



UNIVERSITY OF TORONTO



3 1761 00004232 5







T. LIVII PATAVINI

HISTORIARUM

TOMUS II.

LIB. IX.—XXVI.



LL
2088 Dr. 2

T. LIVII PATAVINI

HISTORIARUM

QUE SUPERSUNT,

EX RECENSIONE

ARN. DRAKENBORCHII.

CUM INDICE RERUM.

ACCEDUNT

GENTES ET FAMILIAE ROMANORUM,

AUCTORE R. STREINNIO.

NECNON

ERNESTI GLOSSARIUM LIVIANUM,

AUCTIUS NONNIHIL, ET IN LOCIS QUAMPLURIMIS
EMENDATUM.

TOMUS II.

OXONII,

E TYPOGRAPHEO CLARENDOIANO.

MDCCLXIII.

PA 14
S: 1952

PA
6452
A2
1800
t. 2

T. LIVII PATAVINI
HISTORIARUM
AB URBE CONDITA
LIBRI.

EPITOME LIBRI IX

T. *VETURIUS et Sp. Postumius apud Caudinas Furcas, deducto in locum artum exercitu, quum nulla spes evadendi esset, fædere cum Samnitibus facto, et sexcentis equitibus Romanis obsidibus datis, ita exercitum abduxerunt, ut omnes sub jugum mittentur. Iidemque, auctore Sp. Postumio consule, (qui in senatu suaserat, ut eorum deditione, quorum culpa tam deforme fædus ictum erat, publica fides liberaretur) cum duobus tribunis plebis et omnibus, qui fædus spoponderant, dediti Samnitibus, non sunt recepti: nec multo post, fusis a Papirio Cursore Samnitibus et sub jugum missis, receptisque sexcentis equitibus Romanis, qui obsides dati erant, pudor prioris flagitii abolitus est. Tribus duæ adjectæ sunt, Ufentina et Falerina. Suessa et Pontiæ coloniæ deductæ sunt. Ap. Claudius censor aquam perduxit: viam stravit, quæ Appia vocata est: libertinorum filios in senatum legit. Ideoque, quoniam is ordo videbatur inquinatus indignis, sequen-*

tis anni consules in senatu legendo observaverunt, quemadmodum ante per proximos censores observatum fuerat. Res præterea contra Apulos, Etruscos, Umbros, Marsos, Pelignos, Æquos et Samnites, quibus fædus erat restitutum, prospere gestas continet. Flavius scriba, libertino patre natus, ædilis curulis fuit per forensem factionem creatus: quæ quam comitia et campum turbaret, et in iis propter nimias vires dominaretur, a Q. Fabio censore in quatuor tribus redacta est, quas urbanas adpellarit. Eaque res Fabio Maximo nomen dedidit. In hoc libro mentio Alexandri Magni, qui temporibus his fuit; et, æstimatis populi Romani viribus, quæ tunc erant, conligitur, si Alexander in Italianam trajecisset, non tam facilem ei victoriam de populo Romano fore, quam de iis gentibus, quas ad Orientem imperio suo subjecerat.

T. LIVII PATAVINI

LIBER IX.

SEQUITUR hunc annum nobilis clade Romana U. C. 433.
Caudina pax, T. Veturio Calvino, Sp. Postumio A. C. 319.
consulibus. Samnites eo anno imperatorem C. Pontium,
Herennii filium, habuerunt, patre longe pru-
dentissimo natum, primum ipsum bellatorem ducem-
que. Is, ubi legati, qui ad dedendas res missi erant,
pace infecta redierunt, *Ne nihil actum, inquit, hac* Pontii Sam-
legatione censeatis, expiatum est, quidquid ex fædere ^{nitis oratio.}
rupto irarum in nos cœlestium fuit. Satis scio, quibus-
cumque Diis cordi fuit, subigi nos ad necessitatem de-
dendi res, quæ a nobis ex fædere repetitæ fuerant, iis
non fuisse cordi tam superbe ab Romanis fæderis ex-
piationem spretam. Quid enim ultra fieri ad placan-
dos Deos mitigandosque homines potuit, quam quod
nos fecimus? Res hostium in præda captas, quæ belli
jure nostræ videbantur, remisimus: auctores belli, quia
vivos non potuimus, perfunctos jam fato dedidimus: bona
eorum, ne quid ex contagione noxæ remaneret penes
nos, Romam portavimus. Quid ultra tibi, Romane,
quid fæderi, quid Diis arbitris fæderis debeo? quem
tibi tuarum irarum, quem meorum suppliciorum judi-
cem feram, neminem, neque populum, neque privatum,
fugio. Quod si nihil cum potentiore juris humani re-

U. C. 433. linquitur inopi, at ego ad Deos vindices intolerandæ
 A. C. 319. superbiæ confugiam; et precabor, ut iras suas vertant
 in eos, quibus non suæ redditæ res, non alienæ adcu-
 mulatæ satis sint; quorum sævitiam non mors noxio-
 rum, non deditio exanimatorum corporum, non bona
 sequentia domini dditionem exsatient. Placari ne-
 queunt, nisi hauriendum sanguinem laniandaque vis-
 cera nostra præbuerimus. Justum est bellum, Samni-
 tes, quibus necessarium; et pia arma, quibus nulla nisi
 in armis relinquitur spes. Proinde, quum rerum hu-
 manarum maximum momentum sit, quam propitiis
 rem, quam adversis agant Diis, pro certo habete,
 priora bella adversus Deos magis, quam homines, ges-
 sissem; hoc, quod instat, ducibus ipsis Diis gesturos.

Samnites
ad Cau-
dium ca-
stra lo-
cant.

II. Hæc, non laeta magis, quam vera, vaticinatus,
 exercitu educto, circa Caudium castra, quam potest
 occultissime, locat: inde ad Calatiam, ubi jam con-
 sules Romanos castraque esse audiebat, milites de-
 cem pastorum habitu mittit: pecoraque diversos,
 alium alibi, haud procul Romanis pascere jubet
 præsidiis: ubi inciderint in prædatores, ut idem
 omnibus sermo constet, *legiones Samnitium in Apu-
 lia esse, Luceriam omnibus copiis circumsedere: nec
 procul abesse, quin vi capiant.* Jam is etiam rumor
 ante, de industria vulgatus, venerat ad Romanos;
 sed fidem auxere captivi, eo maxime, quod sermo
 inter omnes congruebat. Haud erat dubium, quin
 Lucerini opem Romanus ferret, bonis ac fidelibus
 sociis; simul ne Apulia omnis ad præsentem ter-
 rorem deficeret: ea modo, qua irent, consultatio
 fuit. Duæ ad Luceriam ferebant viæ; altera præter
 oram superi maris patens apertaque, sed, quanto
 tutior, tanto fere longior; altera per Furculas Cau-

dinas brevior. Sed ita natus locus est: saltus duo U.C. 433.
 alti angusti silvosique sunt, montibus circa perpetuis inter se juncti: jacet inter eos satis patens clausus in medio campus, herbidus aquosusque, per quem medium iter est. Sed ante, quam venias ad eum, intrandæ primæ angustiæ sunt: et aut eadem, qua te insinuaveris, retro via repetenda; aut, si ire porro pergas, per alium saltum artiorem impeditio remque evadendum. In eum campum via alia per cavam rupem, Romani, demisso agmine, quum ad alias angustias protinus pergerent, septas dejectu arborum, saxorumque ingentium objacentem molem invenere: quum fraus hostilis adparuisse, præsidium etiam in summo saltu conspicitur. Citati inde Capti
 Romani, fraude loci retro, qua venerant, pergunt repetere viam: eam quoque clausam sua obice armisque inveniunt: si stunt inde gradum sine ullius imperio: stuporque omnium animos, ac velut torpor quidam insolitus membra tenet: intuentesque alii alios (quum alterum quisque compotem magis mentis ac consilii ducerent) dum immobiles silent. Deinde ubi prætoria consulum erigi videre, et expedire quosdam utilia operi, quamquam ludibrio fore munientes, perditis rebus ac spe omni ademta, cernebant; tamen, ne culpam malis adderent, pro se quisque, nec hortante ullo nec imperante, ad muniendum versi, castra propter aquam vallo circumdant; sua ipsi opera laboremque irritum (præterquam quod hostes superbe increpabant) cum miserabili confessione eludentes. Ad consules mœstos, ne advocantes quidem in consilium, (quando nec consilio nec auxilio locus esset) sua sponte legati ac tribuni conveniunt: militesque ad prætorium versi, opem, quam vix

U. C. 433. Dii immortales ferre poterant, ab ducibus expos-
A. C. 319. cunt.

Consilium III. Querentes magis, quam consultantes, nox
expedire obpressit: quum pro ingenio quisque fremerent;
non pos- alius, *per obices viarum*; alius, *per adversa montium,*
sunt. *per silvas, qua ferri arma poterunt, eamus.* *Modo ad*
hostem pervenire liceat, quem per annos jam prope tri-
ginta vincimus; omnia æqua et plana erunt Romano,
in perfidum Samnitem pugnanti: alius, *Quo, aut*
qua eamus? Num montes moliri sede sua paramus?
Dum hæc inminebunt juga, qua tu ad hostem venies?
Armati, inermes, fortes, ignavi, pariter omnes capti
atque victi sumus. Ne ferrum quidem ad bene mori-
endum oblaturus est hostis: sedens bellum conficit.
His in vicem sermonibus, qua cibi, qua quietis in-
memor, nox traducta est. Ne Samnitibus quidem
consilium in tam lætis subpetebat rebus: itaque
universi Herennium Pontium, patrem imperatoris,
per literas consulendum censem. Jam is gravis an-
nis non militaribus solum, sed civilibus quoque, ab-
scesserat muneribus: in corpore tamen affecto vi-
gebat vis animi consiliique. Is, ubi accepit, ad Fur-
culas Caudinas inter duos saltus clausos esse exer-
cititus Romanos, consultus ab nuncio filii, censuit,
omnes inde quam primum inviolatos dimittendos:
quæ ubi spreta sententia est, iterumque, eodem re-
meante nuncio, consulebatur, censuit, ad unum om-
nes interficiendos. Quæ ubi tam discordia inter se,
velut ex auncipi oraculo, responsa data sunt; quam-
quam filius ipse in primis jani animum quoque patris
consensisse in affecto corpore rebatur; tamen con-
sensu omnium victus est, ut ipsum in consilium ad-
ciret. Nec gravatus senex plaustro in castra dicitur

Herennii
discordia
responsa.

advectus, vocatusque in consilium ita ferme locutus U. C. 433.
esse, ut nihil sententiæ suæ mutaret; caussas tan- A. C. 319.
tum adjiceret: *Priore se consilio, quod optimum du-
ceret, cum potentissimo populo per ingens beneficium
perpetuam firmare pacem amicitiamque: altero con-
silio in multas ætates, quibus, amissis duobus exerciti-
bus, haud facile receptura vires Romana res esset, bel-
lum differre: tertium nullum consilium esse.* **Q**num
filius aliique principes percunctando exsequerentur,
*Quid si media via consilii caperetur; ut et dimitteren-
tur incolumes, et leges iis jure belli victis inponeren-
tur?* ista quidem sententia, inquit, ea est, quæ neque
amicos parat, neque inimicos tollit. *Servate modo,*
*quos ignominia irritaveritis: ea est Romana gens, quæ
victa quiescere nesciat.* *Vivet semper in pectoribus il-
lorum, quidquid istuc præsens necessitas inusscrit;* ne-
que eos ante multiplices pœnas expetitas a vobis quies-
cere sinet.

IV. Neutra sententia accepta. Herennius domum e castris est avectus. Et in castris Romanis quum frustra multi conatus ad erumpendum capti essent, et jam omnium rerum inopia esset; victi necessitate legatos mittunt, qui prium pacem æquam peterent: si pacem non inpetrarent, uti provocarent ad pugnam. Tum Pontius, *debellatum esse, Leges a* respondit: *et, quoniam ne victi quidem ac capti for- Pontio dic-
tæ Ro-
tunam fateri scirent, inermes cum singulis vestimentis manis.* *sub jugum missurum: alias conditiones pacis æquas* victis ac victoribus fore; *si agro Samnitium decedere-* tur, coloniæ abducentur, *suis deinde legibus Roma-
num ac Samnitum æquo fædere victurum.* *His condi-
tionibus puratum se esse fatus cum consulibus ferire:* *si quid eorum displiceat, legatos redire ad se vetuit.*

U.C. 433. Hæc quum legatio renunciaretur, tantus gemitus
 A. C. 319. omnium subito exortus est, tantaque moestitia in-
 cessit, ut non gravius accepturi viderentur, si num-
 ciaretur, omnibus eo loco mortem obpetendam esse.
 Quum diu silentium fuisse, nec consules aut pro
 fœdere tam turpi, aut contra fœdus tam necessarium
 Lentulo suadente, hiscere possent; tum L. Lentulus, qui tum princeps
 legatorum virtute atque honoribus erat, *Patrem*
meum, inquit, consules, sæpe audivi memorantem, se
in Capitolio unum non fuisse auctorem senati redi-
mendæ auro a Gallis civitatis, quando nec fossa vallo-
que ab ignavissimo ad opera ac muniendum hoste clausi
essent; et erumpere si non sine periculo magno, tamen
sine certa pernicie possent. Quod si, ut illis decurrere
ex Capitolio armatis in hostem licuit, (quo sæpe modo
obsessi in obsidentes eruperunt) ita nobis aquo aut ini-
quo loco dimicandi tantummodo cum hoste copia esset,
non mihi paterni animi indoles in consilio dando de-
esseret. Evidem mortem pro patria præclaram esse fa-
teor: et me vel derovere pro populo Romano legioni-
busque, vel in medios me inmittere hostes paratus sum.
Sed hic patriam video, hic quidquid Romanorum legi-
onum est: quæ, nisi pro se ipsis ad mortem ruere vo-
lunt, quid habent, quod morte sua servent? Tecta ur-
bis, dicat aliquis, et mænia, et eam turbam, a qua urbs
incolitur: immo, hercule, produntur ea omnia, deleto
hoc exercitu, non servantur. Quis enim ea tuebitur?
Inbellis videlicet atque inermis multitudo? tam, her-
cule, quam a Gallorum inpetu defendit. An a Veis
exercitum Camillumque ducem inplorabunt? Hic om-
nnes spes opesque sunt, quas servando patriam serva-
mus: dedendo ad necem patriam deserimus ac prodi-
mus. At fœda atque ignominiosa deditio est. Sed ea

*caritas patriæ est, ut tam ignominia eam, quam morte U. C. 433.
nostra, si opus sit, servemus. Subeatur ergo ista, quan-* A. C. 319.
*tacumque est, indignitas; et pareatur necessitati, quam
ne Dii quidem superant. Ite, consules, redimite armis
civitatem, quam auro maiores vestri redemerunt.*

V. Consules profecti ad Pontium in conloquium, Accipiuntur quum de fœdere victor agitaret, negarunt, injussu tur. populi fœdus fieri posse: nec sine facialibus ceremoniaque alia sollemni. Itaque non, ut vulgo credunt, Claudiusque etiam scribit, fœdere pax Caudina, sed per sponzionem, facta est. Quid enim aut sponsoribus in fœdere opus esset aut obsidibus, ubi precatione res transigitur? *per quem populum fiat,* quo minus legibus dictis stetur, ut eum ita Jupiter feriat, quemadmodum a facialibus porcus feriatur. Spoponderunt consules, legati, quæstores, tribuni militum; nominaque omnium, qui spoponderunt, existant: ubi, si ex fœdere acta res esset, præterquam duorum facialium, non exstant; et propter necessariam fœderis dilationem obsides etiam sexcenti equites imperati, qui capite luerent, si pacto non staretur. Tempus inde statutum tradendis obsidibus exercituque inermi mittendo. Redintegravit luctum in castris consulum adventus, ut vix ab iis abstinerent manus, quorum temeritate in eum locum deducti essent; quorum ignavia fœdus inde, quam venissent, abituri: illis non ducem locorum, non exploratorem fuisse: belluarum modo cæcos in foveam missos. Alii alias intueri, contemplari arma mox tradenda, et inermes futuras dextras, obnoxiaque corpora hosti: proponere sibimet ipsi ante oculos jugum hostile, et ludibria victoris, et vultus superbos, et per armatos inermium iter. Inde fœdi ag-

U. C. 433. minis miserabilem viam, per sociorum urbes redditum

A. C. 319. in patriam ac parentes, quo sæpe ipsi majoresque eorum triumphantes venissent. Se solos sine vulnera, sine ferro, sine acie victos: sibi non stringere licuisse gladios, non manum cum hoste conferre:

Sub jugum mit-tuntur Ro-mani. sibi nequidquam arma, nequidquam vires, nequidquam animos datos. Hæc frementibus hora fatalis ignominiae advenit, omnia tristiora experiundo facienda. tura, quam quæ præceperant animis. Jam primum cum singulis vestimentis inermes extra vallum exire jussi, et primi traditi obsides, atque in custodiam abducti. Tum a consulibus abire lictores jussi, paludamentaque detracta; tantam inter ipsos, qui, paullo ante eos exsecrantes, dedendos lacerandosque censuerant, miserationem fecit, ut, suæ quisque conditionis oblitus, ab illa deformatione tantæ majestatis, velut ab nefando spectaculo, averteret oculos.

VI. Primi consules prope seminudi sub jugum missi: tum, ut quisque gradu proximus erat, ita ignominiae objectus: tum deinceps singulæ legiones. Circumstabant armati hostes, exprobrantes eludentesque: gladii etiam plerisque intentati: et vulnerati quidam necatique, si vultus eorum indignitate rerum acrior victorem obfendisset: ita traducti sub jugum, et, quod pene gravius erat, per hostium oculos. Quum e saltu evasissent, etsi, velut ab inferis extracti, tum primum lucem adspicere visi sunt, tamen ipsa lux ita deforme intuentibus agmen omni morte tristior fuit. Itaque, quum ante noctem Capuam pervenire possent, incerti de fide sociorum, et quod pudor præpediebat, circa viam haud procul Capua omnium egeni corpora humi prostraverunt.

Capuam
veniunt.

Quod ubi est Capuam nunciatum, evicit miseratio U.C. 483.
 justa sociorum superbiam ingenitam Campanis: A.C. 319.
 confestim insignia sua consulibus, fasces, lictores,
 arma, equos, vestimenta, commeatus militibus be-
 nigne mittunt: et venientibus Capuam cunctus se-
 natus populusque, obviam egressi, justis omnibus
 hospitalibus, privatisque et publicis funguntur of-
 ficiis: neque illis sociorum comitas, vultusque be-
 nigni, et adloquia non modo sermonem elicere, sed
 ne, ut oculos quidem adtollerent, aut consolantes
 amicos contra intuerentur, efficere poterant. Adeo
 super mœrorem pudor quidam fugere conloquia et
 cœtus hominum cogebat. Postero die quum juvenes
 nobiles, missi a Capua, ut proficiscentes ad finem
 Campanum prosequerentur, revertissent; vocatique
 in curiam percunetantibus majoribus natu, multo
sibi mæstiores et abjectioris animi visos, referrent;
adeo silens, ac prope mutum agmen incessisse: tacere
indolem illam Romanam, ablatosque cum armis ani-
mos: non reddere salutem, non salutantibus dare re-
sponsum, non hiscere quemquam præ metu potuisse,
tamquam ferentibus adhuc cervicibus jugum, sub quo
emissi essent. Habere Samnites victoriam, non præcla-
ram solum, sed etiam perpetuam: cepisse enim eos non
Romam, sicut ante Gallos, sed, quod multo bellicosius
fuerit, Romanam virtutem ferociamque.

VII. Quum hæc dicerentur audirenturque, et de-
 ploratum pene Romanum nomen in concilio socio-
 rum fidelium esset; dicitur Ofilius Calavius, Ovii ^{Ofili de}
 filius, clarus genere factisque, tum etiam ætate ve- ^{Romano-}
 rendus, longe aliter se habere rem dixisse: *Silentium* ^{rum silen-}
illud obstinatum, fixosque in terram oculos, et surdas cium.
ad omnia solatia aures, et pudorem intuendæ lucis, in-

U. C. 433. gentem molem irarum ex alto animo crientis indicia
A. C. 319. esse: aut Romana se ignorare ingenia, aut silentium

illud Samnitibus flebiles brevi clamores gemitusque excitaturum; Caudinæque pacis aliquanto Samnitibus, quam Romanis, tristiorum memoriam fore. Quippe suos quemque eorum animos habiturum, ubicumque congressuri sint: saltus Caudinos non ubique Samnitibus fore. Jam Romæ etiam sua infamis clades erat. Obsesso

primum audierunt: tristior deinde ignominiosæ pa-

Luctus Ro- cis magis, quam periculi, nuncius fuit. Ad famam
mæ. obsidionis delectus haberi cœptus erat: dimissus
deinde auxiliorum adparatus, postquam deditioñem
tam fœde factam acceperunt: extemploque sine ulla
publica auctoritate consensum in omnem formam
luctus est. Tabernæ circa forum clausæ, justitium-
que in foro sua sponte cœptum prius, quam in-
dictum: lati clavi, annuli aurei positi; pene mœ-
stior exercitu ipso civitas esse: nec ducibus solum
atque auctoribus sponsoribusque pacis irasci, sed
innoxios etiam milites odisse, et negare urbe tectisve
acciendos. Quam concitationem animorum fre-
git adventus exercitus, etiam iratis miserabilis: non
enim tamquam in patriam revertentes ex inspérato
incolumes, sed captorum habitu vultuque ingressi
sero in urbem, ita se in suis quisque tectis abdide-
runt, ut postero atque inscientibus diebus nemo
eorum forum aut publicum adspicere vellet. Con-
sules, in privato abditi, nihil pro magistratu agere,
nisi quod expressum senatusconsulto est, ut dicta-
torem dicerent comitiorum caussa. Q. Fabium Am-
bustum dixerunt, et P. Ælinum Pætum magistrum
equitum: quibus vitio creatis, subfecti M. Æmilius
Papus dictator, L. Valerius Flaccus magister equi-
tor.

tum. Nec per eos comitia habita: et, quia tæde- U. C. 433.
bat populum omnium magistratum ejus anni, res A. C. 319.
ad interregnum rediit. Interreges Q. Fabius Maxi- Interreg-
mus, M. Valerius Corvus: is consules creavit Q. num.
Publilium Philonem et L. Papirium Cursorem ite- U. C. 434.
rum, hand dubio consensu civitatis, quod nulli ea A. C. 318.
tempestate duces clariores essent.

VIII. Quo creati sunt die, eo (sic enim placuerat
Patribus) magistratum inierunt, sollemnibusque se-
natusconsultis perfectis, de pace Caudina retule-
runt: et Publius, penes quem fasces erant, *Dic Postumii*
Sp. Postumi, inquit. Qui ubi surrexit, eodem illo magnani-
vultu, quo sub jugum missus erat, *Haud sum igna-* tentia.
rus, inquit, *consules*, *ignominiae*, non honoris caussa
me primum excitatum jussumque dicere, non tamquam
senatorem, sed tamquam reum qua infelicitis bellii, qua
ignominiosæ pacis. Ego tamen, quando neque de
noxa nostra neque de pœna retulisti, omissa defensione,
quæ non difficillima esset apud haud ignaros fortuna-
rum humanarum necessitatumque, sententiam de eo, de
quo retulisti, paucis peragam: quæ sententia testis
erit, mihi, an legionibus vestris pepercere, quum
me seu turpi seu necessaria sponсione obstrinxi. Qua
tamen, quando injussu populi facta est, non tenetur
populus Romanus: nec quidquam ex ea, præterquam
corpora nostra debentur Samnitibus. Dedamur per
feciales nudi vinctique: exsolvanus religione populum,
si qua obligavimus; ne quid divini humanive obstet,
quo minus justum piusque de integro ineatur bellum.
Interea consules exercitum scribere, armare, educere
placet; nec prius ingredi hostium fines, quam omnia
justa in ditionem nostram perfecta erunt. Vos, Dii
inmortales, precor quæsoque, si vobis non fuit cordi,

U.C. 434. Sp. Postumium, T. Veturium consules cum Samnitibus
 A.C. 318. prospere bellum gerere; at vos satis habeatis, vidisse nos sub jugum missos, vidisse sponsione infami obligatos, videre nudos vincosque hostibus deditos, omnem iram hostium nostris capitibus excipientes. Novos consules legionesque Romanas ita cum Samnite gerere bellum velitis, ut omnia ante nos consules bella gesta sunt. Quæ ubi dixit, tanta simul admiratio miserationeque viri incessit omnes, ut modo vix crederent, illum eundem esse Sp. Postumium, qui auctor tam fœdæ pacis fuisset: modo miserarentur, quod vir talis etiam præcipuum apud hostes supplicium passurus esset ob iram direntæ pacis. Quum omnes, laudibus modo prosequentes virum, in sententiam ejus pedibus irent; tentata paullisper intercessio est ab L. Livio et Q. Mælio, tribunis plebis: qui, neque exsolvi religione populum, aiebant, ditione sua, nisi omnia Samnitibus, qualia apud Caudium fuissent, restituerentur: neque se pro eo, quod, spondendo pacem, servassent exercitum populi Romani, pænam ullam meritos esse; neque ad extremum, quum sacrosancti essent, dedi hostibus violarive posse.

Postumii
adversus
tribb.
oratio.

IX. Tum Postumius, Interea dedito, inquit, profanos nos, quos salva religione potestis: dedetis deinde et istos sacrosanctos, quum primum magistratu abierint; sed, si me audiatis, prius, quam dedantur, hic in comitio virginis cæsos, hanc jam ut intercalatæ pœnæ usuram habeant. Nam quod ditione nostra negant exsolvi religione populum, id istos magis, ne dedantur, quam quia ita se res habeat, dicere, quis adeo juris fezialium expers est, qui ignoret? Neque ego inficias eo, Patres conscripti, tam sponsiones quam fædera sancta esse apud eos homines, apud quos juxta divinas reli-

giones fides humana colitur: sed injussu populi nego U.C. 434.
quidquam sanciri posse, quod populum teneat. An, si
A.C. 318.
eadem superbia, qua sponzionem istam expresserunt
nobis Samnites, coegerissent nos verba legitima deditum
urbes nuncupare, deditum populum Romanum vos tri-
buni diceretis, et hanc urbem, templa, delubra, fines,
aquas, Samnitium esse? Omitto deditonem, quoniam
de sponsione agitur: quid tandem, si spopondissemus,
urbem hanc relictum populum Romanum? si incen-
surum? si magistratus, si senatum, si leges non habi-
turum? si sub regibus futurum? Dii meliora, inquis!
atqui non indignitas rerum sponsionis vinculum levat.
Si quid est, in quo obligari populus possit, in omnia
potest: et ne illud quidem, quod quosdam forsitan
moveat, refert, consul, an dictator, an prator spopon-
derit. Et hoc ipsi etiam Samnites judicaverunt, quibus
non fuit satis consules spondere, sed legatos, quæstores,
tribunos militum spondere coegerunt. Nec a me nunc
quisquam quæsiverit, quid ita spoponderi? quam id
nec consulis jus esset; nec illis spondere pacem, quæ
mei non erat arbitrii, nec pro vobis, qui nihil manda-
veratis, possem. Nihil ad Caudium, Patres conscripti,
humanis consiliis gesum est. Dii immortales et vestris
et hostium imperatoribus mentem ademerunt: nec nos
in bello satis cavimus; et illi male partum victoriam
male perdiderunt, dum vix locis, quibus ricerant, cre-
dunt, dum quacumque conditione arma viris in arma
natis auferre festinant. An, si sana mens fuisset, dif-
ficile illis fuit, dum senes ab domo ad consultandum
arcessunt, mittere Romam legatos? cum senatu, cum
populo, de pace ac fædere agre? Triduū iter expedi-
tis erat: interea in induciis res fuisset, donec ab Roma
legati aut victoriam illis certam, aut pacem adfer-

U. C. 434. *rent : ea de num sponsio es set, quam populi jussu spo-*
A. C. 318. *pondissemus. Sed neque vos tulissetis, nec nos spopon-*
dissemus : nec fuis fuit alium rerum exitum esse, quam
ut illi, velut somn o latiore, quam quod mentes eorum
capere possent, nequidquam eluderentur : et nostrum ex-
ercitum eadem, que impedierat, fortuna expediret : va-
nam victoriam vanior irritam faceret pax ; sponsio
interponeretur, quae neminem, praeter sponsorem, obli-
garet. Quid enim vobiscum, Patres conscripti, quid
cum populo Romano actum est ? quis vos adpellare
potest ? quis se a vobis dicere deceptum ? hostis ? an
civis ? Hosti nihil spopondistis : civem neminem spon-
dere pro vobis jussistis. Nihil ergo vobis nec nobiscum
est, quibus nihil mandastis ; nec cum Samnitibus, cum
quibus nihil egistis. Samnitibus sponsores nos sumus,
rei satis locupletes : in id, quod nostrum est ; in id,
quod præstare possumus, corpora nostra et animos ; in
haec sœviant, in haec ferrum, in haec iras acuant. Quod
ad tribunos adtinet, consulite, utrum præsens deditio
eorum fieri possit, an in diem differatur : nos interim,
T. Veturi, vosque ceteri, vilia haec capita luendæ spon-
sionis feramus, et nostro supplicio liberemus Romanæ
arma.

X. Movit Patres conscriptos tum caussa, tum
 auctor ; nec ceteros solum, sed tribunos etiam ple-
 bei, ut se in senatus dicherent fore potestate. Ma-
 gistratu inde se extemplo abdicaverunt, traditique
 fezialibus cum ceteris Caudium ducendi. Hoc facto
 senatus consulto, lux quædam adfulsisse civitati visa
 est. Postumius in ore erat ; eum laudibus ad cœ-
 pulum ferebant : devotioni P. Decii consulis, aliis
 claris facinoribus æquabant. Emersisse civitatem ex
 obnoxia pace illius consilio et opera : ipsum se cruci-

Sponsore-
pacis de-
duntur.

*atibus et hostium iræ obferre, piaculaque pro populo U. C. 434,
Romano dare. Arma cuncti spectant et bellum. En A. C. 318.
umquam futurum, ut congregi armatis cum Samnite
lîceat? In civitate, ira odioque ardente, delectus
prope omnium voluntariorum fuit: rescriptæ ex
eodem milite novæ legiones, ductusque ad Caudium
exercitus. Prægressi feciales, ubi ad portam venere,
vestem detrahi pacis sponsoribus jubent, manus post
tergum vinciri. Quum adparitor verecundia majes-
tatis Postumium laxe vinciret, *Quin tu, inquit, ad-*
ducis lorum, ut justa fiat deditio? Tum, ubi in cœ-
tum Samnitium et ad tribunal ventum Pontii est,
A. Cornelius Arvina facialis ita verba fecit: *Quan-*
*doque hice homines injussu populi Romani Quiritium
faidus ictum iri spoponderunt, atque ob eam rem
noxam nocuerunt; ob eam rem, quo populus Romanus
scelere inpio sit solutus, hosce homines volis dedo.*
Hæc dicenti faciali Postumius genu femur, quanta
maxime poterat vi, perculit, et clara voce ait, *se*
Samnitem civem esse, illum legatum; faciale a se
contra jus gentium violatum; eo justius bellum ge-
*sturos.**

XI. Tum Pontius, *Nec ego istam ditionem acci-* Pontii non
piam, inquit, nec Samnites ratam habebunt. Quin tu, accipientis
Sp. Postumi, si Deos esse censes, aut omnia irrita fa- ditionem
cis, aut pacto stas? Samniti populo omnes, quos in oratio.
potestate habuit, aut pro eis pax debetur. Sed quid
ego te adpello, qui te captum victori, cum qua potes
fide, restituis? Populum Romanum adpello; quem si
sponsionis ad Furculas Caudinas factæ pænitet, resti-
tuat legiones intra saltum, quo septæ fuerunt. Nemo
quemquam deceperit: omnia pro infecto sint: reci-

U.C. 434. piant arma, quæ per pactionem tradiderunt: redeant
 A.C. 316. in castra sua: quidquid pridie habuerunt, quam in
 conloquium est ventum, habeant: tum bellum et fortia
 consilia placeant, tunc sponsio et pax repudietur. Ea
 fortuna, iis locis, quæ ante pacis mentionem habuimus,
 geramus bellum: nec populus Romanus consulum spon-
 sionem, nec nos fidem populi Romani occusemus. Num-
 quamne causa defiet, cur victi pacto non stetis? Ob-
 sides Porsenæ dedistis; furto eos subduxistis: auro ci-
 vitatem a Gallis redemistis; inter accipiendum aurum
 cæsi sunt: pacem nobiscum pepigistis, ut legiones vo-
 bis captas restitueremus; eam pacem irritam facitis,
 et semper aliquam fraudi speciem juris inponitis. Non
 probat populus Romanus ignominiosa pace legiones
 servatas? pacem sibi habeat, legiones captas victori
 restituat: hoc fide, hoc faderibus, hoc facialibus cere-
 moniis dignum erat. Ut tu quidem, quod petisti, per
 pactionem habeas, tot cives incolumes; ego pacem,
 quam hosti tibi remittendo pactus sum, non habeam:
 hoc tu, A. Cornelii, hoc vos, faciales, juris gentibus
 dicitis? Ego vero istos, quos dedi simulatis, nec acci-
 pio, nec dedi arbitror; nec moror, quo minus in civi-
 tatem obligatam sponsione commissa, iratis omnibus
 Diis, quorum eluditur numen, redeant. Gerite bellum,
 quando Sp. Postumius modo legatum faciale genu
 percultit. Ita Di credit, Samnitæ civem Postumium,
 non circem Romanum esse, et a Samnite legatum Ro-
 manum violatum: eo vobis justum in nos factum esse
 bellum. Hæc ludibria religionum non pudere in lucem
 proferre? et vix pueris dignas ambages senes ac con-
 sulares fallendæ fidei exquirere? I, lictor, deme vin-
 cla Romanis: moratus sit nemo, quo minus, ubi vi-

sum fuerit, abeant. Et illi quidem, forsitan et pub- U. C. 434.
lica, sua certe liberata fide, ab Caudio in castra A. C. 318.
Romana inviolati redierunt.

XII. Samnitibus, pro superba pace infestissimum cernentibus renatum bellum, omnia, quæ deinde venerunt, non in animis solum, sed prope in oculis esse: et sero ac nequidquam laudare senis Pontii utraque consilia; inter quæ se media lapsos victoriæ possessionem pace incerta mutasse, et, beneficij et maleficij occasione amissa, pugnaturos cum eis, quos potuerint in perpetuum vel inimicos tollere, vel amicos facere: adeoque, nullodum certamine inclinatis viribus, post Caudinam pacem animi mutaverant, ut clariorem inter Romanos deditio Postumium, quam Pontium incruenta victoria inter Samnites faceret: et geri posse bellum Romani pro victoria certa haberent, Samnites simul rebellasse et viciisse crederent Romanum. Inter hæc Satricani ad Samnites defeccrunt, et Fregellæ colonia necopinato adventu Samnitium (fuisse et Satricanos cum iis satiis constat) nocte occupata est: timor inde mutuus utrosque usque ad lucem quietos tenuit: lux pugnæ initium fuit; quam aliquamdiu æquam, et quia pro aris ac focis dimicabatur, et quia ex tectis adjuvabat inbellis multitudo, tamen Fregellani sustinuerunt. Fraus deinde rem inclinavit, quod vocem audiri præconis passi sunt; *Incolumem abiturum, qui arma posuisset*: ea spes remisit a certamine animos, et passim arma jactari copta. Pertinacior pars armata per aversam portam crupit; tutiorque eis audacia fuit, quam incautus ad credendum ceteris pavor: quos circumdatos igni, nequidquam Deos fidemque invocantes, Samnites concrren-
væ-

U. C. 434. runt. Consules, inter se partiti provincias, Papirius
 A. C. 316. in Apuliam ad Luceriam pergit, ubi equites Romani
 obsides ad Caudium dati custodiebantur: Publilius
 in Samnio substitit adversus Caudinas legiones.
 Distendit ea res Samnitum animos; quod nec ad
 Luceriam ire, ne ab tergo instaret hostis, nec ma-
 nere, ne Luceria interim amitteretur, satis aude-
 bant. Optimum visum est committere rem fortunæ,
 et transigere cum Publilio certamen. Itaque in
 aciem copias educunt.

Prælio XIII. Adversus quos Publilius consul quum di-
vincuntur micaturus esset, prius alloquendos milites ratus,
Samnites a Publilio concessionem advocari jussit: ceterum sicut ingenti
 alacritate ad prætorium concursum est, ita præ elati-
 more poscentium pugnam nulla adhortatio impera-
 toris audita est. Suus cuique animus memor igno-
 miniæ adhortator aderat. Vadunt igitur in prælium
 urgentes signiferos: et, ne mora in concursu pilis
 emittendis stringendisque inde gladiis esset, pila,
 velut dato ad id signo, abjiciunt, strictisque gladiis
 cursu in hostem feruntur. Nihil illic imperatoriæ
 artis ordinibus aut subsidiis locandis fuit: omnia
 ira militaris prope vesano inpetu egit. Itaque non
 fusi modo hostes sunt; sed, ne castris quidem suis
 fugam impedire ausi, Apuliam dissipati petiere: Lu-
 ceriam tamen, coacto rursus in unum agmine, est
 perventum. Romanos ira eadem, quæ per medium
 aciem hostium tulerat, et in castra pertulit: ibi
 plus, quam in acie, sanguinis ac cædis factum, præ-
 dæque pars major ira corrupta. Exercitus alter cum
 Papirio consule locis maritimis pervenerat Arpos
 per omnia pacata, Samnitum magis injuriis et odio,
 quam beneficio ullo populi Romani. Nam Sanmites,

ea tempestate in montibus vicatim habitantes, cam- U.C. 434.
 pestria et maritima loca, contemto cultorum mol- A.C. 318.
 liore atque, ut evenit fere, locis simili genere, ipsi
 montani atque agrestes depopulabantur: quæ regio
 si fida Samnitibus fuisset, aut pervenire Arpos ex-
 ercitus Romanus nequisset, aut interjecta inter Ro-
 manam et Arpos, penuria rerum omnium, exclusos a
 commeatis absumsisset. Tum quoque profectos Papirius
 inde ad Luceriam, juxta obsidentes obsessosque, ^{obsidet Lu-}
^{ceriam.} inopia vexavit: omnia ab Arpis Romanis subpedita-
 bantur; ceterum adeo exigue, ut militi, occupato
 stationibus vigiliisque et opere, eques folliculis in
 castra ab Arpis frumentum veheret; interdum ob-
 cursu hostium cogeretur, abjecto ex equo frumento,
 pugnare: obsessis prius, quam alter consul victore
 exercitu advenit, et commeatus ex montibus Sam-
 nitium invecti erant, et auxilia intromissa. Artiora
 omnia adventus Publilii fecit; qui, obsidione dele-
 gata in curam collegæ, vacuus per agros cuncta in-
 festa commeatis hostium fecerat. Itaque quum
 spes nulla esset, diutius obsessos inopiam laturos,
 coacti Samnites, qui ad Luceriam castra habebant,
 undique contractis viribus, signa cum Papirio con-
 ferre.

XIV. Per id tempus, parantibus utrisque se ad
 prœlium, legati Tarentini interveniunt, denunciantes
 Samnitibus Romanisque, ut bellum omitterent: per
 utros stetisset, quo minus discederetur ab armis, ad-
 versus eos se pro alteris pugnaturos. Ea legatione
 Papirius audita, perinde ac motus dictis eorum, cum
 collega se communicaturum respondit: ad citoque
 eo, quum tempus omne in adparatu consumisset,
 conlocutus de re haud dubia, signum pugnæ pro-

U. C. 434. posuit. Agentibus divina humanaque, quæ adso-
A. C. 318. lent, quum acie dimicandum est, consulibus, Ta-
rentini legati obcurrare, responsum exspectantes,
quibus Papirius ait: *Auspicia secunda esse, Tarenti-
ni, pullarius nunciat: litatum præterea est egregie:
auctoribus Diis, ut videtis, ad rem gerendam profici-
cimur.* Signa inde ferri jussit, et copias eduxit,
vanissimam increpans gentem, quæ, suarum impo-
tens rerum præ domesticis seditionibus discordiis-
que, aliis modum pacis ac belli facere æquum cen-
seret. Samnites ex parte altera, quum omnem cu-
ram belli remisissent, quia aut pacem vere cupie-
bant, aut expediebat simulare, ut Tarentinos sibi
conciliarent, quum instructos repente ad pugnam
Romanos conspexissent, vociferari, se in auctoritate
*Tarentinorum manere, nec descendere in aciem, nec
extra vallum arma ferre.* Deceptos potius, quodcum-
que casus ferat, passuros, quam ut sprevisse pacis
auctores Tarentinos rideantur. Accipere se omen, con-
sules aiunt, et eam precari mentem hostibus, ut ne
Iterum vincuntur Samnites a coss. vallum quidem defendant. Ipsi, inter se partitis
copiis, succedunt hostium munimentis, et, simul un-
dique adorti, quum pars fossas explerent, pars vel-
lerent vallum, atque in fossas proruerent, nec virtus
modo insita, sed ira etiam, exulceratos ignominia
stimularet animos, castra invasere: et pro se quis-
que, non hæc furculas, nec Caudium, nec saltus inpios
esse, ubi errorem fraus superbe vicisset; sed Romanam
virtutem, quam nec vallum, nec fossæ arcerent, memo-
rantes, cædunt pariter resistentes fusosque, inermes
atque armatos, servos, liberos, puberes, inpuberes,
homines, jumentaque: nec ullum superfuisset ani-
mal, ni consules receptui signum dedissent, avidosque

cædis milites e castris hostium imperio ac minis ex- U.C. 434.
 pulissent. Itaque apud infensos ob interpellatam A.C. 318.
 dulcedinem iræ confestim oratio habita est, ut do-
 ceretur miles, *minime cuiquam militum consules odio*
in hostes cessisse, aut cessuros: quin duces, sicut belli,
ita insatiabilis supplicii, futuros fuisse, ni respectus
equitum sexcentorum, qui Luceriac obsides tenerentur,
præpedisset animos: ne desperata venia hostes cæcos
in supplicia eorum ageret, perdere prius, quam perire,
optantes. Laudare ea milites, lætarique obviam itum
 iræ suæ esse, ac fateri, omnia patienda potius,
 quam proderetur salus tot principum Romanæ ju-
 ventutis.

XV. Dimissa concione, consilium habitum, om-
 nibusne copiis Luceriam premerent, an altero ex-
 ercitu et duce Apuli circa, gens dubiæ ad id volun-
 tatis, tentarentur. Publilius consul, ad peragran-
 dam profectus Apuliam, aliquot expeditione una po-
 pulos aut vi subegit, aut conditionibus in societatem
 accepit. Papirio quoque, qui obsessor Luceriac re-
 stiterat, brevi ad spem eventus respondit: nam, in-
 sessis omnibus viis, per quas commeatus ex Samnio
 subvehabantur, fame domiti Samnites, qui Luceriac
 in præsidio erant, legatos misere ad consulem Ro-
 manum, ut, receptis equitibus, qui caussa belli es-
 sent, absisteret obsidione. His Papirius ita re-
 spondit: *Debuisse eos Pontium, Herennii filium, quo*
auctore Romanos sub jugum misissent, consulere, quid
victis patiendum censeret: ceterum, quoniam ab hos-
tibus in se æqua statui, quam in se ipsi ferre, malue-
rint, nunciare Luceriam jussit, arma, sarcinas, ju- Sub jugum
menta, multitudinem omnem in bellum intra mœnia re- missi Sam-
linquerent: militem se cum singulis vestimentis sub nites.

U. C. 434. *jugum missurum, ulciscentem inlatam, non novam inferentem ignominiam.*

A. C. 318. Nihil recusatum : septem milia militum sub jugum missa, prædaque ingens Luceriae capta, receptis omnibus signis armisque, quæ ad Caudium amiserant ; et, quod omnia superabat gaudia, equitibus recuperatis, quos pignora pacis custodiendos Luceriam Samnites dederant. Haud ferme alia mutatione subita rerum clarior victoria populi Romani est : siquidem etiam (quod quibusdam in annalibus invenio) Pontius, Herennii filius, Samnitium imperator, ut expiaret consulum ignominiam, sub jugum cum ceteris est missus. Ceterum id minus miror, obscurum esse de hostium duce dedito missoque sub jugum : id magis mirabile est, ambigi, Luciusne Cornelius dictator cum L. Papirio Cursore, magistro equitum, eas res ad Caudium, atque inde Luceriam gesserit, ultiorque unicus Romanæ ignomiñiae, haud sciam an justissimo triumpho ad eam ætatem secundum Furium Camillum, triumphaverit, an consulum Papiriique præcipuum

U. C. 435. id decus sit. Sequitur hunc errorem alias error,
A. C. 317.

Cursorne Papirus proxinis comitiis cum Q. Aulio Cerretano iterum, ob rem bene gestam Luceriae continuato magistratu, consul tertium creatus sit ; an L. Papirus Mugillanus, et in cognomine erratum sit.

XVI. Convenit, jam inde per consules reliqua belli perfecta. Aulus cum Ferentanis uno secundo prælio debellavit ; urbemque ipsam, quo se fusa contulerat acies, obsidibus imperatis, in ditionem accepit. Pari fortuna consulum alter cum Satricanis, qui eives Romani post Caudinam cladem ad Samnites defecerant, præsidiumque eorum in urbem

acceperant, rem gessit : nam quum ad mœnia Sa- U. C. 435.
 trici admotus esset exercitus, legatisque, missis ad A. C. 317.
 pacem cum precibus petendam, triste responsum ab
 consule redditum esset, nisi *præsidio Samnitium in-*
terfecto aut tradito, ne ad se remearent ; plus ea voce,
 quam armis inlatis, terroris colonis injectum. Ita-
 que subinde exsequentes quærendo a consule legati,
 quoniam se pacto paucos et infirmos crederet præsi-
 dio tam valido et armato vim adlaturos, ab iisdem
 consilium petere jussi, quibus auctoribus præsidium
 in urbem accepissent, discedunt : ægreque inpetrato,
 ut de ea re consuli senatum, responsaque ad se re-
 ferri sineret, ad suos redeunt. Duæ factiones sena-
 tum distinebant ; una, cuius principes erant de-
 fectionis a populo Romano auctores ; altera, fide-
 lium civium : certatum ab utrisque tamen est, ut ad
 reconciliandam pacem consuli opera navaretur. Pars
 altera (quum præsidium Samnitium, quia nihil satis
 præparati erat ad obsidionem tolerandam, excessu-
 rum proxima nocte esset) enunciare consuli satis
 habuit, qua noctis hora, quaque porta, et quam in
 viam egressurus hostis foret : altera, quibus invitî
 descitum ad Samnites erat, eadem nocte portam
 etiam consuli aperuerunt, armatosque clam hostes
 in urbem acceperunt. Ita dupli proditione et præ-
 sidium Samnitium, insessis circa viam silvestribus
 locis, necopinato oppressum est, et ab urbe plena
 hostium clamor sublatus ; momentoque unius horæ
 cæsus Samnis, Satricanus captus, et omnia in po-
 testate consulis erant. Qui, quæstione habita, quo-
 rum opera defectio esset facta, quos sontes com-
 perit, virgis cæsos securi percussit : præsidioque
 valido inposito, arma Satricanis ademit. Inde ad

U. C. 435. triumphum decessisse Romam Papirium Cursorem
 A. C. 317. scribunt, qui eo duce Luceriam receptam, Samni-
 Papirii Cursoris laudes. tesque sub jugum missos auctores sunt. Et fuit vir
 haud dubie dignus omni bellica laude, non animi
 solum vigore, sed etiam corporis viribus excellens.
 Præcipua pedum pernicitas inerat, quæ cognomen
 etiam dedit: victoremque cursu omnium ætatis suæ
 fuisse ferunt: et seu virium vi, seu exercitatione
 multa, eibi viniq[ue] eundem capacissimum: nec cum
 ullo asperiorem (quia ipse invicti ad laborem cor-
 poris esset) fuisse mil' tiam pediti pariter equitique.
 Equites etiam aliquando ausos ab eo petere, ut sibi
 pro re bene gesta laxaret aliquid laboris: quibus
 ille, *Ne nihil remissum dicatis, remitto*, inquit, *ne uti-*
que dorsum demulceatis, quum ex eqnis descendetis: et
 vis erat in eo viro imperii ingens pariter in socios
 civesque. Prænestinus prætor per timorem segnius
 ex subsidiis suos duxerat in primam aciem: quem
 quum inambulans ante tabernaculum vocari jussis-
 set, lictorem expedire securim jussit: ad quam vo-
 cem exanimi stante Praenestino, *Agedum, lictor, ex-*
cide radicem hanc, inquit, *incommodam ambulantibus*:
 perfusumque ultimi supplicii metu, multa dieta, di-
 misit. Haud dubie illa ætate, qua nulla virtutum
 feracior fuit, nemo unus erat vir, quo magis innisa-
 res Romana staret: quin eum parem destinant ani-
 mis Magno Alexandro ducem, si arma, Asia perdo-
 mita, in Europam vertisset.

Disputatio XVII. Nihil minus quæsitum a principio hujus
 de Alex- operis videri potest, quam ut plus justo ab rerum or-
 andro M. dine declinarem; varietatibusque distinguendo opere,
 et Roma- et legentibus velut deverticula amœna, et requiem
 nis. animo meo quærerem: tamen tanti regis ac ducis

mentio, quibus saepe tacitis cogitationibus volutavit U. C. 435.
 animum, eas evocat in medium : ut querere libeat,
 quinam eventus Romanis rebus, si cum Alexandro
 foret bellatum, futurus fuerit. Plurimum in bello
 pollere videntur militum copia et virtus, ingenia
 imperatorum, fortuna per omnia humana, maxime
 in res bellicas, potens. Ea, et singula intuenti et
 universa, sicut ab aliis regibus gentibusque, ita ab
 hoc quoque, facile praestant invictum Romanum im-
 perium. Jam primum, ut ordiar ab ducibus compa-
 randis, haud equidem abnuo, egregium ducem fuisse Alexandri
 Alexandrum ; sed clariorem tamen eum facit, quod et ducum
 unus fuit, quod adolescens in incremento rerum, latio.
Rom. con-
 nondum alteram fortunam expertus, decessit. Ut
 alios reges claros ducesque omittam, magna exem-
 pla casuum humanorum ; Cyrum, quem maxime
 Græci laudibus celebrant, quid, nisi longa vita, sicut
 Magnum modo Pompeium, vertenti praebuit fortu-
 næ ? Recensem, duces Romanos, nec omnes om-
 nium ætatum, sed ipsos eos, cum quibus consuli-
 bus aut dictatoribus Alexandro fuit bellandum ; M.
 Valerium Corvum, C. Marcium Rutilum, C. Sulpici-
 um, T. Manlium Torquatum, Q. Publilium Phi-
 lonem, L. Papirium Cursorem, Q. Fabium Maxi-
 mum, duos Decios, L. Volumnium, M'. Curium.
 Deinceps ingentes sequuntur viri, si Punicum Ro-
 mano prævertisset bellum, seniorque in Italiam tra-
 jecisset. Horum in quolibet tum indeoles eadem,
 quæ in Alexandro erat, animi ingeniique ; tum dis-
 ciplina militaris, jam inde ab initiis urbis tradita per
 manus, in artis perpetuis præceptis ordinatae modum
 venerat. Ita reges gesserant bella ; ita deinde ex-
 actores regum Junii Valeriique ; ita deinceps Fabii,

U. C. 435. Quinetii, Cornelii; ita Furius Camillus, quem ju-

A. C. 317. venes ii, quibus cum Alexandro dimicandum erat,
senem viderant. Militaria opera pugnando obeunti
Alexandro (nam ea quoque haud minus clarum eum
faciunt) cessisset videlicet in acie oblatus par
Man-
lius Torquatus, aut Valerius Corvus, insignes ante
milites, quam duces? cessissent Decii, devotis cor-
poribus in hostem ruentes? cessisset Papirius Cur-
sor, illo corporis robore, illo animi? victus esset
consiliis juvenis unius, ne singulos nominem, sena-
tus ille, quem qui *ex regibus constare* dixit, unus ve-
ram speciem Romani senatus cepit? Id vero erat
periculum, ne solertius, quam quilibet unus ex iis,
quos nominavi, castris locum caperet, commeatus
expediret, ab insidiis præcaveret, tempus pugnæ
deligeret, aciem instrueret, subsidiis firmaret. Non
cum Dario rem esse dixisset: quem, mulierum ac
spadonum agmen trahentem, inter purpuram atque
aurum, oneratum fortunæ adparatibus suæ, prædam
verius, quam hostem, nihil aliud quam bene ausus
vana contemnere, incruentus devicit. Longe alias
Italiæ, quam Indiæ, per quam temulento agmine
comissabundus incessit, visus illi habitus esset, sal-
tus Apulæ ac montes Lucanos cernenti et vestigia
recentia domesticæ clidis, ubi avunculus ejus nuper
Epiri rex Alexander absuntus erat.

XVIII. Et loquimur de Alexandro nondum merso
secundis rebus, quarum nemo intolerantior fuit:
qui, si ex habitu novæ fortunæ novique, ut ita di-
cam, ingenii, quod sibi victor induerat, spectetur,
Dario magis similis, quam Alexandro, in Italianam
venisset, et exercitum Macedoniae oblitum degene-
rantemque jam in Persarum mores adduxisset. Re-

ferre in tanto rege piget superbam mutationem U. C. 435.
 vestis, et desideratas humi jacentium adulationes, A. C. 317.
 etiam victis Macedonibus graves, nedum victoribus;
 et fœda supplicia, et inter vinum et epulas cædes
 amicorum, et vanitatem ementiendæ stirpis. Quid,
 si vini amor in dies fieret acrior? quid, si trux ac
 præfervida ira? (nec quidquam dubium inter scrip-
 tores refero) nullane hæc damna imperatoriis virtu-
 tibus ducimus? Id vero periculum erat, quod levis-
 simi ex Græcis, qui Parthorum quoque contra no-
 men Romanum gloriæ favent, dictitare solent, ne
 majestatem nominis Alexandri (quem ne fama qui-
 dem illis notum arbitror fuisse) sustinere non po-
 tuerit populus Romanus, et, adversus quem Athenis,
 in civitate fracta Macedonum armis, cernente tum
 maxime prope fumantes Thebarum ruinas, concio-
 nari libere ausi sint homines, (id quod ex monu-
 mentis orationum patet) adversus eum nemo ex tot
 proceribus Romanis vocem liberam missurus fuerit.
 Quantalibet magnitudo hominis concipiatur animo,
 unius tamen ea magnitudo hominis erit, conlecta
 paullo plus decem annorum felicitate: quam qui eo Fortunæ
 extollunt, quod populus Romanus, etsi nullo bello, Alexandri
 multis tamen præliis victus sit, Alejandro nullius cum fortu-
 pugnæ non secunda fortuna fuerit; non intelligunt, na pop.
 se hominis res gestas, et ejus juvenis, cum populi
 jam octingentesimum bellantis annum rebus con-
 ferre. Miremur, si, quum ex hac parte secula plu-
 ra numerentur, quam ex illa anni, plus in tam
 longo spatio, quam in ætate tredecim annorum,
 fortuna variaverit? Quin tu hominis cum homine,
 et ducis cum duce, fortunam cum fortuna confers?
 Quot Romanos duces nominem, quibus numquam

U. C. 435. adversa fortuna pugnæ fuit? Paginas in annalibus
 A. C. 317. magistratum fastisque percurrere licet, consulum,
 dictatorumque, quorum nec virtutis, nec fortunæ
 ullo die populum Romanum pœnituit. Et, quo
 sint mirabiliores, quam Alexander aut quisquam
 rex, denos vicenosque dies quidam dictaturam, ne-
 mo plus quam annum consulatum gessit: ab tribu-
 nis plebis delectus impediti sunt: post tempus ad
 bella ierunt: ante tempus comitiorum caussa revo-
 cati sunt: in ipso conatu rerum circumiegit se an-
 nus: collegæ nunc temeritas, nunc pravitas, impe-
 dimento aut damno fuit: male gestis rebus alterius
 successum est: tironem aut mala disciplina insti-
 tutum exercitum acceperunt. At, Hercule, reges
 non liberi solum impedimentis omnibus, sed domini
 rerum temporumque, trahunt consiliis cuncta, non
 sequuntur. Invictus ergo Alexander cum invictis
 ducibus bella gessisset, et eadem fortunæ pignora
 in discriminem detulisset: immo etiam eo plus periculi
 subisset, quod Macedones unum Alexandrum habu-
 issent, multis casibus non solum obnoxium, sed
 etiani obferentem se: Romanis multi fuissent,
 Alexandro, vel gloria, vel rerum magnitudine,
 pares; quorum suo quisque fato, sine publico dis-
 crimine, viveret morereturque.

Conlatio copiarum. XIX. Restat, ut copiæ copiis comparentur vel
 numero, vel militum genere, vel multitudine auxilio-
 rum. Censebantur ejus ætatis lustris ducenta quin-
 quagena millia capitum. Itaque, in omni defectione
 sociorum Latini nominis, urbano prope delectu
 decem scriebantur legiones: quaterni quinique
 exercitus sæpe per eos annos in Etruria, in Uni-
 bria, Gallis hostibus adjunctis, in Samnio, in Lu-

canis gerebant bellum. Latium deinde omne cum U. C. 435.
 Sabinis, et Volscis, et Æquis, et omni Campania,^{A. C. 317.}
 et parte Umbriæ Etruriæque, et Picentibus, et
 Marsis, Pelignisque, ac Vestinis atque Apulis, ad-
 juncta que omni ora Græcorum inferi maris a Thuriis
 Neapolim et Cumas, et inde Antio atque Ostiis te-
 nus Samnites, aut socios validos Romanis, aut
 fractos bello invenisset hostes. Ipse trajecisset
 mare cum veteranis Macedonibus, non plus trincta
 millibus hominum et quatuor millibus equitum
 maxime Thessalorum: hoc enim roboris erat: Per-
 sas, Indos, aliasque si adjunxisset gentes, inpedi-
 mentum majus, quam auxilium, traheret. Adde,
 quod Romanis ad manum domi supplementum es-
 set: Alexandro, (quod postea Hannibali accidit)
 alieno in agro bellanti, exercitus consenuisset. Ar-
 ma, clipeus sarissæque illis; Romano scutum, ma-
 jus corpori tegumentum, et pilum, haud paullo,
 quam hasta, vehementius ictu missuque telum.
 Statarius uterque miles, ordines servans: sed illa
 phalanx immobilis, et unius generis: Romana acies
 distinctior, ex pluribus partibus constans: facilis
 partienti, quacumque opus esset, facilis jungenti.
 Jam in opere quis par Romano miles? quis ad tole-
 randam laborem melior? Uno proelio victus Alex-
 ander, bello victus esset. Romanum, quem Caudium,
 quem Cannæ non fregerunt, quæ fregisset acies?
 Næ ille sæpe, etiam si prima prospere evenissent,
 Persas et Indos et inbellem Asiam quæsisset, et
 cum feminis sibi bellum fuisse dixisset: quod Epri
 regem Alexandrum, mortifero vulnere ictum, dix-
 isse ferunt, sortem bellorum in Asia gestorum ab
 hoc ipso juvete cum sua conferentem. Equidem,

U. C. 435. quum per annos quatuor et viginti primo Punico
 A. C. 317. bello classibus certatum cum Pœnis recordor, vix
 ætatem Alexandri subfecturam fuisse reor ad unum
 bellum: et forsitan quum et fœderibus vetustis
 juncta Punica res Romanæ esset, et timor par ad-
 versus communem hostem duas potentissimas armis
 virisque urbes armaret, simul Punico Romanoque
 obrutus bello esset. Non quidem Alejandro duce,
 nec integris Macedonum rebus, sed experti tamen
 sunt Romani Macedonem hostem adversus Antio-
 chum, Philippum, Persen, non modo cum clade
 ulla, sed ne cum periculo quidem suo. Absit in-
 vidia verbo, et civilia bella sileant, numquam ab
 equite hoste, numquam a pedite, numquam aperta
 acie, numquam æquis, utique numquam nostris locis
 laboravimus. Equitem, sagittas, saltus impeditos, avia
 commeatibus loca gravis armis miles timere potest.
 Mille acies, graviores quam Macedonum atque Alex-
 andri, avertit, avertetque; modo sit perpetuus hujus,
 qua vivimus, pacis amor et civilis cura concordiae.

U. C. 436. XX. M. Foslius Flaccinator inde et L. Plautius
 A. C. 316. Veno consules facti. Eo anno ab frequentibus
 Samnitium populis de fœdere renovando legati,
 quum senatum humi strati movissent, rejecti ad
 populum haudquaquam tam efficaces habebant pre-
 ces. Itaque, fœdere negato, induciæ biennii, quum
 per aliquot dies fatigassent singulos precibus, inpe-
 tratae. Et ex Apulia Teanenses Canusinique popu-
 lationibus fessi, obsidibus L. Plautio consuli datis,
 in ditionem veneerunt. Eodem anno primuni præ-
 fecti Capuae creari cœpti, legibus ab L. Furio præ-
 tore datis: quum utrumque ipsi pro remedio ægris
 rebus discordia intestina petissent. Et duæ Romæ

additæ tribus, Ufentina ac Falerina. Inclinatis se- Tribus no-
 mel in Apulia rebus, Teates quoque Apuli ad no- vae.
 vos consules, C. Junium Bubulcum, Q. Æmilius U. C. 437.
 Barbulam, fœdus petitum venerunt, pacis per om- A. C. 315.
 nem Apuliam præstandæ populo Romano auctores :
 id audacter spondendo impetravere, ut fœdus dare-
 tur : neque ut æquo tamen fœdere, sed ut in ditione
 populi Romani essent. Apulia perdomita, (nam
 Forento quoque valido oppido Junius potitus erat)
 in Lucanos perrectum : inde repento adventu Æ-
 milii consulis Nerulum vi captum. Et postquam
 res Capuae stabilitas Romana disciplina fama per
 socios vulgavit ; Antiatibus quoque, qui se sine le-
 gibus certis, sine magistratibus agere querebantur,
 dati ab senatu ad jura statuenda ipsius coloniæ pa-
 troni : nec arma modo, sed jura etiam Romana late
 pollebant.

XXI. C. Junius Bubulcus et Q. Æmilius Bar- U. C. 438.
 bula consules exitu anni non consulibus ab se A. C. 314.
 creatis, Sp. Nautio et M. Popillio, ceterum dictatori
 L. Æmilio legiones tradiderunt. Is, cum L. Fulvio L. Æmi-
 magistro equitum Saticulam obpugnare adortus, re- lius dicta-
 bellandi caussam Samnitibus dedit. Duplex inde tor.
 terror inlatus Romanis : hinc Samnis, magno ex-
 eritu coacto ad eximendos obsidione socios, haud
 procul castris Romanorum castra posuit : hinc Sa-
 ticulani magno cum tumultu, patefactis repente
 portis, in stationes hostium incutuerunt. Inde pars
 utraque, spe alieni magis auxilii, quam viribus freta
 suis, justo mox prælio inito Romanos urgent : et,
 quamquam anceps dimicatio erat, tamen utrimque
 tutam aciem dictator habuit ; quia et locum haud
 facilem ad circumveniendum cepit, et diversa statuit.

U. C. 438. signa. Infestior tamen in erumpentes incessit: nec
 A. C. 314. magno certamine intra mœnia compulit. Tum totam aciem in Samnites obvertit: ibi plus certaminis fuit. Victoria sicut sera, ita nec dubia, nec varia fuit. Fusi in castra Samnites, extinctis nocte ignibus, tacito agmine abeunt: et, spe abjecta Saticulæ tuendæ, Plistiam ipsi, socios Romanorum, ut parem dolorem hosti redderent, circumsidunt.

U. C. 439. XXII. Anno circumacto, bellum deinceps ab
 A. C. 313. dictatore Q. Fabio gestum est. Consules novi, sicut superiores, Romæ manserunt: Fabius, ad accipendum ab Æmilio exercitum, ad Saticulam cum supplemento venit: neque enim Samnites ad Plistiam manserant: sed, ad citis ab domo novis militibus, multitudine freti, castra eodem, quo antea, loco posuerunt: lacescentesque prælio Romanos avertere ab obsidione conabantur. Eo intentius dictator in mœnia hostium versus, id bellum tantum ducere, quod urbem obpugnabat: securior ab Samnitibus agere, stationibus modo obpositis, ne qua in castra vis fieret. Eo ferocius adequitare Samnites vallo, neque otium pati: et quum jam prope in portis castrorum esset hostis, nihil consulto dictatore, magister equitum Q. Aulius Cerretanus, magno tumultu cum omnibus turmis equitum evectus, submovit hostem: tum in minime pertinaci genere pugnæ sic fortuna exercuit opes, ut insignes utrimque clades et clara ipsorum ducum ederet funera. Prior Samnitium imperator, ægre patiens, quo tam ferociter adequitasset, inde se fundi fugarique, orando hortandoque equites prælium integravit: in quem, insignem inter suos carentem pugnam, magister equitum Romanus infesta cuspide ita pernauit equum,

Q. Fabius
Dictator.

Prælium
equestre
cum Sam-
nitibus.

ut uno ictu exanimem equo præcipitaret: nec, ut U. C. 439.
 fit, ad ducis casum perculsa magis, quam irritata,
 est multitudo. Omnes, qui circa erant, in Aulium,
 temere invectum per hostium turmas, tela conje-
 runt. Fratri præcipuum decus ulti Samnitium im-
 peratoris dederunt: is victorem detractum ex equo
 magistrum equitum, plenus mœroris atque iræ, tru-
 cidavit: nec multum afuit, quin corpore etiam, quia
 inter hostiles ceciderat turmas, Samnites potirentur.
 Sed extemplo ad pedes descensum ab Romanis est,
 coactique idem Samnites facere: et repentina acies
 circa corpora ducum pedestre prælium iniit, quo
 haud dubie superat Romanus: recuperatumque Aulii
 corpus, mixta cum dolore lætitia, victores in castra
 referunt. Samnites, duce anisso, et per equestre
 certamen tentatis viribus, omissa Saticula, quam
 nequidquam defendi rebantur, ad Plistiæ obsidionem
 redeunt; intraque paucos dies Saticula Romanus per
 ditionem, Plistia per vim Samnis potitur.

XXIII. Mutata inde belli sedes est: ad Soram ex
 Samnio Apuliaque traductæ legiones. Sora ad Sam-
 nites defecerat, imperfectis colonis Romanorum: Soræ defec-
tio ad Sam-
nites.
 quo quum prior Romanus exercitus, ad ulciscendam
 civium necem recuperandamque coloniam, magnis
 itineribus prævenisset, et sparsi per vias speculato-
 res, sequi legiones Samnitium, nec jam procul ab-
 esse, alii super alios, nunciarent; obviam itum hosti,
 atque ad Lautulas ancipiti prælio dimicatum est:
 non cædes, non fuga alterius partis, sed nox incer-
 tos, victi victoresne essent, diremit. Invenio apud
 quosdam, adversam eam pugnam Romanis fuisse,
 atque in ea cecidisse Q. Aulium, magistrum equi-
 tum. Subfectus in locum Aulii C. Fabius magister

U. C. 439. equitum cum exercitu novo ab Roma advenit ; et,
 A. C. 313. per præmissos nuncios consulto dictatore, ubi subsisteret, quove tempore, et qua ex parte hostem adgrederetur, substitutus occultus, ad omnia satis exploratis consiliis. Dictator, quum per aliquot dies post pugnam continuisset suos intra vallum, obsessi magis quam obsidentis modo, signum repente pugnæ proposuit ; et, efficacius ratus ad accendendos virorum fortium animos, nullam alibi, quam in semet ipso, cuiquam relictam spem, de magistro equitum novoque exercitu militem celavit : et, tamquam nulla, nisi in eruptione, spes esset, *Locis, inquit, angustis, milites, deprehensi, nisi quam victoria pateferimus, viam nullam habemus.* *Statira nostra munimento satis tuta sunt ; sed inopia eadem infesta : nam et circu omnia defecerunt, undeubrehi commeatus poterant ; et, si homines jurare relint, iniqua loca sunt.* Itaque non frustrabor ego vos, castra hic relinquentio, in quæ, infecta victoria, sicut pristino die, eos recipiatis : armis munimenta, non munimentis armata tuta esse debent. Castra habeant repetantque, quibus operæ est trahere bellum : nos omnium rerum respectum, præterquam victoriæ, nobis absindamus. Ferte signa in hostem : ubi extra vallum agmen excesserit, castra, quibus imperatum est, incendant : damna restra, milites, omnium circa, qui defecerunt, populorum præda sarcientur. Et oratione dictatoris, quæ necessitatis ultimæ index erat, milites accensi vadunt in hostem, et respectus ipse ardentium castorum, quamquam proximis tantum (ita enim jussérat dictator) ignis est subditus, haud parvum fuit irritamentum. Itaque, velut recordes inlati, signa primo Samnitibus. inpetu hostium turbant ; et in tempore, postquam

ardentia procul vidit castra magister equitum, (id U.C. 439.
convenerat signum) hostium terga invadit : ita circumventi Samnites, qua potest quisque, fugam per A.C. 313.
diversa petunt. Iugens multitudo, in unum metu
conglobata, ac semet ipsam turba impediens, in me-
dio cæsa. Capta hostium castra direptaque ; quo-
rum præda onustum militem in Romana castra dic-
tator reducit, haudquaquam tam victoria lætum,
quam quod, præter exiguum deformatam incendio
partem, cetera contra spem salva invenit.

XXIV. Ad Soram inde redditum ; novique con- U.C. 440.
sules M. Pœtelius, C. Sulpicius exercitum ab dicta- A.C. 312.
tore Fabio accipiunt, magna parte veterum militum
dimissa, novisque cohortibus in supplementum ad-
ductis. Ceterum, quum propter difficilem urbis si-
tum nec obpugnandi satis certa ratio iniretur, et
aut tempore longinqua, aut præceps periculo victo-
ria esset ; Soranus transfuga, clam ex oppido pro- Sora obses-
fectus, quum ad vigiles Romanos penetrasset, duci sa capitur.
se extemplo ad consules jubet, deductusque tradi-
turum urbem promittit. Visus inde (quum, quo-
nam modo id præstaturus esset, percunctantes do-
ceret) haud vana adferre, perpulit, prope adjuncta
mœnibus Romana castra ut sex millia ab oppido
removerentur : fore, ut minus intentæ in custodiam
urbis diurnæ stationes ac nocturnæ vigiliæ essent.
Ipse insequenti nocte, sub oppido silvestribus locis
cohortibus insidere iussis, deceim milites delectos se-
cum per ardua ac prope invia in arcem dicit ; plu-
ribus, quam pro numero virorum, missilibus telis eo
conlatis. Ad hæc saxa erant, et temere jacentia (ut
fit) in aspretis, et de industria etiam, quo locus tu-
tior esset, ab oppidanis congesta. Ubi quam cou-

U.C. 440. stituisset Romanos, semitamque angustam et ar-
A.C. 312. duam, erectam ex oppido in arcem, ostendisset;
Hoc quidem adscensu, inquit, vel tres armati quamlibet multitudinem arcuerint: vos et decem numero, et, quod plus est, Romani, Romanorumque fortissimi viri estis, et locus pro vobis, et nox erit, quæ omnia ex incerto majora territis ostentat. Ego jam terrore omnia inplebo: vos arcem intenti tenete. Decurrit inde, quanto maxime poterat, cum tumultu, *ad arma, et pro vestram fidem, cives!* clamitans, *arx ab hostibus capta est; ite, defendite.* Hæc incidens principum foribus, hæc obviis, hæc excurrentibus in publicum pavidis increpat. Acceptum ab uno pavorem plures per urbem ferunt. Trepidi magistratus, missis ad arcem exploratoribus, quum tela et armatos tenere arcem multiplicato numero audirent, avertunt animos a spe recuperandæ arcis. Fuga cuncta complentur, portæque ab semisomnis ac maxima parte inermibus refringuntur: quarum per unam præsidium Romenum clamore excitatum intrumpit, et concursantes per viam pavidos cædit. Jam Sora capta erat, quum consules prima luce advenere; et, quos reliquos fortuna ex nocturna cæde ac fuga fecerat, in ditionem accipiunt. Ex his ducentos viginti quinque, qui omnium consensu destinabantur et infandæ colonorum cædis et defectionis autores, vincitos Romam deducunt: ceteram multitudinem incoluam, præsidio imposito, Soræ relinquent. Omnes, qui Romam deducti erant, virgis in foro cæsi, ac securi percussi summo gaudio plebis; cuius maxime intererat, tutam ubique, quæ passim in colonias mitteretur, multitudinem esse.

XXV. Consules, ab Sora profecti, in agros at-

que urbes Ausonum bellum intulerunt : mota nam- U. C. 440.
 que omnia adventu Samnitium, quum apud Lantu- A. C. 312.
 las dimicatum est, fuerant, conjurationesque circa Ausones
 Campaniam passim factæ : nec Capua ipsa crimine bello ad-
 petiti.
 caruit : quin Romam quoque et ad principum quos-
 dam inquirendos ventum est. Ceterum Ausonum
 gens proditione urbium, sicut Sora, in potestatem
 venit. Ausona, et Minturnæ, et Vescia, urbes erant :
 ex quibus principes juventutis duodecim numero, in
 proditionem urbium suarum conjurati, ad consules
 veniunt : docent, suos, jampridem exoptantes Samni-
 tium adventum, simul ad Lautulas pugnatum audie-
 runt, pro vietis Romanos habuisse, juventute, armis
 Samnites juuisse : fugatis inde Samnitibus, incerta
 pace agere, nec cludentes portas Romanis, ne arces-
 sant bellum ; et obstinatos claudere, si exercitus admo-
 reatur. In ea fluctuatione animorum obprimi iacau-
 tos posse. His auctoribus mota propius castra :
 missique eodem tempore circa tria oppida milites,
 partim armati, qui occulti propinqua mœnibus insi-
 derent loca ; partim togati, tectis veste gladiis, qui
 sub lucem apertis portis urbes ingrederentur. Ab
 his simul custodes trucidari cœpti, simul datum sig-
 num armatis, ut ex insidiis concurrerent : ita portæ
 occupatæ, triaque oppida eadem hora eodemque
 consilio capta. Sed, quia absentibus ducibus impe-
 tus est factus, nullus modus cœdibus fuit ; deletaque
 Ausonum gens, vix certo defectionis crimine, per- Ausones
 inde ac si internecivo bello certasset. deleti.

XXVI. Eodem anno, prodiito hostibus Romano
 præsidio, Luceria Samnitium facta : nec diu prodi-
 toribus inpunita res fuit. Haud procul inde exer-
 citus Romanus erat : cuius primo inpetu urbs, sita

U. C. 440. in plano, capit. Lucerini ac Samnites ad inter-
 A. C. 312. necionem cæsi: coque ira processit, ut Romæ quoque, quum de colonis mittendis Luceriam consulere-
 retur senatus, multi delendam urbem censerent. Præter odium, quod exsecrabile in bis captos erat,
 longinquitas quoque abhorrere a relegandis tam
 procul ab domo civibus inter tam infestas gentes
 cogebat. Vicit tamen sententia, ut mitterentur co-
 loni: duo millia et quingenti missi. Eodem anno,
 quum omnia infida Romanis essent, Capuae quoque
 occultæ principum conjurationes factæ. De quibus
 quum ad senatum relatum esset, haudquaquam neg-
 lecta res est: quæstiones decretæ, dictatoremque

C. Mænius quæstionibus exercendis dici placuit: C. Mænius
 dictator dictus: is M. Foslium magistrum equitum dixit.
 quæstionibus exercendis. Ingens erat magistratus ejus terror: itaque sive ti-
 more ejus, seu conscientia, Calavios, Ovium Novi-
 umque, (ea capita conjurationis fuerant) priusquam
 nominarentur apud dictatorem, mors haud dubie ab
 ipsis conscientia judicio subtraxit. Deinde, ut quæ-
 stioni Campanæ materia decessit, versa Roniam in-
 terpretando res: non nominatim, qui Capuae, sed
 in universum, qui usquam coissent conjurassentve
 adversus rempublicam, quæri senatum jussisse: et
 eoitiones, honorum adipiscendorum caussa factas,
 adversus rempublicam esse: latiorque et re et per-
 sonis quæstio fieri; haud abnuente dictatore, sine
 fine illa quæstionis suæ jus esse. Postulabantur
 ergo nobiles homines: adpellantibusque tribunos
 nemo erat auxilio, quin nomina reciperentur. Inde
 nobilitas, nec hi modo, in quos crimen intendebat-
 tur, sed universi simul, negare, nobilium id crimen
 esse; quibus, si nulla obstetur fraude, pateat via

ad honorem, sed hominum novorum: ipsos adeo U.C. 440.
dictatorem magistrumque equitum reos magis, quam
quæsitores idoneos ejus criminis esse: intellectu-
rosque ita esse, simul magistratu abissent. Tum
enimvero Mænius, iam famæ magis, quam imperii,
memor, progressus in concionem ita verba fecit:
Et omnes anteactæ ritæ vos conscos habeo, Quirites,
et hic ipse honos, delatus ad me, testis est innocentiae
meæ: neque enim, quod sæpe alias, quia ita tempora
postulabant reipublicæ, qui bello clarissimus esset, sed
qui maxime procul ab his coitionibus vitam egisset, dic-
tator diligendus exercendis quæstionibus fuit. Sed quo-
niam quidam nobiles homines (qua de caussa, vos ex-
istimare, quam me pro magistratu quidquam incom-
pertum dicere, melius est) primum ipsas expugnare
quæstiones omni ope adnisi sunt: dein, postquam ad
id parum potentes erant, ne caussam dicerent, in præ-
sidia adversariorum, adpellationem et tribunicium au-
xilium, patricii confugerunt: postremo repulsi inde
(adeo omnia tutiora, quam ut innocentiam suam pur-
garent, visa) in nos inruerunt, et privatis dictatorem
poscere reum verecundiæ non fuit: ut omnes Dii ho-
minesque sciant, ab illis, etiam quæ non possint, ten-
tari, ne rationem ritæ reddant; me obriam ire crimihi,
et offerre me inimicis reum, dictatura me abdico. Vos Abdicat se
quæso, consules, si vobis datum ab senatu negotium fu- dictatura.
erit, in me primum et hunc M. Foslium quæstiones ex-
erceatis; ut adpareat, innocentia nostra nos, non ma-
jestate honoris, tutos a criminationibus istis esse. Ab- Reus factus
dicat inde se dictatura, et post eum confessim Fos- absolvitur.
lius magisterio equitum: primum apud consules
(iis enim ab senatu mandata res est) rei facti, ad-
versus nobilium testimonia egregie absolvuntur.

U. C. 440. Publilius etiam Philo, multiplicatis summis honori-
 A. C. 312. bus, post res tot domi belloque gestas, ceterum in-
 visus nobilitati, caussam dixit, absolutusque est.
 Nec dintius, ut fit, quam dum recens erat, quæstio
 per clara nomina reorum viginit: inde labi cœpit ad
 viliora capita, donec coitionibus factionibusque, ad-
 versus quas comparata erat, obpressa est.

XXVII. Earum fama rerum, magis tamen spes
 Campanæ defectionis, in quam conjuratum erat,
 Samnites, in Apuliam versos, rursus ad Caudium
 revocavit: ut inde ex propinquo, si qui motus oc-
 casionem aperiret, Capuam Romanis eriperent. Eo
 consules eum valido exercitu venerunt: et primo
 circa saltus, quum utrumque ad hostem iniqua via
 esset, cunctati sunt: deinde Samnites per aperta
 loca brevi circuitu in loca plana, Campanos cam-
 pos, agmen demittunt, ibique primum castra in
 conspectu hostibus data: deinde levibus præliis,
 equitum sæpius, quam peditum, utrumque periculum
 factum; nec aut eventus eorum Romanum, aut
 moræ, qua trahebant bellum, pœnitiebat. Samni-
 tium contra dueibus, et carpi parvis quotidie dam-
 nis, et senescere dilatione belli vires suæ videban-
 tur: itaque in aciem procedunt, equitibus in cornua
 divisis: quibus præceptum erat, intentiores ad re-
 spectum castrorum, ne qua eo vis fieret, quam ad
 prælium, starent: aciem pediti tutam fore. Con-
 sulum Sulpicius in dextro, Pœtelius in lævo cornu
 consistunt. Dextra pars, qua et Samnites rarib[us] or-
 dinibus, aut ad circumfundos hostes, aut ne ipsi
 circumirentur, constiterant, latius patefacta stetit.
 Sinistris, præterquam quod confertiores steterant,
 repantino consilio Pœtelii consulis additæ vires:

Prælium
cum Sam-
nitibus.

qui subsidiarias cohortes, quæ integræ ad longioris U. C. 440.
 pugnæ casus reservabantur, in primam aciem ex- A. C. 312.
 templo emisit; universisque hostem primo inpetu
 viribus inpullit. Commota pedestri acie Samnitium,
 eques in pugnam succedit: in hunc, transverso ag-
 mine inter duas acies se inferentem, Romanus equi-
 tatus concitat equos; signaque et ordines peditum
 atque equitum confundit, donec universam ab ea
 parte avertit aciem. In eo cornu non Pœtelius so-
 lis, sed Sulpicius etiam, hortator adfuerat, avectus
 ab suis nondum conserentibus manus ad clamorem,
 ab sinistra parte prius exortum: unde, haud dubiam
 victoriam cernens, quum ad suum cornu tenderet
 cum mille ducentis viris, dissimilem ibi fortunam
 invenit: Romanos loco pulsos, victorem hostem
 signa in percusso inferentem. Ceterum omnia mu-
 tavit repente consulis adventus: nam et conspectu
 ducis refectus militum est animus: et, majus quam
 pro numero auxilium, advenerant fortes viri: et
 partis alterius Victoria audita, mox visa etiam, prœ-
 lium restituit. Tota deinde jam vincere acie Ro- Vincunt
 manus, et, omissa certamine, cædi capique Samni- Romani.
 tes; nisi qui Maleventum, cui nunc urbi Beneven-
 tum nomen est, perfugerunt. Ad triginta millia cæsa
 aut capta Samnitium, proditum memoriae est.

XXVIII. Consules, egregia Victoria parta, proti-
 nus inde ad Bovianum obpugnandum legiones du-
 cunt: ibique hiberna egerunt, donec ab novis con-
 sulibus L. Papirio Cursore quintum, C. Junio Bu- U. C. 441.
 bulco iterum, nominatus dictator C. Pœtelius cum A. C. 311.
 M. Foslio magistro equitum exercitum accepit. Is, Pœtelius
 dictator.
 quum audisset arceni Fregellanam ab Samnitibus
 captam, omissa Boviano ad Fregellas pergit: unde,

U. C. 441. nocturna Samnitium fuga sine certamine receptis
 A. C. 311. Fregellis, præsidioque valido inposito, in Campaniam redditum maxime ad Nolam armis repetendam: eo se intra mœnia, sub adventum dictatoris, et Samnitium omnis multitudo et Nolani agrestes contulerant. Dictator, urbis situ circumspecto, quo aperior aditus ad mœnia esset, omnia ædificia (et frequenter ibi habitabatur) circumjecta muris incendit: nec ita multo post, sive a Pœtelio dictatore, sive ab C. Junio consule, (nam utrumque traditur) Nola est capta. Qui captæ decus Nolæ ad consulēm trahunt, adjiciunt, Atinam et Calatiam ab eodem captas; Pœteliū autem, pestilentia orta, clavifigendi causa dictatorem dictum. Suessa et Pontiæ eodem anno coloniæ deductæ sunt. Suessa Auruncorum fuerat: Volsci Pontias, insulam sitam in con-spectu litoris sui, incoluerant: et, Interamna et Casinum ut dederentur coloniæ, senatusconsultum factum est: sed triumviros creavere, ac misere colonorum quatuor millia insequentes consules M. Valerius, P. Decius.

U. C. 442. XXIX. Profligato fere Samnitium bello, prius-
 A. C. 310. quam ea cura decederet Patribus Romanis, Etrusci belli fama exorta est: nec erat ea tempestate gens alia, cuius secundum Gallicos tumultus arma terribilia eſsent, quum propinquitate agri, tum multitudine hominum. Itaque, altero consulū in Samnio reliquias belli persequente, P. Decius, qui graviter æger Romæ restiterat, auctore senatu dictatorem C. Junium Bubulcum dixit: is, prout rei magnitudo postulabat, omnes juniores sacramento adigit: arma, quæque alia res poscit, summa industria parat: nec tantis adparatibus elatus de infe-

rendo bello agitat, quieturus haud dubie, nisi ultro U.C. 442.
 arma Etrusci inferrent. Eadē in comparando co- A.C. 310.
 hibendoque bello consilia et apud Etruscos fuere: Ap. Clau-
 neutri finibus egressi. Et censura clara eo anno dius et C. Ap. Claudii, et C. Plautii fuit; memoriae tamen fe- Plautius
 licioris ad posteros nomen Appii, quod viam muni- censure. Appia via.
 vit, et aquam in urbem duxit, eaque unus perfecit;
 quia, ob infamem atque invidiosam senatus lectio-
 nem verecundia victus, collega magistratu se abdi-
 caverat. Appius, jam inde antiquitus insitam per-
 tinaciam familiæ gerendo, solus censuram obtinuit.
 Eodem Appio auctore, Potitii, gens, cuius ad aram Potitia gens
 Maximam Herculis familiare sacerdotium fuerat, intra an-
 servos publicos, ministerii delegandi caussa, sollem- num ex-
 stincta.
 nia ejus sacri docuerat. Traditur inde dictu mira-
 bile, et quod dimovendis statu suo sacris religionem
 facere posset, quum duodecim familiæ ea tempes-
 tate Potitorum essent, puberes ad triginta, omnes
 intra annum cum stirpe exstinctos: nec nomen
 tantum Potitorum interisse, sed censorem etiam
 Appium, memori Deum ira, post aliquot annos lu-
 minibus captum.

XXX. Itaque consules, qui eum annum secuti U.C. 443.
 sunt, C. Junius Bubulcus tertium et Q. Æmilius A.C. 309.
 Barbula iterum, initio anni questi apud populum,
 deformatum ordineni prava lectione senatus, qua
 potiores aliquot lectis præteriti essent; negaverunt,
 eam lectionem se, quæ sine recti pravique discrimine ad gratiam ac libidinem facta esset, observa-
 turos: et senatum extemplo citaverunt eo ordine, qui
 ante censores Ap. Claudium et C. Plautium fuerat.
 Et duo imperia eo anno dari cœpta per populam,
 utraque pertinentia ad rem militarem: unum, ut tri-

U.C. 443. buni militum seni deni in quatuor legiones a populo
 A.C. 309. crearentur; quæ antea, perquam paucis suffragio
 populi relictis locis, dictatorum et consulum ferme
 fuerant beneficia: tulere eam rogationem tribuni
 Duumviri plebei L. Atilius, C. Marcius. Alterum, ut duum-
 navales viros navales classis ornandæ reficiendæque caussa
 creati. idem populus juberet: lator hujus plebisci fuit M.
 Decius tribunus plebis. Ejusdem anni rem dictu
 parvam præterirem, ni ad religionem visa esset per-
 Tibicines tinere. Tibicines, quia prohibiti a proximis censo-
 relinquunt ribus erant in æde Jovis vesci, quod traditum anti-
 Romam. quitus erat, ægre passi, Tibur uno agmine abierunt:
 adeo ut nemo in urbe esset, qui sacrificiis præcine-
 ret. Ejus rei religio tenuit senatum; legatosque
 Tibur miserant, ut darent operam, ut hi homines
 Romanis restituerentur. Tiburtini, benigne polli-
 citi, primum adcitos eos in curiam hortati sunt, uti
 reverterentur Romam: postquam perPELLI nequi-
 bant, consilio, haud abhorrente ab ingeniis homi-
 num, eos adgrediuntur. Die festo alii alios per
 speciem celebrandarum cantu epularum caussa invi-
 tant, et vino, cuius avidum ferme genus est, onera-
 tos sopiunt: atque ita in plaustra somno vinctos
 Revehun- conjiciunt, ac Romam deportant: nec prius sensere,
 tur. quam, plaustris in foro relictis, plenos crapulae eos
 lux obpressit. Tunc concursus populi factus, impe-
 tratoque, ut manerent, datum, ut triduum quotan-
 nis ornati, cum cantu atque hac, quæ nunc sollem-
 nis est, licentia per urbem vagarentur: restitutum-
 que in æde vescendi jus iis, qui sacris præcinerent.
 Hæc inter duorum ingentium bellorum curam gere-
 bantur.

XXXI. Consules inter se provincias partiti;

Junio Samnites, Aemilio novum bellum Etruria U.C. 443.
 sorte obvenit. In Samnio Cluviam, præsidium Ro- A.C. 309.
 manum, quia nequiverat vi capi, obsessum fame in Res gestæ
 dditionem aceperant Samnites, verberibusque fœ- in Samnio.
 dum in modum laceratos occiderant deditos. Huic
 infensus crudelitati Junius, nihil antiquius obpug-
 natione Cluviana ratus, quo die adgressus est mœ-
 nia, vi cepit, atque omnes puberes interfecit. Inde
 victor exercitus Bovianum ductus: caput hoc erat
 Pentrorum Samnitium, longe ditissimum atque opu-
 lentissimum armis virisque. Ibi quia haud tantum
 irarum erat, spe prædæ milites accensi, oppido poti-
 untur: minus itaque sævitum in hostes est: prædæ
 plus pene, quam ex omni Samnio umquam, eges-
 tum, benigneque omnis militi concessa. Et post-
 quam præpotentem armis Romanum nec acies sub-
 sistere ullæ, nec castra, nec urbes poterant; om-
 nium principum in Samnio eo curæ sunt intentæ,
 ut insidiis quæreretur locus, si qua licentia popu-
 lando effusus exercitus excipi ac circumveniri pos-
 set. Transfugæ agrestes et captivi quidam, pars
 forte, pars consilio oblati, congruentia ad consulem
 adferentes, quæ et vera erant, pecoris viam ingen-
 tem in saltum avium compulsam esse, perpulerunt,
 ut præ datum eo expeditæ ducerentur legiones. Ibi
 ingens hostium exercitus itinera occultus insederat,
 et, postquam intrasse Romanos vidi saltum, re-
 pente exortus cum clamore ac tumultu incautos in-
 vadit. Et primo nova res trepidationem fecit, dum
 arma capiunt, sarcinas congerunt in medium: dein,
 postquam, ut quisque liberaverat se onere, aptave-
 ratque armis, ad signa undique coibant, et notis or-
 dinibus in vetere disciplina militiæ, jam sine præ-

U. C. 443. cepto ullius sua sponte struebatur acies, **consul, ad**
A. C. 309. ancipitem maxime pugnam advectus, desilit ex equo,
 et Jovem, Martenique atque alios testatur Deos, *se nullam suam gloriam inde, sed prædam militi quærentem, in eum locum devenisse: neque in se aliud, quam nimiam ditandi ex hoste militis curam, reprehendi posse: ab eo se dedecore nullam rem aliam, quam virtutem militum, vindicaturam: conniterentur modo uno animo omnes invadere hostem, victimum acie, castris exutum, nudatum urbibus, ultimam spem furto insidiarum tentantem, et loco, non armis, fretum. Sed quem esse jam virtuti Romanæ inexpugnabilem locum? Fre-*
gellana arx, Soranaque, et ubicumque iniquo successum erat loco, memorabantur. His accensus miles, omnium inmemor difficultatium, vadit adversus imminentem hostium aciem: ibi paullum laboris fuit, dum in adversum clivum erigitur agmen: ceterum, postquam prima signa planiciem summam ceperunt, sensitque acies æquo se jam institisse loco, versus extemplo est terror in insidiatores, easdemque latebras, quibus se paullo ante texerant, palati atque inermes fuga repetebant: sed loca difficilia, hosti quæsita, ipsos tum sua fraude impediabant. Itaque ergo perpaucis effugium patuit: cæsa ad viginti millia hominum, victorque Romanus ad oblatam ultro ab hoste prædam pecorum discurrit.

**Etrusci Su-
trium ob-
pugnant.**

XXXII. Dum hæc geruntur in Samnio, jam omnes Etruriæ populi præter Arretinos ad arma ierant, ab obpugnando Sutrio, quæ urbs, socia Romanis, velut claustra Etruriæ erat, ingens orsi bellum. Eo alter consulum Æmilius cum exercitu ad liberandos obsidione socios venit. Advenientibus Romanis, Sutrini commeatus benigne in castra **ante**

urbem posita advexere. Etrusci diem primum con- U.C. 443.
 sultando, maturarent, traherentne bellum, tradux- A.C. 309.
 erunt. Postero die, ubi celeriora, quam tutiora,
 consilia magis placuere ducibus, sole orto signum
 pugnæ propositum est, armatique in aciem proce-
 dunt. Quod postquam consuli nunciatum est, ex-
 templo tesseram dari jubet, ut prandeat miles, fir-
 matisque cibo viribus arma capiat: dicto paretur.
 Consul, ubi armatos paratosque vidi, signa extra
 vallum proferri jussit, et haud procul hoste instruxit
 aciem. Aliquamdiu intenti utrimque steterunt, ex-
 spectantes ut ab adversariis clamor et pugna inci-
 peret: et prius sol meridie se inclinavit, quam telum
 hinc aut illinc emissum est: inde, ne infecta re abi-
 retur, clamor ab Etruscis oritur, concinuntque tu-
 bæ, et signa inferuntur. Nec segnius ab Romanis
 pugna initur: concurrunt infensis animis: numero
 hostis, virtute Romanus superat. Anceps prœlium
 multos utrimque, et fortissimum quenique, absunit:
 nec prius inclinata res est, quam secunda acies Ro-
 mana ad prima signa, integri fessis, successerunt.
 Etrusci, quia nullis recentibus subsidiis fulta prima
 acies fuit, ante signa circaque omnes ceciderunt:
 nullo umquam prœlio fugæ minus, nec plus cædis
 fuisset, ni obstinatos mori Tuscos nox texisset; ita
 ut victores prius, quam victi, pugnandi finem face-
 rent. Post occasum solis signum receptui datum
 est: nocte ab utroque in castra redditum. Nec deinde
 quidquam eo anno rei memoria dignæ apud Sutrium
 gestum est; quia et ex hostium exercitu prima tota
 acies deleta uno prœlio fuerat, subsidiariis modo re-
 lictis, **vix** quod satis esset ad castrorum præsidium:
 et apud Romanos tantum vulnerum fuit, ut plures

post prœlium saucii decesserint, quam ceciderant in acie.

U. C. 444. **XXXIII.** Q. Fabius in sequentis anni consul, belum ad Sutrium exceptit: collega Fabio C. Marcius Rutilus datus est. Ceterum et Fabius supplementum ab Roma adduxit, et novus exercitus domo aditus Etruscis venit. Pernulti anni jam erant, quum inter patricios magistratus tribunosque nulla certamina fuerant: quum ex ea familia, quæ velut fatalis tunc tribunis ac plebi erat, certamen oritur. **A. C. 305.**

Ap. Claudius censor, circumactis decem et octo mensibus, quod Æmilia lege finitum censuræ spatium temporis erat, quum C. Plautius collega ejus magistratu se abdicasset, nulla vi compelli, ut abdicaret, potuit. P. Sempronius erat tribunus plebis; qui finiende censuræ intra legitimum tempus actionem suscepserat, non popularem magis, quam justam; nec in vulgus, quam optimo cuique, gratiorem.

Is, quum idemtidem legem Æmiliam recitaret, auctoremque ejus Mam. Æmilium dictatorem laudibus ferret; qui quinquennalem ante censuram, et longinquitate potestatem dominantem, intra sex mensium et anni coëgisset spatium: *Dic, agedum, inquit, Ap. Claudi, quidnam facturus fueris, si eo tempore, quo C. Furius et M. Geganius censores fuerunt, censor fuisses.* Negare Appius, interrogationem tribuni magno opere ad caussam pertinere suam: nam, etsi tenuerit lex Æmilia eos censores, quorum in magistratu lata esset, quia post illos censores creatos eam legem populus jussisset, quodque postremum jussisset, id jus ratumque esset; non tamen aut se, aut eorum quemquam, qui post eam legem latam creati censores essent, teneri ea lege potuisse.

Ap. Claudius censor, circumactis decem et octo mensibus, quod Æmilia lege finitum censuræ spatium temporis erat, quum C. Plautius collega ejus magistratu se abdicasset, nulla vi compelli, ut abdicaret, potuit. P. Sempronius erat tribunus plebis; qui finiende censuræ intra legitimum tempus actionem suscepserat, non popularem magis, quam justam; nec in vulgus, quam optimo cuique, gratiorem.

XXXIV. Hæc sine ullius adsensu cavillante Ap- U.C. 444.
 pio, En, inquit, Quirites, illius Appii progenies, qui, A.C. 308.
 decemvir in annum creatus, altero anno se ipse crea- P. Sempro-
 vit: tertio, nec ab se, nec ab ullo creatus, privatus nii tr. pl.
 fasces et imperium obtinuit: nec ante continuando ab- oratio in
 stitit magistratu, quam obruerent eum male parta,
 male gesta, male retenta imperia. Hæc est eadem fa- Claudium.
 milia, Quirites, cuius vi atque injuriis compulsi, extor-
 res patria, Sacrum montem cepistis: hæc, adversus
 quam tribunicium auxilium vobis comparastis: hæc,
 propter quam duo exercitus Aventinum insedistis: hæc,
 quæ fænebres leges; hæc, quæ agrarias semper inpug-
 narit: hæc connubia Patrum et plebis interrupti: hæc
 plebi ad curules magistratus iter obsepsit: hoc est no-
 men multo, quam Tarquiniorum, infestius vestræ li-
 bertati. Itane tandem, Ap. Claudi, quum centesimus
 jam annus sit ab Mam. Æmilio dictatore, tot censores
 fuerint, nobilissimi fortissimique viri, nemo eorum
 duodecim tabulas legit? nemo id jus esse, quod postremo
 populus jussisset, scivit? Immo vero omnes scive-
 runt; et ideo Æmiliae potius legi paruerunt, quam
 illi antiquæ, qua primum censores creati erant, quia
 hanc postremam jusserrat populus: et quia, ubi duæ
 contrariæ leges sunt, semper antiquæ obrogat nova.
 An hoc dicas, Appi, non teneri Æmilia lege populum?
 an populum teneri, te unum exlegem esse? Tenuit
 Æmilia lex violentos illos censores, C. Furium et M.
 Geganium; qui, quid iste magistratus in republica
 mali facere posset, indicarunt: quum, ira finitæ po-
 testatis, Mam. Æmilium, principem ætatis suæ belli
 domique, ærarium fecerunt: tenuit princeps omnes cen-
 sores intra centum annorum spatium: tenet C. Plau-
 tiuum collegam tuum iisdem auspiciis, eodem jure crea-

U.C. 414. *tum.* *An hunc non, ut qui optimo jure censor creatus*
 A.C. 308. *esset, populus creavit? tu unus eximius es, in quo hoc*
principium ac singulare valeat? Quem tu regem sa-
cificiorum crees, amplexus regni nomen, ut qui optimo
jure rex Romæ creatus sit, creatum se dicet? quem
semestri dictatura, quem interregno quinque dierum
contentum fore putas? quem clavi figendi, aut ludo-
rum caussa dictatorem audacter crees? Quam isti sto-
lidos ac socordes rideri creditis eos, qui intra vicesimum
diem, ingentibus rebus gestis, dictatura se abdicave-
runt, aut qui ritio creati abiernant magistratu? Quid
ego antiqua repetam? Nuper intra decem annos C.
Mænius dictator, quia, quum quæstiones severius, quam
quibusdam potentibus tutum erat, exerceret, contagio
eius, quod quærebat ipse, criminis objectata ab inimicis
est, ut privatus obviam iret crimini, dictatura se ab-
dicavit. Nolo ego istam in te modestiam: ne dege-
neraveris a familia imperiosissima et superbissima:
non die, non hora citius, quam necesse est, magistratu
abieris; modo ne excedas finitum tempus. Satis est,
aut diem, aut mensem censuræ adjicere? Triennium,
inquit, et sex menses ultra, quam licet Æmilia lege,
censuram geram, et solus geram: hoc quidem jam
regno simile est. An collegam subrogabis, quem ne
in demortui quidem locum subrogari fas est? Pœnitet
enim, quod antiquissimum sollemne, et solum ab ipso,
cui fit, institutum Deo, ab nobilissimis antistitibus ejus
sacri ad servorum ministerium religiosus censor de-
duxisti: gens antiquior originibus urbis hujus, hospitio
Deorum immortalium sancta, propter te ac tuam cen-
suram intra annum ab stirpe extincta est: nisi uni-
versam rempublicam eo nefario obstrinxeris, quod omi-
nori etiam reformidat animus. Urbs eo lustro capta

est, quo, demortuo collega C. Julio censore, L. Papirius Cursor, ne abiret magistratu, M. Cornelium Maluginensem collegam subrogavit. Et quanto modestior illius cupiditas fuit, quam tua, Appi? Nec solus, nec ultra finitum lege tempus L. Papirius censuram gessit, tamen neminem invenit, qui se postea auctorem sequeretur: omnes deinceps censores post mortem collegæ se magistratu abdicarunt. Te, nec quod dies exit censuræ, nec quod collega magistratu abiit, nec lex, nec pudor coeret: virtuem in superbia, in audacia, in contemptu Deorum hominumque ponis. Ego te, Ap. Claudi, pristius magistratus majestate ac reverentia, quem gessisti, non modo manu violatum, sed ne verbo quidem inclemterior a me adpellatum vellem: sed et hæc, quæ adhuc egi, pervicacia tua et superbia coegerit me loqui; et, nisi Aemiliæ legi parueris, in vincula duci jubebo; nec, quum ita comparatum a majoribus sit, ut, comitiis censoriis nisi duo confecerint legitima suffragia, non renunciato altero, comitia differantur, ego te, qui solus censor creari non possis, solum censuram gerere patiar. Hæc taliaque quum dixisset, preendi censorem, et in vincula duci jussit. Adprobantibus sex tribunis actionem collegæ, tres adpellanti Appio auxilio fuerunt; summaque invidia omnium ordinum solus censuram gessit.

XXXV. Dum ea Romæ geruntur, jam Sutrium ab Etruscis obsidebatur: consulique Fabio, imis montibus ducenti ad ferendam opem sociis tentandasque munitiones, si qua posset, acies hostium instructa obcurrit; quorum ingentem multitudinem quum ostenderet subjecta late planicies; consul, ut loco paucitatem suorum adjuvaret, flectit paullulum in clivos agmen, (aspreta erant strata saxis) inde

Fabii præ- lium cum
Etruscis.

U. C. 444 signa in hostem obvertit. Etrusci, omnium, præterquam multitudinis suæ, qua sola freti erant, immemores, prælium ineunt adeo raptim et avide, ut, abjectis missilibus, quo celerius manus consererent, stringerent gladios, vadentes in hostem. Romanus contra nunc tela, nunc saxa, quibus eos adfatum locus ipse armabat, ingerere. Igitur scuta galeæque ictæ quum etiam, quos non vulneraverant, turbarent, (neque subire erat facile ad propiorem pugnam, neque missilia habebant, quibus enim rem gererent) stantes et expositos ad ictus quum jam satis nihil tegeret, quosdam etiam pedem referentes, fluctuantemque et instabilem aciem, redintegrato clamore, strictis gladiis hastati et principes invadunt: eum inpetum non tulerunt Etrusci, versisque signis, fuga effusa castra repetunt. Sed equites Romani, prævecti per obliqua campi, quum se fugientibus obtulissent, omisso ad castra itinere, montes petunt. Inde inermi pene agmine ac vexato vulneribus in silvam Ciminiam penetratum. Romanus, multis millibus Etruscorum cæsis, duodequadraginta signis militaribus captis, castris etiam hostium cum præda ingenti potitur. Tum de persecundo hoste agitari cœptum.

Ciminia
silva.

XXXVI. Silva erat Ciminia magis tum invia atque horrenda, quam nuper fuere Germanici saltus, nulli ad eam diem ne mercatorum quidem adita: eam intrare haud fere quisquam, præter ducem ipsum, audiebat: aliis omnibus cladis Caudinæ nondum memoria aboleverat. Tum ex iis, qui aderant, (consulis fratrem M. Fabium, Kæsonem alii, C. Claudium quidam matre eadem, qua consulem, genitum tradunt) speculatum se iturum professus, bre-

viique omnia certa adlaturum. Cære educatus apud U. C. 444.
hospites, Etruscis iude literis eruditus erat, lin- A. C. 408.
guaniqne Etruscam probe noverat. Habeo auctores,
vulgo tum Romanos pueros, sicut nunc Græcis, ita
Etruscis literis erudiri solitos. Sed proprius est vero
præcipuum aliquid fuisse in eo, qui se tam audaci
simulatione hostibus inmisererit: servus ei dicitur
comes unus fuisse, nutritus una, eoque haud igna-
rus linguæ ejusdem: nec quidquam aliud profieis-
centes, quam summatis regionis, quæ intranda erat,
naturam ac nomina principum in populis accepere;
ne qua inter conloquia insigni nota hæsitantes de-
prehendi possent. Iere pastorali habitu, agrestibus
telis, falcibus gæsisque binis armati. Sed neque
commercium linguæ, nec vestis armorumve habitus
sic eos texit, quam quod abhorrebat ab fide, quem-
quam externum Ciminios saltus intraturum. Usque
ad Camertes Umbros penetrasse dicuntur: ibi, qui
essent, fateri Romanum ausum: introductumque in
senatum consulis verbis egisse de societate amicitia-
que: atque inde comi hospitio acceptum, nunciare
Romanis jussum, commeatum exercitui dierum tri-
ginta præsto fore, si ea loca intrasset; juventutem-
que Camertium Umbrorum in armis paratam im-
perio futuram. Hæc quum relata consuli essent,
inpedimentis prima vigilia præmissis, legionibus post
inpedimenta ire jussis, ipse substitit cum equitatu:
et, luce orta, postero die obequitavit stationibus
hostium, quæ extra saltum dispositæ erant: et,
quum satis diu tenuisset hostem, in castra sese re-
cepit; portaque altera egressus, ante noctem ag-
men adsequitur. Postero die, luce prima, juga Ci-
minii montis tenebat: inde, contemplatus opulentæ

U. C. 444. Etruriæ arva, milites emittit. Ingenti jam abacta
 A. C. 308. præda, tumultuaræ agrestium Etruscorum cohortes,
 repente a principibus regionis ejus concitatæ, Ro-
 manis obcurrunt, adeo incompositæ, ut vindices
 prædarum prope ipsi prædæ fuerint. Cæsis fugatis-
 que iis, late depopulato agro, victor Romanus, opu-
 lentusque rerum omnium copia, in castra rediit. Eo
 forte quinque legati cum duobus tribunis plebis ve-
 nerant, denunciatum Fabio senatus verbis, ne sal-
 tum Ciminum transiret: lætati serius se, quam ut
 impedire bellum possent, venisse, nuncii victoriæ
 Romam revertuntur.

XXXVII. Hac expeditione consulis motum la-
 tius erat, quam profligatum, bellum: vastationem
 namque sub Cimini montis radicibus jacens ora
 senserat, conciveratque indignatione non Etruriæ
 Ingens modo populos, sed Umbriæ finitima. Itaque, quan-
 truscorum exercitus conligitur. tuts non umquam antea, exercitus ad Sutrium ve-
 nit: neque e silvis tantummodo promota castra,
 sed etiam aviditate dimicandi quam primum in cam-
 pos delata acies: deinde instructa primo suo stare
 loco, relicto hostibus ad instruendum contra spatio:
 dein, postquam detractare hostem sensere pugnam,
 ad vallum subeunt. Ubi postquam stationes quoque
 receptas intra munimenta sensere, clamor repente
 circa duces ortus, ut *eo sibi e castris cibaria ejus diei*
deferrī juberent; *mansuros se sub armis, et aut nocte,*
aut certe luce prima castra hostium invasuros. Nihilo
 quietior Romanus exercitus imperio ducis contine-
 tur: decima erat fere diei hora, quum cibum capere
 consul milites jubet; præcipit, ut in armis sint,
 quacumque diei noctisve hora signum dederit. Pau-
 cis milites adloquitur, Samnitium bella extollit, ele-

vat Etruscos : nec hostem hosti, nec multitudinem U. C. 444.
multitudini comparandam ait esse. *Fræterea telum*^{A. C. 308.}
aliud occultum scituros in tempore : interea taceri opus
esse. His ambagibus prodi simulabat hostes, quo
animus militum multitudine territus restineretur :
et, quod sine munimento consederant, verisimilius
erat, quod simulabatur. Curati cibo corpora quieti-
dant, et quarta fere vigilia sine tumultu excitati ar-
ma capiunt. Dolabræ calonibus dividuntur ad val-
lum proruendum fossasque inplendas : intra muni-
menta instruitur acies : delectæ cohortes ad porta-
rum exitus conlocantur : dato deinde signo paullo
ante lucem, quod æstivis noctibus sopitæ maxime Etrisci ob-
quietis tempus est, proruto vallo erupit acies ; stra-^{pressi.}
tos passim invadit hostes : alios immobiles, alios se-
misomnos in cubilibus suis, maximam partem ad ar-
ma trepidantes, cædes obpressit : paucis armandi se-
datum spatum est. Eos ipsos, non signum certum,
non ducem sequentes, fundit Romanus, fugatos
eques persecitur : ad castra, ad silvas diversi ten-
debant. Silvæ tutius dedere refugium : nam castra
in campis sita eodem die capiuntur : aurum argen-
tumque jussum referri ad consulem : cetera præda
militis fuit. Cæsa aut capta eo die hostium millia
ad sexaginta. Eam tam claram pugnam trans
Ciminiam silvam ad Perusiam pugnatam, quidam
auctores sunt ; metuque in magno civitatem fuisse,
ne interclusus exercitus tam infesto saltu, co-
ortis undique Tuscis Umbrisque, obprimeretur.
Sed, ubicumque pugnatum est, res Romana su-
perior fuit : itaque a Perusia, et Cortona, et Arre-
tio, quæ ferme capita Etruriaæ populorum ea tem-
pestate erant, legati, pacem fœdusque ab Roma-

U. C. 444. nis petentes, inducias in triginta annos inpetra-
A. C. 305. verunt.

XXXVIII. Dum hæc in Etruria geruntur, consul alter C. Marcius Rutilus Allifas de Samnitibus vi cepit: multa alia castella vicique, aut deleta hostiliter, aut integra in potestatem venere. Per idem tempus et classis Romana a P. Cornelio, quem senatus maritimæ oræ præfecerat, in Campaniam acta, quum adpulsa Pompeios esset; socii inde navales ad depopulandum agrum Nucerinum profecti, proximis raptim vastatis, unde redditus tutus ad naves esset, dulcedine (ut fit) prædæ longius progressi, excire hostes. Palatis per agros nemo obvius fuit, quum occidione occidi possent: redeuntes agmine incauto haud procul navibus adsecuti agrestes exuerunt præda, partem etiam occiderunt: quæ superfuit cædi, trepida multitudo ad naves compulsa est. Profectio Q. Fabii trans Ciminiam silvam quantum Romæ terrorem fecerat, tam lætam famam in Samnium ad hostes tulerat: *interclusum Romanum exercitum obsideri, cladisque imaginem Furculas Caulinas memorabant: eadem temeritate aridam ulteriorum semper gentem in saltus invios deductam, septam non hostium magis armis, quam locorum iniquitatibus esse.* Jam gaudium invidia quadam miscebatur, quod belli Romani decus ab Samnitibus fortuna ad Etruscos avertisset: itaque armis virisque ad obterendum C. Marcius consulem concurrunt; protinus inde Etruriam per Marsos ac Sabinos petituri, si Marcius dimicandi potestatem non faciat. Obvius iis consul fuit: dimicatum prælio utrimque atroci, atque incerto eventu est: et quum anceps cædes fuisset, adversæ tamen rei fama in Romanos vertit, ob amissos

Classis
Romana.

Anceps
prælrium
cum Sam-
nitibus.

quosdam equestris ordinis, tribunosque militum, at- U. C. 444.
que unum legatum, et (quod insigne maxime fuit) A. C. 308.
consulis ipsius vulnus. Ob hæc etiam aucta fama
(ut solet) ingens terror Patres invasit, dictatorem-
que dici placebat: nec, quin Cursor Papirius dice-
retur, in quo tum summa rei bellicæ ponebatur, du-
biu[m] cuiquam erat: sed nec in Samnum nimicium
perferri, omnibus infestis, tuto posse; nec vivere
Marcium consulem satis fidebant. Alter consul Fa-
bius infestus privatim Papirio erat: quæ ne ira ob-
staret bono publico, legatos ex consularium numero
mittendos ad eum senatus censuit: qui sua quoque
eum, non publica solum, auctoritate moverent, ut
memoriam simultatium patriæ remitteret. Profecti
legati ad Fabium quum senatusconsultum tradidis-
sent, adjecissentque orationem convenientem man-
datis, consul, demissis in terram oculis, tacitus ab
incertis, quidnam acturus esset, legatis recessit:
nocte deinde silentio (ut mos est) L. Papirium Fabius Pa-
dictatorem dixit: cui quum ob animum egregie pirium dic-
victum legati gratias agerent, obstinatum silentium cit.
obtinuit, ac sine responso ac mentione facti sui le-
gatos dimisit, ut adpareret, insignem dolorem in-
genti comprimi animo. Papirius C. Junium Bubul-
cum magistrum equitum dixit: atque ei, legem ci-
riatam de imperio ferenti, triste omen diem diffidit,
quod Faucia curia fuit principium, duabus insignis Fauc.
cladibus, captæ urbis, et Caudinæ pacis: quod utro- curia.
que anno eadem curia fuerat principium. Macer Li-
cinius tertia etiam clade, quæ ad Cremeram accepta
est, abominandam eam curiam facit.

XXXIX. Dictator postero die, auspiciis repudi-

U. C. 444. tis, pertulit legem : et, profectus cum legionibus, ad
 A. C. 305. terrorem traducti silvam Ciminiam exercitus nuper
 scriptis, ad Longulam pervenit : acceptisque a Mar-
 cio consule veteribus militibus, in aciem copias
 eduxit : nec hostes detractare visi pugnam : in-
 structos deinde armatosque (quum ab neutrīs prœ-
 lium inciperet) nox obpressit. Quieti aliquamdiu,
 nec suis diffidentes viribus, nec hostem sernentes,
 stativa in propinquō habuere. Interea res in Etruria
 Res in
 Etruria
 bene gestae. gestae : nam et cum Umbrorum exercitu acie depug-
 natum est ; (fusi tamen magis, quam cæsi, hostes,
 quia cœptam acriter non tolerarunt pugnam) et ad
 Vadimonis lacum Etrusci, lege sacrata coacto ex-
 ercitū, quum vir virum legisset, quantis numquam
 alias antea simul copiis, simul animis, dimicarunt :
 tantoque irarum certamine gesta res est, ut ab neu-
 tra parte emissā sint tela : gladiis pugna cœpit, et,
 acerrime commissa, ipso certamine, quod aliquamdiu
 anceps fuit, accensa est : ut non cum Etruscis to-
 ties victis, sed cum aliqua nova gente, videretur di-
 micatio esse. Nihil ab ulla parte movetur fugæ :
 cadunt antesignani : et, ne nudentur propugnatori-
 bus signa, fit ex secunda prima acies. Ab ultimis
 deinde subsidiis cietur miles ; adeoque ad ultimum
 laboris ac periculi ventum est, ut equites Romani,
 omissis equis, ad primos ordines peditum per arma,
 per corpora evaserint : ea velut nova inter fessos ex-
 porta acies turbavit signa Etruscorum. Secuta deinde
 impetum eorum, utecumque adfecta erat, cetera mul-
 titudo tandem perrumpit ordines hostium. Tunc
 vinci pertinacia cœpta, et averti manipuli quidam :
 et, ut semel dedere terga, etiam certiorem capessere

fugam. Ille primum dies fortuna veteri abundantes U. C. 444.
Etruscorum fregit opes: cæsum in acie, quod robo- A. C. 308.
ris fuit; castra eo in petu capta direptaque.

XL. Pari subinde periculo gloriæque eventu bel- Samnitium
lum in Samnitibus erat; qui, præter ceteros belli acies insig-
adparatus, ut acies sua fulgeret novis armorum in- nibus armis
signibus, fecerunt. Duo exercitus erant: scuta al- fulgens.
terius auro, alterius argento cælaverunt. Forma erat
scuti: summum latius, qua pectus atque humeri te-
guntur, fastigio æquali; ad imum cuneatior, mobi-
litatis caussa: spongia pectori tegumentum; et si-
nistrum crus ocrea tectum: galeæ cristatæ, quæ
speciem magnitudini corporum adderent: tunicæ au-
ratis militibus versicolores, argentatis linteæ can-
didæ: his dextrum cornu datum; illi in sinistro
consistunt. Notus jam Romanis adparatus insig-
nium armorum fuerat; doctique a ducibus erant,
horridum militem esse debere; non cælatum auro et
argento, sed ferro et animis fretum: quippe illa præ-
dam verius, quam arma, esse; nitentia ante rem, de-
formia inter sanguinem et vulnera. Virtutem esse mi-
litis decus, et omnia illa victoriam sequi; et ditem
hostem quamvis pauperis victoris præmium esse. His
Cursor vocibus instinctos milites in prælium ducit:
dextro ipse cornu consistit; sinistro præfecit ma-
gistrum equitum. Simul est concursum, ingens fuit
cum hoste certamen; non segnius inter dictatorem
et magistrum equitum, ub utra parte victoria inci-
peret. Prior forte Junius commovit hostem, lævo
dextrum cornu, sacratos more Samnitium milites,
eoque candida veste et paribus candore armis insig-
nes: *eos se Orco mactare Junius dictitans, quum in-*
tulisset signa, turbavit ordines, et haud dubie in pulit

U.C. 144. aciem. Quod ubi sensit dictator, *Ab lævone cornu*
 A.C. 308. *victoria incipiet?* inquit, *et dextrum cornu, dictatoris*
acies, alienam pugnam sequetur, non partem maximam
victoriæ trahet? Concitat milites: nec peditum vir-
 tuti equites, aut legatorum studia ducibus cedunt.
 M. Valerius a dextro, P. Decius ab lævo cornu, am-
 bo consulares ad equites in cornibus positos eve-
 luntur: adhortatique eos, ut partem secum capes-
 serent decoris, in transversa latera hostium incur-
Vincitur. runt. Is novus additus terror quum ex parte utra-
 que circumvasisset aciem, et ad terrorem hostium
 legiones Romanæ, redintegrato clamore, intulissent
 gradum, tum fuga ab Samnitibus cœpta. Jam strage
 hominum armorumque insignium campi repleri; ac
 primo pavidos Samnites castra sua accepere: deinde
 ne ea quidem retenta: captis direptisque ante noctem
 injectus ignis. Dictator ex senatusconsulto trium-
 phavit: cuius triumpho longe maximam speciem
 captiva arma præbuere: tantum magnificentiae vi-
 sum in iis, ut aurata scuta dominis argentiarum
 ad forum ornandum dividerentur: inde natum ini-
 tiuni dicitur fori ornandi ab ædilibus, quum tensæ
 ducereuntur. Et Romani quidem ad honorem Deum
 insignibus armis hostium usi sunt: Campani, ab
 Samnites
 gladiato-
 res. superbia et odio Samnitium, gladiatores (quod spec-
 taclum inter epulas erat) eo ornatu armarunt,
 Samnitiumque nomine compellarunt. Eodem anno
 cum reliquis Etruscorum ad Perusiam, quæ et ipsa
 induciarum fidem ruperat, Fabius consul nec dubia
 nec difficult victoria dimicat: ipsum oppidum (nam
 ad mœnia vitor accessit) cepisset, ni legati deden-
 tes urbem exissent. Præsidio Perusiæ inposito, le-
 gationibus Etruriæ amicitiam potentibus præ se Ro-

mam ad senatum missis, consul, præstantiore etiam, U. C. 444.
quam dictator, victoria triumphans, urbem est in- A. C. 308.
vectus. Quin etiam devictorum Samnitium decus
magna ex parte ad legatos, P. Decium et M. Vale-
rium, est versum: quos populus proximis comitiis
ingenti consensu consulem alterum, alterum præto-
rem declaravit.

XLI. Fabio ob egregie perdonitam Etruriam U. C. 445.
continuatur consulatus; Decius collega datur. Va- A. C. 307.
lerius prætor quartum creatus. Consules partiti pro-
vincias: Etruria Decio, Samnum Fabio evenit. Is
profectus ad Nuceriam Alfaternam, tum pacem pe-
tentes, quod uti ea, quum daretur, noluissent, ad-
spernatus, obpugnando ad deditio[n]em subegit. Cum Bene res
Samnitibus acie dimicatum: haud magno certamine gesta contra
hostes victi: neque ejus pugnae memoria tradita Samnites.
foret, ni Marsi eo primum prælio cum Romanis bel-
lassent. Secuti Marsorum defectionem Peligni, cam-
dem fortunam habuerunt. Decio quoque alteri con-
suli secunda belli fortuna erat. Tarquinensem metu Contra
subegerat frumentum exercitui præbere, atque indu- Etruscos.
cias in quadraginta annos petere. Volsiniensium cas-
tella aliquot vi cepit: quædam ex iis diruit, ne re-
ceptaculo hostibus essent: circumferendoque passim
bello, tantum terrorem sui fecit, ut nomen omne
Etruseum fœdus ab consule peteret. Ac de eo qui-
dem nihil impetrarem: induciæ annuæ datae: sti-
pendium exercitui Romano ab hoste in eum annum
pensum, et binæ tunicæ in militem exactæ: ea mer-
ces induciarum fuit. Tranquillas res jam Etruscis
turbavit repentina defectio Umbrorum, gentis inte-
græ a cladibus belli, nisi quod transitum exercitus
ager senserat. Ii, concitata omni juventute sua, et

U. C. 445. magna parte Etruscorum ad rebellionem compulsa,
A. C. 307. tantum exercitum fecerant, ut, reliquo post se in
Etruria Decio, ad obpugnandam inde Romanam itu-
ros, magnifice de se, ac contemptim de Romanis lo-
quentes, jactarent. Quod incepsum eorum ubi ad
Decium consulem perlatum est, ad urbem ex Etrur-
ia magnis itineribus pergit, et in agro Pupiniensi
ad famam intentus hostium consedit. Nec Romæ
speruebat Umbrorum bellum: et ipsæ minæ me-
tum fecerant expertis a Gallica clade, quam intutam
urbem incolerent. Itaque legati ad Fabium consu-
lem missi sunt, ut, si quid laxamenti a bello Sam-
nitium esset, in Umbriam propere exercitum duceret.
Dicto paruit consul, magnisque itineribus ad Meva-
niam, ubi tum copiæ Umbrorum erant, perrexit.
Repens adventus consulis, quem procul Umbria in
Samnio bello alio occupatum crediderant, ita exter-
ruit Umbros, ut alii recedendum ad urbes munitas,
quidam omittendum bellum censerent. Plaga una
(Materinam ipsi adpellant) non continuit modo ce-
teros in armis, sed confestim ad certamen egit: cas-
tra vallantem Fabium adorti sunt. Quos ubi effusos
ruere in munimenta consul vidit, revocatos milites
ab opere, prout loci natura tempusque patiebatur,
ita instruxit: cohortatusque prædicatione vera qua
in Tuscis, qua in Samnio partorum decorum, exi-
guam adpendicem Etrusci belli conficere jubet: et
vocis inpiæ pœnas expetere, qua se urbem Roma-
nam obpugnaturos minati sunt. Hæc tanta sunt
alacritate militum audita, ut clamor, sua sponte
ortus, loquentem interpellaverit ducem: ante im-
perium deinde concentu tubarum ac cornuum cursu
effuso in hostem feruntur. Non tamquam in viros

Contra
Umbros.

aut armatos incurruunt : (mirabilia dictu !) signa pri- U. C. 445.
mo eripi cœpta signiferis ; deinde ipsi signiferi trahi A. C. 307.
ad consulem, armatique milites ex acie in aciem
transferri : et, sicubi est certamen, scutis magis,
quam gladiis, geritur res. Umbonibus incussaque
ala sternuntur hostes : plus capitur hominum, quam
cæditur : atque una vox ponere arma jubentium per
totam fertur aciem. Itaque inter ipsum certamen
facta deditio est a primis auctoribus belli : postero
insequentibusque diebus et ceteri Umbrorum populi
deduntur. Oriculani sponsione in amicitiam ac-
cepti.

XLII. Fabius, alienæ sortis victor belli, in suam provinciam exercitum reduxit : itaque ei, ob res tam feliciter gestas, sicut priore anno populus continuauerat consulatum, ita senatus in insequentem annum, quo Ap. Claudius, L. Volumnius consules U. C. 446.
fuerunt, prorogavit, maxime Appio adversante, imperium. Appium censorem petisse consulatum, co- A. C. 306.
mitiaque ejus ab L. Furio tribuno plebis interpel-
lata, donec se censura abdicavit, in quibusdam an-
nalibus invenio. Creatus consul, quum collegæ no-
vum bellum, Sallentini hostes decernerentur, Ro- Sallentini
mæ mansit, ut urbanis artibus opes augeret, quando victi.
belli decus penes alios esset. Volumnium provinciæ
haud pœnituit : multa secunda prœlia fecit : aliquot
urbes hostium vi cepit : prædæ erat largitor, et be-
nignitatem per se gratam comitate adjuvabat : mi-
litemque iis artibus fecerat et periculi et laboris
aviduus. **Q.** Fabius proconsul ad urbem Allifas cum
Samnitium exercitu signis conlatis confligit : mini- Samnites
me ambigua res fuit. Fusi hostes, atque in castra victi.
compulsi : nec castra forent retenta, ni exiguum su-

U. C. 446. perfuisset diei : ante noctem tamen sunt circumses-
 A. C. 305. sa, et nocte custodita, ne quis elabi posset. Postero
 die, vixdum luce certa, deditio fieri cœpta : et pacti,
 qui Samnitium forent, ut cum singulis vestimentis
 emitterentur. Hi omnes sub jugum missi : sociis
 Samnitium nihil cautum : ad septem millia sub cor-
 rona veniere : qui se civem Hernicum dixerat, seor-
 sum in custodia habitus. Eos omnes Fabius Romam
 ad senatum misit : et, quum quæsitum esset, de-
 lectu, an voluntarii pro Samnitibus adversus Roma-
 nos bellassent, per Latinos populos custodiendi dan-

U. C. 447. tur : jussique eam integrum rem novi consules, P.
 A. C. 305. Cornelius Arvina, Q. Marcius Tremulus, (ii enim
 jam creati erant) ad senatum referre : id ægre passi
 Hernici, concilium populorum omnium habentibus
 Anagninis in circu, quem Maritimum vocant, præter
 Alatrinatem, Ferentinatemque, et Verulanum, om-
 nes Hernici nominis populo Romano bellum in-
 dixerunt.

XLIII. In Samnio quoque, quia decesserat inde
 Fabius, novi motus exorti. Calatia et Sora, præsi-
 diaque, quæ in iis Romana erant, expugnata : et in
 captivorum corpora militum fœde sœvitum : itaque
 eo P. Cornelius cum exercitu missus. Marcio novi
 hostes (jam enim Anagninis Hernicisque aliis bel-
 lumi jussum erat) decernuntur. Primo ita omnia op-
 portuna loca hostes inter consulum castra interce-
 perunt, ut pervadere expeditus nuncius non posset,
 et per aliquot dies incerti rerum omnium, suspensi-
 que de statu alterius, uterque consul ageret, Ro-
 manque is metus manaret ; adeo ut omnes juniores
 sacramento adigerentur, atque ad subita rerum duo
 justi scriberentur exercitus. Ceterum Hernicum bel-

Iun nequaquam pro præsenti terrore ac vetustate U.C. 447.
gentis gloriae fuit : nihil usquam dictu dignum ausi,
A.C. 305.
trinis castris intra paucos dies exuti, triginta dierum
inducias, ita ut ad senatum Romanam legatos mitte-
rent, pacti sunt bimestri stipendio frumentoque, et
singulis in militem tunicis. Ab senatu ad Marcium
rejecti, cui senatusconsulto permissum de Hernicis
erat : isque eam gentem in ditionem accepit. Et
in Samnio alter consul superior viribus, locis impe-
ditior erat. Omnia itinera obseperant hostes, sal-
tusque pervios ceperant, ne qua subvehi commieatus
possent : neque eos, quum quotidie signa in aciem
consul proferret, elicere ad certamen poterat : satis-
que adparcbat, neque Samnitum certamen præsens,
nec Romanum dilationem belli laturum. Adventus
Marcii, qui, Hernicis subactis, maturavit collegæ ve-
nire auxilio, moram certaminis hosti exemit : nam,
ut qui ne alteri quidem exercitui se ad certamen cre-
didissent pares, conjungi utique passi duos consula-
res exercitus nihil crederent superesse spei, adven-
tentem incomposito agmine Marcium adgrediuntur.
Raptim conlatæ sarcinæ in medium ; et, prout tem-
pus patiebatur, instructa acies. Clamor primum in
stativa perlatus, dein conspectus procul pulvis, tu-
multum apud alterum consulem in castris fecit : is-
que, confestim arma capere jussis, raptimque eductis
in aciem militibus, transversam hostium aciem, at-
que alio certamine occupatam, invadit ; clamitans,
summum flagitium fore, si alterum exercitum utriusque
victoriae compotem sinerent fieri, nec ad se sui belli
vindicarent decus. Qua inpetum dederat, perrumpit ; Victi Sam-
aciemque per medianam in castra hostium tendit, et
vacua defensoribus capit atque incendit. Quæ ubi
nites.

U. C. 447. flagrantia Marcianus miles conspexit, et hostes re-
A. C. 305. spexere, tum passim fuga cœpta Samnitium fieri : sed omnia obtinet cædes, nec in ullam partem tutum perfugium est. Jam, triginta millibus hostium cæsis, signum receptui consules dederant, conligebantque in unum copias, in vicem inter se gratantes : quum repente visæ procul hostium novæ cohortes, quæ in supplementum scriptæ fuerant, integravere cædem : in quas, nec jussu consulū, nec signo accepto, victores vadunt ; *malo tirocinio inbuendum Samnitēm*, clamitantes. Indulgent consules legionum ardori, ut qui probe scirent, novum militem hostium inter perculsos fuga veteranos ne tentando quidem satis certamini fore. Nec eos opinio fefellit : omnes Samnitium copiæ, veteres novæque, montes proximos fuga capiunt : eo et Romana erigitur acies ; nec quidquam satis tuti loci victis est : et de jugis, quæ ceperant, funduntur ; jamque una voce omnes pacem petebant. Tum, trium mensium frumento imperato, et annuo stipendio, ac singulis in militem tunicis, ad senatum pacis oratores missi. Cornelius in Samnio relietus. Marcius de Hernicis triumphans in urbem rediit ; statuaque equestris in foro decreta est, quæ ante templum Castoris posita est. Hernicorum tribus populis, Alatrinati, Verulano, Ferentinati, quia maluerunt, quam civitatem, suæ leges redditæ : connubiumque inter ipsos, quod aliquamdiu soli Hernicorum habuerunt, permissum. Anagninis, quiq[ue] arma Romanis intulerant, civitas sine suffragii latione data : concilia connubiaque ademta : et magistratibus, præterquam sacrorum curatione, interdictum. Eodem anno ædes Salutis a C. Junio Bubulco censore locata est, quam consul bello Sam-

nitium voverat: ab eodem collegaque ejus M. Vale- U. C. 447.
rio Maximo viæ per agros publica impensa factæ. A. C. 305.
Et cum Karthaginiensibus eodem anno fœdus tertio Karthagini-
renovatum: legatisque eorum, qui ad id venerant, gati.
comiter munera missa.

XLIV. Dictatorem idem annus habuit P. Cornelius Scipionem, cum magistro equitum P. Decio Mure: ab iis, propter quæ creati erant, comitia consularia habita, quia neuter consulum potuerat bello abesse. Creati consules L. Postumius, Ti. Minucius. Hos consules Piso Q. Fabio et P. Decio subgerit, biennio exemto, quo Claudium Volumniumque, et Cornelium cum Marcio consules factos tradidimus: memoriane fugerit in annalibus digerendis, an consulto binos consules, falsos ratus, transcederit, incertum est. Eodem anno in campum Stellatem agri Campani Samnitium incursiones factæ. Itaque ambo consules, in Samnum missi, quum diversas regiones, Tifernum Postumius, Bovianum Minucius, petissent; Postumii prius ductu ad Tifernum pugnatum. Alii haud dubie Samnites victos, ac viginti millia hominum capta tradunt: alii Marte æquo discessum, et Postumium, metum simulantem nocturno itinere, clam in montes copias abduxisse: hostes secutos duo millia inde locis nūnitis et ipsos consedisse. Consul, ut stativa tuta copiosaque (et ita erant) petisse videretur, postquam et munitamentis castra firmavit, et omni adparatu rerum utiliā instruxit; relicto firmo præsidio, de vigilia tertia, qua duci proxime potest, expeditas legiones ad collegam, et ipsum adversus alios sedentem, ducit: ubi, auctore Postumio, Minucius cum hostibus signa confert; et, quum anceps prælium Samnites vincuntur.

U. C. 448. in multum dici processisset, tum Postumius integris
 A. C. 304. legionibus defessam jam aciem hostium improviso invadit. Itaque, quum lassitudo ac vulnera fugam quoque præpedissent, occidione occisi hostes, signa unum et viginti capta: atque inde ad castra Postumii perrectum. Ibi duo victores exercitus percussum jam fama hostem aborti fundunt fugantque: signa militaria sex et viginti capta, et imperator Samnium Statius Gellius, multique alii mortales, et castra utraque capta: et Bovianum, ubi postero die cœptum obpugnari, brevi capit: magna gloria rerum gestarum consules triumpharunt. Minucium consulem, cum vulnere gravi relatum in castra, mortuum, quidam auctores sunt, et M. Fulvium in locum ejus consulem subfectum: et ab eo, quum ad exercitum Minucii missus esset, Bovianum captum. Eodem anno Sora, Arpinum, Censennia, recepta ab Samnitibus. Herculis magnum simulacrum in Capitolio positum dedicatumque.

U. C. 449. XLV. P. Sulpicio Saverrione, P. Sempronio Sopho consulibus, Samnites, seu finem, seu dilationem belli quærentes, legatos de pace Romam misere: quibus suppliciter agentibus responsum est, *nisi sæpe Pacem petunt Samnites.* bellum parantes pacem petissent Samnites, oratione ultro citroque habita, de pace transigi potuisse: nunc, quando verba rana ad id locorum fuerint, rebus standum esse. P. Sempronium consulem cum exercitu brevi in Samnio fore: eum, ad bellum pacemne inclinent animi, falli non posse: comperta omnia senatui relaturn: decedentem ex Samnio consulem legati sequerentur. Eo anno quum pacatum Samnium exercitus Romanus, benigne præbito commeatu, peragrasset, fœdus antiquum Samnitibus redditum. Ad Æquos

inde veteres hostes, ceterum per multos annos sub U.C. 449.
 specie infidæ pacis quietos, versa arma Romana : A.C. 303.
 quod, incolumi Hernico nomine, missitaverant simul
 cum iis Samniti auxilia ; et, post Hernicos subactos,
 universa prope gens, sine dissimulatione consilii pub-
 lici, ad hostes desciverat : et postquam, icto Romæ
 cum Samnitibus fœdere, feiales venerant res repe-
 titum, *tentationem* aiebant esse, ut, *terrore incusso*
belli, *Romanos se fieri paterentur* : *quod quantopere*
optandum foret, *Hernicos docuisse* : *quum, quibus li-*
cuerit, suas leges Romanæ civitati præoptaverint : *qui-*
bis legendi, quid malling, copia non fuerit, pro pena
necessariam civitatem fore. Ob hæc vulgo in conciliis Bellum
 jactata, populus Romanus bellum fieri Æquis jussit : ^{cum} Æquis.
 consulesque ambo, ad novum profecti bellum, qua-
 tuor millibus a castris hostium consederunt. Æquo-
 rum exercitus, (ut qui suo nomine perimulos annos
 inbelles egissent) tumultuario similis, sine ducibus
 certis, sine imperio, trepidare : alii exeundum in
 aciem, alii castra tuenda censem : movet plerosque
 vastatio futura agrorum, ac deinceps cum levibus
 præsidiis urbium relictarum excidia. Itaque, post-
 quam inter multas sententias una, quæ, omissa cura
 communium, ad respectum suarum quemque rerum
 vertisset, audita ; ut prima vigilia diversi e castris
 ad deportanda omnia tuendaque mœnibus in urbes
 abirent ; cuncti eam sententiam ingenti adsensu ac-
 cepere. Palatis hostibus per agros, prima luce Ro-
 mani, signis prolatis, in acie consistunt ; et, ubi ne-
 mo obvius ibat, pleno gradu ad castra hostium ten-
 dunt. Ceterum, postquam ibi neque stationes pro
 portis, nec quemquam in vallo, nec fremitum con-
 vertum castrorum animadverterunt ; insolito silentio

U. C. 449. moti, metu insidiarum subsistunt : transgressi deinde
 A. C. 303. vallum, quum deserta omnia invenissent, pergun-
 hostem vestigiis sequi : sed vestigia, in omnes æque
 ferentia partes, ut in dilapsis passim, primo errorem
 faciebant ; post, per exploratores compertis hostium
 consiliis, ad singulas urbes circumferendo bello,
 unum et quadraginta oppida intra dies quinquaginta
 omnia obpugnando ceperunt ; quorum pleraque di-
 ruta atque incensa, nomenque *Æquorum* prope ad
 internacionem deletum. De *Æquis* triumphatum :
 exemploque eorum clades fuit, ut Marrucini, Marsi,
 Peligni, Frentani mitterent Romam oratores pacis
 petendæ amicitiæque : iis populis fœdus potentibus
 datum.

C. Flavius
 ædilis cu-
 rulis.

XLVI. Eodem anno Cn. Flavius Cn. filius scriba,
 patre libertino, humili fortuna ortus, ceterum calli-
 dus vir et facundus, ædilis curulis fuit. Invenio in
 quibusdam annalibus, quum adpareret ædilibus, fie-
 rique se pro tribu ædilem videret, neque accipi no-
 men, quia scriptum faceret ; tabulam posuisse, et
 jurasse, se scriptum non facturum : quem aliquanto
 ante desisse scriptum facere, arguit Macer Licinius,
 tribunatu ante gesto triumviratibusque, nocturno al-
 tero, altero coloniæ deducendæ. Ceterum (id quod
 haud discrepat) contumacia adversus contemnentes
 humilitatem suam nobiles certavit : civile jus, repo-
 situm in penetralibus pontificum, evulgavit, fastos-
 que circa forum in albo proposuit, ut, quando lege
 agi posset, sciretur : ædem Concordiæ in area Vul-
 cani summa invidia nobilium dedicavit ; coactusque
 consensu populi Cornelius Barbatus pontifex maxi-
 mus verba præire, quum more majorum negaret, ni-
 si consulem aut imperatorem, posse templum dedi-

care. Itaque ex auctoritate senatus latum ad popu- U. C. 449.
lum est, ne quis templum aramve injussu senatus A. C. 303.
aut tribunorum plebei partis majoris dedicaret.
Haud memorabilem rem per se, nisi documentum
sit adversus superbiam nobilium plebeiae libertatis,
referam. Ad collegam ægrum visendi caussa Flavius
quum venisset, consensuque nobilium adolescentium,
qui ibi adsidebant, adsurrectum ei non esset, curu-
lem adferri sellam eo jussit, ac sede honoris sui
anxios invidia inimicos spectavit. Ceterum Flavium
dixerat ædilem forensis factio, Ap. Claudii censura
vires nacta, qui senatum primus libertinorum filiis
lectis inquinaverat: et postquam eam lectionem ne-
mo ratam habuit, nec in curia adeptus erat, quas pe-
tierat, opes urbanas; humilibus per omnes tribus di-
visis, forum et campum conrupit: tantumque Flavii
comitia indignitatis habuerunt, ut plerique nobilium
annulos aureos et phaleras deponerent. Ex eo tem-
pore in duas partes discessit civitas: aliud integer
populus, fautor et cultor bonorum, aliud forensis
factio tenebat; donec Q. Fabius et P. Decius cen- Forensis
sores facti: et Fabius, simul concordiae caussa, si- turba in
mul ne humillimorum in manu comitia essent, om- tribus ur-
banas con- jaæta.
nem forensem turbam excretam in quatuor tribus
conjecit, urbanasque eas adpellavit: adeoque eam
rem acceptam gratis animis ferunt, ut Maximii cog-
nomen, quod tot victoriis non pepererat, hac ordi-
num temperatione pareret. Ab eodem institutum
dicitur, ut equites Idibus Quinctilibus transvehe-
rentur.

EPITOME LIBRI X.

COLONIÆ deductæ sunt *Sora*, et *Alba*, et *Carseoli*.
Marsi in dditionem accepti sunt. Collegium augurum ampliatum est, ut essent novem, quum antea quaterni fuissent. Lex de provocatione ad populum a Valerio consule tunc tertium lata est. Duæ tribus adjectæ sunt, *Aniensis* et *Terentina*. Samnitibus bellum indictum, et adversus eos sæpe prospere pugnatum est. Quum adversus *Etruscos*, *Umbros*, *Samnites*, *Gallos*, *P. Decio* et *Q. Fabio* ducibus, pugnaretur, Romanusque exercitus in maximo esset discrimine, *P. Decius*, secutus exemplum patris, devorit se pro exercitu, et morte sua victorium ejus pugnæ populo Romano dedit. Papirius Cursor Samnitium exercitum, qui jurejurando obstrictus, quo majore constantia virtutis pugnaret, in aciem descenderat, fudit. Census actus est: lustrum conditum: censa sunt civium capita ducenta sexaginta duo millia, et trecenta viginti duo.

T. LIVII PATAVINI

LIBER X.

L. GENUCIO, Ser. Cornelio consulibus, ab ex- U. C. 450.
ternis ferme bellis otium fuit. Soram atque A. C. 302.
Albam coloniæ deductæ. Albam in Æquos sex mil-
lia colonorum scripta. Sora agri Volsei fuerat; sed
possederant Samnites: eo quatuor millia hominum
missa. Eodem anno Arpinatibus Trebulanisque ci-
vitas data. Frusinates tertia parte agri damnati,
quod Hernicos ab eis sollicitatos compertum; capi-
taque conjurationis ejus, quæstione ab consulibus
ex senatusconsulto habita, virgis cæsi ac securi per-
cussi. Tamen, ne prorsus inbellem agerent annum,
parva expeditio in Umbria facta est; quod nuncia- Latrones in
batur, ex spelunca quadam excursiones armatorum spelunca
in agros fieri. In eam speluncam penetratum cum obpressi.
signis est: et ex eo loco obscuro multa vulnera ac-
cepta, maximèque lapidum ictu; donec, altero spe-
cus ejus ore (nam pervius erat) invento, utræque
fauces congestis lignis accensæ: ita intus funio ac
vapore ad duo millia armatorum, ruentia novissime
in ipsas flamas, dum evadere tendunt, absunta.
Marcis Livio Dentre et Æmilio consulibus, redinte- U. C. 451.
gratum Æquicum bellum. Coloniam, ægre patientes A. C. 301.
velut arcem suis finibus inpositam, summa vi expug-
nare adorti, ab ipsis colonis pelluntur. Ceterum

U. C. 451. tantum Romæ terrorem fecere, quia vix credibile
 A. C. 301. erat, tam adfectis rebus solos per se Æquos ad bellum coortos, ut tumultus ejus caussa dictator diceatur.
 C. Junius retur C. Junius Bubulcus: is, cum M. Titinio magistro equitum prefectus, primo congressu Æquos subegit, ac, die octavo triumphans in urbem quum redisset, ædem Salutis, quam consul voverat, censor locaverat, dictator dedicavit.

Cleonymus Laeon.

II. Eodem anno classis Græcorum, Cleonymo duce Lacedæmonio, ad Italæ litora adpulsa, Thurias urbem in Sallentinis cepit. Adversus hunc hostem consul Æmilius missus prælio uno fugatum compulit in naves. Thuriæ redditæ veteri cultori: Sallentinoque agro pax parta. Junium Bubulcum dictatorem missum in Sallentinos, in quibusdam annalibus invenio: et Cleonymum prius, quam confligendum esset cum Romanis, Italia excessisse: circumvectus inde Brundisii promontorium, medioque sinu Hadriatico ventis latus, quum lœva importuosa Italæ litora, dextra Illyrii Liburnique et Istri, gentes feræ, et magna ex parte latrociniis maritimis infames, ternerent, penitus ad litora Venetorum pervenit: ibi expositis paucis, qui loca explorarent, quum audisset, tenue prætentum litus esse; quod transgressis stagna ab tergo sint, inrigua æstibus maritimis; agros haud procul proximos campestres cerni; ulteriora colles; inde esse ostium fluminis præalti, quo circumagi naves in stationem tutam vidisse: (Meduacus amnis erat) eo in vectam classem subire flumine adverso jussit. Gravissimas navium non pertulit alveus fluminis: in leviora navigia transgressa multitudo armatorum ad frequentes agros, tribus maritimis Patavinorum vicis colentibus eam oram,

pervenit. Ibi egressi, levi præsidio navibus relichto, U. C. 451.
 vicos expugnant, inflammant tecta, hominum pecu- A. C. 301.
 dumque prædas agunt, et dulcedine prædandi lon-
 gius usque a navibus procedunt. Hæc ubi Patavium
 sunt nunciata, (semper autem eos in armis adcolæ
 Galli habebant) in duas partes juventutem dividunt:
 altera in regionem, qua effusa populatio nunciabat-
 tur; altera, ne cui prædonum obvia fieret, altero
 itinere ad stationem navium (millia autem quatuor-
 decim ab oppido aberat) ducta. In naves parvas,
 custodibus interemtis, in petus factus; terraque
 nautæ coguntur naves in alteram ripam amnis
 transjicere: et in terra prosperum æque in palatos
 prædatores prælium fuerat: refugientibusque ad
 stationem Græcis Veneti obsistunt. Ita in medio
 circumventi hostes cæsique; pars capti classem in-
 dicant regemque Cleonymum tria millia abesse.
 Inde, captivis proximo vico in custodiam datis, pars
 fluviales naves, ad superanda vada stagnorum apte
 planis alveis fabricatas, pars captiva navigia armatis
 complent: profectique ad classem, immobiles naves,
 et loca ignota plus, quam hostem, timentes, circum-
 vadunt: fugientesque in altum acrius, quam repug-
 nantes, usque ad ostium amnis persecuti, captis qui-
 busdam incensisque navibus hostium, quas trepidatio
 in vada intulerat, victores revertuntur. Cleony-
 mus, vix quinta parte navium incolumi, nulla regi-
 one maris Hadriatici prospere adita, discessit. Ros-
 tra navium spoliaque Laconum, in æde Junonis ve-
 teri fixa, multi supersunt, qui viderunt. Patavii mo-
 numentum navalis pugnæ eo die, quo pugnatum est,
 quotannis sollempni certamine navium in flumine op-
 pidi medio exercetur.

U.C. 451. III. Eodem anno Romæ cum Vestinis, petentibus
A.C. 301. amicitiam, ictum est fœdus. Multiplex deinde ex-
Fœdus ortus terror. Etruriam rebellare, ab Arretinorum
cum Ve- seditionibus motu orto, nunciabatur: ubi Cilnium
stinis. genus præpotens, divitiarum invidia pelli armis cœp-
M. Vale- tum: simul Marsos agrum vi tueri, in quem colonia
rius dicta- Carseoli deducta erat, quatuor millibus hominum
tor. scriptis. Itaque propter eos tumultus dictus M. Va-
lerius Maximus dictator, magistrum equitum sibi le-
git M. Æmilium Paullum: id magis credo, quam
Q. Fabium ea ætate atque eis honoribus Valerio
subjectum: ceterum ex Maximi cognomine ortum
errorem haud abnuerim. Profectus dictator cum ex-
ercitu prœlio uno Marsos fundit: compulsis deinde
in urbes munitas, Milioniam, Plestinam, Fresiliam,
intra dies paucos cepit: et parte agri multatis Mar-
Etruscum sis fœdus restituit. Tum in Etruscos versum bel-
bellum: et, quum dictator auspiciorum repetendorum
caussa profectus Romam esset, magister equitum,
pabulatum egressus, ex insidiis circumvenitur; sig-
nisque aliquot amissis, fœda militum cæde ac fuga
in castra est compulsus: qui terror non eo tantum
a Fabio abhorret, quod si qua alia arte cognomen
suum æquavit, tum maxime bellicis laudibus: sed
etiam, quod, memor Papirianæ sævitiæ, numquam,
ut dictatoris injussu dimicaret, adduci potuisset.

IV. Nunciata ea clades Romam majorem, quam
res erat, terrorem excivit: nam, ut exercitu deleto,
ita justitium indictum; custodiæ in portis, vigiliæ
vicatim exactæ; arma, tela in muros congesta. Om-
nibus junioribus sacramento adactis, dictator, ad
exercitum missus, omnia spe tranquilliora et com-
posita magistri equitum cura, castra in tutiorem lo-

cum redacta, cohortes, quæ signa amiserant, extra U. C. 451.
 vallum sine tentoriis destitutas invenit; exercitum A. C. 301.
 avidum pugnæ, quo maturius ignominia aboleretur.
 Itaque confestim castra inde in agrum Rusellatum
 promovit. Eo et hostes secuti: et quamquam ex
 bene gesta re summam et in aperto certamine virium
 spem habebant; tamen insidiis quoque, quas felici-
 ter experti erant, hostem tentant. Tecta semiruta
 vici, per vastationem agrorum deusti, haud procul
 castris Romanorum aberant. Ibi additis armatis,
 pecus in conspectu præsidii Romani, cui præerat
 Cn. Fulvius legatus, propulsum: ad quam inlece-
 bram quum moveretur nemo ab Romana statione,
 pastorum unus, progressus sub ipsas munitiones, in-
 clamat alios, cunctanter ab ruinis vici pecus propel-
 lentes, *quid cessarent, quum per media castra Roma-
 na tuto agere possent?* Hæc quum legato Cærites
 quidam interpretarentur, et per omnes manipulos
 militum indignatio ingens esset, nec tamen injussu
 movere auderent; jubet peritos linguae adtendere
 animum, pastorum sermo agresti, an urbano, pro-
 pior esset. Quum referrent, sonum linguae, et cor-
 porum habitum, et nitorem, cultiora, quam pasto-
 ralia, esse; *ite igitur, dicite, inquit, detegant nequid-*
quam conditæ insidias: omnia scire Romanum: nec
magis jam dolo capi, quam armis vinci, posse. Hæc
 ubi auditæ sunt, et ad eos, qui considerant in insi-
 diis, perlata, consurrectum répente ex latebris est,
 et in patentem ad conspectum undique campum pro-
 lata signa. Visa legato major acies, quam quæ ab
 suo præsidio sustineri posset: itaque propere ad
 dictatorem auxilia adcitum mittit; interea ipse in-
 petus hostium sustinet.

U. C. 451. V. Nuncio addato, dictator signa ferri, ac sequi
A. C. 301. armatos jubet; sed celeriora prope omnia imperio
erant. Rapta extemps signa armaque; et vix ab
inpetu et cursu tenebantur; quum ira ab accepta
nuper clade stimulabat, tum concitatiō accidens
clamor ab increscente certamine. Urgent itaque
alii alios, hortanturque signiferos, ut ocios eant:
quo magis festinantes videt dictator, eo impensis
retentat agnien, ac sensim incedere jubet. Etrusci
contra, principio exciti pugnæ, omnibus copiis ade-
rant. Et super alios alii nunciant dictatori, omnes
legiones Etruscorum capessisse pugnam; nec jam
ab suis resisti posse: et ipse cernit ex superiore lo-
co, in quanto discriminè præsidium esset. Ceterum,
satis fretus esse etiam nunc tolerando certamini le-
gatum, nec se procul abesse periculi vindicem, quam
maxime vult fatigari hostem, ut integris adoriantur
viribus fessos. Quamquam lente procedunt, jam ta-
men ad inpetum capiendum, equiti utique, modicum
erat spatium: prima incedebant signa legionum, ne
quid occultum aut repentinum hostis timeret: sed
reliquerat intervalla inter ordines peditum, qua satis
laxo spatio equi permitti possent. Pariter sustulit
clamorem acies; et emissus eques libero cursu in
hostem invehitur, incompositisque adversus eques
trem procellam subitum pavorem obfundit. Itaque,
ut prope serum auxilium jam pene circumventis, ita
universa requies data est: integri accepere pugnam:
nec ea ipsa longa, aut anceps fuit. Fusi hostes castra
repetunt, inferentibusque jam signa Romanis ce-
dunt, et in ultimam castrorum partem congregantur.
Haerent fugientes in angustiis pertarum: pars mag-
na aggerem vallumque condescendunt, si aut ex supe-

riore loco tueri se, aut superare aliqua et evadere U.C. 451.
possent. Forte quodam loco male densatus agger A.C. 301.
pondere superstantium in fossam procubuit: atque
ea quum Deos pandere viam fugæ conclamassent,
plures inermes, quam armati, evadunt. Hoc prœlio
fractæ iterum Etruscorum vires: et, pacto annuo
stipendio, et duum mensium frumento, permissum
ab dictatore, ut de pace legatos mitterent Romam.
Pax negata: inducæ biennii datæ: dictator trium-
phans in urbem rediit. Habeo auctores, sine ullo
memorabili prœlio pacatam ab dictatore Etruriam
esse, seditionibus tantum Arretinorum compositis,
et Cilnio genere cum plebe in gratiam reducto. Con-
sul ex dictatura factus M. Valerius: non petente,
atque adeo etiam absentem, creatum credidere qui-
dam; et per interregem ea comitia facta: id unum
non ambigitur, consulatum cum Appuleio Pansa
gessisse.

VI. M. Valerio et Q. Appuleio consulibus, satis U.C. 452.
pacatæ foris res fuere. Etruscum adversa belli res A.C. 300.
et inducæ quietum tenebant: Samnitum, multorum
annorum cladibus domitum, haudum fœderis novi
pœnitebat. Romæ quoque plebem quietam et exo-
neratam deducta in colonias multitudo præstabat:
tamen, ne undique tranquillæ res essent, certamen
injectum inter primores civitatis, patricios plebeios-
que, ab tribunis plebis Q. et Cu. Oculniis: qui, un- Certamen
dique criminandorum Patrum apud plebem occasio- inter patri-
nibus quæsiti, postquam alia frustra tentata erant, cios et ple-
eam actionem suscepérunt, qua non infimam plebem beios, de
accenderent, sed ipsa capita plebis, consulares trium- sacerdotiis
phalesque plebeios: quorum honoribus nihil, præter
sacerdotia, quæ nondum promiscua erant, decesset.

U. C. 452. Rogationem ergo promulgarunt, ut, quum quatuor
A. C. 300. augures, quatuor pontifices ea tempestate essent,
placeretque augeri sacerdotum numerum, quatuor
pontifices, quinque angures, de plebe omnes, adle-
gerentur. Quemadmodum ad quatuor augurum nu-
merum, nisi morte duorum, id redigi collegium po-
tuerit, non invenio; quum inter augures constet,
inparem numerum debere esse, ut tres antiquæ tri-
bus, Ramnes, Titienses, Luceres, suum quæque au-
gurem habeant; aut, si pluribus sit opus, pari inter
se numero sacerdotes multiplicent: sicut multipli-
cati sunt, quum ad quatuor quinque adjecti novem
numerum, ut terni in singulas essent, expleverunt.
Ceterum, quia de plebe adlegebantur, juxta eam rem
ægre passi Patres, quam quum consulatum vulgari
viderent. Simulabant ad Deos id magis, quam ad se,
pertinere: ipsos visuros, ne sacra sua polluantur:
id se optare tantum, ne qua in rempublicam clades
veniat. Minus autem tetendere, adsueti jam tali ge-
nere certaminum vinci: et cernebant, adversarios
non id, quod olim vix speraverint, affectantes mag-
nos honores, sed omnia jam, in quorum spem du-
biā erat certatum, tamen adeptos, multiples con-
sulatus, censurasque et triumphos.

VII. Certatum tamen suadenda dissuadendaque
lege inter Ap. Claudium maxime ferunt, et inter P.
Decium Murem: qui quum eadem fermie de jure Pa-
trum ac plebis, quæ pro lege Licinia quondam con-
traque eam dicta erant, quum plebeis consulatus ro-
gabatur, disseruissent; retulisse dicitur Decius pa-
rentis sui speciem, qualem eum multi, qui in con-
cione erant, viderant, incinctum Gabino cultu, su-
per telum stantem, quo se habitu pro populo ac

legionibus Romanis devovisset : *tum P. Decium consulem purum piumque Deis immortalibus visum, æque ac si T. Manlius collega ejus devoreretur : eumdem P. Decium, qui sacra publica populi Romani faceret, legi rite non potuisse ? id esse periculum, ne suas preces ministrarent Dii, quam Ap. Claudiū ? castius eum satidis era privata facere, et religiosius Deos colere, quam se ? quem pænitere rororum, quæ pro republica nuncupaverint tot consules plebeii, tot dictatores, aut ad exercitus eentes, aut inter ipsa bella ? Numerarentur duces eorum annorum, quibus plebeiorum ductu et auspicio res geri captæ sunt : numerarentur triumphi : jam ne nobilitatis quidem suæ plebeios pænitire : pro certo habere, si quod repens bellum oriatur, non plus spei fore senatui populoque Romano in patriciis, quam in plebeiis dueibus. Quod quum ita se habeat, cui Deorum hominumre indignum videri potest, inquit, eos viros, quos vos sellis curulibus, toga prætexta, tunica palmata, et toga picta, et corona triumphali luureaque honoraritis, quorum domos spoliis hostium adfixis insignes inter alias feceritis, pontificalia atque auguralia insignia adjicere ? qui, Joris optimi maximi ornatu decoratus, curru aurato per urbem vectus in Capitolium adscenderit, si conspiciuntur eum capide ac lituo, capite velato vietim cædat, auguriumre ex arce capiat ? Cujus imaginis titulo consulatus, censuraque, et triumphus, æquo animo legetur ; si auguratum aut pontificatum adjeceritis, non sustinebunt legentium oculi ? Evidem (pace dixrim Deum) eos nos jam populi Romani beneficio esse spero, qui sacerdotiis non minus reddamus dignatione nostra honoris, quam accepemus ; et Deorum magis, quam nostra caussa expetimus, ut, quos privatim colimus, publice colamus.*

U. C. 452. VIII. *Quid autem ego sic adhuc egi, tamquam integræ sit caussa patriciorum de sacerdotiis, et non jam in possessione unius amplissimi simus sacerdotii? Decemviro[s] sacris faciundis, carminum Sibyllæ ac fatorum populi hujus interpres, antistites eosdem Apollinaris sancti ceremoniarumque aliarum, plebeios videmus. Nec tum patriciis ulla injuria facta est, quum duumviris sacræ faciundis adjectus est propter plebeios numerus: et nunc tribunus, vir fortis ac strenuus, quinque augurum loca, quatuor pontificum adjecit, in quæ plebeii nominentur; non ut vos, Appi, vestro loco pellant, sed ut adjurent vos homines plebeii divinis quoque rebus procurandis, sicut in ceteris humanis pro parte virili adjurant. Noli erubescere, Appi, collegam in sacerdotio habere, quem in censura, quem in consulatu collegam habere potuisti: cuius tam dictatoris magister equitum, quam magistri equitum dictator esse potes. Sabinum advenam, principem nobilitatis vestræ, seu Attum Clasum, seu Ap. Claudium mavultis, illi antiqui patricii in suum numerum acceperunt. Ne fastidieris nos in sacerdotum numerum accipere: multa nobiscum decora adferimus: immo omnia eadem, quæ vos superbos fecerunt. L. Sextius primus de plebe consul est factus. C. Licinius Stolo primus magister equitum, C. Marcius Rutilus primus et dictator et censor, Q. Publilius Philo primus prætor. Semper ista audita sunt eadem, penes vos auspicia esse, vos solos gentem habere, vos solos justum imperium et auspicium domi militiæque. Æque adhuc prosperum plebeium ac patricium fuit, porroque erit. Enimquam fando audistis, patricios primo esse factos, non de caelo demissos, sed qui patrem ciere possent, id est, nihil ultra quam ingenuos? Consulem jam patrem ciere possum, arumque*

A. C. 300.

jam poterit filius mens. Nihil est aliud in re, Quirites, U. C. 452.
nisi ut omnia negata adipiscamur: certamen tantum A. C. 300.
patricii petunt, nec curant, quem eventum certaminum
habeant. Ego hanc legem, quod bonum, faustum, fe-
lixque sit robis ac reipublicæ, uti rogas, jubendam
censeo.

IX. Vocare tribus extemplo populus jubebat, adparebatque accipi legem: ille tamen dies est intercessione sublatus: postero die, deterritis tribunis, ingenti consensu accepta est. Pontifices suasor legis P. Decius Mûs, P. Sempronius Sophus, et augures plebeii. C. Marcius Rutilus, M. Livius Denter. Quinque augures item de plebe, C. Genucius, P. Ælius Pætus, M. Minucius Fessus, C. Marcius, T. Publilius. Ita octo pontificum, novem augurum numerus factus. Eodem anno M. Valerius consul de provocatione Lex de prolegem tulit, diligentius sanctam: tertio ea tum post vocatione reges exactos lata est, semper a familia eadem. Caussam renovandæ sæpius haud aliam fuisse reor, quam quod plus paucorum opes, quam libertas plebis, poterant. Porcia tamen lex sola pro tergo ci- Porcia lex. vium lata videtur: quod gravi poena, si quis verberasset necassetve civem Romanum, sanxit. Valeria lex, quum eum, qui provocasset, virgis cædi, securique necari vetuisset, si quis adversus ea fecisset, nihil ultra, quam inprobe factum, adjecit. Id (qui tum pudor hominum erat) visum, credo, vincium satis validum legis: nunc vix serio ita minetur quisquam. Bellum ab eodem consule haudquam memorabile adversus rebellantes Æquos, quum præter animos feroce nihil ex antiqua fortuna haberent, gestum est. Alter consul Appuleius in Umbria Nequinum oppidum circumsedit: locus erat arduus,

atque in parte una præceps, ubi nunc Narnia sita

U. C. 453. est: nec vi, nec munimento capi poterat. Itaque
A. C. 299.

eam infectam rem M. Fulvius Pætinus, T. Manlius Torquatus, novi consules, acceperunt. In eum annum quum Q. Fabium consulem non petentem omnes dicerent centuriae, ipsum auctoreni fuisse Macer Licinius ac Tubero tradunt differendi sibi consultus in bellicosiorem annum: eo anno majori se usui reipublicæ fore, urbano gesto magistratu: ita nec dissimulantem, quid inallem, nec petentem tamen, ædilem curulem cum L. Papirio Cursore factum. Id ne pro certo ponerem, vetustior annalium auctor Piso effecit; qui eo anno ædiles curules fuisse tradit C. Domitium Cn. F. Calvinum et Sp. Carvilium Q. F. Maximum. Id credo cognomen errorem in ædilibus fecisse: secutamque fabulam mixtam ex ædilicis et consularibus comitiis, convenientem errori. Et lustrum eo anno conditum a P. Sempronio Sopho et P. Sulpicio Saverrione censoribus: tribusque additæ duæ, Aniensis ac Terentina. Hæc Romæ gesta.

Tribus
novæ.

X. Ceterum ad Nequinum oppidum quum segni obsidione tempus tereretur, duo ex oppidanis, quorum erant ædificia juncta muro, specu facto ad stationes Romanas itinere occulto pervenient: inde ad consulem deducti, præsidium armatum se intra mœnia et muros accepturos confirmant. Nec adspernanda res visa, neque incaute credenda: cum altero eorum (nam alter obses retentus) duo exploratores per cuniculum missi: per quos satis comperta re, trecenti armati, transfuga duce in urbem ingressi, nocte portam, quæ proxima erat, cepere: qua refracta, consul exercitusque Romanus sine cer-

tamine urbem invasere. Ita Nequinum in ditionem U. C. 458.
 populi Romani venit. Colonia eo adversus Umbros A. C. 299.
 missa, a flumine Narnia adpellata: exercitus eum
 magna præda Romanum reductus. Eodem anno ab
 Etruseis adversus inducias paratum bellum: sed eos Etrusci bel-
 alia molientes Gallorum ingens exercitus, fines in- lumi adver-
 gressus, paullisper a proposito avertit. Peccnia de- sus Roma-
 inde, qua multum poterant, freti, socios ex hostibus nos moli-
 untur,
 facere Gallos conantur, ut eo adjuncto exercitu cum
 Romanis bellarent. De soeietate haud abnuunt bar-
 bari: de mercede agitur: qua pacta acceptaque,
 quum parata cetera ad bellum essent, sequique E-
 truscus juberet, inficias eunt, *mercedem se belli Ro-*
manis inferendi pætos: quidquid acceperint, accepisse,
ne agrum Etruscum vastarent, armisque lucesserent
cultores. Militaturos tamen se, si utique Etrusci velint;
sed nulla alia mercede, quam ut in partem agri acci-
piantur, tandemque aliqua sede certa consistant. Multa
 de eo concilia populorum Etruriæ habita: nec per-
 fici quidquam potuit; non tam quia inminui agrum,
 quam quia adeolas sibi quisque adjungere tam effe-
 ratæ gentis homines horrebat: ita dimissi Galli pe-
 cuniam ingentem sine labore ae periculo partam re-
 tulerunt. Romæ terrorem præbuit fama Gallici tu-
 multus ad bellum Etruscum adjecti: eo minus cune-
 tanter fœdus iustum cum Picenti populo est.

XI. T. Manlio consuli Etruria provincia sorte T. Manlii
 evenit: qui, vixdum ingressus hostium fines, quin exerceceretur ^{cos. mors.} inter equites, ab rapido cursu circum-
 gendo equo effusus, extemplo prope exspiravit: ter-
 tius ab eo casu dies finis vitæ consuli fuit. Quo
 velut omine belli accepto, Deos pro se commisso
 bellum memorantes Etrusci sustulere animos. Ro-

- U. C. 453. mæ, tum desiderio viri, tum incommoditate tempo-
 A. C. 299. ris, tristis nuncius fuit : ut Patres ab jubendo dicta-
 tore consulis subrogandi comitia, ex sententia prin-
 M. Valerius cipum habita, deteruerint. M. Valerium consulem
 subiectus. omnes sententiæ centuriæque dixere, quem senatus
 dictatorem dici jussurus fuerat: tum extemplo in
 Etruriam ad legiones proficisci jussit. Adventus ejus
 compressit Etruscos, adeo ut nemo extra munitamenta
 egredi auderet, timorque ipsorum obsidioni similis
 esset : neque illos novus consul vastandis agris ure-
 disque tectis, quum passim non villæ solnū, sed fre-
 quentes quoque vici, incendiis fumarent, elicere ad
 certamen potuit. Quum hoc segnius bellum opinio-
 ne esset, alterius belli, quod multis in vicem cladibus
 haud inmerito terribile erat, fama Picentium, novo-
 rum sociorum, indicio exorta est : *Samnites arma et*
rebellionem spectare, seque ab iis sollicitatos esse. Pi-
 centibus gratiæ actæ, et magna pars curæ Patribus
 ab Etruria in Samnites versa est. Caritas etiam an-
 nonæ sollicitam civitatem habuit : ventumque ad
 inopiæ ultimum foret, ut scripsere, quibus ædilem
 fuisse eo anno Fabium Maximum placet, ni ejus
 viri cura, qualis in bellicis rebus multis tempestati-
 bus fuerat, talis domi tum in annonæ dispensatione,
 præparando ac convehendo frumento, fuisse. Eo
 anno (nec traditur caussa) interregnum initum : in-
 terreges fuere Ap. Claudius, dein P. Sulpicius. Is
 U. C. 454. comitia consularia habuit : creavit L. Cornelium
 A. C. 298. Scipionem, Cn. Fulvium consules. Principio hujus
 anni oratores Lucanorum ad novos consules vene-
 runt, questum, *quia conditionibus perlicere se nequi-*
rerint ad societatem armorum, Samnites infesto exer-
citu ingressos fines suos vastare, belloque ad bellum co-

*gere. Lucano populo satis superque erratum quondam : U. C. 434.
nunc ita obstinatos animos esse, ut omnia ferre ac pati
tolerabilius ducant, quam ut umquam postea nomen
Romanum violent. Orare Patres, ut et Lucanos in fi-
dem accipient, et vim atque injuriam ab se Samnitium
arceant. Se, quamquam, bello cum Samnitibus suscepto,
necessaria jam facta adversus Romanos fides sit, tamen
obsides dare paratos esse.*

XII. Brevis consultatio senatus fuit: ad unum omnes jungendum fœdus cum Lucanis, resque repe- Fœdus
tendas ab Samnitibus, censem. Benigne responsum cum Lu-
canis. Lucanis, ictumque fœdus. Feciales missi, qui Sam-
nitem decidere agro sociorum, ac deducere exerci-
tum finibus Lucanis juberent: quibus obviam missi
ab Samnitibus, qui denunciarent, *Si quod adissent in
Samnio concilium, haud inviolatos abituros.* Hæc post-
quam audita sunt Romæ, bellum Samnitibus et Pa-
tres censuerunt, et populus jussit. Consules inter se
provincias partiti sunt: Scipioni Etruria, Fulvio
Samnites obvenerunt; diversique, ad suum quisque
bellum, profiscuntur. Scipioni, segne bellum et
simile prioris anni militiæ exspectanti, hostes ad
Volaterras instructo agmine obcurrerunt. Pugna- Pugna cum
tum majore parte diei, magna utrumque cæde: nox Etruscis.
incertis, qua data victoria esset, intervenit: lux in-
sequens victorem victumque ostendit. Nam Etrusci
silentio noctis castra reliquerunt. Romanus, egres-
sus in aciem, ubi profectio[n]e hostium concessam
victoriam videt, progressus ad castra, vacuis cum
plurima præda (nam et stativa trepide deserta fue-
rant) potitur: inde in Faliscum agrum copiis re-
ductis, quum impedimenta Faleriis cum modico præ-
sidio reliquisset, expedito agmine ad depopulandos

U. C. 454. hostium fines incedit. Omnia ferro ignique vastantur; prædæ undique actæ: nec solum modo vastum hosti relictum, sed castellis etiam vicisque inlatus ignis: urbibus obpugnandis temperatum, in quas timor Etruscos compulerat. Cn. Fulvii consulis clara Samnites pugna in Samnio ad Bovianum haudquaquam ambiguæ victoriæ fuit. Bovianum inde adgressus, nec ita multo post Aufidenam vi cepit.

XIII. Eodem anno Carseolos colonia in agrum Aequicolorum deducta. Fulvius consul de Samnitibus triumphavit. Quum conitia consularia instarent, fama exorta, Etruscos Samnitesque ingentes conscribere exercitus; palam omnibus conciliis vexari principes Etruscorum, quod non Gallos quacumque conditione traxerint ad bellum: increpari magistratus Samnitium, quod exercitum, adversus Lucanum hostem comparatum, objecerint Romanis: itaque suis sociorumque viribus consurgere hostes ad bellum, et haudquaquam pari defungendum esse certamine. Hic terror, quum inlustres viri consula-

Q. Fabius tum peterent, omnes in Q. Fabium Maximum, primo non petentem, deinde, ut inclinata studia videntur, etiam recusantem convertit. *Quid se jam senem, ac perfunctum laboribus laborumque præmiis, sollicitarent?* Nec corporis, nec animi vigorem remanere eumdem: et fortunam ipsam reveri, ne cui Deorum nimia jam in se, et constantior, quam relint humanæ res, videatur. Et se gloriae seniorum subcrevisse, et ad suam gloriam consurgentis alios lætum adspicere: nec honores magnos fortissimis viris Romæ, nec honoribus deesse fortes viros. Acuebat hac moderatione tam justa studia; quæ verecundia legum restinguenda ratus, legem recitari jussit, qua intra decem annos

et unidem consulem refici non licet. Vix præ stre- U.C. 454.
pitu audita lex est: tribunique plebis, nihil id in- A.C. 298.
pedimenti futurum, aiebant: se ad populum laturos,
uti legibus solvretur. Et ille quidem in recusando
perstebat, *quid ergo adtineret leges ferri, rogitans,*
quibus per eosdem, qui tulissent, fraus fieret? Jam re-
gi leges, non regere. Populus nihilominus suffragia
inibat: et, ut quæque intro vocata erat centuria,
consulem haud dubie Fabium dicebat. Tum demum
consensu civitatis victus, *Dii adprobent, inquit, quod*
agitis, acturique estis, Quirites. Ceterum, quoniam in
me, quod vos vultis, facturi estis, in collega sit meæ
apud vos gratiæ locus. P. Decium, expertum mihi
concordi collegio virum, dignum vobis, dignum parente
suo, quæso, mecum consulem faciatis. Justa suffraga-
tio visa: omnes, quæ supererant, centuriæ Q. Fa-
bium, P. Decium consules dixerunt. Eo anno plenis-
que dies dicta ab ædilibus, quia plus, quam quod
lege finitum erat, agri possiderent: nec quisquam
ferne est purgatus: vinculumque ingens inmodicæ
cupiditatis injectum est.

XIV. Consules novi, Q. Fabius Maximus quar- U.C. 455.
tum et P. Decius Mus tertium, quum inter se agi- A.C. 297.
tarent, uti alter Samnites hostes, alter Etruscos de-
ligeret; quantæque in hanc aut in illam provinciam
copiæ satis, et uter ad utrum bellum dux idoneus
magis esset; ab Sutrio et Nepete et Faleriis legati,
auctores, concilia Etruriæ populorum de petenda
pace haberi, totam belli molem in Samnum averte-
runt. Profecti consules, quo expeditiores commincatus A nno coss.
essent, et incertior hostis, qua venturum bellum fo- in Sam-
ret, Fabius per Soranum, Decius per Sidicinum ones di-
agrum, in Samnum legiones ducent. Ubi in hos- cump.

U. C. 455. tium fines ventum est, uterque populabundus effuso
 A. C. 297. agmine incedit: explorant tamen latius, quam po-
 pulantur. Igitur non fefeller ad Tifernum hostes
 in occulta valle instructi, quam ingressos Romanos
 superiore ex loco adoriri parabant. Fabius, inpedi-
 mentis in locum tutum remotis, præsidioque modi-
 co inposito, præmonitis militibus adesse certamen,
 quadrato agmine ad prædictas hostium latebras suc-
 cedit. Samnites, desperato improviso tumultu, quan-
 do in apertum semel discrimen evasura esset res, et
 ipsi acie justa maluerunt concurrere: itaque et in
 æquum descendunt, ac fortinæ se, majore animo,
 Prælium atrox cum Samni-
 tibus. quam spe, committunt. Ceterum, sive quia ex om-
 nium Samnitium populis, quodcumque roboris fue-
 rat, contraxerant, seu quia discrimen summæ rerum
 augebat animos, aliquantum aperta quoque pugna
 præbuerunt terroris. Fabius, ubi nulla ex parte
 hostem loco moveri vidit, M. Fulvium et M. Vale-
 rium, tribunos militum, cum quibus ad primam
 aciem procurrерat, ire ad equites jubet, et adhortari,
*ut, si quando umquam equestri ope adjutam rempubli-
 can meninerint, illo die adnitantur, ut ordinis ejus
 gloriam invictam præstent.* Peditum certamine inmo-
 bilem hostem restare; omnem reliquam spem in impetu
 esse equitum: et ipsos nominatim juvenes, pari co-
 mitate utrumque, nunc laudibus, nunc promissis
 onerat. Ceterum, quando ne ea quoque tentata vis
 proficeret, consilio grassandum, si nihil vires juva-
 rent, ratus, Scipionem legatum hastatos primæ le-
 gionis subtrahere ex acie, et ad montes proximos,
 quam posset occultissime, circumducere jubet: inde
 adscensu abdito a conspectu erigere in montes ag-
 men, aversoque hosti ab tergo repente se ostendere.

Equites, ducibus tribunis, haud multo plus hostibus, U. C. 455.
 quam suis, ex improviso ante signa evecti, præbuerunt tumultus. A. C. 297.
 Adversus incitatas turmas stetit immota Samnitium acies, nec parte ulla pelli aut per-
 rumpi potuit. Et, postquam irritum inceptum erat,
 recepti post signa prælio excesserunt. Crevit ex eo
 hostium animus; nec sustinere frons prima tam lon-
 gum certamen increscentemque fiducia sui vim po-
 tuisset, ni secunda acies jussu consulis in primum
 successisset. Ibi integræ vires sistunt invehentem
 se jam Samnitem: et tempore improvisa ex monti-
 bus signa clamorque sublatus non vero tantum metu
 terruere Samnitium animos: nam et Fabius Decium
 collegam adpropinquare exclamavit, et pro se quis-
 que miles, *adesse alterum consulem, adesse legiones,*
 gaudio alacres fremunt; errorque utilis Romanis
 oblatus fugæ formidinisque Samnites inplevit, maxi-
 me territos, ne ab altero exercitu integro intactoque
 fessi obprimerentur: et, quia passim in fugam dissipa-
 ti sunt, minor cædes, quam pro tanta victoria,
 fuit: tria millia et quadringenti cæsi: capti trecen-
 ti ferme et triginta: signa militaria capta tria et
 viginti.

Vincunt
Romani.

XV. Samnitibus Apuli se ante prælium conjunx-
 issent, ni P. Decius consul iis ad Maleventum castra
 objecisset, extractos deinde ad certamen fudisset. Ibi quoque plus fugæ fuit, quam cædis: duo millia Apulorum cæsa: spredoque eo hoste, Decius in Samnium legiones duxit. Ibi duo consulares exercitus, diversis vagati partibus, omnia spatio quinque men-
 sium evastarunt. Quadraginta et quinque loca in Samnio fuere, in quibus Decii castra fuerunt: alterius consulis sex et octoginta: nec valli tantum

U. C. 455. ac fossarum vestigia relictæ, sed multo illis insigni-
A. C. 297. ora monumenta vastitatis circa regionumque depo-

pulatarum. Fabius etiam urbem Cimetram cepit: ibi capta armatorum duo millia quadringenti: cæsi ferme pugnantes ad quadringentos triginta. Inde, comitiorum caussa Romam profectus, maturavit eam rem agere: quin primæ vocatæ **Q. Fabium** consulem dicerent omnes centuriæ, Ap. Claudius consularis candidatus, vir acer et ambitiosus, non sui magis honoris caussa, quam ut patricii recuperarent duo consularia loca, quum suis, tum totius

Q. Fabius nobilitatis viribus, incubuit, ut se cum **Q. Fabio** consulatum recuperasset.

consulem dicerent. Fabius primo, de se eadem fere, quæ priore anno, dicendo, abnuere: circumstare sellam omnis nobilitas; orare, ut ex cœno plebeio consulatum extraheret, majestatemque pristinam tum honori, tum patriciis gentibus redderet. Fabius, silentio facto, media oratione studia hominum sedavit: *facturum enim se fuisse dixit, ut duorum patriciorum nomina recipere, si alium, quam se, consulem fieri videret: nunc se sui rationem comitiis, quum contra leges futurum sit, pessimo exemplo non habitu-*

U. C. 456. **rum.** Ita **L. Volumnius** de plebe cum Ap. Claudio
A. C. 296.

consul est factus, priore item consulatu inter se comparati. Nobilitas objectare Fabio, fugisse eum Ap. Claudium collegam, eloquentia civilibusque artibus haud dubie præstantem.

XVI. Comitiis perfectis, veteres consules jussi bellum in Samnio gerere, prorogato in sex menses imperio. Itaque insequenti quoque anno, **L. Volumnio**, Ap. Claudio consulibus, **P. Decius**, qui consul in Samnio relictus a collega fuerat, proconsul idem populari non destitutus agros, donec Samni-

tium exercitum, nusquam se prœlio committentem, U.C. 456.
 postremo expulit finibus. Etruriam pulsi petierunt : A.C. 296.
 et, quod legationibus nequidquam sæpe tentaverant, pulsi fini-
 id se tanto agmine armatorum, mixtis terrore pre-
 cibus, acturos efficacius rati, postulaverunt princi- petunt.
 Etruriam
 pum Etruriæ concilium. Quo coacto, per quot an-
 nos pro libertate dimicent cum Romanis, exponunt :
omnia expertos esse, si suismet ipsorum viribus tolerare
tantam molem belli possent : tentasse etiam haud mag-
ni momenti finitimarum gentium auxilia : petisse pacem
a populo Romano, quum bellum tolerare non possent :
rebellasse, quod pax servientibus gravior, quam liberis
bellum, esset. Unam sibi spem reliquam in Etruscis
restare. Scire, gentem Italie opulentissimam armis,
viris, pecunia, esse : habere adcolas Gallos, inter fer-
rum et arma natos, feroce quum suopte ingenio, tum
adversus Romanum populum : quem captum a se au-
roque redemptum, haud vana jactantes, memorent. Ni-
hil abesse, si sit animus Etruscis, qui Porsenæ quondam
majoribusque eorum fuerit, quin Romanos, omni agro cis
Tiberim pulsos, dimicare pro salute sua, non de into-
lerando Italie regno, cogant. Samnitem illis exercitum
paratum, instructum armis, stipendio, venisse : con-
festim secuturos, vel si ad ipsam Romanam urbem ob-
pugnandam ducant.

XVII. Hec eos in Etruria jactantes molientesque
 bellum domi Romanum urebat : nam P. Decius, ubi
 comperit per exploratores profectum Samnitium ex-
 exercitum, advocato consilio, *Quid per agros, inquit,*
vagamur, vicatim circumferentes bellum ? quin urbes
et mœnia adgredimur ? nullus jam exercitus Samnio Tres in
præsidet : cessere finibus, ac sibimet ipsi exsilium consci-
vere. Adprobantibus cunctis, ad Murgantiam, va- Samnio ur-
bes a Ro-
manis cap-
tæ.

U. C. 456. lidam urbem, obpugnandam dicit : tantusque ardor
A. C. 296. militum fuit, et caritate ducis, et spe majoris, quam
ex agrestibus populationibus, prædæ, ut uno die vi
atque armis urbem caperent : ibi duo millia Samni-
tium et centum pugnantes circumventi captique : et
alia præda ingens capta est : quæ ne impedimentis
gravibus agmen oneraret, convocari milites Decius
jubet. *Haccine, inquit, victoria sola, aut hac præda*
contenti estis futuri? Vultis vos pro virtute spes gere-
re? omnes Samnitium urbes, fortunæque in urbibus
relietæ, vestræ sunt; quando legiones eorum, tot præ-
liis fusas, postremo finibus expulisti. Vendite ista, et
inlicite lucro mercatorem, ut sequatur agmen : ego sub-
inde subgeram, quæ vendatis. Ad Romuleam urbem
hinc eamus, ubi vos labor haud major, præda major
manet. Divendita præda, ultiro adhortantes impera-
torem ad Romuleam pergunt. Ibi quoque sine opere,
sine tormentis, simul admota sunt signa, nulla vi
deterriti a muris, qua cuique proximum fuit, scalis
raptim admotis, in mœnia evasere : captum oppi-
dum ac direptum est : ad duo millia et trecenti oc-
cisi ; et sex millia hominum capta ; et miles ingenti
præda potitus : quam vendere, sicut priorem, coac-
tus, Ferentinum inde, quamquam nihil quietis da-
batur, tamen summa alacritate ductus. Ceterum ibi
plus laboris ac periculi fuit : et defensa summa vi
mœnia sunt, et locus erat munimento naturaque tu-
tus : sed evicit omnia adsuetus prædæ miles : ad
tria millia hostium circa muros cæsa : præda militis
fuit. Hujus obpugnatarum urbium decoris pars ma-
jor in quibusdam annalibus ad Maximum trahitur.
Murgantiam ab Decio, a Fabio Ferentinum Romu-
leamque obpugnatas tradunt : sunt, qui novorum

consulum hanc gloriam faciant. Quidam non am- U.C. 456.
borum, sed alterius, L. Volumnii: ei Samnium pro- A.C. 296.
vinciam evenisse.

XVIII. Dum ea in Samnio, cujuscunque ductu Bellum auspicioque, gererentur; Romanis in Etruria iterum ^{Etruscum.} bellum ingens multis ex gentibus concitur; cuius auctor Gellius Egnatius ex Samnitibus erat. Tusci fere omnes conciverant bellum: traxerat contagio proximos Umbriæ populos; et Gallica auxilia mercede sollicitabantur: omnis ea multitudo ad castra Samnitium conveniebat. Qui tumultus repens postquam Romam perlatus est, quum jam L. Volumnius consul cum legionibus secunda ac tertia, sociorumque millibus quindecim profectus in Samnium esset, Ap. Claudium primo quoque tempore in Etruriam ^{Eo profi-} ire placuit: duæ Romanae legiones secutæ, prima ^{ciscitur} et quarta, et sociorum duodecim millia: castra haud procul ab hoste posita. Ceterum magis eo proiectum est, quod mature ventum erat, ut quosdam spectantes jam arma Etruriæ populos metus Romani nominis comprimeret, quam quod ductu consulis quidquam ibi satis scite aut fortunate gestum sit. Multa prælia Res nec locis et temporibus inquis commissa: spesque in ^{scite nec fortunata} dies graviorem hostem faciebat: et jam prope erat, gerit. ut nec duci milites, nec militibus dux satis fideret. Literas ad collegam arcessendum ex Samnio missas, in trinis annalibus invenio: piget tamen incertum ponere, quum ea ipsa inter consules populi Romani, jam iterum eodem honore fungentes, discrepancio fuerit: Appio abnuente missas; Volumnio adfirmando, Appii se literis adicitum. Jam Volumnius in Samnio tria castella ceperat, in quibus ad tria millia hostium cæsa erant, dimidium fere ejus captum: et

U.C. 456. Lucanorum seditiones, a plebeiis et egentibus duci-

A.C. 296. bus ortas, summa optimatum voluntate per Q. Fa-
bium proconsulem, missum eo cum veteri exercitu,
compresserat. Decio depopulandos hostium agros
relinquit: ipse cum suis copiis in Etruriam ad col-

Volumini- legam pergit: quem advenientem læti omnes acce-
us it ad pere. Appium ex conscientia sua credo animum ha-

Appiuni. buisse haud inmerito iratum, si nihil scripserat: in-
liberali et ingrato animo, si eguerat ope, dissimu-
lantem. Vix enim salute mutua reddit, quum ob-

Alteratio viam egressus esset, *Satin' salve*, inquit, *L. Volum-*
coss.

ni? ut sese in Samnio res habent? Quæ te cuussa, ut
provincia tua excederes, induxit? Volumnius in Sam-
nio res prosperas esse ait, literis ejus ad ciuitatem venisse:
quæ si falsæ fuerint, nec usus sui sit in Etruria, ex-
templo conversis signis abiturum. Tu vero abeas, inquit,
neque te quisquam moratur: ctenim minime consenta-
neum est, quum bello tuo forsitan vix sufficias, hic te
ad opem ferendam aliis gloriari venisse. Bene, Her-
cules, verteret, dicere Volumnius: malle frustra ope-
ram insumentam, quam quidquam incidisse, cur non sa-
tis esset Etruriæ unus consularis exercitus.

XIX. Digredientes jam consules legati tribunique
ex Appiano exercitu circumsiunt: pars imperato-
rem suum orare, ne collegæ auxilium, quod ad ciendum
ultro fuerit, sua sponte oblatum sperneretur: plures
abeunti Volumnio obsistere atque obtestari, ne pra-
vo cum collega certamine rem publicam prodat. Si qua
clades incidisset, desertori magis, quam deserto, noxiæ
fore. Eo rem adductam, ut omne rei bene aut secus
gestæ in Etruria decus dedecusque ad *L. Volumnium*
sit delegatum: neminem quæsitorum, quæ verba Appii,
sed quæ fortuna exercitus fuerit. Dimitti ab Appio

eum, sed a republica et ab exercitu retineri; experiretur U. C. 456.
 modo voluntatem militum. Hæc monendo obtestan- A. C. 296.
 doque, prope restitantes consules in concionem per-
 traxerunt: ibi orationes longiores habitæ in eam-
 dem ferme sententiam, in quam inter paucos certa-
 tum verbis fuerat. Et quum Volumnius, caussa su-
 perior, ne infacundus quidem adversus eximiam elo-
 quentiam collegæ visus esset; cavillansque Appius,
 sibi acceptum referre, diceret, debere, quod ex muto
 atque elingui facundum etiam consulem haberent: pri-
 ore consulatu, primis utique mensibus, hiscere eum ne-
 quissee, nunc jam populares orationes serere. Quam
 mallem, inquit Volumnius, tu a me strenue facere,
 quam ego abs te scite loqui didicissem. Postremo con-
 ditionem ferre, quæ decretura sit, non orator, (neque
 enim id desiderare rempublicam) sed imperator uter
 sit melior: Etruriam et Samnum provincias esse:
 utram mallet, eligeret: suo exercitu se vel in Etruria,
 vel in Samnio rem gesturum. Tum militum clamor
 ortus, ut simul ambo bellum Etruscum susciperent:
 quo animadverso consensu, Volumnius, Quoniam in
 collegæ voluntate interpretanda, inquit, errari; non
 committam, ut, quid vos velitis, obscurum sit: manere,
 an abire me velitis, clamore significate. Tum vero
 tantus est clamor exortus, ut hostes e castris exci-
 ret: armis adreptis in aciem descendunt: et Vo-
 lumnius signa canere, ac vexilla efferri e castris jus-
 sit. Appium addubitasse ferunt, cernentem, seu pug-
 nante, seu quieto se, fore collegæ victoriam: deinde
 veritum, ne suæ quoque legiones Volumnium seque-
 rentur, et ipsum flagitantibus suis signum dedisse.
 Ab neutra parte satis commode instructi fuerunt: Pugna cum
 nam et Samnitium dux Gellius Egnatius pabulatum Samnitibus
 et Tuscis.

U.C. 456. cum cohortibus paucis ierat; suoque in petu magis
A. C. 296. milites, quam cujusquam ductu aut imperio, pug-
nam capessebant: et Romani exercitus nec pariter
ambo ducti, nec satis temporis ad instruendum fuit.
Prius concurrit Volumnius, quam Appius ad hostem
perveniret: itaque fronte inæquali concursum est:
et, velut forte quadam mutante adsuetos inter se
hostes, Etrusci Volumnio, Samnites, parumper cunc-
tati, quia dux aberat, Appio obcurrere. Dicitur Ap-
pius in medio pugnæ discrimine, ita ut inter prima
signa manibus ad cœlum sublatis consiperetur, ita
precatus esse: *Bellona, si hodie nobis victoriam duis,
ast ego templum tibi voveo.* Hæc precatus velut insti-
gante Dea, et ipse collegæ et exercitus virtutem
æquavit. Duces imperatoria opera exsequuntur; et
milites, ne ab altera parte prius victoria incipiat,
admituntur. Ergo fundunt fugantque hostes, majo-
reni molem haud facile sustinentes, quam cum qua
manus conserere adsueti fuerant: urgendo cedentes,
insequendoque effusos compulere ad castra. Ibi, in-
terventu Gellii cohortiumque Sabellarum, paullisper
recrudit pugna: iis quoque mox fusis, jam a victo-
ribus castra obpugnabantur: et, quum Volumnius
Romanus superior. ipse portæ signa inferret; Appius, Bellonam victri-
cem idem tidem celebrans, accenderet militum ani-
mos, per vallum, per fossas intruperunt. Castra capta
direptaque: præda ingens parta et militi concessa
est: septem millia ac trecenti hostium occisi, duo
millia et centum viginti capti.

XX. Dum ambo consules omnisque Romana vis
in Etruscum bellum magis inclinat, in Samnio novi
exercitus, exorti ad depopulandos imperii Romani
fines, per Vescinos in Campaniam Falernumque

agrūm transcendunt, ingentesque prædas faciunt. U. C. 456.
 Volumnium, magnis itineribus in Samnum redeun- A. C. 296.
 tem, (jam enim Fabio Decioque prorogati imperii
 finis aderat) fama de Samnitum exercitu populatio-
 nibusque Campani agri ad tuendos socios convertit.
 Ut in Calenum agrūm venit, et ipse cernit recentia
 cladi vestigia, et Caleni narrant, tantum jam prædæ
 hostes trahere, ut vix explicare agmen possint: ita-
 que jam propalam duces loqui, extemplo eundum in
 Samnum esse; ut, relictā ibi præda, in expeditionem
 redeant, nec tam oneratum agmen dimicationi com-
 mittant. Ea, quamquam similia veris erant, certius
 tamen exploranda ratus, dimittit equites, qui vagos
 prædatores in agros palantes excipiant: ex quibus
 inquirendo cognoscit, ad Voltturnum flumen sedere
 hostem; inde tertia vigilia moturum: iter in Sam-
 nium esse. His satis exploratis profectus, tanto in- Obprimit
 tervallo ab hostibus consedit, ut nec adventus sius Samnites
 propinquitate nimia nosci posset, et egredientem prædatores
 e Campaniæ.
 castris hostem obprimeret. Aliquanto ante lucem ad
 castra accessit; gnarosque Oscæ linguae, exploratum
 quid agatur, mittit. Intermixti ho tibus (quod facile
 erat in nocturna trepidatione) cognoscunt, infre-
 quentia armatis signa egressa, prædam prædæque
 custodes exire, ignobile agmen, et sua quemque mo-
 lientem, nullo inter alios consensu, nec satis certo
 imperio. Tempus adgrediendi aptissimum visum est:
 et jam lux adpetebat: itaque signa canere jussit;
 agmenque hostium adgreditur. Samnites, præda in-
 pediti, infrequentes armati, pars addere gradum, ac
 præ se agere prædam, pars stare, incerti utrum pro-
 gredi, an regredi in castra tutius foret, inter cuncta-
 tionem obprimuntur: et Romani iam transcederant

U. C. 456. vallum, cædesque ac tumultus erat in castris. Samnitium agmen, præterquam hostili tumultu, captivorum etiam repentina defectione turbatum erat: qui partim ipsi soluti vinctos solvebant: partim arma in sarcinis deligata rapiebant, tumultumque, prælio ipso terribiliorem, intermixti agmini præbebant. Memorandum deinde edidere facinus: nam Stium Minacium ducem, adeuntem ordines hortantemque, invadunt: dissipatis inde equitibus, qui cum eo aderant, ipsum circumsistunt, insidentemque equo captum ad consulem Romanum rapiunt. Revocata eo tumultu prima signa Samnitium: præliumque jam profligatum integratum est, nec diutius sustineri potuit. Cæsa ad sex millia hominum: duo millia et quingenti capti: in eis tribuni militum quatuor: signa militaria triginta: et, quod lætissimum victoribus fuit, captivorum recepta septem millia et quadringenti; præda ingens sociorum: aedictique edicto domini ad res suas noscendas recipiendasque. Præstituta die, quarum rerum non exstitit dominus, militi concessæ: coactique vendere prædam, ne alibi, quam in armis, animum haberent.

XXI. Magnum ea populatio Campani agri tumultum Romæ præbuerat: et per eos forte dies ex Etruria adlatum erat, post deductum inde Volumnianum exercitum Etruriam concitam in arma, et Gellum Egnatiuni, Samnitium ducem, et Umbros ad defectionem vocari, et Gallos pretio ingenti solicitari. His nunciis senatus conterritus justitium indici, delectum omnis generis hominum haberi jussit: nec ingenui modo aut juniores sacramento adacti, sed seniorum etiam cohortes factæ, libertinique centuriati: et defendendæ urbis consilia agi-

tabantur; summæque rerum prætor P. Sempronius U. C. 456.
 præerat. Ceterum parte curæ exonerarunt senatum A. C. 296.
L. Volumnii consulis literæ, quibus cæsos fusosque
 populatores Campaniæ cognitum est. Itaque et supplicationes ob rem bene gestam consulis nomine de-
 cernunt: justitium remittitur, quod fuerat dies de-
 cem et octo, supplicatioque perlæta fuit. Tum de
 præsidio regionis depopulatæ ab Samnitibus, agitari
 cœptum. Itaque placuit, ut duæ coloniæ circa Ves-
 cinum et Falernum agrum deducerentur: una ad
 ostium Liris fluvii, quæ Minturnæ adpellata; altera
 in saltu Vescino, Falernum contingente agrum, ubi
 Sinope dicitur Græca urbs fuisse, Sinuessa deinde
 ab coloniis Romanis adpellata. Tribunis plebis ne-
 gotium datum est, ut plebeiscito juberetur P. Sem-
 pronius prætor triumviros in ea loca coloniis deducen-
 dis creare: nec⁺ qui nomina darent, facile invenie-
 bantur, quia in stationem se prope perpetuam
 infestæ regionis, non in agros, mitti rebantur.
 Avertit ab eis curis senatum Etruriæ ingravescens
 bellum, et crebræ literæ Appii, monentis, ne regio-
 nis ejus motum negligenter: *quatuor gentes conferre Quatuor
 arma, Etruscos, Samnites, Umbros, Gallos: jam castra gentes in
 bifariam facta esse, quia unus locus capere tantam Etruria
 multitudinem non possit.* Ob hæc, et (jam adpetebat conseruant
 tempus) comitiorum causa **L. Volumnius consul arma ad-**
 Rom. *versus*
 Romam revocatus: qui prius, quam ad suffragium
 centurias vocaret, in concionem advocato populo,
 multa de magnitudine belli Etrusci disseruit: *jam
 tum, quum ipse ibi cum collega rem pariter gesserit,
 fuisse tantum bellum, ut nec duce uno, nec exercitu
 geri potuerit: accessisse postea dici Umbros, et ingen-
 tem exercitum Gallorum. Adversus quatuor populos*

U. C. 456. *duces consules illo die deligi meminissent : se, nisi con-*
 A. C. 296. *fideret, eum consensu populi Romani consulem declaratum iri, qui haud dubie tum primus omnium duxor habeatur, dictatorem fuisse extemplo dicturum.*

Fabius re-
cusans
cos. eli-
gitur.

XXII. Nemini dubium erat, quin Q. Fabius omnium consensu destinaretur; eumque et prærogativæ, et primo vocatæ omnes centuriæ consulem cum L. Volumnio dicebant. Fabii oratio fuit, qualis biennio ante: deinde, ut vincebatur consensu, versa postremo ad collegam P. Decium poscendum: *id senectuti suæ adminiculum fore: censura duobusque consulatibus simul gestis expertum se, nil concordi collegio firmius ad rempublicam tuendam esse: novo imperii socio vix jam adsuescere senilem animum posse: cum moribus notis facilius se communicaturum consilia.* Subscripsit orationi ejus consul, quæna meritis P. Decii laudibus, tum, quæ ex concordia consulum bona, quæque ex discordia mala in administratione rerum militarium evenirent, memorando, *quam prope ultimum discriminem suis et collegæ certaminibus nuper ventum foret: admonendo Decium Fabiumque, ut uno animo, una mente riverent: esse præterea viros natos militiæ, factis magnos, ad verborum linguæque certamina rudes: ea ingenia consularia esse. Callidos solertesque, juris atque eloquentiæ consultos, qualis Ap. Claudius esset, urbi ac foro præsides habendos, prætoresque ad reddenda jura creandos esse.* His agendis dies est consumtus: postridie ad præscriptum consulis et consularia et prætoria comitia habita. Consules creati Q. Fabius et P. Decius: Ap. Claudius prætor; omnes absentes: et L. Volumnio ex senatus-consulto et scito plebis prorogatum in annum imperium est.

XXIII. Eo anno prodigia multa fuerunt; quorum U. C. 456.
averruncandorum caussa supplicationes in biduum A. C. 295.
senatus decrevit. Publice vinum ac tus præbitum:
supplicatum iere frequentes viri feminæque. Insig-
nem supplicationem fecit certainen in sacello Pudi-
citiæ patriciæ, quæ in foro boario est ad ædemi ro-
tundam Herculis inter matronas ortum. Virginiam,
Auli filiam, patriciam plebeio nuptam L. Volumnio Pudicitia
consuli, matronæ, quod e Patribus enupsisset, sa- patricia.
cris arcuerant. Brevis altercatio inde ex iracundia
muliebri in contentionem animorum exarsit: quum
se Virginia et patriciam et pudicam in patriciæ Pu-
dicitiæ templum ingressam, et uni nuptam, ad quem
virgo deducta sit; nec se viri honorumve ejus ac re-
rum gestarum pœnitere, vero gloriaretur. Facto de-
inde egregio magnifica verba adauxit: in vico Lon-
go, ubi habitabat, ex parte ædium, quod satis esset
loci modico sacello, exclusit; aramque ibi posuit:
et, convocatis plebeiis matronis, conquesta injuriam
patriciarum, *Hanc ego aram, inquit, Pudicitiæ ple-
beiæ dedico: vosque hortor, ut, quod certamen virtu-
tis viros in hac civitate tenet, hoc pudicitiæ inter ma-* Pudicitia
*tronas sit: detisque operam, ut hæc ara, quam illa, si plebeia.
quid potest, sanctius et a castioribus coli dicatur.* Eo-
dein ferme ritu et hæc ara, quo illa antiquior, culta
est; ut nulla, nisi spectatæ pudicitiæ matrona, et
quæ uni viro nupta fuisset, jus sacrificandi haberet.
Vulgata dein religio a pollutis, nec matronis solum,
sed omnis ordinis feminis, postremo in oblivionem
venit. Eodem anno Cn. et Q. Ogulnii ædiles cu-
rules aliquot fœneratoribus diem dixerunt: quorum
bonis multatis, ex eo, quod in publicum redactum
est, ænea in Capitolio limina, et trium mensarum

U. C. 456. argentea vasa in cella Jovis, Jovemque in culmine
 A. C. 296. cum quadrigis, et ad ficum Ruminalem simulacra

infantium conditorum Urbis sub uberibus lupæ posuerunt; semitamque saxo quadrato a Capena porta ad Martis straverunt: et ab ædilibus plebeiis L. Ælio Pæto et C. Fulvio Curvo, ex multaticia item pecunia, quam exegerunt pecuariis damnatis, ludi facti; pateræque aureæ ad Cereris positæ.

U. C. 457. XXIV. Q. inde Fabius quintum et P. Decius
 A. C. 295. quartum consulatum ineunt, tribus consulatibus cen-

suraque collegæ; nec gloria magis rerum, quæ ingens erat, quam concordia, inter se clari: quæ ne perpetua esset, ordinum magis, quam ipsorum, inter se certamen intervenisse reor: patriciis tendentibus,

Inter coss. ut Fabius Etruriam extra ordinem provinciam haberet; plebeiis auctoribus Decio, ut ad sortem revocaret. Fuit certe contentio in senatu; et, postquam ibi Fabius plus poterat, revocata res ad populum est: in concione, ut inter militares viros, et factis potius, quam dictis, fretos, pauca verba habita:

Fabius, *quam arborem conseruissest, sub ea legere alium fructum, indignum esse*, dicere; *se aperuisse Ciminiam silvam, viamque per devios saltus Romano bello fecisse*. *Quid se il atatis sollicitassent, si alio duce bellum gesturi essent? Nimirum adversarium se, non socium imperii, legisse, sensim exprobrat: et invidisse Decium concordibus collegiis tribus*. Postremo, *se tendere nihil ultra, quam ut, si se dignum provincia ducerent, in eam mitterent: in senatus arbitrio se fuisse, et in potestate populi futurum*. P. Decius senatus injuriam querebatur: *quoad potuerint, Patres adnisos, ne plebeiis aditus ad magnos honores esset: postquam ipsa virtus pervicerit, ne in ullo genere hominum inhon-*

rata esset, quæri, quemadmodum irrita sint non suffragia modo populi, sed arbitria etiam fortunæ, et in paucorum potestatem vertantur. Omnes ante se consules sortitos provincias esse; nunc extra sortem Fabio senatum provinciam dare. Si honoris ejus caussa: ita eum de se, deque republica meritum esse, ut fareat Q. Fabii gloriæ, quæ modo non sive contumelia splendeat. Cui autem dubium esse, ubi unum bellum sit asperum ac difficile, quum id alteri extra sortem mandetur, quin alter consul pro supervacaneo atque inutili habeatur? Gloriari Fabium rebus in Etruria gestis: velle et P. Decium gloriari: et forsitan, quem ille obrutum ignem reliquerit, ita ut toties novum ex improviso incendium daret, eum se extincturum. Postremo se collegæ honores præmiaque concessurum verecundia ætatis ejus majestatisque; quum periculum, quum dimicatio proposita sit, neque cedere sua sponte, neque cessurum: et, si nihil aliud ex eo certamine tulerit, illud certe latrum, ut, quod populi sit, populus jubeat potius, quam patres gratificantur. Jovem optimum maximum Deosque immortales se precari, ut ita sortem æquam sibi cum collega dent, si eamdem virtutem felicitatemque in bello administrando daturi sint: certe id et natura æquum, et exemplo utile esse, et ad famam populi Romani pertinere, eos consules esse, quorum utrolibet duce bellum Etruscum geri recte possit. Fabius, nihil aliud precatus populum, quam ut prius, quam intro vocarentur ad suffragium tribus, Ap. Claudi prætoris adlatas ex Etruria literas audirent, comitio abit: nec minore populi consensu, quam senatus, provincia Etruria extra sortem Fabio decreta est.

U. C. 457.
A. C. 295.

XXV. Concursus inde ad consulem factus omnium ferme juniorum: et pro se quisque nomina

Fabio extra
sortem da-
tur Etruria.

U. C. 457. dabant : tanta cupido erat sub eo duce stipendia fa-

A. C. 295. ciendi. Qua circumfusus turba, *Quatuor millia*, in-

quit, *peditum et sexcentos equites dumtaxat scribere in*

animo est : *hodierno et crastino die qui nomina dederi-*

tis, mecum ducam : *majori mihi curæ est, ut omnes lo-*

cupletes reducam, quom ut multis rem geram militibus.

Fabius in
provin-
ciam ve-
nit. Profectus apto exercitu, et eo plus fiduciæ ac spei
gerente, quod non desiderata multitudo erat, ad op-
pidum Aharnam, unde haud procul hostes erant, ad
castra Appii prætoris pergit : paucis citra millibus
lignatores ei cum præsidio obcurrunt ; qui, ut licto-
res prægredi viderunt, Fabiumque esse consulem ac-
cepere, læti atque alacres Diis populoque Romano
grates agunt, quod eum sibi imperatorem misissent.
Circunfusi deinde quum consulem salutarent, quærerit
Fabius, quo pergerent ; respondentibusque, ligna-
tum se ire, *ain' tandem*, inquit, *num castra vallata*
non habetis? Ad hoc quum subclamatum esset ; *du-*
plici quidem vallo, et fossa, et tamen in ingenti metu
-esse : *habetis igitur*, inquit, *adfatim lignorum* : *redite,*
et vellite vallum. Redeunt in castra, terroremque
ibi, vellentes vallum, et iis, qui in castris remanse-
rant, militibus, et ipsi Appio fecerunt. Tum pro se
quisque alii aliis dicere, *consulis se Q. Fabii facere*
jussu. Postero inde die castra mota, et Appius præ-
tor Romam dimissus : inde nusquam stativa Roma-
nis fuere : negabat utile esse, uno loco sedere exer-
citum : itineribus ac mutatione locorum nobiliorem
ac salubriorem esse : fiebant autem itinera, quanta
fieri sinebat hiems haudum exacta. Vere inde pri-
mo, relicta secunda legione ad Clusium, quod Ca-
mars olim adpellabant, præpositoque castris L. Sci-
pione pro prætore, Romam ipse ad consultandum

de bello rediit: sive ipse sponte sua, quia bellum ei U. C. 457.
 majus in conspectu erat, quam quantum esse famæ A. C. 295,
 crediderat; sive senatusconsulto adiit: nam in man ad
 utrumque auctores sunt. Ab Ap: Claudio prætore Redit Ro-
 retractum quidam videri volunt; quum in senatu et bello.
 consultan-
 dum de
 apud populum (id quod per literas adsidue fecerat)
 terrorem belli Etrusci augeret: *non subiectum du-*
cem unum, nec exercitum unum, adversus quatuor po-
pulos. Periculum esse, sive juncti unum prenant,
sive id diversi gerant bellum, ne ad omnia simul obire
unus non possit. Duas se ibi legiones Romanas reli-
quisse: et minus quinque millia peditum equitumque
cum Fabio venisse: sibi placere, P. Decium consullem
primo quoque tempore in Etruriam ad collegam pro-
fieisci: L. Volumnio Samnum provinciam dari. Si
consul malit in suam provinciam ire, Volumnium in
Etruriam ad consulrem cum exercitu justo consulari
proficiisci. Quum magnam partem moveret oratio
prætoris, P. Decium censuisse ferunt, ut omnia in-
tegra ac libera Q. Fabio servarentur, donec vel ipse,
si per conimodum reipublicæ posset, Romam ve-
nisset, vel aliquem ex legatis misisset; a quo dis-
ceret senatus, quantum in Etruria belli esset, quan-
tisque administrandum copiis, et quot per duces
esset.

XXVI. Fabius, ut Romam rediit, et in senatu et productus ad populum medium orationem habuit, ut nec angere, nec minnere videretur belli faunam; magisque in altero adsumendo duce aliorum indulgere timori, quam suo aut reipublicæ periculo consulere: ceterum, si sibi adjutorem belli sociumque imperii darent, quonam modo se oblivious P. Decii consulis per tot collegia experti posse? Neminem omnium secum

U. C. 457. *conjungi malle: et copiarum satis sibi cum P. Decio,*
 A. C. 295. *et numquam nimium hostium fore. Sin collega quid
 aliud malit, at sibi L. Volumnium darent adjutorem.* Omnia rerum arbitrium et a populo, et a senatu,
 et ab ipso collega, Fabio permisum est: et quum
 P. Decius se in Samnium vel in Etruriam proficisci
 paratum esse ostendisset, tanta lætitia ac gratulatio
 fuit, ut præciperetur victoria animis, triumphusque,
 non bellum, decretum consulibus videretur. Invenio
 apud quosdam, extemplo, consulatu inito, profectos
 in Etruriam Fabium Deciumque, sine ulla mentione
 sortis provinciarum certainumque inter collegas,
 quæ exposui. Sunt, quibus ne hæc quidem certa-
 mina exponere satis fuerit: adjecterunt et Appii cri-
 minationes de Fabio absente ad populum, et perti-
 naciam adversus præsentem consulem pretoris, con-
 tentionemque aliam inter collegas, tendente Decio,
 ut suæ quisque provinciae sortem tueretur. Constare
 res incipit ex eo tempore, quo profecti ambo con-
 sules ad bellum sunt. Ceterum, antequam consules

Galli le-
 gionem Romanam circumve-
 niunt. in Etruriam pervenirent, Senones Galli multitudine
 ingenti ad Clusium venerunt, legionem Romanam
 castraque obpugnaturi. Scipio, qui castris præerat,
 loco adjuvandam paucitatem suorum militum ratus,
 in colle, qui inter urbem et castra erat, aciem erexit.
 Sed, ut in re subita, parum explorato itinere ad ju-
 gum perrexit, quod hostes ceperant, parte alia egressi:
 ita cæsa ab tergo legio, atque in medio, quum
 hostis undique urgeret, circumventa. Deletam quo-
 que ibi legionem, ita ut nuncius non superesset, qui-
 dam auctores sunt; nec ante ad consules, qui jam
 haud procul a Clusio aberant, famam ejus cladis
 perlata, quam in conspectu fuere Gallorum equites,

pectoribus equorum suspensa gestantes capita, et U. C. 457.
lanceis infixa, ovantesque moris sui carmine. Sunt,
A. C. 295.
qui Umbros fuisse, non Gallos, tradant; nec tantum
cladis acceptum: et circumventis pabulatoribus cum
L. Manlio Torquato legato Scipionem proprætorem
subsidiū e castris tulisse, victoresque Umbros, red-
integrato prælio, victos esse, captivosque eis ac
prædam ademitam. Similius vero est, a Gallo hoste,
quam Umbro, eam cladem acceptam; quod, quum
sæpe alias, tum eo anno, Gallici tumultus præcipuus
terror civitatem tenuit. Itaque præterquam quod
ambo consules profecti ad bellum erant cum qua-
tuor legionibus, et magno equitatu Romano, Cam-
panisque mille equitibus delectis, ad id bellum mis-
sis, et sociorum nominisque Latini majore exercitu,
quam Romani; alii duo exercitus haud procul urbe
Etruriæ obpositi, unus in Falisco, alter in Vaticano
agro. Cn. Fulvius et L. Postumius Megellus, pro-
prætores ambo, stativa in eis locis habere jussi.

XXVII. Consules ad hostes, transgresso Apen- Ambo coss.
nino, in agrum Sentinatem pervenerunt. Ibi qua- in agro
tuor millium ferme intervallo castra posita. Inter Sentinati.
hostes deiude consultationes habite: atque ita con-
venit, ne unis castris miscerentur omnes, neve in
aciem descenderent simul. Samnitibus Galli, Etrus-
cis Umbri adjecti: dies indicta pugnae: Samniti
Gallisque delegata pugna: inter ipsum certamen
Etrisci Umbrique jussi castra Romana obpugnare.
Hæc consilia turbarunt transfugæ Ciusini tres, clam
nocte ad Fabium consulem transgressi: qui, editis
hostium consiliis, dimissi cum donis, ut subinde, ut
quæque res nova decreta esset, exploratam perfer-
rent. Consules Fulvio, ut ex Falisco, Postumio, ut

U. C. 457. ex Vaticano exercitum ad Clusium admoveant, sum-
A. C. 295. maque vi fines hostium depopulentur, scribunt. Hu-
Etrusci jus populationis fama Etruscos ex agro Sentinate ad
avocati ad suos fines tuendos movit. Instare inde consules, ut
sua tu-
enda. absentibus iis pugnaretur: per biduum lachessiere
prælio hostem: biduo nihil dignum dictu actum.
Pauci utrimque cecidere: magisque irritati sunt ad
justum certamen animi, quam ad discriminem summa
rerum adducta: tertio die descensum in campum
omnibus copiis est. Quidam instructæ acies starent,
cerva fugiens lupum e montibus exacta per campos
inter duas acies decurrerit; inde diversæ feræ, cerva
ad Gallos, lupus ad Romanos cursum deflexit. Lu-
po data inter ordinis via; cervam Galli confixere.
Tum ex antesignanis Romanus miles, *Illac fuga, in-*
quit, et cædes vertit, ubi sacram Dianæ feram jacen-
tem videtis. Hinc rictor Martius lupus, integer et in-
tactus, gentis nos Martiæ et conditoris nostri admonuit.
Prælium cum Gallo et Samnitibus. Dextro cornu Galli, sinistro Samnites constiterunt:
adversæ Samnites Q. Fabius primam ac tertiam le-
giones pro dextro cornu; adversus Gallos pro si-
nistro Decius quintam et sextam instruxit: secunda
et quarta cum L. Volumnio proconsule in Samnio
gerebant bellum. Primo concursu adeo æquis viri-
bus gesta res est, ut, si adfuissent Etrusci et Umbri,
aut in acie, aut in castris, quocumque se inclinas-
sent, accipienda clades fuerit.

XXVIII. Ceterum, quamquam communis adhuc
Mars belli erat, nequid discrimin fortuna fecerat,
qua datura vires esset, haudquam similis pugna
in dextro lævoque cornu erat. Romani apud Fabium
arcebant magis, quam inferebant, pugnam; extra-
hebaturque in quanto maxime serum diei certamen:

quia ita persuasum erat duci, et Samnites et Gallos U.C. 457.
 primo inpetu feroce esse, quos sustineri satis sit; A.C. 295.
 longiore certamine sensim residere Samnitium animos: Gallorum quidem etiam corpora intolerantis-
 sima laboris atque aestus fluere; primaque eorum
 proelii plus quam virorum, postrema minus quam
 feminarum esse. In id tempus igitur, quo vinci so-
 lebat hostis, quam integerrimas vires militi servabat.
 Ferocior Decius et aetate et vigore animi, quantum-
 cumque virium habuit, certamine primo effudit: et,
 quia lentior videbatur pedestris pugna, equitatum in
 pugnam concitat: et ipse, fortissimae juvenum tur-
 mae inmixtus, orat proceres juventutis, in hostem
 ut secum inpetum faciant: duplum illorum gloriam
 fore, si ab laevo cornu et ab equite victoria incipiat.
 Bis avertere Gallicum equitatum: iterum longius
 evectos, et jam inter media equitum agmina pro-
 lium cientes, novum pugnae conterruit genus: es-
 sedis carrisque superstans armatus hostis ingenti so-
 nitu equorum rotarumque advenit, et insolitos ejus
 tumultus Romanorum conterruit equos. Ita victo-
 rem equitatum velut lymphaticus pavor dissipat:
 sternit inde ruentes equos virosque improvida fuga.
 Turbata hinc etiam signa legionum: multique in-
 petu equorum ac vehiculorum raptorum per agmen
 obtriti antesignani: et insecura, simul territos hostes
 vidit, Galica acies nullum spatum respirandi reci-
 piendique se dedit. Vociferari Decius, *Quo fugerent?*
quam in fuga spem haberent? obsistere cedentibus,
 ac revocare fusos: deinde, ut nulla vi percusso sus-
 tinere poterat, patrem P. Decium nomine compel-
 lans, *Quid ultra moror,* inquit, *familiare fatum?* da- Decius se
tum hoc nostro generi est, ut tuendis periculis publicis devovet.

U. C. 457. *piacula simus. Jam ego mecum hostium legiones mae-*
A. C. 295. tandas Telluri ac Diis Manibus dabo. Hæc locutus
 M. Livium pontificem, quem, descendens in aciem,
 digredi vetuerat ab se, præire jussit verba, quibus
 se legionesque hostium pro exercitu populi Romani
 Quiritium devoveret. Devotus inde eadem preca-
 tione eodemque habitu, quo pater P. Decius ad Ve-
 serim bello Latino se jusserrat devoveri. Quum se-
 cundum sollemnes precatio[n]es adjecisset, *præ se age-*
re sese formidinem ac fugam, cædemque ac cruentem,
caelestium, inferorum iras: contacturum funebris di-
ris signa, tela, arma hostium; locumque eundem suæ
pestis et Gallorum ac Samnitium fore. Hæc exsecra-
 tus in se hostesque, qua confertissimam cernebat
 Gallorum aciem, concitat equum: inferensque se
 ipse infestis telis est interfectus.

XXIX. Vix humanæ inde opis videri pugna po-
 tuit. Romani, duce amissio, quæ res terrori alias
 esse solet, sistere fugam, ac novam de integro vel-
 le instaurare pugnam. Galli, et maximus globus cir-
 cumstans consulis corpus, velut alienata mente, va-
 na incassum jactare tela: torpere quidam, et nec
 pugnæ meminisse, nec fugæ. At ex parte altera
 pontifex Livius, cui lictores Decius tradiderat, jus-
 seratque proprætorem esse, vociferari, *Vicisse Ro-*
manos, defunctos consulis fato. Gallos Samnitesque
Telluris matris ac Deorum Manum esse. Rapere ad
se ac vocare Decium devotam secum aciem; furiarum-
que ac formidinis plena omnia ad hostes esse. Super-
 veniunt deinde his restituentibus pugnam L. Cor-
 nelius Scipio et C. Marcius, cum subsidiis ex no-
 vissima acie jussu Q. Fabii consulis ad præsidium
 collegæ missi: ibi auditur P. Decii eventus, ingens

hortamen ad omnia pro republica audenda. Itaque U. C. 457.
 quum Galli structis ante se scutis conferti starent,
 A. C. 295.
 nec facilis pede eoulato videretur pugna; jussu le-
 gatorum conlecta humi pila, quæ strata inter duas
 acies jacebant, atque in testudinem hostium conjecta:
 quibus plerisque in scuta, verutis in corpora ipsa
 fixis, sternitur cuneus; ita ut magna pars integris
 corporibus adtoniti conciderent: hæc in sinistro
 cornu Romanorum fortuna variaverat. Fabius in dextro cor-
 dextro, primo (ut ante dictum est) eumetando ex-
 traxerat diem: deinde, postquam nec clamor ho- nu Sam-
 nites vin-
 stium, nec inpetus, nec tela missa, eamdem vim ha- cit.
 bere visa; præfectis equitum jussis ad latus Samni-
 tium circumducere alas, ut signo dato in transver-
 sos, quanto maximo possent inpetu, incurrerent;
 sensim suos signa inferre jussit, et commovere ho-
 stem. Postquam non resisti vidit, et haud dubiam
 lassitudinem esse; tum, conlectis omnibus subsidiis,
 quæ ad id tempus reservaverat, et legiones concita-
 vit, et signum ad invadendos hostes equitibus dedit.
 Nec sustinuerunt Samnites inpetum; præterque
 aciem ipsam Gallorum, relictis in dimicacione so-
 ciis, ad castra effuso cursu ferebantur. Galli, testu-
 dine facta, conferti stabant. Tum Fabius, audita Galli cir-
 morte collegæ, Campanorum alam, quingentos fere cumventi.
 equites, excedere acie jubet, et circumvectos ab ter-
 go Gallicam invadere aciem: tertiae deinde legionis
 subsequi principes, et, qua turbatum agmen hostium
 viderent inpetu equitum, instare ac territos cädere.
 Ipse ædem Jovi Victori spoliaque hostium quum vo-
 visset, ad castra Saninitium perrexit; quo multitudo
 omnis consternata agebatur. Sub ipso vallo, quia
 tantam multitudinem portæ non recepere, tentata

U. C. 457. ab exclusis turba suorum pugna est. Ibi Gellius
 A. C. 295. Egnatius imperator Samnitum cecidit: compulsi
 deinde intra vallum Samnites, parvoque certamine
 Victoria Romano- rūrum cruenta. capta castra, et Galli ab tergo circumventi. Cæsa eo
 die hostium viginti quinque millia, octo capta: nec
 incruenta victoria fuit. Nam ex P. Decii exercitu
 cæsa septem millia; ex Fabii, mille ac ducenti. Fa-
 bius, dimissis ad quærendum collegæ corpus, spolia
 hostium conjecta in acervum Jovi Victori cremavit.
 Consulis corpus eo die, quia obrutum superstratis
 Gallorum cumulis erat, inveniri non potuit: postero
 die inventum relatumque est cum multis militum
 lacrimis. Intermissa inde omnium aliarum rerum
 cura, Fabius collegæ funus omni honore laudibus-
 que meritis celebrat.

Res in
Etruria
bene ge-
sta.

XXX. Et in Etruria per eosdem dies ab Cn. Ful-
 vio pro prætore res ex sententia gesta; et, præter
 ingentem inlatam populationibus agrorum hosti cladem,
 pugnatum etiam egregie est: Perusinorumque
 et Clusinorum cæsa amplius millia tria, et signa mi-
 litaria ad viginti capta. Samnitum agmen, quum
 per Pelignum agrum fugeret, circumventum a Pe-
 lignis est: ex millibus quinque ad mille cæsi. Mag-
 na ejus diei, quo in Sentinati agro bellatum, fama
 est, etiam vero stanti: sed superjecere quidam
 augendo fidem; qui in hostium exercitu peditum
 quadraginta millia trecentos triginta, equitum sex
 millia, mille carpentorum scripsere fuisse: scilicet
 cum Umbris Tuscisque, quos et ipsos pugnæ adfu-
 isse: et, ut Romanorum quoque augerent copias,
 L. Volumnium pro consule ducem consulibus, ex-
 ercitumque ejus legionibus consulum adjiciumt. In
 pluribus annalibus duorum ea consulum propria

victoria est. Volumnius in Samnio interim res gerit, U.C. 457.
 Samnitiumque exercitum, in Tifernum montem compulsum, non deterritus iniuitate loci, fundit fugaque. Q. Fabius, Deciano exercitu relieto in Etruria, suis legionibus deductis ad urbem, de Gallis Etruscisque ac Samnitibus triumphavit: milites triumphantem secuti sunt. Celebrata inconditis carminibus militaribus non magis victoria Q. Fabii, quam mors præclara P. Decii est: excitataque memoria parentis, æquata eventu publico privatoque filii laudibus. Data ex præda militibus æris octogeni bini, sagaque et tunicæ; præmia illa tempestate militiae haudquaquam spernenda.

XXXI. His ita rebus gestis, nec in Samnitibus Etrusci et adhuc, nec in Etruria pax erat: nam et, Perusinis Samnites bellum re-auctoribus, post deductum ab consule exercitum re-parant. bellatum fuerat: et Samnites præ datum in agrum Vescinum Formianumque, et parte alia in Æsernum, quæ Vulturno adjacent flumini, descendere. Adversus eos Ap. Claudius prætor cum exercitu Deciano missus. Fabius in Etruria rebellante denuo quatuor millia et quingentos Perusinorum occidit: cepit ad mille septingentos quadraginta: qui redemti singuli æris trecentis decem: præda alia omnis militibus concessa. Samnitium legiones, quum partim Ap. Claudius prætor, partim L. Volumnius pro consule sequeretur, in agrum Stellatem conve nerunt: ibi et Samnitium legiones omnes considunt, et Appius Volumniusque castra conjungunt. Pugnatum infestissimis animis, hinc ira stimulante adversus rebellantes toties, illinc ab ultima jam dimicantibus spe. Cæsa ergo Samnitium sexdecim milia trecenti, capta duo millia septingenti: ex Ro-

U. C. 457. mano exercitu cecidere duo millia septingenti. Felix
 A. C. 295. annus bellicis rebus, pestilentia gravis, prodigiisque
 sollicitus: nam, et terram multifariam pluisse, et in
 exercitu Ap. Claudii plerosque fulminibus ictos, nunci-
 atum est: librique ob hæc aditi. Eo anno Q. Fa-
 bius Gurges, consulis filius, aliquot matronas ad po-
 pulum stupri damnatas pecunia multavit: ex quo
 multatio aeris Veneris ædem, quæ prope circum est,
 Belli Samnitici diuturnitas, et atrocitas. faciendam curavit. Supersunt etiam nunc Samnitium
 bella, quæ continua per quartum jam volumen an-
 numque sextum et quadragesimum, a M. Valerio,
 A. Cornelio consulibus, qui primi Samnio arma in-
 tulerunt, agimus: et ne tot annorum clades utrius-
 que gentis laboresque actos nunc referam, quibus
 nequiverint tamen dura illa pectora vinci; proximo
 anno Samnites in Sentinati agro, Pelignis, ad Ti-
 fernum, Stellatibus campis, suis ipsi legionibus,
 mixti alienis, ab quatuor exercitibus, quatuor duci-
 bus Romanis cæsi fuerant, imperatorem clarissi-
 mum gentis sue amiserant; socios bellum, Etruscos,
 Umbros, Gallos, in eadem fortuna videbant, qua
 ipsi erant: nec suis, nec externis viribus jam stare
 poterant; tamen bello non abstinebant: adeo ne
 infeliciter quidem defensæ libertatis tædebat: et
 vinci, quam non tentare victoram, malebant. Qui-
 nam sit ille, quem non pigeat longinquitatis bello-
 rum scribendo legendoque, quæ gerentes non fati-
 gaverunt?

U. C. 458. XXXII. Q. Fabium, P. Decium, L. Postumius
 A. C. 294. Megellus et M. Atilius Regulus consules secuti sunt.
 Samnum ambobus decreta provincia est; quia tres
 scriptos hostium exercitus, uno Etruriam, altero po-
 pulationes Campaniæ repeti, tertiam tuendis parari

finibus, fama erat. Postumium valetudo adversa U.C. 458.
 Romæ tenuit: Atilius extemps⁹ profectus, ut in A.C. 294.
 Samnio hostes (ita enim placuerat Patribus) non-
 dum egressos obprimeret. Velut ex composito ibi
 obvium habuere hostem; ubi et intrare, nedum va-
 stare, ipsi Samnitium agrum prohiberentur: et egre-
 di inde in pacata sociorumque populi Romani fines
 Samnitēm prohiberent. Quum castra castris con- Samnites
 lata essent, quod vix Romanus toties victor auderet,^{castra Ro-}
 ausi Samnites sunt (tantum desperatio ultima teme-^{mana ad-}
 ritatis facit) castra Romana obpugnare: et quam-
 quam non venit ad finem tam audax incepsum, ta-
 men haud omnino vanum fuit. Nebula erat ad
 multum diei densa adeo, ut lucis usum eriperet, non
 prospectu modo extra vallum ademto, sed propinquo
 etiam congregientium inter se conspectu. Hac velut
 latebra insidiarum freti Samnites, vixdum satis certa
 luce, et eam ipsam premente caligine, ad stationem
 Romanam in porta segniter agentem vigilias perve-
 niunt. Improviso obpressis nec animi satis ad re-
 sistendum, nec virium fuit. Ab tergo castrorum
 decimana porta impetus factus: itaque captum quæ-
 storium; quæstorque ibi L. Opimius Pansa occisus:
 conclamatum inde ad arma.

XXXIII. Consul, tumultu excitus, cohortes duas
 sociorum, Lucanam Suessanamque, quæ proximæ
 forte erant, tueri prætorium jubet: manipulos le-
 gionum principali via inducit. Vixdum satis aptatis
 armis, in ordines eunt: et clamore magis, quam
 oculis, hostem noscunt: nec, quantus numerus sit,
 aestimari potest. Cedunt primo incerti fortunæ suæ,
 et hostem introrsum in media castra accipiunt: inde
 quum consul vociferaretur, *expulsine extra vallum*,

U. C. 458. *castra sua obpugnaturi essent, rogitans; cl-*
 A. C. 294. *more sublato connisi primo resistunt: deinde infe-*

runt pedem urgentque, et impulsos semel terrore
eodem agunt, quo cœperunt. Expellunt extra por-
tam vallumque: inde pergere ac persequi (quia tur-
bida lux metum circa insidiarum faciebat) non ausi,
liberatis castris contenti, receperunt se intra vallum
trecentis ferme hostium occisis. Romanorum sta-
tionis primæ vigilumque et eorum, qui circa quæ-
storium obpressi, periere ad ducentos triginta. Ani-
mos inde Samnitibus non infelix audacia auxit; et
non modo proferre inde castra Romanum, sed ne
pabulari quidem per agros suos, patiebantur: retro
in pacatum Soranum agrum pabulatores ibant. Qua-
rum rerum fama, tuniultuosior etiam, quam res
erant, perlata Romam, coëgit L. Postumium con-
sulem, vixdum validum, proficisci ex urbe. Prius
tamen, quam exiret, militibus edicto Soram jussis
convenire, ipse ædem Victoriae, quam ædilis curulis
ex multatia pecunia faciendam curaverat, dedica-
vit. Ita ad exercitum profectus, ab Sora in Sam-
nium ad castra collegæ perrexit: inde postquam
Samnites, diffisi duobus exercitibus resisti posse,
recesserunt; diversi consules ad vastandos agros
urbesque obpugnandas discedunt.

Urbes Samnitium captæ. XXXIV. Postumius Milioniam obpugnare ador-
 tus, vi primo atque inpetu, dein, postquam ea pa-
 rum procedebant, opere ac vineis demum injunctis
 muro cepit. Ibi, capta jam urbe, ab hora quarta
 usque ad octavam fere horam omnibus partibus ur-
 bis diu incerto eventu pugnatum est: postremo poti-
 tur oppido Romanus. Samnitium cæsi tria millia
 ducenti: capti quatuor millia ducenti, præter præ-

dam aliam. Inde Ferentinum ductæ legiones: unde U. C. 455.
 oppidani cum omnibus rebus suis, quæ ferri agique
 potuerunt, nocte per aversam portam silentio ex-
 cesserunt. Igitur, simul advenit consul, primo ita
 compositus instructusque mœnibus successit, tam-
 quam idem, quod ad Milioniam fuerat, certaminis
 fore: deinde, ut silentium vastum in urbe, nec ar-
 ma, nec viros in turribus ac muris vidit, avidum in-
 vadendi deserta mœnia militem detinet, ne quam oc-
 cultam in fraudem incautus rueret. Duas turmas so-
 ciorum Latini nominis circumequitare mœnia, atque
 explorare omnia jubet: equites portam unam alte-
 ramque eadem regione in propinquuo patentes con-
 spiciunt, itineribusque iis vestigia nocturnæ hostium
 fugæ. Adequatant deinde sensim portis, urbemque
 ex tuto rectis itineribus perviam conspicunt: ad
 consulem referunt, excessum urbe; solitudine haud
 dubia id perspicuum esse, et recentibus vestigiis
 fugæ, ac strage rerum in trepidatione nocturna pas-
 sim relictarum. His auditis, consul ad eam partem
 urbis, qua adierant equites, circumducit agmen:
 constitutisque haud procul porta signis, quinque
 equites jubet intrare urbem, et, modicum spatium
 progressos, tres manere eodem loco, si tuta vide-
 antur; duos explorata ad se referre. Qui ubi redie-
 runt, retuleruntque, eo se progressos, unde in om-
 nes partes circumspectus esset, longe lateque silen-
 tium ac solitudinem vidiisse; extemplo consul co-
 hortes expeditas in urbem induxit; ceteros interim
 castra communire jussit: ingressi milites, refractis
 foribus, paucos graves ætate aut invalidos inveni-
 unt, reliquaque, quæ migratu difficultia essent. Ea di-
 repta; et cognitum ex captivis est, communi consilio

U. C. 458. aliquot circa urbes consicisse fugam ; suos prima vi-
 A. C. 294. gilia profectos : credere, eamdem in aliis urbibus so-
 litudinem inventuros. Dictis captivorum fides exsti-
 tit : desertis oppidis consul potitur.

Bellum XXXV. Alteri consuli M. Atilio nequaquam tam
 Attilio non facile. facile bellum fuit. Quum ad Luceriam duceret le-
 giones, quam obpugnari ab Samnitibus audierat, ad
 finem Lucerinum ei hostis obvius fuit : ibi ira vires
 æquavit. Prælium varium et anceps fuit : tristius
 tamen eventu Romanis ; et quia insueti erant vinci,
 et quia digredientes magis, quam in ipso certamine,
 senserunt, quantum in sua parte plus vulnerum ac
 cædis fuisset. Itaque is terror in castris ortus, qui
 si pugnantes cepisset, insignis accepta clades foret.
 Tum quoque sollicita nox fuit jam invasurum ca-
 stra Samnitem creditibus, aut prima luce cum
 victoribus conserendas manus. Minus cladis, cete-
 rum non plus animorum, ad hostes erat : ubi pri-
 mumi inluxit, abire sine certamine cupiunt. Sed
 via una, et ea ipsa præter hostes, erat : qua ingres-
 si, præbuere speciem recta tendentium ad castra
 obpugnanda. Consul arma capere milites jubet, et
 sequi se extra vallum : legatis, tribunis, præfectis
 socrorum imperat, quod apud quemque facto opus
 est. Omnes adfirmant, *se quidem omnia facturos,*
sed militum jacere animos : tota nocte inter vulnera et
gemitus morientium vigilatum esse. *Si ante lucem ad*
castra ventum foret, tantum pavoris fuisse, ut relicturi
signa fuerint : nunc pudore a fuga contineri, alioquin
pro victis esse. Quæ ubi consul accepit, sibimet ipsi
 circumeundos adloquendosque milites ratus, ut ad
 quosque venerat, cunctantes arma capere increpa-
 bat ; *Quid cessarent, tergiversarenturque ? Hostem in*

castra venturum, nisi illi extra castra exissent: et pro U. C. 458.
 tentoriis suis pugnatos, si pro vallo nollent: arma- A. C. 294.
 tis ac dimicantibus dubiam victoriam esse. Qui nudus
 atque inermis hostem maneat, ei aut mortem, aut ser-
 vitutem patiendam. Hæc jurganti increpantique re-
 spondebant: *Confectos se pugna hesterna esse: nec*
virium quidquam, nec sanguinis superesse: majorem
multitudinem hostium adparere, quam pridie fuerit.
 Inter hæc adpropinquabat agmen: et, jam breviore
 intervallo certiora intuentes, vallum secum portare
 Samnitem adfirmant, nec dubium esse, quin castra
 circumvallatur sint. Tunc, enimvero, consul, in-
 dignum facinus esse, vociferari, tantam contumeliam
 ignominiamque ab ignavissimo accipi hoste. Etiamne
 circumsedebimur, inquit, in castris, ut fame potius
 per ignominiam, quam ferro, si necesse est, per virtu-
 tem, moriamur? Dii bene verterent, facerentque, quod
 se dignum quisque ducerent. Consulem M. Atilium vel
 solum, si nemo aliis sequatur, iturum adversus hostes:
 easurumque inter signa Samnitium potius, quam cir-
 cumvallari castra Romana videat. Dicta consulis le-
 gati, tribunique, et omnes turmæ equitum, et cen-
 turiones primorum ordinum, adprobavere. Tum pu-
 dore victus miles segniter anna capit, segniter e ca-
 stris egreditur: longo agrinae, nec continenti, mœ-
 sti ac prope victi procedunt adversus hostem, nec
 spe, nec animo certiore. Itaque simul conspecta
 sunt Romana signa, extemplo a primo Samnitium
 agmine ad novissimum fremitus perfertur, *Exire, id*
quod timuerint, ad inpediendum iter Romanos. Nullam
 inde ne fugæ quidem patere viam: illo loco aut
 cadendum esse, aut, stratis hostibus, per corpora eo-
 rum evadendum.

U.C. 458. XXXVI. In medio sarcinas conjiciunt; armati
 A.C. 294. suis quisque ordinibus instruunt aciem. Jam exiguum inter duas acies erat spatium, et stabant expectantes, dum ab hostibus prius impetus, prius clamor inciperet: neutrī animus est ad pugnandum. Diversique integri atque intacti abissent, ni cedenti instaturum alterum timuissent: sua sponte inter invitatos tergiversantesque segnis pugna, clamore incerto atque inpari, cœpit: nec vestigio quisquam movebatur. Tum consul Romanus, ut rem excitaret, equitum paucas turmas extra ordinem immisit: quorum quum plerique delapsi ex equis essent, et alii turbati; et ab Samnitium acie ad obprimendos eos, qui ceciderant, et ad suos tuendos ab Romanis procursum est. Inde paullulum irritata pugna est, sed aliquanto et impigre magis, et plures procurrerant Samnites: et turbatus eques sua ipse subsidia territis equis proculcavit: hinc fuga cœpta totam avertit aciem Romanam. Jamque in terga fugientium Samnites pugnabant, quum consul, equo prævectus ad portam castrorum, ac statione equitum ibi obposita, edictoque, *ut, quicumque ad vallum tenderet, sive ille Romanus, sive Samnis esset, pro hoste haberent;* haec ipsa minitans, obstitit profuse tendentibus suis in castra. *Quo pergis, inquit, miles? et hic arma et viros invenies: nec, vivo consule tuo, nisi victor castra intrabis.* Proinde elige, cum cire, an hoste, pugnare malis. Hæc dicente consule, equites infestis cuspidibus circumfunduntur, ac peditem in pugnam redire jubent. Non virtus solum consulem, sed fors etiam adjuvit; quod non institerunt Samnites, spatiumque circumagendi signa, vertendique aciem a castris in hostem fuit. Tum

alii alios hortari, ut repeterent pugnam: centu- U. C. 458.
 riones ab signiferis rapta signa inferre: et ostendere A. C. 294.
 suis, paucos et ordinibus incompositis effuse venire
 hostes. Inter haec consul, manus ad cœlum adtol-
 lens, voce clara, ita ut exaudiretur, templum Jovi
 Statori vovet, si constitisset a fuga Romana acies,
 redintegratoque prolio cecidisset vicissetque legio-
 nes Samnitium. Omnes undique adnisi ad restitu-
 endam pugnam, duces, milites, peditum equitumque
 vis: numen etiam Deorum respexit nomen Ro-
 manum visum: adeo facile inclinata res, repulsique
 a castris hostes; mox etiam redacti ad eum locum,
 in quo commissa pugna erat. Ibi, objacente sarcin-
 arum cumulo, quas conjecterant in medium, haesere
 impediti: deinde, ne diriperentur res, orbem arma-
 torum sarcinis circundant. Tum vero eos a fronte
 urgere pedites, ab tergo circumvecti equites: ita in
 medio cæsi captique. Captivorum numerus fuit sep-
 tem millium ac ducentorum, qui omnes nudi sub ju-
 gum missi: cæsos retulere ad quatuor millia octingentos. Ne Romanis quidem læta victoria fuit:
 recensente consule biduo acceptam cladem, amis-
 sorum militum numerus relatus septem millium ac
 ducentorum. Dum haec in Apulia gerebantur, al-
 tero exercitu Samnites Interamnam, coloniam Ro-
 manam, quæ via Latina est, occupare conati, ur-
 bem non tenuerunt: agros depopulati quum præ-
 dam aliam inde mixtam hominum atque pecudum,
 colonosque captos agerent, in victorem incident
 consulem, ab Luceria redeuntem: nec prædam so-
 lum amittunt, sed ipsi longo atque impedito agmine
 incompositi cæduntur. Consul, Interamnam edicto
 dominis ad res suas noscendas recipiendasque re-

U. C. 458. vocatis, et exercitu ibi relicto, comitorum caussa
 A. C. 294. Romam est profectus. Cui de triumpho agenti negatus honos, et ob amissa tot millia militum, et quod captivos sine pactione sub jugum misisset.

Etruria a Postumio vastata.

XXXVII. Consul alter Postumius, quia in Samnitibus materia belli deerat, in Etruriam traducto exercitu, primum pervastaverat Volsiniensem agrum: dein cum egressis ad tuendos fines haud procul mœnibus ipsorum depugnat: duo millia octingenti Etruscorum cæsi: ceteros propinquitas urbis tutata est. In Rusellanum agrum exercitus traductus: ibi non agri tantum vastati, sed oppidum etiam expugnatum: capta amplius duo millia hominum, minus duo millia circa muros cæsa. Pax tamen clarior majorque, quam bellum in Etruria eo anno fuerat, parta est. Tres validissimæ urbes, Etruriæ capita, Volsinii, Perusia, Arretium, pacem petiere; et, vestimentis militum frumentoque pacti cum consule, ut mitti Romam oratores liceret, inducias in quadraginta annos inpetraverunt: multa præsens quingentūm millium æris in singulas civitates inposita. Ob hasce res gestas, consul quum triumphum ab senatu, moris magis caussa, quam spe inpetrandi, petisset, videretque alios, quod tardius ab urbe exisset; alios, quod injussu senatus ex Samnio in Etruriam transisset, partim suos inimicos, partim collegæ amicos, ad solatium æquitatæ repulsæ sibi quoque negare triumphum: *Non ita, inquit, Patres conscripti, vestræ majestatis meminero, ut me consulem esse obliriscar: eodem jure imperii, quo bella gessi, bellis feliciter gestis, Samnio atque Etruria subactis, Victoria et pace parta, triumphabo.* Ita senatum reliquit. Inde inter tribunos plebis contentio orta

pars intercessuros, ne novo exemplo triumpharet, U. C. 458.
 aiebant; pars auxilio se adversus collegas trium- A. C. 294.
 phanti futuros. Jactata res ad populum est: voca-
 tusque eo consul, quum M. Horatium, L. Valerium
 consules, C. Martium Rutilum nuper, patrem ejus,
 qui tunc censor esset, non ex auctoritate senatus
 sed jussu populi triumphasse diceret; adjiciebat, se
quoque laturum fuisse ad populum, ni sciret, mancipia
nobilium tribunos plebis legem inpedituros: voluntatem
sibi ac favorem consentientis populi pro omnibus
jussis esse, ac futura. Posteroque die auxilio tribu- Postumius
 norum plebis trium, adversus intercessionem septem triumphat
 tribunorum et consensum senatus, celebrante popu- senatu ad-
 lo diem, triumphavit. Et hujus anni parum con- versante.
 stans memoria est. Postumium, auctor est Claudius,
 in Samnio captis aliquot urbibus, in Apulia fusum
 fugatumque, saucium ipsum cum paucis Luceriam
 compulsum: ab Atilio in Etruria res gestas, eum-
 que triumphasse. Fabius, ambo consules in Sam-
 nio et ad Luceriam res gessisse, scribit, traductum-
 que in Etruriam exercitum, (sed ab utro consule
 non adjecit) et ad Luceriam utrimque multos occi-
 sos, inque ea pugna Jovis Statoris ædem votam, ut
 Romulus ante voverat: sed fanum tantum, id est
 locus, templo effatus, sacratus fuerat. Ceterum, hoc
 demum anno ut ædem etiam fieri senatus juberet,
 bis ejusdem voti damnata res publica in religionem
 venit.

XXXVIII. Sequitur hunc annum et consul in- U. C. 459.
 signis L. Papirius Cursor, qua paterna gloria, qua A. C. 293.
 sua, et bellum ingens victoriaque, quantam de Sam-
 nitibus nemo ad eam diem, præter L. Papirium pa-
 trem consulis, pepererat: et forte eodem conatu

U. C. 459. adparatuque omni opulentia insignium armorum
 A. C. 293. bellum adornaverant: et Deorum etiam adhibuerant opes, ritu quodam sacramenti vetusto velut initiatis militibus, delectu per omne Samnium habitu nova lege: ut, qui juniorum non convenisset ad imperatorum edictum, quique injussu abisset, caput Jovi sacratum esset. Tum exercitus omnis Aquiloniam est indictus: ad quadraginta millia militum, quod roboris in Samnio erat, convenerunt. Ibi mediis fere castris locus est conceptus cratibus pluteisque, et linteis contextus, patens ducentos maxime pedes in omnes pariter partes. Ibi ex libro vetero linteo lecto sacrificatum, sacerdote Ovio Pacatio quodam, honine magno natu, qui se id sacrum petere afirmabat ex vetusta Samnitium religione; qua quondam usi majores eorum fuissent, quum adimendæ Etruseis Capuæ clandestinum cepissent consilium. Sacrificio perfecto, per viatorem imperator adcirci jubebat nobilissimum quemque genere factisque: singuli introducebantur. Erat quum alias adparatus sacri, qui profundere religione animum posset; tum in loco circa omni contexto aræ in medio, victimæque circa cæsæ, et circumstantes centuriones strictis gladiis. Admovebatur altaribus miles, magis ut victima, quam ut sacri particeps: adgebaturque jurejurando, quæ visa auditaque in eo loco essent, non enunciaturum Dein jurare cogebatur diro quodam carmine, in execrationem capitis familiæque et stirpis composito, nisi isset in prælium, quo imperatores duxissent: et si aut ipse ex acie fugisset, aut, si quem fugientem vidisset, non exemplo occidisset. Id primo quidam abnuentes juraturos se, obtruncati circa altaria sunt:

Sacra-
mento ad-
iguntur
milites
Samni-
tium hor-
rendo
quodam
ritu.

jacentes deinde inter stragem victimarum documento U. C. 459.
 ceteris fuere, ne abnuerent. Primoribus Samnitium A. C. 293.
 ea detestatione obstrictis, decem nominatis ab im-
 peratore, eis dictum, ut vir virum legerent, donec
 sexdecim millium numerum confecissent: ea legio
 linteata ab integumento concepti, quo sacrata no-
 bilitas erat, adpellata est. His arma insignia data,
 et cristatæ galeæ, ut inter ceteros eminerent. Paul-
 lo plus viginti millium aliis exercitus fuit, nec cor-
 porum specie, nec gloria belli, nec adparatu linte-
 atæ legioni dispar: hic hominum numerus, quod
 roboris erat, ad Aquiloniam consedit.

XXXIX. Consules profecti ab urbe: prior Sp. Samnium
 Carvilius, cui veteres legiones, quas M. Atilius, su- vastant
 perioris anni consul, in agro Interamnati relique-
 rat, decretæ erant, cum eis in Samnium profectus,
 dum hostes, operati superstitionibus, concilia se- coss.
 creta agunt, Amiternum oppidum de Samnitibus vi
 cepit. Cæsa ibi millia hominum duo ferme atque
 octingenti: capta quatuor millia ducenti septua-
 ginta. Papirius novo exercitu (ita decretum erat)
 scripto, Duroniam urbem expugnavit: minus, quam
 collega, cepit hominum, plus aliquanto occidit:
 præda opulenta utrobique est parta. Inde perva-
 gati Samnium consules, maxime depopulato Atinate
 agro, Carvilius ad Cominium, Papirius ad Aquilo-
 niam (ubi summa rei Samnitium erat) pervenit:
 ibi aliquamdiu nec cessatum ab armis est, neque
 naviter pugnatum: lacessendo quietos, resistenti-
 bus cedendo, comminandoque magis, quam infe-
 rendo pugnam, dies absumebatur: quod quum in-
 ciperetur, remittereturque, omnium rerum etiam

U. C. 459. parvarum eventus proferebatur in dies. Altera Romana castra viginti millium spatio aberant: et absentis collegæ consilia omnibus gerendis intererant rebus: intentiorque Carvilius, quo majore discrimine res vertebatur, in Aquiloniam, quam ad Cominium, quod obsidebat, erat. **L.** Papirius, jam per omnia ad dimicandum satis paratus, nuncium ad collegam mittit; *sibi in animo esse, postero die, si per auspiciu liceret, configere cum hoste. Opus esse, et illum, quanta maxima vi posset, Cominium obpugnare, ne quid laxamenti sit Samnitibus ad subsidia Aquiloniam mittenda.* Diem ad proficisciendum nuncius habuit: nocte rediit, adprobare collegam consulta referens. Papirius, nuncio misso, extemplo concessionem habuit; multa de universo genere belli, multa de præsenti hostium adparatu, vana magis specie, quam efficaci ad eventum, disseruit. *Non enim cristas vulnera facere; et per picta atque aurata scuta transire Romanum pilum: et candore tunicarum fulgentem aciem, ubi res ferro geratur, cruentari. Auream olim atque argenteam Samnitium aciem a parente suo occidione occisam: spoliaque ea honestiora victori hosti, quam ipsis arma, fuisse. Datum hoc forsitan nomini familiæque suæ, ut adversus maximos conatus Samnitium obponerentur duces; spoliaque ea referrent, quæ insignia publicis etiam locis decorandis essent. Deos inmortales adesse propter toties petita fædera, toties rupta: tum, si qua conjectura mentis divinæ sit, nulli umquam exercitui fuisse infestiores, quam qui, nefando sacro mixta hominum pecudumque cæde respersus, incipiti Deum iræ devotus, hinc fæderum cum Romanis ictorum testes Deos, hinc juris-*

Papirius
milites
hortatur.

*jurandi adversus fædera suscepti execrationes horrens, U. C. 459.
invitus juraverit, oderit sacramentum, uno tempore A. C. 293.
Deos, cives, hostes metuat.*

XL. Hæc, comperta perfugarum indiciis, quum apud infensos jam sua sponte milites disseruisset, simul divinæ humanæque spei pleni, clamore consentienti pugnam poscunt; pœnitet in posterum diem dilatum certamen; moram diei noctisque oderunt. Tertia vigilia noctis, jam relatis literis a collega, Papirius silentio surgit, et pullarium in auspicium mittit. Nullum erat genus hominum in castris intactum cupiditate pugnæ: summi infimique æque intenti erant: dux militum, miles ducis ardorem spectabat. Is ardor omnium etiam ad eos, qui auspicio intererant, pervenit: nam, quum pulli non pascerentur, pullarius, auspicium mentiri ausus, tri-
Auspiciumpodium solistimum consuli nunciavit. Consul latus
mentitur auspicium egregium esse, et Deis auctoribus rem
pullarius.
gesturos, pronunciat; signumque pugnæ proponit. Exeunti jam forte in aciem nunciat perfuga, viginti cohortes Samnitium (quadringenariæ ferme erant) Cominium profectas, quod ne ignoraret collega, extemplo nuncium mittit: ipse signa ocius proferri jubet, subsidiaque suis quæque locis, et præfectos subsidiis attribuerat. Dextro cornu L. Volumnium, sinistro L. Scipionem, equitibus legatos alios, Caios Cædicium et Trebonium, præfecit. Sp. Nautium mullos, detractis clitellis, cum cohortibus alariis in tumulum conspectum propere circumducere jubet, atque inde inter ipsam dimicationem, quanto maxime posset, moto pulvere ostendere. Dum his intentus imperator erat, altercatio inter pullarios orta de auspicio ejus diei, exauditaque ab equitibus Roma-

U. C. 459. nis : qui, rem haud spernendam rati, Sp. Papirio
 A. C. 293. fratri filio consulis, ambigi de auspicio, renunciaverunt. Juvenis, ante doctrinam Deos spernentem natus, rem inquisitam, ne quid incompertum deferret ad consulem, detulit. Cui ille, *Tu quidem macte virtute diligentiaque esto : ceterum qui auspicio adest, si quid falsi nunciat, in semet ipsum religionem recipit.* *Mihi quidem tripudium nunciatum, populo Romano exercituque egregium auspicium est.* Centurionibus deinde imperavit, ut pullarios inter prima signa constituerent. Promovent et Samnites signa ; insequitur acies ornata armataque, ut hostium quoque magnificum spectaculum esset. Priusquam clamor tolleretur, concurrereturque, emisso temere pilo ictus pullarius ante signa cecidit : quod ubi consuli nunciatum est, *Dii in prælio sunt*, inquit ; *habet paenam noxiū caput.* Ante consulem hæc dicentem corvus voce clara occinuit : quo lætus augurio consul, adfirmans numquam humanis rebus magis præsentes interfuisse Deos, signa canere, et clamorem tolli jussit.

Isque ictus pilo cadit.

XLI. Prælium commissum atrox, ceterum longe disparibus animis. Romanos ira, spes, ardor certaminis, avidos hostium sanguinis in prælium rapit : Samnitium magnam partem necessitas ac religio invitatos magis resistere, quam inferre pugnam, cogit : nec sustinuissent primum clamorem atque impetum Romanorum, per aliquot jam annos vinci adsueti, ni potentior alias metus insidens pectoribus a fuga retineret. Quippe in oculis erat omnis ille occulti paratus sacri, et armati sacerdotes, et promiscua hominum pecudumque strages, et respersæ fando nefandoque sanguine aræ, et dira execratio, ac

furiāle carmen, detestandæ familiæ stirpique com- U. C. 459.
 positum : his vineulis fugæ obstricti stabant, civem A. C. 293.
 magis, quam hostem, timentes. Instare Romanus
 a cornu utroque, a media acie, et cædere Deorum
 hominumque adtonitos metu : repugnatur segniter,
 ut ab iis, quos timor moraretur a fuga. Jam prope
 ad signa cædes pervenerat, quum ex transverso pul-
 vis, velut ingentis agniinis incessu motus, adparuit.
 Sp. Nautius (Octavium Metium quidam eum tra-
 dunt) dux alaribus cohortibus erat : pulverem ma-
 jorem, quam pro numero, excitabant : insidentes
 mulis calones frondosos ramos per terram trabe-
 bant : arma signaque per turbidam lucem in primo
 adparebant : post altior densiorque pulvis equitum
 speciem cogentium agmen dabat. Fefellitque non
 Samnites modo, sed etiam Romanos : et consul ad-
 firmavit errorem, elamitans inter prima signa, ita ut
 vox etiam ad hostes accideret, *cuptum Cominium, vic-*
torem collegam adesse; adniterentur vincere prius,
quam gloria alterius exercitus fieret. Hæc insidens
 equo : inde tribunis centurionibusque imperat, ut
 viam equitibus patesciam. Ipse Trebonio Cædi-
 cioque prædixerat, ut, ubi se cuspidem erectam
 quatientem vidissent, quanta maxima vi possent,
 concitarent equites in hostem. Ad nutum omnia,
 ut ex ante præparato, fiunt : panduntur inter ordi-
 nes viæ : provolat eques, atque infestis cuspidibus
 in medium agmen hostium ruit : perrumpitque or-
 dines, quaeumque impetum dedit : instant Volum-
 nius et Scipio, et percussos sternant. Tum, jam Victi Sam-
 Deorum hominumque vieta vi, funduntur linteatæ ^{nites.}
 cohortes : pariter jurati injuratique fugiunt, nec
 quemquam, præter hostes, metuunt. Peditum ag-

U. C. 459. men, quod superfuit pugnæ, in castra ad Aquiloniam
 A. C. 293. compulsum est : nobilitas equitesque Bovianum per-
 fugerunt : equites eques sequitur, peditem pedes : ac
 diversa cornua, dextrum ad castra Samnitium, læ-
 vum ad urbem tendit. Prior aliquanto Volumnius
 castra cepit : ad urbem Scipioni majore resistitur
 vi ; non quia plus animi victis est, sed melius muri,
 quam vallum, armatos arcent : inde lapidibus pro-
 pulsant hostem. Scipio, nisi in primo pavore, pri-
 usquam configerentur animi, transacta res esset,
 lentiorem fore munitæ urbis obpugnationem ratus,
 interrogat milites, *Satin' æquo animo paterentur, ab*
altero cornu castra capta esse : se victores pelli a por-
tis urbis ? Reclamantibus universis, prius ipse,
scuto super caput elato, pergit ad portam : secuti
alii, testudine facta, in urbem perrumpunt : detur-
batisque Samnitibus, qui circa portam erant, muros
occupavere : penetrare in interiora urbis, quia pauci
admodum erant, non audent.

XLI. Hæc primo ignorare consul, et intentus
 recipiendo exercitu esse : jam enim præceps in oc-
 casum sol erat, et adpetens nox periculosa et sus-
 pecta omnia etiam victoribus faciebat. Progres-
 sus longius ab dextra castra capta videt : ab læva
 clamorem in urbe mixtum pugnantium ac paventium
 fremitu esse : et tum forte certamen ad portam erat.
 Advectus deinde equo propius, ut suos in muris vi-
 det, nec jam integri quidquam esse, quoniam teme-
 ritate paucorum magnæ rei parta occasio esset, ad-
 ciri, quas receperat, copias, signaque in urbem in-
 ferri jussit. Ingressi proxima ex parte, quia nox
 adpropinquabat, quievere : nocte oppidum ab ho-
 stibus desertum est. Cæsa illo die ad Aquiloniam

Samnitium millia triginta trecenti quadraginta : cap- U. C. 459.
ta tria millia octingenti et septuaginta : signa mili- A. C. 293.
taria nonaginta septem. Ceterum illud memoriae tra-
ditur, non ferme alium ducem lætiorem in acie vi-
sum, seu suopte ingenio, seu fiducia bene gerundæ
rei. Ab eodem robore animi neque controverso au-
spicio revocari a prælio potuit ; et in ipso discrimi-
ne, quo tempora Diis immortalibus voveri mos erat,
voverat Jovi Victor, si legiones hostium fudisset,
pocillum mulsi prius, quam temetuni biberet, sese Pocillum
facturum : id votum Diis cordi fuit : et auspicia in ^{mulsi vo-}_{tum} Jovi,
bonum verterunt.

XLIII. Eadem fortuna ab altero consule ad Co-
minium gesta res. Prima luce, ad mœnia omnibus
copiis admotis, corona cinxit urbem ; subsidiaque
firma, ne qua eruptio fieret, portis obposuit. Jam
signum dantem eum nuncius a collega trepidus de
viginti cohortium adventu et ab inpetu moratus est,
et partem copiarum revocare instructam intentam-
que ad obpugnandum coëgit. D. Brutus Scævani
legatum cum legione prima et decem cohortibus
alariis equitatuque ire adversus subsidium hostium
jussit : quocumque in loco fuisset obvius, obsisteret
ac moraretur ; manumque, si forte ita res posceret,
conferret : modo ne ad Cominium eæ copiæ admo- Cominium
veri possent. Ipse scalas ferri ad muros ab omni ^{a Carvilio} captum.
parte urbis jussit, ac testudine ad portas successit :
simul et refringebantur portæ, et vis undique in mu-
ros fiebat. Samnites, sicut, antequam in muris vi-
derent armatos, satis animi habuerunt ad prohiben-
dos urbis aditu hostes ; ita, postquam jam non ex
intervallo nec missilibus, sed cominus gerebatur res ;
et, qui ægre successerant ex plano in muros, loco,

U.C. 459. quem magis timuerant, victo, facile in hostem in-
A.C. 293. parem ex æquo pugnabant; relictis turribus muris-
que, in for. omnes compulsi, paullisper inde ten-
taverunt extremam pugnae fortunam. Deinde, ab-
jectis armis, ad undecim millia hominum et quadrin-
genti in fidem consulis venerunt: cæsa ad quatuor
millia trecenti octoginta. Sic ad Cominium, sic ad
Aquiloniam gesta res. Inde medio inter duas urbes
spatio, ubi tertia exspectata erat pugna, hostes non
inventi: septem millia passuum quum abessent a
Cominio, revocati ab suis neutri prælio obcur-
runt. Primis ferme tenebris quum in conspectu jam
castra, jani Aquiloniam habuissent, clamor eos
intrime par accidens sustinuit: deinde e regione
castrorum, quæ incensa ab Romanis erant, flamma
late fusa certioris cladis indicio progredi longius
prohibuit. Eo ipso loco prope temere sub armis
strati passim inquietum omne tempus noctis, ex-
spectando timendoque lucem, egere: prima luce,
incerti quam in partem intenderent iter, repente in
fugam consternantur, conspecti ab equitibus: qui,
egressos nocte ab oppido Samnites persecuti, vide-
rant multitudinem, non vallo, non stationibus fir-
matam. Conspecta et ex muris Aquiloniae ea mul-
titudo erat: janique etiam legionariae cohortes se-
quebantur. Ceterum nec pedes fugientes persequi
potuit: et ab equite novissimi agminis ducenti ferme
et octoginta interfici. Arma multa pavidi ac signa
militaria duodeviginti reliquere: alio agmine inco-
lumi, ut ex tanta trepidatione, Bovianum perven-
tum est.

XLIV. Lætitiam utrinque exercitus Romani
auxit et ab altera parte feliciter gesta res: uterque

ex alterius sententia consul captum oppidum diri- U.C. 459.
piendum militi dedit; exhaustis deinde tectis ignem A.C. 293.
injecit: eodemque die Aquilonia et Coninium de-
flagravere: et consules, cum gratulatione mutua
legionum suaque, castra conjunxere. In conspectu
duorum exercituum et Carvilius suos pro cujusque
merito laudavit donavitque; et Papirius, apud quem
multiplex in acie, circa castra, circa urbem, fuerat
certamen, Sp. Nautium, Sp. Papirium, fratri filium,
et quatuor centuriones, manipulumque hastatorum,
armillis aureisque coronis donavit: Nautium propter
expeditionem, qua magni agminis modo terruerat
hostes: juvenem Papirium propter navatam cum
equitatu et in pœlio operam, et nocte, qua fugam
infestam Samnitibus ab Aquilonia clam egressis
fecit: centuriones militesque, quia primi portam
murusque Aquiloniae ceperant: equites omnes, ob
insignem multis locis operam, corniculis armillisque
argenteis donat. Consilium inde habitum, quum
jam tempus esset deducendi ab Samnio exercitus,
aut utriusque, aut certe alterius. Optimum visum,
quo magis fractæ res Samnitum essent, eo perti-
nacius et infestius agere cetera et persequi: ut per-
domitum Samnum insequentibus consulibus tradi
posset. Quando jam nullus esset hostium exercitus,
qui signis conlatis dimicaturus videretur, unum su-
peresse belli genus, urbium obpugnationes; quarum
per excidia militem locupletare præda, et hostem
pro aris ac focis dimicantem conficere possent. Ita-
que, literis missis ad senatum populumque Roma-
num de rebus ab se gestis, diversi, Papirius ad Sæ-
pinum, Carvilius ad Volaniam obpugnandam legio-
nes ducunt.

U. C. 459. XLV. Literæ consulum ingenti lætitia et in curia
 A. C. 293. et in concione auditæ ; et quatridui supplicatione
 publicum gaudium privatis studiis celebratum est :
 nec populo Romano magna solum, sed peropportu-
 na etiam, ea victoria fuit ; quia per idem forte tem-
 pus rebellasse Etruscos adlatum est. Subibat cogi-
 tatio animum, quonam modo tolerabilis futura Etru-
 ria fuisset, si quid in Samnio adversi venisset ; quæ,
 conjuratione Samnitium erecta, quoniam ambo con-
 sules omnisque Romana vis aversa in Samnum es-
 set, occupationem populi Romani pro occasione re-
 bellandi habuisset. Legationes sociorum, a M. Ati-
 lio prætore in senatum introductæ, querebantur,
 uri et vastari agros a finitimis Etruscis, quod de-
 sciscere a populo Romano nollent : obtestabantur
 que Patres conscriptos, ut se a vi atque injuria com-
 munium hostium tutarentur. Responsum legatis,
curæ senatui futurum, ne socios fidei suæ pœniteret :
Etruscorum prope diem eamdem fortunam, quam Sam-
nitium, fore. Segnius tamen quod ad Etruriani ad-
 tinebat, acta res esset, ni Faliscos quoque, qui per
 multos annos in amicitia fuerant, adlatum foret,
 arma Etruscis junxisse. Hujus propinquitas populi
 acuit curam Patribus, ut feciales mittendos ad res
 repetendas censerent : quibus non redditis, ex aucto-
 ritate Patrum jussu populi bellum Faliscis indictum
 est : jussique consules sortiri, uter ex Samnio in
 Etruriam cum exercitu transiret. Jam Carvilius
 Volanam, et Palumbinum, et Herculaneum ex Sam-
 nitibus ceperat : Volanam intra paucos dies, Palum-
 binum eodem, quo ad muros accessit. Ad Hercu-
 laneum bis etiam signis conlatis ancipiti prælio, et
 cum majore sua, quam hostium, jactura dimicavit.

Etrusco-
 rum re-
 bellio.

Castris deinde positis, mœnibus hostem inclusit. U. C. 459.
 obpugnatum oppidum captumque. In his tribus ur- A. C. 293.
 bibus capta aut cæsa ad decem millia hominum : ita
 ut parvo admodum plures caperentur. Sortientibus
 provincias consulibus, Etruria Carvilio evenit secun-
 dum vota militum, qui vim frigoris jam in Samnio
 non patiebantur. Papirio ad Sæpinum major vis ho-
 stium restitit : sæpe in acie, sæpe in agmine, sæpe
 circa ipsam urbem adversus eruptiones hostium
 pugnatum : neque obsidio, neque bellum ex æquo
 erat : non enim muris magis se Samnites, quam
 armis ac viris mœnia, tutabantur. Tandem pug-
 nando in obsidionem justam coëgit hostes : obsi-
 dendoque vi atque operibus urbem expugnavit : ita-
 que ab ira plus cædis editum, capta urbe : septem
 millia quadringenti cæsi : capta minus tria millia
 hominum : præda, quæ plurima fuit, congestis Sam-
 nitium rebus in urbes paucas, militi concessa est.

XLVI. Nives jam omnia oppleverant, nec du- Papirii tri-
 rari extra tecta poterat ; itaque consul exercitum de umphus.
 Samnio deduxit. Venienti Romam triumphus om-
 nium consensu est delatus : triumphavit in magi-
 stratu, insigni, ut illorum temporum habitus erat,
 triumpho. Pedites equitesque insignes donis trans-
 iere, ac transvecti sunt : multæ civicæ coronæ, val-
 laresque, ac murales conspectæ. Inspectata spolia
 Samnitium : et decore ac pulchritudine paternis
 spoliis, quæ nota frequenti publicorum ornatu lo-
 corum erant, comparabantur : nobiles aliquot cap-
 tivi, clari suis patrumque factis, ducti. Æris gravis
 transvecta vicies centena et ad triginta tria millia :
 id æs redactum ex captivis dicebatur : argenti, quod
 captum ex urbibus erat, pondo millia trecenta tri-

U. C. 459. ginta : omne æs argentumque in ærarium conditum.

A. C. 293. Militibus nihil datum ex præda est : auctaque ea invidia est ad plebem, quod tributum etiam in stipendum militum conlatum est : quum, si spreta gloria fuisset captivæ pecuniæ in ærarium inlatæ, et militum dari ex præda, et stipendum militare præstari potuisset. Ædem Quirini, quam in ipsa dimicatione votam apud neminem veterem auctorem invenio, (neque, Hercule, tam exiguo tempore perficere potuisset) ab dictatore patre votam, filius consul dedicavit, exornavitque hostium spoliis : quorum tanta multitudo fuit, ut non templum tantum forumque his ornaretur ; sed sociis etiam colonisque finitimis, ad templorum locorumque publicorum ornatum, dviderentur. A triumpho exercitum in agrum Vescinum, quia regio ea infesta ab Samnitibus erat, hibernatum duxit. Inter hæc Carvilius consul, in Etruria Troilium primum obpugnare adortus, quadringentos septuaginta ditissimos, pecunia grandi pactos, ut abire inde liceret, dimisit : ceteram multitudinem oppidumque ipsum vi cepit : inde quinque castella, locis sita munitis, expugnavit. Cæsa ibi hostium duo millia quadringenti ; minus duo millia capti. Et Faliscis pacem petentibus annuas inducias dedit, pactus centum millia gravis æris, et stipendum ejus anni militibus. His rebus actis ad triumphum decessit, ut minus clarum de Samnitibus, quam collegæ triumphus fuerat, ita cumulo Etrusci belli æquatum. Æris gravis tulit in ærarium trecenta octoginta millia : de reliquo ære ædem Fortis Fortunæ de manubiis faciendam locavit, prope ædem ejus Deæ ab rege Ser. Tullio dedicatam : et militibus ex præda centenos binos asses, et alterum

Carvilius
triumphus.

tantum centurionibus atque equitibus (malignitate U. C. 459,
collegæ gratius accipientibus munus) divisit. Favor A. C. 293.
consulis tutatus ad populum est L. Postumium legatum ejus: qui dicta die a M. Cantio tribuno plebis, fugerat in legationem (ut fama ferebat) populi judicium: jactarique magis, quam peragi, accusatio ejus poterat.

XLVII. Exacto jam anno, novi tribuni plebis Lustrum magistratum inierant: iisque ipsis, quia vitio conditum ati erant, quinque post dies alii subfecti. Lustrum conditum eo anno est a P. Cornelio Arvina, C. Marcio Rutilo, censoribus: censa capitum millia ducenta sexaginta duo trecenta viginti duo. Censores vicesimi sexti a primis censoribus; lustrum undevicesimum fuit. Eodem anno coronati primum, ob res bello bene gestas, ludos Romanos spectaverunt: palmæque tum primum, translato e Græcia more, victoribus datæ. Eodem anno ab ædilibus curulibus, qui eos ludos fecerunt, damnatis aliquot pecuariis, via a Martis silice ad Bovillas perstrata est. Comitia consularia L. Papirius habuit: creavit consules Q. Fabium Maximi filium Gurgitem et D. Junium Brutum Scævam: ipse Papirius prætor factus. Multis rebus lætus annus vix ad solatium unius mali, pestilentiae urentis si- Pestilentia. mul urbem atque agros, subfecit; portentoque jam similis clades erat: et libri aditi, quinam finis, aut quod remedium ejus mali ab Diis daretur. Inventum in libris, Æsculapium ab Epidauro Romanum arcessendum: neque eo anno, quia bello occupati consules erant, quidquam de ea re actum: præterquam quod unum diem Æsculapio supplicatio habita est.

EPITOME LIBRI XI.

QUUM *Fabius Gurges consul male adversus Samnites pugnasset, et senatus de removendo eo ab exercitu ageret, *Fabius Maximus pater, deprecatus hanc filii ignominiam, eo maxime senatum movit, quod iturum se filio legatum pollicitus est, idque præstitit : ejus consiliis et opera filius consul adjutus, cæsis Samnitibus, triumphavit. C. Pontium, imperatorem Samnitium, ductum in triumpho securi percussit. Quum civitas pestilentia laboraret, missi legati, ut Æsculapii signum Romam ab Epidauro transferrent, anguem, qui se in nacem eorum contulerat, in quo ipsum numen esse constabat, deportavere : eoque in insulam Tiberis egresso, eodem loco ædes Æsculapio consecrata est. L. Postumius consularis, quoniam, quum exercitui præcesset, opera militum in agro suo usus erat, damnatus est. Cum Samnitibus pacem petentibus fœdus quarto renovatum est. Curius Dentatus consul, Samnitibus cæsis, et Sabinis, qui rebellaverant, victis, et in dedicationem acceptis, bis in eodem magistratu triumphavit. Coloniæ deductæ sunt, Castrum, Sena, Hadria. Triumviri capitales tunc primum creati sunt. Censu acto, lustrum conditum est : censa sunt cirium capita ducenta septuaginta duo millia. Plebs propter æs alienum, post graves et longas seditiones, ad ultimum se-**

cessit in Janiculum: unde a Q. Hortensio dictatore deducta est, isque in ipso magistratu decessit. Res præterea contra Volsinienses gestas continet: item adversus Lucanos, contra quos auxilium Thurinis ferre placuerat.

EPITOME LIBRI XII.

QUUM legati Romanorum a Gallis Senonibus interfecti essent, bello ob id Gallis indicto, L. Cæcilius prætor cum legionibus ab iis cæsus est. Quum a Tarentinis classis Romana direpta esset, duumviro, qui præerat classi, occiso, legati, ad eos a senatu, ut de iis injuriis quererentur, missi, pulsati sunt: ob id, bellum iis indictum est. Samnites defecerunt. Adversus eos, et Lucanos, et Bruttios, et Etruscos aliquot præliis a compluribus ducibus bene pugnatum est. Pyrrhus Epirotarum rex, ut auxilium ferret Tarentinis, in Italiam venit. Quum in præsidium Reginorum legio Campana cum præfecto Decio Jubellio missa esset, occisis Reginis Rheygium occupavit.

EPITOME LIBRI XIII.

VALERIUS Lævinus consul parum prospere adversus Pyrrhum pugnavit, elephantorum maxime inusitata facie territis militibus. Post id prælium cum corpora Romanorum, qui in acie ceciderant, Pyrrhus inspiceret, omnia versa in hostem invenit, populabundusque ad urbem Romam processit. C. Fabricius, missus ad eum a senatu, ut de redimendis captivis agearet, frustra, ut patriam desereret, a rege tentatus est: captivi sine pretio remissi sunt. Cineas, legatus a Pyrrho ad senatum missus, petiit, ut componendæ pacis caussa rex in urbem recipetur: de qua re quum ad frequentiorem senatum referri placuisset, Ap. Claudius, qui propter valetudinem oculorum jamdiu consiliis publicis se abstinuerat, venit in curiam, et sententia sua tenuit, ut id Pyrrho negaretur. Cn. Domitius censor primus ex plebe lustrum condidit: censa sunt civium capita ducenta septuaginta octo millia, ducenta viginti duo. Iterum adversus Pyrrhum dubio eventu pugnatum est. Cum Karthaginiensibus quartum fœdus renovatum est. Quum C. Fabricio consuli is, qui ad eum a Pyrrho transfugerat, polliceretur, se regi venenum daturum, cum indicio ad regem remissus est. Res præterea contra Etruscos, Lucanos, Bruttios, et Samnites prospere gestas continet.

EPITOME LIBRI XIV.

PYRRHUS in Siciliam trajecit. Quum inter alia prodigia fulmine dejectum esset in Capitolio Jovis signum, caput ejus per aruspices inventum est. Curius Dentatus, quum delectum haberet, ejus, qui catus non responderat, bona primus vendidit. Pyrrhum iterum ex Sicilia in Italiam reversum vicit, et Italia expulit. Fabricius censor P. Cornelium Rufinum consularem senatu morit, quod is decem pondo argenti facti haberet. Lustro a censoribus condito, censa sunt capita cirium ducenta septuaginta unum millia, ducenta viginti quatuor. Cum Ptolemæo Ægypti rege societas juncta est. Sextilia virgo Vestalis, damnata incesti, riva defossa est. Coloniae deductæ sunt Posidonia et Cosa. Karthaginiensium classis auxilio Tarrentinis venit: quo facto ab iis fœdus violatum est. Res præterea contra Lucanos, Samnites, et Bruttios feliciter gestas, et Pyrrhi regis mortem continet.

EPITOME LIBRI XV.

VICTIS Tarentinis pax et libertas data est. Legio Campana, quæ Rhegium occupaverat, obsessa, ditione facta, securi percussa est. Quum legatos Apolloniatum ad senatum missos quidam juvenes pulsassent, dediti sunt Apolloniatibus. Picentibus victis pax data est: coloniæ deductæ, Ariminum in Piceno, Benerentum in Samnio. Tunc primum populus Romanus argento uti cœpit. Umbri et Sallentini vici in ditionem accepti sunt. Quæstorum numerus ampliatus est, ut essent octo.

EPITOME LIBRI XVI.

ORIGO Karthaginiensium et primordia urbis eorum referuntur; contra quos et Hieronem regem Syracusanorum auxilium Mamertinis ferendum censuit senatus, quum de ea re inter suadentes, ut id fieret, dissuadentesque contentio fuisset. Transgressis tum primum mare equitibus Romanis, adversus Hieronem saepius bene pugnatum. Petenti pax data est. Lustrum a censoribus conditum est: censa sunt civium capita ducenta octoginta duo millia, ducenta triginta quatuor. D. Junius Brutus munus gladiatorum in honorem defuncti patris dedit primus. Colonia Æsernia deducta est. Res præterea contra Pœnos et Vulsinios prospere gestas continet.

EPITOME LIBRI XVII.

*C*N. Cornelius consul, a classe Punica circumventus, et per fraudem velut in conloquium evocatus, captus est. C. Duilius consul adversus classem Pœnorum prospere pugnavit, primusque omnium Romanorum ducum navalis victoriæ duxit triumphum: ob quam caussam ei perpetuus honos habitus est, ut revertenti a cœna, tibicine canente, funale præferretur. L. Cornelius consul in Sardinia et Corsica contra Sardos, et Corsos, et Hannonem Pœnorum ducem feliciter pugnavit. Atilius Calatinus consul, quum in locum ini-
quum, a Pœnis circumsessum, temere duxisset exerci-
tum, M. Calpurnii tribuni militum virtute et opera
evasit: qui, cum trecentis militibus eruptione facta,
hostes in se converterat. Hannibal dux Pœnorum,
victa classe, cui præfuerat, a militibus suis in crucem
sublatus est. Atilius Regulus consul, victis navalib
prælio Pœnis, in Africam trajecit.

EPITOME LIBRI XVIII.

ATILIUS Regulus in Africa serpentem portentosæ magnitudinis cum magna militum clade occidit, et, quum aliquot præliis bene adversus Karthaginienses pugnasset, successorque ei a senatu prospere bellum gerenti non mitteretur, id ipsum per literas ad senatum missas questus est: in quibus inter caussas pentendi successoris erat, quod agellus ejus a mercenariis desertus esset. Quærente deinde fortuna, ut magnum utriusque casus exemplum in Regulo proderetur, arcessito a Karthaginiensibus Xanthippo Lacedæmoniorum duce, victus prælio et captus est. Res deinde a ducibus Romanis omnibus terra marique prospere gestas deformaverunt naufragia classium. Ti. Coruncanius primus ex plebe pontifex maximus creatus est. P. Sempronius Sophus, M. Valerius Maximus censores, quum senatum legerent, tredecim senatu moverunt: lustrum condiderunt, quo censa sunt civium capita ducenta nonaginta septem millia, sepingenta nonaginta septem. Regulus missus a Karthaginiensibus ad senatum, ut de pace, et, si eam non posset impetrare, de captivis commutandis ageret, et jurejurando adstrictus. redditurum se Karthaginem, si commutari ceptivos non placuisset; utrumque negundi auctor senati fuit: et, quum fide custodita reversus esset, supplicio a Karthaginiensibus de eo sumto, periit.

EPITOME LIBRI XIX.

CÆCILIUS Metellus, rebus adversus Pænos prospere gestis, speciosum egit triumphum, tredecim ducibus hostium et centum viginti elephantis in eoductis. Claudius Pulcher consul, contra auspicia profectus, jussis mergi pullis, qui cibari solebant, infeliciter adversus Karthaginienses classe pugnavit; et, revocatus a senatu, jussusque dictatorem dicere, Claudium Gliciam dixit, sortis ultimæ hominem: qui, coactus abdicare se magistratu, postea ludos prætextatus spectavit. Atilius Calatinus primus dictator extra Italiam exercitum duxit. Cum Pænis captiorum commutatio facta est. Coloniæ deductæ sunt Fregenæ, in agro Sallentino Brundusium. Lustrum a censoribus conditum est: censa sunt civium capita ducenta quinquaginta unum millia, ducenta viginti duo. Claudia, soror P. Claudi, qui, contemtis auspiciis, male pugnaverat, a ludis revertens, quum turba premeretur, dixit: Utinam frater meus viveret, iterumque classem duceret! ob eam caussam multa ei dicta est. Duo prætores tum primum creati sunt. Cæcilius Metellus pontifex maximus A. Postumium consulem, quoniam idem et flamen Martialis erat, quum is ad bellum gerendum proficisci vellet, in urbe tenuit, nec passus est a sacris recedere. Rebus adversus Pænos a pluribus ducibus prospere gestis, summam victoriæ C. Lu-

tatius consul, victa ad Aegates insulas classe Pænorum, in posuit. Petentibus Karthaginiensibus pax data est. Quum templum Vestæ arderet, Cæcilius Metellus pontifex maximus ex incendio sacra rapuit. Duæ tribus adjectæ sunt, Velina et Quirina. Falisci quum rebellassent, sexto die perdoniti, in deditio nem venerunt.

EPITOME LIBRI XX.

SPOLETIUM colonia deducta est. *Adversus Ligures tunc primum exercitus promotus est. Sardi et Corsi, quum rebellassent, subacti sunt. Tuccia virgo Vestalis incesti damnata est. Bellum Illyriis, propter unum ex legatis, qui ad eos missi erant, occisum, indictum est: subactique in ditionem venerunt. Praetorum numerus ampliatus est, ut essent quatuor. Galli Transalpini, qui in Italiam intruperant, cæsi sunt. Eo bello populus Romanus sui Latinique nominis trecenta millia armatorum habuisse dicitur. Exercitibus Romanis tum primum trans Padum ductis, Galli Insubres, aliquot præliis fusi, in ditionem venerunt. M. Claudius Marcellus consul, occiso Insubrium Gallorum duce Virdomaro, opima spolia retulit. Istri subacti sunt. Item Illyrii, quum rebellassent, domiti in ditionem venerunt. Lustrum a censoribus conditum est, quo censa sunt civium capita ducenta septuaginta millia, ducenta tredecim. Libertini in quatuor tribus redacti sunt, quum antea dispersi per omnes fuissent; Esquilinam, Palatinam, Suburranam, Collinam. C. Flaminius censor viam Flaminiam munit, et circum Flaminium extruxit. Coloniae deductæ in agro de Gallis capto, Placentia et Cremona.*

EPITOME LIBRI XXI.

In Italiam belli Punici secundi ortus narratur, et Hannibalis Pænorum ducis contra fædus per Iberum amnem transitus, a quo Saguntum, sociorum populi Romani civitas, obsessa octavo mense capta est. De quibus injuriis missi legati ad Karthaginienses, qui quererentur: quum satisfacere nollent, bellum iis indictum est. Hannibal, superato Pyrenæo saltu, per Gallias, fusis Volcis, qui obsistere conati erant, ad Alpes renit; et laborioso per eas transitu (quum montanos quoque Gallos obvios aliquot præliis repulisset) descendit in Italiam, et ad Ticinum amnum Romanos equestri prælio fudit: in quo vulneratum P. Cornelium Scipionem protexit filius, qui Africani postea nomen accepit: iterumque exercitu Romano ad flumen Trebiam fuso, Hannibal Apenninum quoque, per magnam militum vexationem propter vim tempestatum, transiit. Cn. Cornelius Scipio in Hispania contra Pænos propere pugnavit, dace hostium Magone capto.

T. LIVII PATAVINI

LIBER XXI.

IN parte operis mei licet mihi præfari, quod in principio summæ totius professi plerique sunt rerum scriptores, bellum maxime omnium memorabile, quæ umquam gesta sint, me scripturum; quod, Hannibale duce, Karthaginenses cum populo Romano gessere. Nam neque validiores opibus ultæ inter se civitates gentesque contulerunt arma, neque his ipsis tantum unquam virium aut roboris fuit: et haud ignotas belli artes inter se, sed expertas primo Punico conserebant bello: et adeo varia belli fortuna ancepsque Mars fuit, ut proprius periculum fuerint, qui vicerunt. Odiis etiam prope majoribus certarunt, quam viribus: Romanis indignantibus, quod victoribus victi ultiro inferrent arma; Poenis, quod superbe avareque crederent imperitatum victis esse. Fama etiam est, Hannibalem annorum ferme novem, pueriliter blandientem patri Hamilcari, ut duceretur in Hispaniam, quum, perfecto Africo bello, exercitum eo trajecturus sacrificaret, altaribus admotum, tactis sacris jurejurando adactum, se, quum primum posset, hostem fore populo Romano. Angebant ingentis spiritus virum Sicilia Sardiniaque amissæ: nam et Siciliam nimis celeri desperatione rerum concessam, et Sardiniam

Belli Punici secundi magnitudo.

Hannibal odium jurat in Romanos. Hamilcar bellum Romanum meditatur.

inter motum Africæ fraude Romanorum, stipendio etiam insuper inposito, interceptam.

II. His auxiis curis ita se Africo bello, quod fuit sub recentem Romanam pacem, per quinque annos, ita deinde novem annis in Hispania augendo Punico imperio gessit; ut adpareret, majus eum, quam quod gereret, agitare in animo bellum: et, si diutius vixisset, Hamilcare duce Pœnos arma Italiæ inlaturos fuisse, quæ Hannibal is ductu intulerunt.

Moritur. Mors Hamilcaris peropportuna et pueritia Hannibal is distulerunt bellum. Medius Hasdrubal inter gener ei succedit. patrem et filium octo ferme annos imperium obtinuit; flore ætatis (uti ferunt) prinio Hamilcari conciliatus: gener inde ob altam indolem proiecto annis adscitus, et, quia gener erat, factionis Barcinæ opibus, quæ apud milites plebemque plus quam modicæ erant, haud sane voluntate principum, imperio potitus. Is, plura consilio, quam vi, gerens, hospitiis regulorum magis, conciliandisque per amicitiam principum novis gentibus, quam bello aut ar-

Occiditur. mis, rem Karthaginiensem auxit. Ceterum nihilo ei pax tutior fuit: barbarus eum quidam palam, obiram imperfecti ab eo domini, obtruncavit; comprehensusque ab circumstantibus haud alio, quam si evasisset, vultu; tormentis quoque quum laceraretur, eo fuit habitu oris, ut, superante lætitia dolores, ridentis etiam speciem præbuerit. Cum hoc Hasdrubale, quia miræ artis in sollicitandis gentibus, imperioque jingendis suo fuerat, fœdus renovaverat populus Romanus, ut finis utriusque imperii esset annis Iberus, Saguntinisque mediis inter imperia duorum populorum libertas servaretur.

III. In Hasdrubalis locum haud dubia res fuit,

quim prærogativam militarem, qua extemplo juvenis Hannibal in prætorium delatus, imperatorque in- Ei succedit Hannibal. genti omnium clamore atque adsensu adpellatus erat, favor etiam plebis sequeretur. Hunc vixdum puberem Hasdrubal literis ad se arcessierat: actaque res etiam in senatu fuerat, Barcinis nitentibus, ut adsuesceret militiæ Hannibal, atque in paternas succederet opes. Hanno, alterius factionis princeps, *Et æquum postulare videtur, inquit, Hasdrubal; et ego tamen non censeo, quod petit, tribuendum.* Quum admiratione tam ancipitis sententiæ in se omnes convertisset, *Florem ætatis, inquit, Hasdrubal, quem ipse patri Hannibalis fruendum præbuit, justo jure eum a filio repeti censem:* nos tamen minime decet, juventutem nostram pro militari rudimento adsuefacere libidini prætorum. *An hoc timemus, ne Hamilcaris filius nimis sero imperia inmodica et regni paterni speciem videat? et, cuius regis genero hereditarii sint relictæ exercitus nostri, ejus filio parum mature serviamus?* Ego, istum juvenem doni tenendum, sub legibus, sed magistratibus docendum vivere æquo jure cum ceteris, censem: ne quandoque parvus hic ignis incendium ingens exsuscitet.

IV. Pauci, ac ferme optimus quisque, Hannoni adsentiebantur: sed (ut plerumque fit) major pars meliorem vicit. Missus Hannibal in Hispaniam primo statim adventu omnem exercitum in se convertit. Hamilcarem juvenem redditum sibi veteres milites credere; eumdem vigorem in vultu, vimque in oculis, habitum oris, lineamentaque intueri: dein brevi effecit, ut pater in se minimum momentum ad favorem conciliandum esset. Numquam ingenium idem ad res diversissimas, parendum atque impe-

Hannibalis dotes et ingenium.

randum, habilius fuit: itaque haud facile decerneret, utrum imperatori, an exercitui, carior esset: neque Hasdrubal alium quemquam præficere malle, ubi quid fortiter ac strenue ageundum esset: neque milites alio duce plus confidere, aut audere. Plurimum audaciæ ad pericula capessenda, plurimum consilii inter ipsa pericula erat: nullo labore aut corporis fatigari, aut animus vinci poterat. Caloris ac frigoris patientia par: cibi potionisque desiderio naturali, non voluptate, modus finitus: vigiliarum somnique nec die, nec nocte discriminata tempora. Id, quod gerendis rebus superesset, quieti datum: ea neque molli strato, neque silentio arcessita. Multi saepè militari sagulo opertum, humi jacentem inter custodias stationesque militum, conspexerunt. Vestitus nihil inter æquales excellens: arma atque equi conspicebantur. Equitum peditumque idem longe primus erat: princeps in prælium ibat: ultimus conserto pælio excedebat. Has tantas viri virtutes ingentia vitia æquabant; inhumana crudelitas, perfidia plus quam Punica, nihil veri, nihil sancti, nullus Deum metus, nullum jusjurandum, nulla religio. Cum hac indole virtutum atque vitiorum triennio sub Hasdrubale imperatore meruit, nulla re, quæ agenda videndaque magno futuro duei esset, prætermissa.

Hannibal bellum inferre Saguntinis statuit. **V.** Ceterum ex quo die dux est declaratus, velut Italia ei provincia decreta, bellumque Romanum mandatum esset, nihil prolatandum ratus, ne se quoque, ut patrem Hamilcarem, deinde Hasdrubalem, cunctantem casus aliquis obprimeret, Saguntinis inferre bellum statuit: quibus obpugnandis quia haud dubie Romana arma movebantur, in Ol-

cadum fines prius (ultra Iberum ea gens in parte Sed prius
 magis, quam in ditione, Karthaginiensium erat) in- varios
 duxit exercitum, ut non petisse Saguntinos, sed re- Hispaniæ
 rum serie, finitinis domitis gentibus, jungendoque, populos
 tractus ad id bellum videri posset. Carteiam, urbem subigit.
 opulentam, caput gentis ejus, expugnat diripitque.
 Quo metu percussæ minores civitates, stipendio im-
 posito, imperium accepere: victor exercitus, opu-
 lentusque præda, Karthaginem novam in hiberna
 est deductus. Ibi large partiendo prædam, stipen-
 dio præterito cum fide exsolvendo, cunctis civium
 sociorumque animis in se firmatis, vere primo in
 Vaccæos promotum bellum. Hermandica et Arbo-
 cala urbes vi captæ. Arbocala et virtute et multi-
 tudine oppidanorum diu defensa. Ab Hermandica
 profugi, exsilibus Olcadum, priore æstate domitæ
 gentis, quum se junxissent, concitant Carpetanos:
 adortique Hannibalem, regressum ex Vaccæis, haud
 procul Tago flumine agmen grave præda turbavere.
 Hannibal prælio abstinuit; castrisque super ripam
 positis, quum prima quies silentiumque ab hostibus
 fuit, amnem vado trajecit: valloque ita producto,
 ut locuni ad transgrediendum hostes haberent, in-
 vadere eos transeuntes statuit. Equitibus præcepit,
 ut, quum ingressos aquam viderent, adorirentur.
 Peditum agmen in ripa, elephantos ante quadra-
 ginta disposuit. Carpetanorum cum adpendicibus
 Olcadum Vaccæorumque centum millia fuere; in-
 victa acies, si æquo dimicaretur campo. Itaque et
 ingenio feroces, et multitudine freti, et quod metu
 cessisse credebant hostem, id morari victoriam rati,
 quod interesset amnis, clamore subiato, passim sine
 ullius imperio, qua cuique proximum est, in amnem

ruunt. Et ex parte altera ripæ vis ingens equitum in flumen inmissa, medioque alveo haudquaquam pari certamine concussum; quippe ubi pedes instabilis, ac vix vado fidens, vel ab inermi equite, equo temere acto, perverti posset: eques, corpore armisque liber, equo vel per medios gurgites stabili, cominus eminusque rem gereret. Pars magna flumine absunta: quidam, vorticoso amni delati in hostes, ab elephantis obtriti sunt: postremi, quibus regressus in suam ripam tutior fuit, ex varia trepidatione quum in unum conligerentur, priusquam ex tanto pavore reciperen animos, Hannibal, agmine quadrato amnem ingressus, fugam ex ripa fecit: vastatisque agris, intra paucos dies Carpetanos quoque in dedicationem accepit. Et jam omnia trans Iberum, præter Saguntinos, Karthaginiensium erant.

VI. Cum Saguntinis bellum nondum erat: ceterum jam belli caussa certamina cum finitimis serebantur, maxime Turdetanis: quibus quum adisset idem, qui litis erat sator, nec certamen juris, sed Saguntini vim quæri adpareret; legati a Saguntinis Romam missi, auxilium ad bellum jam haud dubie inminens mittunt. orantes. Consules tunc Romæ erant P. Cornelius U. C. 534. Scipio et Ti. Sempronius Longus: qui quum, legatis in senatum introductis, de republica retulissent, placuissetque mitti legatos in Hispaniam, ad res sociorum inspiciendas; quibus si videretur digna caussa, et Hannibali denunciarent, ut ab Saguntinis, sociis populi Romani, abstineret, et Karthaginem in Africam trajicerent, ac sociorum populi Romani querimonias deferrent. Hac legatione decreta, necdum missa, omnium spe celerius Saguntum obpugnari adlatum est. Tunc relata ex integro

res ad senatum. Alii, provincias consulibus Hispaniam atque Africam decernentes, terra marique rem gerendam censebant: alii totum in Hispaniam Hannibalemque intendebant bellum. Erant, qui non temere movendam rem tantam, exspectandosque ex Hispania legatos censerent. Hæc sententia, quæ tutissima videbatur, vicit: legatique eo maturius missi, P. Valerius Flaccus et Q. Bæbius Tamphilus, Saguntum ad Hannibalem, atque inde Karthaginem, si non absisteretur bello, ad ducem ipsum in pœnam fœderis rupti depositum.

VII. Dum ea Romani parant consultantque, jam Saguntum summa vi obpugnabatur. Civitas ea longe opulentissima ultra Iberum fuit, sita passus mille ferme a mari. Oriundi a Zacinthro insula dicuntur, mixtique etiam ab Ardea Rutulorum quidam generis: ceterum in tantas brevi creverant opes, seu maritimis, seu terrestribus fructibus, seu multitudinis incremento, seu sanctitate disciplinæ, qua fidem socialem usque ad perniciem suam coluerunt. Hannibal, infesto exercitu ingressus fines, pervastatis passim agris, urbem tripartito adgreditur. Angulus muri erat in planiorem patentiorēmque, quam cetera circa, vallem vergens: adversus eum vineas agere instituit, per quas aries mœnibus admoveri posset. Sed ut locus procul muro satis æquus agendis vineis fuit; ita handquaquam prospere, postquam ad effectum operis ventum est, cœptis succedebat: et turris ingens inminebat: et murus, ut in suspecto loco, supra ceteræ modum altitudinis emunitus erat: et jnventus delecta, ubi plurimum periculi ac laboris ostendebatur, ibi vi majore obsistebant. Ac primo missilibus submovere hos-

U. C. 534.

A. C. 218.

U. C. 534. tem, nec quidquam satis tutum munientibus pati:
 A. C. 218. deinde jam non pro mœnibus modo atque turri tela
 micare, sed ad erumpendum etiam in stationes ope-
 raque hostium animus erat: quibus tumultuariis
 certaminibus haud ferme plures Saguntini cadebant,
 Hannibal quam Pœni. Ut vero Hannibal ipse, dum murum
 vulnera-
 tus. incautius subit, adversum femur tragula graviter
 ictus cecidit; tanta circa fuga ac trepidatio fuit, ut
 non multum abesset, quin opera ac vineæ desere-
 rentur.

VIII. Obsidio deinde per paucos dies magis,
 quam obpugnatio, fuit, dum vulnus ducis curaretur:
 per quod tempus ut quies certaminum erat, ita ab
 adparatu operum ac munitionum nihil cessatum.
 Itaque acrius de integro obortum est bellum, pluri-
 busque partibus, vix accipientibus quibusdam opera
 locis, vineæ cœptæ agi, admoverique aries. Abun-
 dabat multitudine hominum Pœnus; ad centum
 enim quinquaginta millia habuisse in armis satis
 creditur. Oppidani ad omnia tuenda atque obeunda
 multifariam distineri cœpti sunt: et non subfie-
 bant (jam enim feriebantur arietibus) muri, quas-
 satæque multæ partes erant: una continentibus
 ruinis nudaverat urbem: tres deinceps turres, qua-
 tumque inter eas muri erat, cum fragore ingenti
 prociderant: captumque oppidum ea ruina credide-
 rant Pœni; qua, velut si pariter utrosque murus
 texisset, ita utrimque in pugnam procursum est.
 Nihil tumultuariæ pugnæ simile erat, quales in ob-
 pugnationibus urbium per occasionem partis alterius
 conseri solent: sed justæ acies, velut patenti cam-
 po, inter rainas muri tectaque urbis modico distan-
 tia intervallo constiterant: hinc spes, hinc despe-

ratio animos irritat: Pœno cepisse jam se urbem, U.C. 534.
 si paullulum admittatur, credente; Saguntinis pro A.C. 218.
 nudata mœnibus patria corpora obponentibus, nec
 ullo pedem referente, ne in relictum a se locum
 hostem inmitteret. Itaque quo acrius et conferti
 magis utrumque pugnabant, eo plures vulnerabantur,
 nullo inter arma corporaque vano intercidente telo.
 Falarica erat Saguntinis, missile telum hastili abiega-
 no, et cetera tereti, præterquam ad extremum, unde
 ferrum exstabat: id, sicut in pilo, quadratum stuppa
 circumligabant, liniebantque pice. Ferrum autem
 tres longum habebat pedes, ut cum armis transfigere
 corpus posset. Sed id maxime, etiamsi hæ-
 sisset in scuto, nec penetrasset in corpus, pavorem
 faciebat; quod, quum medium accensum mittere-
 tur, conceptumque ipso motu multo majorem ignem
 ferret, arma omitti cogebat, nudumque militem ad
 insequentes ictus præbebat.

IX. Quum diu anceps fuisset certamen, et Sa-
 guntinis, quia præter spem resisterent, crevissent
 animi; Pœnus, quia non viciisset, pro victo esset;
 clamorem repente oppidani tollunt, hostemque in
 ruinas muri expellunt; inde impeditum trepidan-
 temque exturbant; postremo fusum fugatumque in
 castra redigunt. Interim ab Roma legatos venisse Hannibal
 nunciatum est: quibus obviam ad mare missi ab legatos
 Hannibale, qui dicerent, nec tuto eos adituros inter Rom. non
 admittit. tot tam efferatarum gentium armæ: nec Hannibali,
 in tanto discrimine rerum, operæ esse legationes
 audire. Adparebat, non admissos protinus Kartha-
 ginem ituros: literas igitur nunciosque ad principes
 actionis Barcinæ præmittit, ut præpararent suorum

U.C. 534. animos, ne quid pars altera gratificari pro Romanis
A.C. 216. posset.

Legati Rom. Carthagi-
 nem eunt. no unus adverso senatu caussam fœderis, magno
 Hanno- silentio propter auctoritatem suam, non adsensum
 nis oratio in Hanni- audientium, egit. *Per Deos, fœderum arbitros ac
 balem.* *X. Itaque, præterquam quod admissi auditique
 sunt, ea quoque vana atque irrita legatio fuit. Han-
 na fœdera. Juvenem flagrantem cupidine regni, vi-
 amque unam ad id cernentem, si ex bellis bella serendo
 subcinctus armis legionibusque rivat, velut materiam
 igni præbentes, ad exercitus misistis: aliustis ergo hoc
 incendium, quo nunc ardetis. Saguntum vestri cir-
 cumsident exercitus, unde arcentur fœdere: mox Kar-
 thaginem circumsidebunt Romanæ legiones, ducibus iis-
 dem Diis, per quos priore bello rupta fœdera sunt ulti.
 Utrum hostem, an vos, an fortunam utriusque populi,
 ignoratis? Legatos, ab sociis et pro sociis venientes,
 bonus imperator vester in castra non admisit, jus gen-
 tium sustulit: hi tamen, unde ne hostium quidem le-
 gati arcentur, pulsi ad vos reniunt, res ex fœdere re-
 petunt: publica fraus absit; auctorem culpæ et reum
 criminis depositunt. Quo lenius agunt, segnius inci-
 piunt; eo, quum cœperint, vereor, ne perseverantius
 særiant. Ægates insulas Erycemque ante oculos pro-
 ponite; quæ terra marique per quatuor et riginti an-
 nos passi sitis. Nec puer hic dux erat, sed pater ipse
 Hamilcar, Mars alter, ut isti volunt: sed Tarento, id
 est Italia, non abstinueramus ex fœdere: sicut nunc*

Sagunto non abstinemus. Ticerunt ergo Dii homi- U.C. 534.
nesque; et, id de quo verbis ambigebatur, uter populus A.C. 218.
fædus rupisset, eventus belli, velut æquus judex, unde
jus stabat, ei victoriam dedit. Karthagini nunc Han-
nibal vineas turresque admoveat: Karthaginis mænia
quatit ariete. Sagunti ruinæ (falsus utinam vates
sim) nostris capitibus incident: susceptumque cum Sa-
guntinis bellum, habendum cum Romanis est. Dede-
mus ergo Hannibalem? dicet aliquis. Scio, meam
levem esse in eo auctoritatem propter paternas inimi-
citias. Sed et Hamilcarem eo perisse letatus sum,
quod, si ille rriveret, bellum jam cum Romanis habe-
remus; et hunc juvenem, tamquam furiam facemque
hujus belli, odi ac detestor. Nec dedendum solum id
piaculum rupti fæderis; sed, si nemo deposcat, deve-
hendum in ultimas maris terrarumque oras, ablegan-
dumque eo, unde nec ad nos nomen famaque ejus ac-
cedere, neque sollicitare quietæ civitatis statum possit.
Ego ita censeo, legatos extemplo Romam mittendos,
qui senatui satisfaciant: alios, qui Hannibali nuncient,
ut exercitum ab Sagunto abducat, ipsumque Hanniba-
lem ex fædere Romanis dedant: tertiam legationem
ad res Saguntinis reddendas decerno.

XI. Quum Hanno perorasset, nemini omnium Favet sena-
certare oratione cum eo necesse fuit: adeo prope tus Cartha-
omnis senatus Hannibal erat; infestiusque locu- gin. Han-
tum arguebant Hannonem, quam Flaccum Vale- nibali.
rium, legatum Romanum. Responsum inde legatis
Romanis est, *Bellum ortum ab Saguntinis, non ab*
Hannibale esse: populum Romanum injuste facere, si
Saguntinos vetustissimæ Karthaginiensium societati
præponat. Dum Romani tempus terunt legationi-
bus mittendis, Hannibal, quia fessum militem præliis

U. C. 534. operibusque habebat, paucorum iis dierum quietem
A. C. 218. dedit, stationibus ad custodiam vinearum aliorum-

que operum dispositis : interim animos eorum nunc
 ira in hostes stimulando, nunc spe præmiorum ac-
 cendit. Ut vero pro concione prædam captæ urbis
 edixit militum fore, adeo accensi omnes sunt, ut, si
 extemplo signum datum esset, nulla vi resisti vide-
 retur posse. Saguntini ut a prœliis quietem habu-
 erant, nec lassentes, nec lassissimi per aliquot dies ;
 ita non nocte, non die umquam cessaverant ab
 opere, ut novum murum ab ea parte, qua patefac-
 tum oppidum ruinis erat, reficerent. Inde obpug-
 natio eos aliquanto atrocior, quam ante, adorta est :
 nec, qua primum aut potissimum parte ferrent opem,
 (quum omnia variis clamoribus streperent) satis
 scire poterant. Ipse Hannibal, qua turris mobilis,
 omnia munimenta urbis superans altitudine, age-
 batur, hortator aderat : quæ quum admota, cata-
 pultis ballistisque per omnia tabulata dispositis,
 muros defensoribus nudasset ; tum Hannibal, oc-
 casionem ratus, quingentos ferme Afros cum dola-
 bris ad subruendum ab imo murum mittit : nec
 erat difficile opus, quod cæmenta non calce durata
 erant, sed interlita luto, structuræ antiquæ genere.
 Itaque latius, quam cæderetur, ruebat : perque pa-
 tentia ruinis agmina armatorum in urbem vadebant.
 Locum quoque editum capiunt : conlatisque eo ca-
 tapultis ballistisque, ut castellum in ipsa urbe velut
 arcem imminentem haberent, muro circumdant : et
 Saguntini murum interiorem ab nondum capta urbis
 parte ducunt. Utrumque summa vi et inuniunt, et
 pugnant : sed, interiora tuendo, minorem in dies
 urbem Saguntini faciunt. Simul crescit inopia om-

niūm longa obsidione, et minuitur exspectatio ex- **U. C. 534.**
ternæ opis; quum tam procul Romani, unica spes, **A. C. 216.**
circa omnia hostium essent. Paullisper tamen ad-
fectos animos recreavit repentina profectio Han-
nibal's in Oretanos Carpetanosque: qui duo po-
puli, delectus acerbitate consternati, retentis con-
quisitoribus, metum defectionis quum præbuis-
sent, obpressi celeritate Hannibal's, omiserunt mo-
ta arma.

XII. Nec Sagunti obpugnatio segnior erat, Ma-
harbale, Himilconis filio, (eum præfecerat Hanni-
bal) ita impigre rem agente, ut ducem abesse nec
cives, nec hostes sentirent. Is et prælia aliquot se-
cunda fecit, et tribus arietibus aliquantulum muri
discussit; strataque omnia recentibus ruinis adve-
nienti Hannibali ostendit. Itaque ad ipsam arcem
extemplo ductus exercitus, atroxque prælium cum
multorum utrimque cæde initum, et pars arcis capta
est. Tentata deinde per duos est exigua pacis spes, Pax frustra
Alconem Saguntinum, et Alorcum Hispanum. Al-
con, insciis Saguntinis, precibus aliquid moturum
ratus, quum ad Hannibalem noctu transisset,
postquam nihil lacrimæ movebant, conditionesque
tristes, ut ab irato victore, ferebantur, transfuga
ex oratore factus, apud hostem mansit; meritum
adfirmans, qui sub conditionibus his de pace ageret.
Postulabatur autem, redderent res Turdetanis; tra-
ditoque omni auro atque argento, egressi urbe cum
singulis vestimentis ibi habitarent, ubi Pœnus jus-
sisset. Has pacis leges abnuente Alcone acceptu-
ros Saguntinos, Alorcus, vinci animos, ubi alia
vincantur, adfirmans, se pacis ejus interpretem fore
pollicetur. Erat autem tum miles Hannibal's; ce-

^{tentata.}

U.C. 534. terum publice Saguntinis amicus atque hospes. Tra-
A.C. 218. dito palam telo custodibus hostium, transgressus
munitiona, ad prætorem Saguntinum (et ipse ita
jubebat) est deductus: quo quum extemplo concur-
sus omnis generis hominum esset factus, submota
cetera multitudine, senatus Alorco datus est: cuius
talis oratio fuit.

**Alorci
oratio de
pace.**

XIII. *Si civis vester Alcon, sicut ad pacem peten-
dam ad Hannibalem venit, ita pacis conditiones ab
Hannibale ad vos retulisset, supervacaneum hoc mihi
fuisset iter, quo nec orator Hannibal, nec transfuga
ad vos venissem. Quum ille, aut vestra, aut sua
culpa, manserit apud hostem, (si metum simulavit,
sua; vestra, si periculum est apud vos vera referen-
tibus) ego, ne ignoraretis, esse aliquas et salutis et
pacis vobis conditiones, pro vetusto hospitio, quod mihi
vobiscum est, ad vos veni. Vestra autem caussa me,
nec ullius alterius, loqui, quæ loquor apud vos, vel ea
fides sit, quod, neque dum vestris viribus restitistis, ne-
que dum auxilia ab Romanis sperastis, pacis umquam
apud vos mentionem feci. Postquam nec ab Romanis
vobis ulla spes est, nec vestra jam aut arma vos, aut
mænia satis defendunt, pacem adfero ad vos magis
necessariam, quam æquam: cuius ita aliqua spes est,
si eum quemadmodum ut victor fert Hannibal, sic vos
ut victi audiatis: si non id, quod amittitur, in damno,
(quum omnia rictoris sint) sed, quidquid relinquitur,
pro munere habituri estis. Urbem vobis, quam ex
magna jam parte dirutam, captam fere totam habet,
admit, agros relinquit, locum adsignaturus, in quo
novum oppidum ædificetis: aurum argentumque omne,
publicum privatumque, ad se jubet deferri: conjugum
restraque corpora ac liberorum vestrorum servat in-*

violata, si inermes cum binis vestimentis velitis ab Sa- U. C. 534.
gundo exire. Hæc victor hostis imperat. Hæc, quam- A. C. 218.
quam sint gravia atque acerba, fortuna vestra vobis
suadet. Evidem haud despero, quum omnium po-
testas ei facta sit, aliquid ex his rebus remissurum.
Sed vel hæc patienda censeo potius, quam trucidari
corpora vestra, rapi trahique ante ora vestra conjuges
ac liberos belli jure sinatis.

XIV. Ad hæc audienda quum, circumfusa paulatim multitudine, permixtum senatui esset populi concilium; repente primores, secessione facta, (prusquam responsum daretur) argentum aurumque omne, ex publico privatoque in forum conlatum, in ignem ad id raptim factum conjicientes, eodem plerique semet ipsi præcipitaverunt. Quum ex eo pavore ac trepidatio totam urbem pervasisisset, alias insuper tumultus ex arce auditur. Turris diu quassata prociderat: perque ruinam ejus cohors Pœnorum in petu facto quum signum imperatori dedisset, nudatam stationibus custodiisque solitis hostium esse urbem; non cunctandum in tali occasione ratus Hannibal, totis viribus adgressus urbem, momento cepit, signo dato, ut omnes puberes interficerentur: quod imperium crudele, ceterum prope necessarium Captum cognitum ipso eventu est. Cui enim parci potuit Saguntum. ex iis, qui aut inclusi cum conjugibus ac liberis domos super se ipsos concremaverunt, aut armati nullum ante finem pugnæ, quam morientes, fecerunt?

XV. Captum oppidum est cum ingenti præda. Quamquam pleraque ab dominis de industria corrupta erant, et in cædibus vix ullum discrimen ætatis ira fecerat, et captivi militum præda fuerant;

U. C. 534. tamen et ex pretio rerum venditarum aliquantum
 A. C. 218. pecuniae redactum esse constat, et multam pretiosam supellectilem vestemque missam Karthaginem.

Octavo mense, quam cœptum obpugnari, captum Saguntum, quidam scripsere: inde Karthaginem novam in hiberna Hannibalem concessisse: quinto deinde mense, quam ab Karthagine profectus sit, in Italiam pervenisse. Quæ si ita sunt, fieri non potuit, ut P. Cornelius, Ti. Sempronius consules fuerint, ad quos et principio obpugnationis legati Saguntini missi sint, et qui in suo magistratu cum Hannibale, alter ad Ticinum animem, ambo aliquanto post ad Trebiam, pugnaverint. Aut omnia breviora aliquanto fuere, aut Saguntum principio anni, quo P. Cornelius, Ti. Sempronius consules fuerunt, non cœptum obpugnari est, sed captum. Nam excessisse pugna ad Trebiam in annum Cn. Servilii et C. Flaminii non potest: quia Flaminius Arimini consulatum iniit, creatus ab Ti. Sempronio consule; qui, post pugnam ad Trebiam ad creandos consules Romanum quum venisset, comitiis perfectis ad exercitum in hiberna rediit.

Capto Sa-
gundo tre-
pidant Ro-
mani. XVI. Sub idem fere tempus et legati, qui redierant a Karthagine, Romanum retulerunt, omnia hostilia esse, et Sagunti excidium nunciatum est: tantusque simul mœror Patres, misericordiaque sociorum perenitorum indigne, et pudor non lati auxilii, et ira in Karthaginienses, metusque de summa rerum cepit, velut si jam ad portas hostis esset; ut, tot uno tempore motibus animi turbati, trepidarent magis, quam consulerent. Nam neque hostem acerrem bellicosioremque secum congressum; nec rem Romanam tam desidem umquam fuisse atque inbel-

lem. Sardos, Corsosque, et Istros, atque Illyrios, U. C. 534.
 lacessisse magis, quam exercuisse, Romana arma : A. C. 218.
 et cum Gallis tumultuatum verius, quam belligera-
 tum. Pœnum, hostem veteranum, trium et viginti
 annorum militia durissima inter Hispanas gentes
 semper victorem, primi Hamilcare, deinde Has-
 drubale, nunc Hannibale, duce acerrimo adsuetum,
 recentem ab excidio opulentissimæ urbis, Iberum
 transire : trahere secum tot excitos Hispanorum
 populos : concitum avidas semper armorum Gal-
 licas gentes : cum orbe terrarum bellum gerendum
 in Italia ac pro mœnibus Romanis esse.

XVII. Nominatae jam antea consulibus provinciae Belli adpar-
 erant ; tum sortiri jussi. Cornelio Hispania, Sem-^{ratus apud}
 pronio Africa cum Sicilia evenit. Sex in eum an-
 num decretæ legiones, et socium quantum ipsis vide-
 retur, et classis quanta parari posset. Quatuor et
 viginti peditum Romanorum nullia sunt scripta, et
 mille octingenti equites : sociorum quadraginta mil-
 lia peditum, quatuor millia et quadringenti equites :
 naves ducentæ viginti quinqueremes, celoces viginti
 deductæ. Latum inde ad populum, *vellent, jubarent,*
populo Karthaginiensi bellum indici. Ejusque belli
 caussa supplicatio per urbem habita, atque adorati
 Dii, ut bene ac feliciter eveniret, quod bellum popu-
 lus Romanus jussisset. Inter consules ita copiae di-
 visæ. Sempronio datæ legiones duæ, (ea quaterna
 millia erant peditum, et trecenti equites) et sociorum
 sexdecim millia peditum, equites mille octingenti :
 naves longæ centum sexaginta, celoces duodecim.
 Cum his terrestribus maritimisque copiis Ti. Sem-
 pronius missus in Siciliam ; ita in Africam trans-
 missurus, si ad arcendum Italia Pœnum consul alter

U. C. 534. satis esset. Cornelio minus copiarum datum, quia L.
A. C. 218. Manlius prætor et ipse cum haud invalido præsidio
in Galliam mittebatur. Navium maxime Cornelio
numeris deminutus : sexaginta quinqueremes datæ
(neque enim mari venturum, aut ea parte belli dimi-
caturum hostem credebant) et duæ Romanæ legio-
nes cum suo justo equitatu, et quatuordecim milli-
bus sociorum peditum, equitibus mille sexcentis.
Duas legiones Romanas, et decem millia sociorum
peditum, mille equites socios, sexcentos Romanos
Gallia provincia eodem anno versa in Punicum bel-
lum habuit.

Legati missi Carthaginem. XVIII. His ita comparatis, ut omnia justa ante
bellum fierent, legatos majores natu, Q. Fabium,

M. Livium, L. Æmilius, C. Licinium, Q. Bæbium,
in Africam mittunt ad percunctandos Karthaginien-
ses, publicone consilio Hannibal Saguntum obpug-
nasset? et si, id quod facturi videbantur, faterentur,
ac defenderent publico consilio factum, ut indice-
rent populo Karthaginiensi bellum. Romani post-
quam Karthaginem venerunt, quum senatus datus
esset, et Q. Fabius nihil ultra, quam unum, quod
mandatum erat, percunctatus esset; tum ex Kartha-
giniensibus unus : *Præceps vestra, Romani, et prior*
legatio fuit, quum Hannibalem, tamquam suo consilio
Saguntum obpugnantem deposcebatis : ceterum hæc le-
gatio veris adhuc lenior est, re asperior. Tunc enim
Hannibal et insimulabatur, et deposcebatur : nunc ab
nobis et confessio culpæ exprimitur ; et, ut a confessis,
res extemplo repetuntur. Ego autem non, privato
publicone consilio Saguntum obpugnatum sit, queren-
dum censem : sed utrum jure, an injuria. Nostra
enim hæc quæstio atque animadversio in civem nos-

*trum est; nostro, an suo fecerit arbitrio. Vobiscum U. C. 534.
una disceptatio est, licueritne per fædus fieri. Itaque A. C. 218.
quoniam discerni placet, quid publico consilio, quid sua
sponte imperatores faciant; nobis vobiscum fædus est a
Lutatio consule ictum: in quo quum caveretur utro-
rumque sociis, nihil de Saguntinis (nec dum enim
erant socii restri) cautum est. At enim eo fædere,
quod cum Hasdrubale ictum est, Saguntini excipiuntur:
adversus quod nihil ego dicturus sum, nisi quod a vobis
didici. Vos enim, quod C. Lutatius consul primo no-
biscum fædus icit, quia neque auctoritate Patrum, nec
populi jussu ictum erat, negastis vos eo teneri: itaque
aliud de integro fædus publico consilio ictum est. Si
vos non tenent vestra fædera, nisi ex auctoritate aut
jussu vestro icta; ne nos quidem Hasdrubalis fædus,
quod nobis insciis icit, obligare potuit. Proinde omit-
tite Sagunti atque Iberi mentionem facere, et, quod diu
parturit animus vester, aliquando pariat. Tum Ro-
manus, sinu ex toga facto, *Hic*, inquit, *vobis bellum* Bellum in-
et pacem portamus; utrum placet, sumite. Sub hanc dicunt.
vocem haud minus ferociter, daret, utrum vellet,
subclamatum est: et quum is iterum sinu effuso bel-
lum dare dixisset, accipere se omnes responderunt, et,
quibus acciperent animis, iisdem se gesturos.*

XIX. Hæc directa percunctatio ac denunciatio Disceptatio
belli magis ex dignitate populi Romani visa est, de fœde-
rum jure. quam de fœderum jure verbis disceptare, quum ante,
tum maxime Sagunto excisa: nam, si verborum dis-
ceptationis res esset, quid fœdus Hasdrubalis cum
Lutatii priore fœdere, quod mutatum est, compa-
randum erat? quum in Lutatii fœdere diserte addi-
tum esset, *ita id ratum fore, si populus censuisset;* in
Hasdrubalis fœdere nec exceptum tale quidquam

U. C. 534. fuerit, et tot annorum silentio ita vivo eo comprobatum sit foedus, ut ne mortuo quidem auctore quidquam mutaretur. Quamquam, etsi priore fœdere staretur, satis cautum erat Saguntinis, sociis utrorumque exceptis : nam neque additum erat, *iis, qui tunc essent* : nec, *ne qui postea adsumerentur* : et quum adsumere novos liceret socios, quis æquum censeret, aut ob nulla quemquam merita in amicitiam recipi ? aut receptos in fidem non defendi ? tantum, ne Karthaginiensium socii aut sollicitarentur ad defectionem, aut sua sponte desciscen-

Legati Romaniani in Hispaniam transiuncti. Legati Ro- tes reciperentur. Legati Romani ab Karthagine, sicut his Romæ imperatum erat, in Hispaniam, ut adirent civitates, ut in societatem perlicerent, aut averterent a Poenis, trajecerunt. Ad Bargusios pri-

mum venerunt : a quibus benigne excepti, quia tædebat imperii Punici, multos trans Iberum populos ad cupidinem novæ fortunæ erexerunt. Ad Volcianos inde est ventum : quorum celebre per Hispaniam responsum ceteros populos ab societate Romana avertit : ita enim maximus natu ex *iis* in concilio respondit : *Quæ verecundia est, Romani, postulare vos, uti vestram Karthaginiensium amicitiae præponamus, quum, qui id fecerunt, Saguntinos crudelius, quam Pœnus hostis perdidit, vos socii prodideritis ? ibi queratis socios, censeo, ubi Saguntina clades ignota est.* Hispanis populis, sicut lugubre, ita insigne documentum Sagunti ruinæ erunt, ne quis fidei Romanæ aut societati confidat. Inde extemplo abire finibus Volcianorum jussi, ab nullo deinde concilio Hispaniæ benigniora verba tulere : itaque nequidquam peragrata Hispania, in Galliam transeunt.

XX. In his nova terribilisque species visa est,

quod armati (ita mos gentis erat) in concilium ve- U. C. 534.
 nerunt: quum, verbis extollentes gloriam virtutem- A. C. 218.
 que populi Romani ac magnitudinem imperii, pe- Gallos
 tissent, ne Pœno, bellum Italiæ inferenti, per agros adeunt.
 urbesque suas transitum darent; tantus cum fremitu
 risus dicitur ortus, ut vix a magistratibus majori-
 busque natu juventus sedaretur. Adeo stolida in-
 pudensque postulatio visa est, censere, ne in Italianam
 transmittant Galli bellum, ipsos id avertere in se,
 agrosque suos pro alienis populandos objicere. Se-
 dato tandem frenitu, responsum legatis est, *Neque*
Romanorum in se meritum esse, neque Karthaginien-
sium injuriam, ob quæ aut pro Romanis, aut adversus
Pœnos sumant arma. Contra ea audire sese, gentis
sue homines agris finibusque Italiæ pelli a populo Ro-
mano, stipendumque pendere, et cetera indigna pati.
 Eadem ferme in ceteris Galliæ conciliis dicta audi-
 taque: nec hospitale quidquam pacatumve satis
 prius auditum, quam Massiliam venere. Ibi omnia,
 ab sociis inquisita cum cura ac fide, cognita, *præ-*
occupatos jam ante ab Hannibale Gallorum animos
esse: sed ne illi quidem ipsi satis mitem gentem fore,
(adeo ferocia atque indomita ingenia esse) ni subinde
auro, cuius avidissima gens est, principum animi con-
cipientur. Ita peragratis Hispaniæ et Galliæ populis,
 legati Romam redeunt, haud ita multo post, quam
 consules in provincias profecti erant: civitatem
 omnem in exspectationem belli erectam invenie-
 runt, satis constante fama, jam Iberum Pœnos
 transmisso.

XXI. Hannibal, Sagunto capto, Karthaginem
 novam in hiberna concesserat: ibique, auditis, quæ
 Romæ, quæque Karthagine acta decretaque forent,

U. C. 534. seque non ducem solum, sed etiam caussam esse
 A. C. 21⁸. belli, partitis divenditisque reliquiis prædæ, nihil
 ultra differendum ratus, Hispani generis milites con-
 Hanniba- vocat : *Credo ego vos, inquit, socii, et ipsos cernere,*
 lis oratio *pacatis omnibus Hispaniæ populis, aut finiendam nobis*
 ad milites. *militiam, exercitusque dimittendos esse : aut in alias*
terras transferendum bellum : ita enim hæ gentes non
pacis solum, sed etiam victoriæ, bonis florebunt, si ex
aliis gentibus prædam et gloriam quæreremus. Itaque,
quum longinqua ab domo instet militia, incertumque
sit, quando domos vestras, et quæ cuique ibi cara sunt,
visuri sitis, si quis vestrum suos invisere vult, commea-
tum do. Primo vere, edico, adsitis ; ut, Diis bene ju-
 vantibus, bellum ingentis gloriæ prædæque futurum
 incipiamus. Omnibus fere visendi domos oblata ul-
 tro potestas grata erat, et jam desiderantibus suos,
 et longius in futurum providentibus desiderium.
 Per totum tempus hiemis quies inter labores, aut
 jam exhaustos, aut mox exhauriendos, renovavit
 corpora animosque ad omnia de integro patienda.
 Adparatus Vere primo ad edictum convenere. Hannibal, quum
 Hanniba- recensuisset omnium auxilia gentium, Gades pro-
 lis ad bel- fectus Herculi vota exsolvit : novisque se obligat
 lum. votis, si cetera prospera evenissent. Inde partiens
 curas simul in inferendum atque arcendum bellum,
 ne, dum ipse terrestri per Hispaniam Galliasque iti-
 nere Italiam peteret, nuda apertaque Romanis A-
 frica ab Sicilia esset, valido præsidio firmare eam
 statuit. Pro eo supplementum ipse ex Africa, max-
 imè jaculatorum, levium armis, petiit ; ut Afri in
 Hispania, in Africa Hispani, melior procul ab domo
 futurus uterque miles, velut mutuis pignoribus ob-
 ligati, stipendia facerent. Tredecim millia octin-

gentos quinquaginta pedites cætratos misit in Afri- U.C. 534.
cam, et funditores Baliares octingentos septuaginta : A.C. 218.
equites mixtos ex multis gentibus mille ducentos.
Has copias partim Karthagini præsidio esse, partim
distribui per Africam jubet : simul conquisitoribus
in civitates missis, quatuor millia conscripta delectæ
juventutis, præsidium eosdem et obsides, duci Kar-
thaginem jubet.

XXII. Neque Hispaniam negligendam ratus,
(atque ideo haud minus, quod haud ignarus erat,
circumitam ab Romanis eam legatis ad sollicitandos
principum animos) Hasdrubali fratri, viro in pigro,
eam provinciam destinat, firmatque eum Africis
maxime præsidiis, peditum Afrorum undecim milli-
bus octingentis quinquaginta, Liguribus trecentis,
Baliaribus quingentis : ad hæc peditum auxilia ad-
diti equites Libyphœnices (mixtum Punicum Afris
genus) trecenti, et Numidæ Maurique adcolæ Ocea-
ni ad mille octingentos, et parva Ilergetum manus
ex Hispania, ducenti equites : et, ne quid terrestris
decesset auxilii genus, elephanti quatuordecim : clas-
sis præterea data ad tuendam maritimam oram,
(quia, qua parte belli vicerant, ea tum quoque rem
gesturos Romanos, credi poterat) quinquaginta quin-
queremes, quadriremes duæ, triremes quinque : sed
aptæ instructæque remigio triginta et duæ quinque-
remes erant, et triremes quinque. Ab Gadibus
Karthaginem ad hiberna exercitus rediit : atque
inde, profectus præter Etovissam urbem, ad Ibe-
rum maritimamque oram ducit. Ibi, fama est, in
quiete visum ab eo juvenem divina specie, qui se ab
Jove diceret ducem in Italianam Hannibali missum : Somnium
proinde sequeretur, neque usquam a se deflecteret oculi Hannibalis.

U. C. 534. los. Pavidum primo, nusquam circumspicientem aut
 A. C. 218. respicientem, secutum; deinde, cura humani ingenii,
 quem, quidnam id esset, quod respicere vetitus esset,
 agitaret animo, temperare oculis nequivisse; tum
 vidisse, post sese serpentem mira magnitudine cum
 ingenti arborum ac virgultorum strage ferri, ac post
 insequi cum fragore cœli nimbum: tum, quæ moles
 ea, quidre prodigiæ esset, quærentem audisse: *Vasti-
 tatem Italæ esse: pergeret porro ire, nec ultra inqui-
 reret, sineretque fata in occulto esse.*

Hannibal Iberum transit.
 Pyrenæum saltum superat.

XXIII. Hoc visu lætus tripartito Iberum copias
 trajecit, præmissis, qui Gallorum animos, qua tradu-
 cendus exercitus erat, donis conciliarent, Alpiumque
 transitus specularentur: nonaginta millia peditum,
 duodecim millia equitum Iberum traduxit. Ilergetes
 inde, Bargusiosque, et Ausetanos, et Lacetaniam,
 quæ subiecta Pyrenæis montibus est, subegit: oræ-
 que huic omni præfecit Hannonem, ut fauces, quæ
 Hispanias Galliis jungunt, in potestate essent. De-
 cem millia peditum Hannoni ad præsidium obti-
 nendæ regionis data, et mille equites. Postquam
 per Pyrenæum saltum traduci exercitus est cœptus,
 rumorque per barbaros manavit certior de bello Ro-
 mano; tria millia inde Carpetanorum peditum iter
 averterunt: constabat, non tam bello motos, quam
 longinquitate viæ insuperabilique Alpium transitu.
 Hannibal, quia revocare aut vi retinere eos anceps
 erat, ne ceterorum etiam feroce animi irritarentur,
 supra septem millia hominum domos remisit, quos
 et ipse gravari militia senserat, Carpetanos quoque
 ab se dimissos simulans.

XXIV. Inde, ne mora atque otium animos sol-
 licitarent, cum reliquis copiis Pyrenæum transgre-

ditur, et ad oppidum Illiberi castra locat. Galli U.C. 534.
 quamquam Italiæ bellum inferri audiebant, tamen,
 A.C. 218.
 quia vi subactos trans Pyrenæum Hispanos fama
 erat, præsidiaque valida inposita, metu servitutis ad
 arma consternati, Ruscinonem aliquot populi con-
 veniunt: quod ubi Hannibali nunciatum est, mo- Gallos sibi
 ram magis, quam bellum, metuens, oratores ad re- conciliat.
 gulos eorum misit, *conloqui semet ipsum velle cum his*; et vel illi propius Illiberi accederent, vel se Rus-
 cinonem processurum, ut ex propinquo congressus fa-
 cilior esset: nam et accepturum eos in castra sua se-
 lœtum, nec cunctanter se ipsum ad eos venturum. Hos-
 pitem enim se Galliæ, non hostem, advenisse: nec
 stricturum ante gladium, si per Gallos liceat, quam
 in Italiam venisset. Et per nuncios quidem hæc.
 Ut vero reguli Gallorum, castris ad Illiberim ex-
 templo motis, haud gravate ad Poenum venerunt;
 capti donis, cum bona pace exercitum per fines
 suos præter Ruscinonem oppidum transmiserunt.

XXV. In Italiam interim nihil ultra, quam Iberum transisse Hannibalem, a Massiliensium legatis Romam perlatum erat: quum perinde, ac si Alpes jam transisset, Boii, sollicitatis Insubribus, defece- Boii in Ita-
 runt; nec tam ob veteres in populum Romanum
 iras, quam quod nuper circa Padum, Placentiam
 Cremonamque colonias in agrum Gallicum deduc- lia rebel-
 tas ægre patiebantur. Itaque, armis repente ad-
 adeptis, in eum ipsum agrum inpetu facto, tantum
 terroris ac tumultus fecerunt, ut non agrestis modo
 multitudo, sed ipsi triumviri Romani, qui ad agrum
 venerant adsignandum, diffisi Placentiæ mœnibus,
 Mutinam configuerint, C. Lutatius, C. Servilius, T.

U.C. 534. Annius. Lutatii nomen haud dubium est: pro C.
A.C. 218. Servilio et T. Annio, Q. Acilium et C. Herennium
habent quidam annales: alii P. Cornelium Asinam
et C. Papirium Masonem. Id quoque dubium est,
legati, ad expostulandum missi ad Boios, violati
sint, an in triumviros agrum metantes inpetus sit
factus. Mutinæ quum obsiderentur, et gens, ad
obpugnandarum urbium artes rudis, pigerrima ea-
dem ad militaria opera, segnis intactis adsideret
muris, simulari cœptum de pace agi: evocatique ab
Gallorum principibus legati ad conloquium, non
contra jus modo gentium, sed violata etiam, quæ
data in id tempus erat, fide, comprehenduntur; ne-
gantibus Gallis, nisi obsides sibi redderentur, eos
dimissuros. Quum hæc de legatis nunciata essent,

Manlius et Mutina præsidumque in periculo esset, L. Man-
lius prætor, ira accensus, effusum agmen ad Mutin-
nam dicit. Silvæ tunc circa viam erant, plerisque
incultis: ibi, inexplorato profectus, in insidias præ-
cipitatus, multaque cum cæde suorum ægre in aper-
tos campos emersit: ibi castra communita; et,
quia Gallis ad tentanda ea defuit spes, refecti sunt
militum animi, quamquam adcisas res satis con-
stabat. Iter deinde de integro cœptum; nec, dum
per patentia loca ducebatur agmen, adparuit hostis;
ubi rursus silvæ intratæ, tum postremos adorti, cum
magna trepidatione ac pavore omnium, octingentos
milites occiderunt, sex signa ademere. Finis et
Gallis territandi, et pavendi Romanis fuit, ut e sal-
tu invio atque impedito evascre: inde, apertis locis
facile tutantes agmen, Romani Tanetum, vicum
propinquum Pado, contendere: ibi se munimento

ad tempus commeatibusque fluminis et Brixianorum U. C. 534.
Gallorum auxilio, adversus crescentem in dies mul- A. C. 218.
titudinem hostium, tutabantur.

XXVI. Qui tumultus repens postquam est Romam perlatus, et Punicum insuper Gallico bello auctum Patres acceperunt; C. Atilium prætorem cum una legione Romana et quinque millibus sociorum, delectu novo a consule conscriptis, auxilium ferre Manlio jubent: qui sine ullo certamine (abscesserant enim metu hostes) Tanetum pervenit.

Et P. Cornelius, in locum ejus, quæ missa cum P. Cornelius
prætore fuerat, transcripta legione nova, profectus lius cos.
ab urbe sexaginta longis navibus, præter oram pervenit cum classe
Etruriæ Ligurumque, et inde Salyum montes, per- Massiliam.
venit Massiliam, et ad proximum ostium Rhodani (pluribus enim divisus amnis in mare decurrit) ca-
stra locat: vixdum satis credens, Hannibalem su-
perasse Pyrenæos montes: quem ut de Rhodani
quoque transitu agitare animadvertisit, incertus, quo-
nam ei loco obcurreret, necdum satis refectis ab
jactatione maritima militibus, trecentos interim de-
lectos equites, ducibus Massiliensibus et auxiliari-
bus Gallis, ad exploranda omnia visendosque ex
tuto hostes præmittit. Hannibal, ceteris metu aut Hannibal
pretio pacatis, jam in Volcarum pervenerat agrum, ad Rhoda-
gentis validæ. Colunt autem circa utramque ripam num.
Rhodani: sed, diffisi citeriore agro arceri Pœnum
posse, ut flumen pro munimento haberent, omnibus
ferme suis trans Rhodanum trajectis, ulteriorem
ripam annis armis obtinebant. Ceteros adcolas
fluminis Hannibal, et eorum ipsorum quos sedes
tenuerant, simul perlicit donis ad naves undique
contrahendas fabricandasque: simul et ipsi trajici

U. C. 534. exercitum, levarique quamprimum regionem suam
A. C. 218.

tanta urgente hominum turba cupiebant. Itaque ingens coacta vis navium est lintriumque temere ad vicinalem usum paratarum: novasque alias primum Galli inchoantes cavabant ex singulis arboribus: deinde et ipsi milites, simul copia materiæ, simul facilitate operis inducti, alveos informes, (nihil, dummodo innare aquæ et capere onera possent, curantes) quibus se suaque transvcherent, raptim faciebant.

XXVII. Jamque omnibus satis comparatis ad trajiciendum, terrebant ex adverso hostes, omnem ripam equites virique obtinentes: quos ut averteret, Hannibalis strata-
gema. Hannonem, Bomilcaris filium, vigilia prima noctis, cum parte copiarum, maxime Hispanis, adverso flumine ire iter unius diei jubet; et, ubi primum possit, quam occultissime trajecto animi, circumducere agmen, ut, quum opus facto sit, adoriatur ab tergo hostem. Ad id dati duces Galli edocent, inde millia quinque et viginti ferme supra, parvæ insulæ circumfusum amnem, latiorem, ubi dividebatur, eoque minus alto alveo, transitum ostendere: ibi raptim cæsa materia ratesque fabricatæ, in quibus equi virique et alia onera trajicerentur. Hispani sine ulla mole, in utres vestimentis conjectis, ipsi cætris subpositis incubantes, flumen tranavere. Et aliis exercitus, ratibus junctis trajectus, castris prope flumen positis, nocturno itinere atque operis labore fessus, quiete unius diei reficitur, intento duce ad consilium opportune exsequendum. Postero die, profecti ex loco, prodito fumo significant, se transisse, et hand procul abesse: quod ubi accepit Hannibal, ne tempori deasset, dat signum ad trajicien-

dum. Jam paratas aptatasque habebat pedes lin- U. C. 534.
 tres : equites fere propter equos nantes navium ag- A. C. 218.
 men, ad excipiendum adversi inpetum fluminis parte Trajicit
 superiore transmittens, tranquillitatem infra Rhoda-
 num. traji-
 cientibus lintribus præbebat. Equorum pars mag-
 na nantes loris a pupibus trahebantur, præter eos,
 quos instructos frenatosque, ut extemplo egresso in
 ripam equiti usui essent, inposuerant in naves.

XXVIII. Galli obcurvant in ripam cum variis
 ululatibus cantuque moris sui, quatientes scuta su-
 per capita, vibrantesque dextris tela : quamquam et
 ex adverso terrebat tanta vis navium cum ingenti
 sono fluminis et clamore vario nautarum et mili-
 tum, qui nitebantur perrumpere inpetum fluminis,
 et qui ex altera ripa trajicientes suos hortabantur.
 Jam satis paventes adverso tumultu terribilior ab
 tergo adortus clamor, castris ab Hannone captis :
 mox et ipse aderat, ancepsque terror circumstabat,
 et e navibus tanta vi armatorum in terram evadente,
 et ab tergo improvisa premente acie. Galli, post-
 quam, ultiro vim facere conati, pellebantur, qua pa-
 tere visum maxime iter, perrumpunt, trepidique in
 vicos passim suos diffugiunt. Hannibal, ceteris
 copiis per otium trajectis, spernens jam Gallicos
 tumultus, castra locat. Elephantorum trajiciendo- Elephanti
 rum varia consilia fuisse credo : certe variata me- quomodo
 moria actæ rei : quidam, congregatis ad ripam ele- trajecti.
 phantis, tradunt, ferocissimum ex iis irritatum ab
 rectore suo, qui m refugientem in aquam nantem
 sequeretur, traxisse gregem, ut quemque timentem
 altitudinem destituerat vadum, inpetu ipso fluminis
 in alteram ripam rapiente. Ceterum magis constat,
 ratibus trajectos · id ut tutius consilium ante reia

U. C. 534. foret, ita, acta re, ad fidem pronius est. Ratem
 A. C. 218. unam, ducentos longam pedes, quinquaginta latam,
 a terra in amnem porrexit: quam, ne secunda
 aqua deferretur, pluribus validis retinaculis parte
 superiore ripæ religatam, pontis in modum humo
 injecta constraverunt; ut belluae audacter velut per
 solum ingredierentur: altera ratis, æque lata, longa
 pedes centum, ad trajiciendum flumen apta, huic
 copulata est: et quum elephanti, per stabilem ra-
 tem, tamquam viam, prægredientibus feminis, acti,
 in minorem applicatam transgressi sunt; exempli
 resolutis, quibus leviter adnexa erat, vinculis, ab
 actuariis aliquot navibus ad alteram ripam pertra-
 hitur: ita primis expositis, alii deinde repetiti ac
 trajecti sunt. Nihil sane trepidabant, donec con-
 tinenti velut ponte agerentur: primus erat pavor;
 quum, soluta ab ceteris rate, in altum raperentur:
 ibi, urgentes inter se, cedentibus extremis ab aqua,
 trepidationis aliquantum edebant; donec quietem
 ipse timor circumspectantibus aquam fecisset: ex-
 cidere etiam sævientes quidam in flumen: sed, pon-
 dere ipso stabiles, dejectis rectoribus, quærendis
 pedetentim vadis, in terram evasere.

XXIX. Dum elephanti trajiciuntur, interim Han-
 nibal Numidas equites quingentos ad castra Romana
 miserat speculatum, ubi, et quantæ copiæ essent, et
 quid pararent. Huic alæ equitum missi, ut ante
 dictum est, ab ostio Rhodani trecenti Romanorum
 equites obcurrunt: prælrium atrocissimum, quam pro nu-
 mero pugnantium, editur. Nam præter multa vul-
 nera, cædes etiam prope par utrimque fuit: fugaque
 et pavor Numidarum Romanis, jam admodum fes-
 sis, victoram dedit: victores ad centum sexaginta,

Equestre
prælrium
inter Nu-
midas et
Rom.

nec omnes Romani, sed pars Gallorum : victi anni U. C. 534.
 plius ducenti ceciderunt. Hoc principium simul A. C. 218.
 omenque belli, ut summæ rerum prosperum even-
 tum, ita haud sane incruentam ancipitisque certa-
 minis victoriam, Romanis portendit. Ut, re ita
 gesta, ad utrumque ducem sui redierunt, nec Sci-
 pioni stare sententia poterat, nisi ut ex consiliis
 cœptisque hostis et ipse conatus caperet : et Han-
 nibalem incertum, utrum cœptum in Italiam inten-
 deret iter, an cum eo, qui primus se obtulisset Ro-
 manus exercitus, manus consereret, avertit a præ-
 senti certamine Boiorum legatorum regulique Ma-
 gali adventus : qui se duces itinerum, socios periculi
 fore, adfirmantes, integro bello, nusquam ante li-
 batis viribus, Italiam adgrediendam censem. Mul-
 titudo timebat quidem hostem, nondum oblitterata
 memoria superioris belli : sed magis iter immensum
 Alpesque, rem fama utique inexpertis horrendam,
 metuebat.

XXX. Itaque Hannibal, postquam ipsi sententia Hannibal
 stetit pergere ire, atque Italiam petere, advocata hortatur
 concione, varie militum versat animos castigando
 adhortandoque. *Mirari se, quinam pectora semper*
inpavida repens terror invaserit : per tot annos vin-
centes eos stipendia facere ; neque ante Hispania ex-
cessisse, quam omnes gentesque et terræ eæ, quas duo
diversa maria amplectantur, Karthaginiensium essent.
Indignatos deinde, quod, quicumque Saguntum obse-
dissent, velut ob noxam, sibi dedi postularet populus
Romanus, Iberum trajecisse ad delendum nomen Ro-
manorum, liberandumque orbem terrarum. Tum ne-
mini visum id longum, quum ab occasu solis ad exortus
intenderent iter. Nunc, postquam multo majorem par-

milites.

U. C. 534. *tem itineris emensam cernant, Pyrenæum saltum inter*
 A. C. 218. *ferocissimas gentes superatum, Rhodanum, tantum am-*
nem, tot millibus Gallorum prohibentibus, domita etiam
ipsius fluminis vi, trajectum, in conspectu Alpes ha-
beant, quarum alterum latus Italiae sit; in ipsis portis
hostium fatigatos subsistere, quid Alpes aliud esse cre-
dentes, quam montium altitudines? Fingerent altiores
Pyrenæi jugis: nullas profecto terras cœlum contin-
gere, nec inexasperabiles humano generi esse. Alpes
quidem habitari, coli, gignere atque alere animantes:
pervias paucis esse, exercitibus invias? eos ipsos, quos
cernant, legatos non pennis sublime elatos Alpes trans-
gressos: ne majores quidem eorum indigenas; sed ad-
venas Italiae cultores, has ipsas Alpes ingentibus sæpe
agminibus cum liberis ac conjugibus, migrantium modo,
tuto transmisisse. Militi quidem armato, nihil secum
præter instrumenta belli portanti, quid invium aut in-
exasperabile esse? Saguntum ut caperetur, quid per
octo menses periculi, quid laboris exhaustum esse?
Romam, orbis terrarum caput, petentibus quidquam
ad eo asperum atque arduum videri, quod inceptum
moretur? Cepisse quondam Gallos ea, quæ adiri posse
Pœnus desperet: proinde aut cederent animo atque
virtute genti, per eos dies toties ab se victæ: aut iti-
neris finem sperent campum interjacentem Tiberi ac
mænibus Romanis.

Mediter-
ranea Gal-
liæ petit.

XXXI. His adhortationibus incitatos corpora
 curare, atque ad iter se parare jubet. Postero die,
 profectus adversa ripa Rhodani, mediterranea Gal-
 liæ petit: non quia rectior ad Alpes via esset, sed,
 quantum a mari recessisset, minus obvium fore Ro-
 manum credens: cum quo, priusquam in Italianam
 ventum foret, non erat in animo manus conserere.

Quartis castris ad Insulam pervenit: ibi Arar Rho- U.C. 534.
 danusque amnes, diversis ex Alpibus decurrentes, A.C. 218.
 agri aliquantum amplexi, confluunt in unum. Mediis
 campis Insulae nomen inditum. Incolunt prope Al-
 lobroges, gens jam inde nulla Gallica gente opibus
 aut fama inferior: tum discors erat. Regni certa-
 mine ambigebant fratres: major, et qui prius im-
 peritarat, Brancus nomine, minore ab fratre et cœtu
 juniorum, qui jure minus, vi plus poterant, pelleba-
 tur. Hujus seditionis peropportuna disceptatio quum
 ad Hannibalem rejecta esset, arbiter regni factus,
 quod ea senatus principumque sententia fuerat, im-
 perium majori restituit: ob id meritum commeatu
 copiaque rerum omnium, maxime vestis, est adju-
 tus, quam infames frigoribus Alpes præparari coge-
 bant. Sedatis certaminibus Allobrogum, quum jam
 Alpes peteret, non recta regione iter instituit; sed
 ad lœvam in Tricastinos flexit; inde per extremam
 oram Vocontiorum agri tetendit in Tricorios: haud
 usquam impedita via, priusquam ad Druentiam flu-
 men pervenit. Is et ipse Alpinus amnis longe om- Druentia
 nium Galliæ fluminum difficillimus transitu est: amnis.
 nam, quum aquæ vim vehat ingentem, non tamen
 navium patiens est: quia nullis coërcitus ripis, plu-
 ribus simul, neque iisdem alveis fluens, nova semper
 vada novosque gurgites faciens, (et ob eadem pediti
 quoque incerta via est) ad hæc sava glareosa vol-
 vens, nihil stabile nec tutum ingredienti præbet; et
 tum, forte imbribus auctus, ingentem transgredien-
 tibus tumultum fecit, quum super cetera trepidatione
 ipsi sua atque incertis clamoribus turbarentur.

XXXII. P. Cornelius consul, triduo fere post, P. Corne-
 quam Hannibal ab ripa Rhodani movit, quadrato lius classe
 in Italianum redit.

U. C. 534. agmine ad castra hostium venerat, nullam dimini-
 A. C. 218. candi moram facturus: ceterum, ubi deserta muni-
 menta, nec facile se tantum prægressos adsecutu-
 rum videt; ad mare ac naves rediit, tutius facilius-
 que ita descendenti ab Alpibus Hannibali obcursu-
 rius. Ne tamen nuda auxiliis Romanis Hispania
 transit
 Alpes.
 Hannibal fratrem cum maxima parte copiarum adversus Has-
 drubalem misit; non ad tuendos tantummodo ve-
 teres socios conciliandosque novos, sed etiam ad
 pellendum Hispania Hasdrubalem: ipse cum ad-
 modum exiguis copiis Genuam repetit, eo, qui circa
 Padum erat, exercitu Italiam defensurus. Hanni-
 bal ab Druentia campestri maxime itinere cum bona
 pace ad Alpes incolentium ea loca Gallorum perve-
 nit. Tum, quamquam fama prius (qua incerta in
 majus vero ferri solent) præcepta res erat, tamen
 ex propinquo visa montium altitudo, nivesque cœlo
 prope inmixtæ, tecta informia inposita rupibus, pe-
 cora jumentaque torrida frigore, homines intonsi et
 inculti, animalia inanimaque omnia rigentia gelu,
 cetera visu, quam dictu, fœdiora, terrorem renova-
 runt. Erigentibus in primos agmen clivos adparue-
 runt inminentes tumulos insidentes montani: qui,
 si valles occultiores insedissent, coorti in pugnam
 repente, ingentem fugam stragemque dedissent.
 Hannibal consistere signa jubet; Gallisque ad vi-
 senda loca præmissis, postquam comperit, transitum
 ea non esse, castra inter confragosa omnia prærup-
 taque, quam extentissima potest valle, locat. Tum
 per eosdem Gallos, haud sane multum lingua mori-
 busque abhorrentes, quum se inmisciuerint conlo-
 quiis montanorum, edoctus interdiu tantum obsideri

saltum, nocte in sua quemque dilabi tecta; luce pri- U. C. 534.
ma subiit tumulos, ut ex aperto atque interdiu vim A. C. 215.
per angustias facturus. Die deinde simulando aliud,
quam quod parabatur, consumto, quum eodem quo
constiterant, loco castra communisent, ubi primum
degressos tumulis montanos laxatasque sensit cus-
todiias, pluribus ignibus, quam pro numero manen-
tium, in speciem factis, impedimentisque cum equite
relictis, et maxima parte peditum; ipse cum expe-
ditis, acerrimo quoque viro, raptim angustias eva-
dit: iisque ipsis tunulis, quos hostes tenuerant,
consedit.

XXXIII. Prima deinde luce castra mota, et ag-
men reliquum incedere cœpit. Jam montani signo
dato ex castellis ad stationem solitam convenie-
bant; quum repente conspiciunt alios, arce occu-
pata sua, super caput inminentes, alios via transire
hostes. Utraque simul objecta res oculis animisque
inmobiles parumper eos defixit: deinde ut trepidationem in angustiis, suoque ipsum tumultu misceri
agmen videre, equis maxime consternatis, quidquid
adjecissent ipsi terroris, satis ad perniciem fore rati,
perversis rupibus juxta invia ac devia adsueti dis-
currunt. Tum vero simul ab hostibus, simul ab
iniquitate locorum Pœni obpugnabantur; plusque
inter ipsis, (sibi quoque tendente, ut periculo prius
evaderet) quam cum hostibus, certaminis erat. Equi
maxime infestum agmen faciebant, qui et clamori-
bus dissonis, quos nemora etiam repercussæque val-
les augebant, territi trepidabant; et icti forte aut
vulnerati adeo consternabantur, ut stragem ingen-
tem simul hominum ac sarcinarum omnis generis
facerent: multosque turba, quum præcipites de-

U. C. 534. ruptæque utrimque angustiæ essent, in immensum
A. C. 218. altitudinis dejicit; quosdam et armatos: sed ruinæ
 maximæ modo jumenta cum oneribus devolvebantur. Quæ quamquam fœda visu erant, stetit parrumper tamen Hannibal, ac suos continuit, ne tumultum ac trepidationem augeret: deinde postquam interrumpi agmen vidit, periculumque esse, ne exutum impedimentis exercitum nequidquam incolumem traduxisset, decurrit ex superiore loco; et, quum inpetu ipso fudisset hostem, suis quoque tumultum auxit: sed is tumultus momento temporis, postquam liberata itinera fuga montanorum erant, sedatur: nec per otium modo, sed prope silentio, mox omnes traducti. Castellum inde, quod caput ejus regionis erat, viculosque circumjectos capit, et captivorum pecoribus per triduum exercitum aluit: et quia nec montanis primo percussis, nec loco magnopere impediebantur, aliquantum eo triduo viæ confecit.

XXXIV. Perventum inde ad frequentem cultoribus alium, ut inter montana, populum: ibi non bello aperto, sed suis artibus, fraude, deinde insidiis est prope circumventus. Magno natu principes castellorum oratores ad Pœnum veniunt: *alienis malis, utili exemplo, doctos, memorantes, amicitiam malle, quam vim experiri Pœnorū: itaque obedienter imperata facturos, commeatum itinerisque duces, et ad fidem promissorum obsides acciperet.* Hannibal nec temere credendo, nec adspernando, ne repudiati aperte hostes fierent, benigne quum respondisset; obsidibus, quos dabant, acceptis, et commeatu, quem in viam ipsi detulerant, usus, nequaquam ut inter pacatos, composito agmine duces eorum sequitur. Primum agmen elephanti et equites erant:

ipse post cum robore peditum, circumspectans sol- U.C. 534.
licitusque omnia, incedebat. Ubi in angustiorem A.C. 218.
viam ex parte altera subjectam jugo insuper inmi-
nenti ventum est, undique ex insidiis barbari a
fronte, ab tergo coorti, minus eminus petunt:
saxa ingentia in agmen devolvunt: maxima ab ter-
go vis hominum urgebat: in eos versa peditum
acies haud dubium fecit, quin, nisi firmata extrema
agminis fuissent, ingens in eo saltu accipienda clades
fuerit. Tunc quoque ad extremum periculi ac prope
perniciem ventum est: nam, dum cunctatur Hanni-
bal demittere agmen in angustias; quia non, ut ipse
equitibus præsidio erat, ita peditibus quidquam ab
tergo auxili reliquerat; obscursantes per obliqua
montani, perrupto medio agmine, viam insedere;
noisque una Hannibali sine equitibus atque inpedi-
mentis acta est.

XXXV. Postero die, jam segnius intercursanti-
bus barbaris, junctæ copiæ, saltusque haud sine
clade (majore tamen jumentorum, quam hominum,
pernicie) superatus: inde montani pauciores jam,
et latrocini magis quam belli more, concursabant;
modo in primum, modo in novissimum agmen, ut-
cumque aut locus opportunitatem daret, aut pro-
gressi morative aliquam occasionem fecissent. Ele-
phanti, sicut præcipites per artas vias magna mora
agebantur, ita tutum ab hostibus, quacunque in-
cederent, (quia insuetis adeundi proprius metus erat)
agmen præbebant. Nono die in jugum Alpium per-
ventum est, per invia pleraque et errores, quos aut
ducentium fraud, aut, ubi fides iis non esset, temere
initæ valles a conjectantibus iter, faciebant. Bidu-
um in jugo stativa habita: fessisque labore ac pug-

U. C. 534. nando quies data militibus: jumentaque aliquot,
 A. C. 218. quæ prolapsa in rupibus erant, sequendo vestigia
 agminis in castra pervenere. Fessis tædio tot ma-
 lorum nivis etiam casus, occidente jam sidere Ver-
 giliarum, ingentem terrorem adjecit. Per omnia
 nive oppleta quum, signis prima luce motis, segniter
 agmen incederet, pigritiaque et desperatio in om-
 nium vultu enineret; prægressus signa Hannibal
 in promontorio quodam, unde longe ac late pro-
 spectus erat, consistere jussis militibus Italiam osten-
 tat, subjectosque Alpinis montibus Circumpadanos
 campos: *mæniaque eos tum transcendere non Italiæ
 modo, sed etiam urbis Romanæ: cetera plana, procli-
 via fore: uno, aut sumnum altero prælio arcem et
 caput Italiæ in manu ac potestate habituros.* Pro-
 cedere inde agmen cœpit; jam nihil ne hostibus
 quidem, præter parva furta per occasionem, tentan-
 tibus. Ceterum iter multo, quam in adscensu fuerat,
 (ut pleraque Alpium ab Italia sicut breviora, ita ad-
 rectiora sunt) difficilius fuit: omnis enim ferme via
 præceps, angusta, lubrica erat: ut neque sustinere
 se a lapsu possent; nec, qui paullulum titubassent,
 hærere adflicti vestigio suo; aliique super alios, et
 jumenta et homines, occiderent.

XXXVI. Ventum deinde ad multo angustiorem
 rupem, atque ita rectis saxis, ut ægre expeditus mi-
 les tentabundus, manibusque retinens virgulta ac
 stirpes circa eminentes, demittere sese posset. Na-
 tura locus jam ante præceps, recenti lapsu terræ in
 pedum mille admnodum altitudinem abruptus erat.
 Ibi quum, velut ad finem viæ, equites constitissent,
 miranti Hannibali, quæ res moraretur agmen, nun-
 ciatur, rupem inviam esse: digressus deinde ipse ad

locum visendum: haud dubia res visa, quin per in- U. C. 534.
 via circa nec trita antea, quamvis longo anibitu,
 circumduceret agmen. Ea vero via insuperabilis
 fuit: nam quum super veterem nivem intactam no- A. C. 218.
 va modicæ altitudinis esset, molli nec præaltæ nivi
 facile pedes ingredientium insistebant: ut vero tot
 hominum jumentorumque incessu dilapsa est, per
 nudam infra glaciem fluentemque tabem liquefientis
 nivis ingrediebantur. Tetra ibi luctatio erat: ut a
 lubrica glacie, non recipiente vestigium, et in prono
 citius pede se fallente, et, seu manibus in adsurgen-
 do seu genu se adjuvissent, ipsis adminiculis prolapsis,
 iterum corruiissent, nec stirpes circa radices-
 ve, ad quas pede aut manu quisquam eniti pos-
 set, erant; ita in levi tantum glacie tabidaque nive
 volutabantur: jumenta secabant; interdum etiam,
 tum infimam ingredientia nivem, et prolapsa jactan-
 dis gravius in continendo unguis, penitus perfringe-
 bant: ut pleraque, velut pedica capta, hærerent in
 durata et alte concreta glacie.

XXXVII. Tandem, nequidquam jumentis atque
 hominibus fatigatis, castra in jugo posita, ægerrime
 ad id ipsum loco purgato: tantum nivis fodiendum
 atque egerendum fuit. Inde ad rupem muniendam,
 per quam unam via esse poterat, milites ducti, quum
 cædendum esset saxum, arboribus circa inmanibus Rupes igne
 dejectis detruncatisque, struem ingentem lignorum et aceto
 faciunt: eamque (quum et vis venti apta faciendo
 igni coorta esset) succendunt, ardentinaque saxa in-
 fusio aceto putrefaciunt. Ita torridam incendio re-
 pem ferro pandunt, molliuntque amfractibus modi-
 cis clivos, ut non jumenta solum, sed elephanti
 etiam, deduci possent. Quatriduum circa rupem

U. C. 534. consumtum, jumentis prope fame absumtis: nuda
 A. C. 218. enim fere cacumina sunt, et, si quid est pabuli,
 obruunt nives. Inferiora valles et apricos quosdam
 colles habent, rivosque prope silvas, et jam humano
 cultu digniora loca. Ibi jumenta in pabulum missa,
 et quies muniendo fessis hominibus data triduo:
 inde ad planum descensum, etiam locis mollioribus
 et adcolarum ingeniis.

Italiam XXXVIII. Hoc maxime modo in Italiam per-
 ingreditur Hannibal. ventum est, quinto mense a Karthagine nova, (ut
 quidam auctores sunt) quinto decimo die Alpibus
 superatis. Quantæ copiæ transgresso in Italiam
 Hannibali fuerint, nequaquam inter auctores con-
 stat: qui plurimum, centum millia peditum, viginti
 equitum fuisse scribunt; qui minimum, viginti mil-
 lia peditum, sex equitum. L. Cincius Alimentus, qui
 captum se ab Hannibale scribit, maxime auctor me-
 moveret, nisi confunderet numerum, Gallis Lig-
 ribusque additis: cum his octoginta millia peditum,
 decem equitum, adducta in Italiam: (magis ad-
 fluxisse verisimile est, et ita quidam auctores sunt:)
 ex ipso autem audisse Hannibale, postquam Rho-
 danum transierit, triginta sex millia hominum, in-
 gentemque numerum equorum et aliorum jumento-
 rum amisisse in Taurinis, quæ Gallis proxima gens
 erat, in Italiam degresso. Id quum inter omnes
 constet, eo magis miror ambigi, quanam Alpes
 transierit: et vulgo credere, Penino, atque inde
 nomen et jugo Alpium inditum, transgressum. Cœ-
 lius per Cremonis jugum dicit transisse: qui ambo
 saltus eum non in Taurinos, sed per Salassos mon-
 tanos ad Libuos Gallos deduxissent. Nec verisimile
 est, ea tum ad Galliam patuisse itinera; utique, quæ

ad Peninum ferunt, obsepta gentibus semigermanis U. C. 534.
fuissent: neque, Hercule, in montibus his (si quem A. C. 219.
forte id movet) ab transitu Pœnorum ullo Veragri,
incolæ jugi ejus, norunt nomen inditum; sed ab eo,
quem, in summo sacratum vertice, Peninum mon-
tani adpellant.

XXXIX. Per opportune ad principia rerum Taurinis, proximæ genti, adversus Insubres motum bellum erat: sed armare exercitum Hannibal, ut parti alteri auxilio esset, (in refiendo maxime sentientem contracta ante mala) non poterat: otium etenim ex labore, copia ex inopia, cultus ex inluvie tabeque, squalida et prope efferata corpora varie movebant. Ea P. Cornelio consuli caussa fuit, quum Cornelius Pisas navibus venisset, exercitu a Manlio Atilioque accepto tirone, et in novis ignominiis trepido, ad nit. Padum festinandi; ut cum hoste nondum refecto manum consereret: sed cum Placentiam consul venit, jam ex stativis moverat Hannibal; Taurinorumque unam urbem, caput gentis ejus, quia volentis in amicitiam non veniebant, vi expugnarat: junxissetque sibi, non metu solum, sed etiam voluntate, Gallos ad colas Padi; ni eos, circumspectantes defectionis tempus, subito adventus consulis obpresisset. Et Hannibal movit ex Taurinis, incertos, quæ pars sequenda esset, Gallos præsentem se secuturos ratus. Jam prope in conspectu erant exercitus, convenerantque duces sicuti inter se nondum satis noti, ita jam inbutus uterque quadam admiratione alterius. Nam Hannibal et apud Romanos, jam ante Sagunti excidium, celeberrimum nomen erat: et Scipionem Hannibal eo ipso, quod adversus se dux potissimum lectus esset, præstantem vi-

U. C. 534. rum credebat: et auxerant inter se opinionem, Sci-
A. C. 218. pio, quod, relictus in Gallia, obvius fuerat in Ita-
liam transgresso Hannibali; Hannibal, et conatu
tam audaci trajiciendarum Alpium, et effectu. Oc-
cupavit tamen Scipio Padum trajicere, et, ad Tici-
num amneum motis castris, prius, quam educeret in
aciem, adhortandorum militum caussa, talem ora-
tionem exorsus est:

Cornelius
milites
suis ad-
hortatur.

XL. *Si eum exercitum, milites, educerem in aciem,*
quem in Gallia mecum habui, supersedissem loqui apud
vos: quid enim adhortari referret aut eos equites, qui
equitatum hostium ad Rhodanum flumen egregie vi-
cissent, aut eas legiones, cum quibus fugientem hunc
ipsum hostem secutus, confessionem cedentis ac detrac-
tantis certamen pro victoria habui? Nunc, quia ille
exercitus, Hispaniae provinciae scriptus, ibi cum fratre
Cn. Scipione meis auspiciis rem gerit, ubi eum gerere
senatus populusque Romanus voluit; ego, ut consulem
ducem adversus Hannibalem ac Pænos haberetis, ipse
me huic voluntario certamini obtuli; novo imperatori
apud novos milites pauca verba facienda sunt. Ne
genus belli, neve hostem ignoretis; cum iis est vobis,
milites, pugnandum, quos terra marique priore bello
vicistis: a quibus stipendum per viginti annos exe-
gistis: a quibus capta belli præmia, Siciliam ac Sar-
diniam, habetis. Erit igitur in hoc certamine is vobis
illisque animus, qui rictoribus et rictis esse solet. Nec
nunc illi, quia audent, sed quia necesse est, pugnaturi
sunt: nisi creditis, qui exercitu incolumi pugnam de-
tractavere, eos, duabus partibus peditum equitumque
in transitu Alpium amissis, (quum plures pene perie-
rint, quam supersunt) plus spei nactos esse. At enim
vauci quidem sunt, sed vigentes animis corporibusque,

*quorum robora ac vires vix sustinere vis ulla possit. U. C. 534.
Effigies, immo umbræ hominum, fame, frigore, inlu-* A. C. 218:
*vie, squalore enecti, contusi ac debilitati inter saxa
rupesque: ad hæc, præusti artus, nive rigentes nervi,
membra torrida gelu, quassata fractaque arma, claudi
ac debiles equi. Cum hoc equite, cum hoc pedite pug-
nuturi estis: reliquias extremas hostium, non hostes,
habebitis. Ac nihil magis vereor, quam ne, vos quem
pugnaveritis, Alpes viciisse Hannibalem videantur. Sed
ita forsitan decuit, cum fæderum ruptore duce ac po-
pulo Deos ipsos, sine ulla humana ope, committere ac
profligare bellum: nos, qui secundum Deos violati su-
mus, commissum ac profligatum conficere.*

XLI. *Non vereor, ne quis me hoc vestri adhortandi
caussa magnifice loqui existimet; ipsum aliter animo
adfectum esse. Licuit in Hispaniam, provinciam meum,
quo jam profectus eram, cum exercitu ire meo: ubi et
fratrem consilii participem aë périculi socium haberem,
et Hasdrubalem potius, quam Hannibalem, hostem, et
minorem haud dubie molem belli: tamen, quum præ-
terveherer navibus Galliæ oram, ad famam hujus hos-
tit in terram egressus, præmisso equitatu, ad Rhodan-
num movi castra. Equestri prælio, qua parte copia-
rum conserendi manum fortuna data est, hostem fudi:
peditem agmen, quod in modum fugientium raptim
agebatur, quia adsequi terra non poteram, regressus ad
naves, quanta maxima celeritate potui, tanto maris
terrarumque circuitu, in radicibus Alpium obvius fui.
Huic timendo hosti utrum, quum declinarem certamen,
inprovisus incidisse videor, an obcurrere in vestigiis
ejus? lacessere ac trahere ad decernendum? Experiri
juvat, utrum alios repente Karthaginenses per viginti
annos terra ediderit: an iidem sint, qui ad Aegates*

U. C. 534. *pugnaverunt insulas, et quos ab Eryce duodecimenis de-*
 A. C. 218. *nariis æstimos emisistis : et utrum Hannibal hic sit*
æmulus itinerum Herculis, ut ipse fert, an vectigalis
stipendiariusque et scrvus populi Romani a patre re-
lictus : quem nisi Saguntinum scelus agitaret, respice-
ret profecto, si non patriam victimam, domum certe, pa-
tremque, et fædera Hamilcaris scripta manu : qui,
jussus a consule nostro, præsidium deduxit ab Eryce :
qui graves inpositas victimis Karthaginiensibus leges fre-
mens mærensque accepit : qui decidere Sicilia, qui sti-
pendium populo Romano dare pactus est. Itaque vos
ego, milites, non eo solum animo, quo adversus alios
hostes soletis, pugnare velim ; sed cum indignatione
quadam atque ira : velut si servos videatis vestros ar-
ma repente contra vos ferentes. Licuit ad Erycem
clausos, ultimo suppicio humanorum, fame interficere :
licuit victricem classem in Africam trajicere, atque in-
tra paucos dies sine ullo certamine Karthaginem delere.
Veniam dedimus precantibus : emisimus ex obsidione :
pacem cum victimis fecimus : tutelæ deinde nostræ duxi-
mus, quum Africo bello urgerentur. Pro his inparti-
tis, furiosum juvenem sequentes, obpugnatum patriam
nostram veniunt. Atque utinam pro decore tantum
hoc vobis, et non pro salute, esset certamen : non de
possessione Siciliæ ac Sardiniae, de quibus quondam
agebatur, sed pro Italia vobis est pugnandum : nec est
alius ab tergo exercitus, qui, nisi nos vincimus, hosti
obsistat ; nec Alpes alicæ sunt, quas dum superant, com-
parari nova possint præsidia : hic est obstandum, mil-
ites, velut si ante Romana mænia pugnemus. Unus-
quisque se non corpus suum, sed conjugem ac liberos
parvos armis protegere putet : nec domesticas solum
agitet curas, sed idemtidem hoc animo reputet, nostras

*nunc intueri manus senatum populumque Romanum : U. C. 534.
qualis nostra vis virtusque fuerit, talem deinde fortu-* A. C. 218.
nam illius urbis ac Romani imperii fore.

XLII. Hæc apud Romanos consul. Hannibal, rebus prius, quam verbis, adhortandos milites ratus, circumdato ad spectaculum exercitu, captivos montanos vinctos in medio statuit; armisque Gallicis ante corum pedes projectis, interrogare interpretem jussit, ecquis, si vinculis levaretur, armaque et equum victor acciperet, decertare ferro vellet? Quum ad unum omnes ferrum pugnamque poscerent, et dejecta in id sors esset, se quisque eum optabat, quem fortuna in id certamen legeret. Ut cujusque sors exciderat, alacer, inter gratulantes gaudio exultans, cum sui moris tripudiis arma raptim capiebat: ubi vero dimicarent, is habitus animorum non inter ejusdem modo conditionis homines erat, sed etiam inter spectantes vulgo, ut non vincentium magis, quam bene morientium, fortuna laudaretur.

XLIII. Dum sic aliquot spectatis paribus adfec- Ejus oratores dimisisset, concione inde advocata, ita apud eos locutus fertur: *Si, quem animum in alienæ sortis exemplo paullo ante habuistis, eumdem mox in æstimanda fortuna vestra habueritis, vicimus, milites: neque enim spectaculum modo illud, sed quædam veluti imago vestræ conditionis erat. Ac nescio, an majora vincula majoresque necessitates vobis, quam captivis vestris, fortuna circumdederit. Dextra lævaque duo maria claudunt, nullam, ne ad effugium quidem, navem habentibus: circa Padus annis, major Padus ac violenter Rhodano; ab tergo Alpes urgent, vix integris vobis ac vigentibus transitæ. Hic vincendum aut moriendum, milites, est, ubi primum hosti obcurreris: et*

U. C. 534. *eadem fortuna, quæ necessitatem pugnandi inposuit,*
 A. C. 218. *præmia vobis ea victoribus proponit, quibus ampliora homines ne ab Diis quidem immortalibus optare solent.*
Si Siciliam tantum ac Sardiniam, parentibus nostris ereptas, nostra virtute recuperaturi essemus, satis tamen ampla pretia essent: quidquid Romani tot triumphis partum congestumque possident, id omne restringum cum ipsis dominis futurum est. In hanc tam opimam mercedem, agite, cum Diis bene juvantibus arma capite.
Satis adhuc in vastis Lusitaniæ Celtiberiæque montibus, pecora consecando, nullum emolumen tot laborum periculorumque restringorum vidistis: tempus est jam, opulenta vos ac ditia stipendia facere, et magna operæ pretia mereri, tantum itineris per tot montes fluminaque et tot armatas gentes emensos. Hic vobis terminum laborum fortuna dedit: hic dignam mercedem emeritis stipendiis dabit. Nec, quam magni nominis bellum est, tam difficultem existimaritis victoriam fore: sæpe et contemtus hostis cruentum certamen edidit, et incliti populi regesque perlevi momento victi sunt. Nam, demto hoc uno fulgore nominis Romani, quid est, cur illi vobis comparandi sint? Ut viginti annorum militiam restringam cum illa virtute, cum illa fortuna tacceam; ab Herculis columnis, ab oceano terminisque ultimis terrarum, per tot ferocissimos Hispaniæ et Galliæ populos vincentes huc pervenistis: pugnabitis cum exercitu tirone, hac ipsa aestate cæso, victo, circumsesso a Gallis, ignoto adhuc duci suo, ignorantique ducem. An me, in prætorio patris, clarissimi imperatoris, prope natum, certe eductum, domitorem Hispaniæ Galliæque, victorem eumdem non Alpinarum modo gentium, sed ipsarum, quod multo majus est, Alpium, cum semestri hoc conferam duce, desertore exercitus sui? Cui si

quis, demtis signis, Pænos Romanosque hodie ostendat, U. C. 534.
ignoraturum certum habeo, utrius exercitus sit consul. A. C. 218.

Non ego illud parvi æstimo, milites, quod nemo vestrum est, cuius non ante oculos ipse sæpe militare aliquod ediderim facinus; cui non idem ego, virtutis spectator ac testis, notata temporibus locisque referre sua possim decora. Cum laudatis a me millies donatisque, alumnus prius omnium vestrum, quam imperator, procedam acie adversus ignotos inter se ignorantesque.

XLIV. *Quocumque circumtuli oculos, plena omnia video animorum ac roboris; veteranum peditem, generosissimarum gentium equites frenatos et infrenatos, vos socios fidelissimos fortissimosque, vos Karthaginienses, quum ob patriam, tum ob iram justissimam, pugnatores. Inferimus bellum, infestisque signis descendimus in Italiam, tanto audacius fortiusque pugnaturi, quanto major spes, major est animus inferentis vim, quam arcentis. Accendit præterea animos et stimulat dolor, injuria, indignitas: ad supplicium depoposcerunt me ducem primum, deinde vos omnes, qui Saguntum obpugnassetis: deditos ultimis cruciatibus adfecturi fuerunt. Crudelissima ac superbissima gens sua omnia suique arbitrii facit: cum quibus bellum, cum quibus pacem habeamus, se modum inponere æqueum censem: circumscribit includitque nos terminis montium fluminumque, quos ne excedamus: neque eos, quos statuit, terminos observat. Ne transieris Iberum: ne quid rei tibi sit cum Suguntinis. Ad Iberum est Saguntum: nusquam te vestigio moveris. Parum est, quod veterrimas provincias meas Siciliam et Sardiniam adimis: etiam Hispanias? et inde cessero, in Africam transcendes. Transcendes autem, dico? duos consules*

U. C. 534. *hujus anni, unum in Africam, alterum in Hispaniam*
A. C. 218. *miserunt: nihil usquam nobis relictum est, nisi quod*

armis vindicarimus. Illis timidis et ignavis licet esse, qui respectum habent, quos suus ager, sua terra, per tutam ac pacata itinera fugientes, accipient: vobis necesse est fortibus viris esse, et, omnibus inter victoriam mortemve certa desperatione abruptis, aut vincere, aut, si fortuna dubitabit, in prælio potius, quam in fuga, mortem obpetere. Si hoc bene fixum omnibus destinatumque in animo est, iterum dicam, vicistis: nullum momentum ad vincendum homini ab Diis immortalibus acrius datum est.

XLV. His adhortationibus quum utrimque ad certamen accensi militum animi essent, Romani ponte Ticinum jungunt, tutandique pontis caussa castellum insuper inponunt. Pœnus, opere occupatis hostibus, Maharbalem cum ala Numidarum, equitibus quingentis, ad depopulandos sociorum populi Romani agros mittit: Gallis parcí quam maxime jubet, principumque animos sollicitari ad defectionem. Ponte perfecto, traductus Romanus exercitus in agrum Insubrium, quinque millia passuum a Victumviis consedit. Ibi Hannibal castra habebat: revocatoque propere Maharbale atque equitibus, quum instare certamen cerneret, nihil umquam satis dictum præmonitumque ad cohortandos milites ratus, vocatis ad concionem certa præmia pronunciat, in quorum spem pugnarent. *Agrum sese daturum esse in Italia, Africa, Hispania, ubi quisque velit, immunem ipsi, qui accepisset, liberisque; qui pecuniam, quam agrum, maluisset, ei se argento satisfacturum: qui sociorum cives Karthaginenses fieri nellerent, potestatem facturum: qui domos redire mal-*

Præmia
suis pro-
nuntiat
Hanni-
bal.

*lent, daturum se operam, ne cuius suorum popularium U.C. 534.
mutatam secum fortunam esse vellent.* Servis quoque A.C. 218.
dominos prosecutis libertatem proponit, binaque
pro his mancipia dominis se redditurum. Eaque ut
rata scirent fore, agnum læva manu, dextera silicem
retinens, si falleret, Jovem ceterosque precatus Deos,
ita se mactarent, quemadmodum ipse agnum mac-
tasset, secundum precationem caput pecudis saxo
elisit. Tum vero omnes, velut Diis auctoribus in
spem suam quisque acceptis, id moræ, quod non-
dum pugnarent, ad potienda sperata rati, prælium
uno animo et voce una poscunt.

XLVI. Apud Romanos haudquaquam tanta ala-
critas erat, super cetera recentibus etiam territos
prodigiis: nam et lupus intraverat castra, laniatis- Prodigia
que obviis ipse intactus evaserat; et examen apum in castris
in arbore prætorio inminente conserderat. Quibus Romanis.
procuratis, Scipio, cum equitatu jaculatoribusque
expeditis profectus ad castra hostium, exque pro-
pinquo copias, quantæ, et cuius generis essent, spe-
culandas, obvius fit Hannibali, et ipsi cum equitibus
ad exploranda circa loca progresso: neutri alteros
primo cernebant: densior deinde incessu tot homi-
num equorumque oriens pulvis signum propinquan-
tium hostium fuit. Constitit utrumque agmen, et
prælio sese expediebant. Scipio jaculatores et Gal-
los equites in fronte locat; Romanos, sociorumque Pugna
quod roboris fuit, in subsidiis. Hannibal frenatos equestris
equites in medium accipit, cornua Numidis firmat. num.
Vixdum clamore sublato, jaculatores fugerunt inter
subsidia ad secundam aciem: inde equitum certa-
men erat aliquamdiu anceps: dein, quia turbabant
equos pedites intermixti, multis labentibus ex equis,

U. C. 534. aut desilientibus, ubi suos premi circumventos vi-
A. C. 218. dissent, jam magna ex parte ad pedes pugna ierat : donec Numidæ, qui in cornibus erant, circumvecti paullulum, ab tergo se ostenderunt. Is pavor perculit Romanos, auxitque pavorem consulis vulnus, periculumque intercursu tum primum pubescentis fi-
Cos. a filio lii propulsatum. Hic erit juvenis, penes quem perservatus. perfecti hujusce belli laus est, Africanus ob egregiam victoriam de Hannibale Pœnisque adpellatus. Fuga tamen effusa jaculatorum maxime fuit, quos primos Numidæ invaserunt. Alius confertus equitatus consulem in medium acceptum, non armis modo, sed etiam corporibus suis, protegens, in castra, nusquam trepide neque effuse cedendo, reduxit. Servati consulis decus Cœlius ad servum natione Ligurrem delegat : malim equidem de filio verum esse, quod et plures tradidere auctores, et fama obtinuit.

XLVII. Hoc primum cum Hannibale prœlium fuit ; quo facile adparuit, et equitatu meliorem Pœnum esse, et ob id campos patentes, quales sunt inter Padum Alpesque, bello gerendo Romanis aptos non esse. Itaque proxima nocte, jussis militibus vasa silentio configere, castra ab Ticino mota, festinatumque ad Padum est ; ut ratibus, quibus junxerat flumen, nondum resolutis, sine tumultu atque insectatione hostis, copias trajiceret. Prius Placentiam pervenere, quam satis sciret Hannibal ab Ticino profectos : tamen ad sexcentos moratorum in citeriore ripa, segniter ratem solventes, cepit : transire non potuit pontem, ut extrema resoluta erant, tota rate in secundam aquam labente. Cœlius auctor est, Magonem eum equitatu et His-

Ultra Padum redunt Romanii.

panis peditibus flumen extempo transnasse; ipsum U.C. 534.
 Hannibalem per superiora Padi vada exercitum tra- A.C. 218.
 duxisse, elephantis in ordinem ad sustinendum in-
 petum fluminis obpositis. Ea peritis amnis ejus vix
 fidem fecerint: nam neque equites, armis equisque
 salvis, tantam vim fluminis superasse verisimile est,
 ut jam Hispanos omnes inflati transvexerint utres:
 et multorum dierum circuitu Padi vada petenda fue-
 rant, qua exercitus gravis impedimentis traduci pos-
 set. Potiores apud me auctores sunt, qui biduo vix
 locum rate jungendo flumini inventum tradunt; ea
 cum Magone equites Hispanorum expeditos prae-
 missos: dum Hannibal, circa flumen legationibus Sequitur
 Gallorum audiendis moratus, traxit gravius pedi-^{eos Han-}
 tum agmen, interim Mago equitesque ab transitu
 fluminis diei unius itinere Placentiam ad hostes
 contendunt. Hannibal paucis post diebus sex mil-
 lia a Placentia castra communivit, et postero die,
 in conspectu hostium acie directa, potestatem pug-
 næ fecit.

XLVIII. Insequenti nocte cædes in castris Ro-
 manis, tumultu tamen quam re major, ab auxiliari-
 bus Gallis facta est: ad duo millia peditum et du- Gallorum
 centi equites, vigilibus ad portas trucidatis, ad Han-^{pars magna}
 nibalem transfugiunt: quos Pœnus benigne adlo-^{transfugi-}
 cutus, et spe ingentium donoram accensos, in civi-^{unt ad}
 tates quemque suas, ad sollicitandos popularium ani-^{Hanniba-}
 mos dimisit. Scipio, cædem eam signum defectio-^{lem.}
 nis omnium Gallorum esse ratus, contactosque eo
 scelere, velut injecta rabie, ad arnia ituros; quam-
 quam gravis adhuc vulnere erat, tamen quarta vi- Scipio ad
 gilia noctis insequentis tacito agmine profectus ad Trebiām
 Trebiām fluvium, in loca altiora collesque impedi- ^{Trebiām}
^{recedit.}

U.C. 534. tiores equiti castra movet. Minus, quam ad Tici-A. C. 21⁸. num, fefellit : missisque Hannibal primum Numidis, deinde omni equitatu, turbasset utique novissimum agmen, ni aviditate prædæ in vacua Romana castra Numidæ devertisserent. Ibi dum, perscrutantes loca omnia castrorum, nullo satis digno moræ pretio tempus terunt, emissus hostis de manibus est : et quum jam transgressos Trebiam Romanos, metantesque castra conspexissent, paucos moratorum occiderunt, citra flumen interceptos. Scipio, nec vexationem vulneris in via jactanti ultra patiens, et collegam (jam enim et revocatum ex Sicilia audierat) ratus exspectandum, locum, qui prope flumen tutissimus stativis est visus, delectum communiit. Nec procul inde Hannibal quum consedisset, quantum victoria equestri elatus, tantum anxius inopia, quæ per hostium agros euntem, nusquam præparatis commeatibus, major in dies excipiebat, ad Clastidium vicum, quo magnum frumenti numerum congesserant Romani, mittit : ibi quum vim pararent, spes facta prodigionis : nec sane magno pretio, nummis aureis quadringentis, Dasio Brundusino præfecto præsidii corrupto, traditur Hannibali Clastidium : id horreum fuit Pœnis sedentibus ad Trebiam. In captivos ex tradito præsilio, ut fama clementiæ in principio rerum configeretur, nihil sævitum est.

Res circa
Siciliam
terra ma-
rique
gestæ.

XLIX. Quum ad Trebiam terrestræ constitisset bellum, interim circa Siciliani insulasque Italiæ imminentes, et a Sempronio consule, et ante adventum ejus, terra marique res gestæ : viginti quinqueremes cum mille armatis ad depopulandam oram Italiæ a Karthaginiensibus missæ, novem Liparas,

•ecto insulam Vulcani tenuerunt, tres in fretum U.C. 534.
avertit aestus. Ad eas conspectas a Messana duo- A.C. 218.
decim naves ab Hierone rege Syracusanorum mis-
sæ, qui tum forte Messanæ erat, consulem Roma-
num obperiens, nullo repugnante captas naves Mes-
sanam in portum deduxerunt. Cognitum ex cap-
tivis, præter viginti naves, cujus ipsi classis essent,
in Italiam missas, quinque et triginta alias quinque-
remes Siciliam petere ad sollicitandos veteres socios.
Lilybæi occupandi præcipuanu curam esse: credere
eadem tempestate, qua ipsi disjecti forent, cam
quoque classem ad Ægates insulas dejectam. Hæc
sicut audita erant, rex M. Æmilio prætori, cujus
Sicilia erat provincia, perscribit, monetque, Lily-
bæum firmo teneret præsidio. Extemplo et circa
prætorem ad civitates missi legati tribunique, qui
suos ad curam custodiæ intenderent; ante omnia
Lilybæum teneri: ad adparatum belli, edicto pro-
posito, ut socii navales decem dierum cocta cibaria
ad naves deferrent; ubi signum datum esset, ne
quis moram concendendi faceret: perque omnem
oram qui erant, ex speculis prospicerent adventan-
tem hostium classem. Simul itaque (quamquam de
industria morati cursum navium erant Karthagini-
enses, ut ante lucem accederent Lilybæum) præsen-
sum tamen est, quia et luna pernox erat, et sublati
armamentis veniebant; extemplo datum e speculis
signum, et in oppido ad arma conclamatum est, et
in naves concensem: pars militum in muris porta-
rumque in stationibus, pars in navibus erant. Et
Karthaginienses, quia rem fore haud cum inparatis
cernebant, usque ad lucem portu se abstinuerunt,
demendis armamentis eo tempore aptandaque ad

U. C. 534. pugnam classe absumto. Ubi in luxit, recepere classem in altum, ut spatum pugnæ esset, exitumque liberum e portu naves hostium haberent. Nec Romani detractavere pugnam, et memoria circa ea ipsa loca gestarum rerum freti, et militum multitudine ac virtute.

Pugna na-
valis ad
Lily-
bæum.

L. Ubi in altum evecti sunt, Romanus conserere pugnam, et ex propinquo vires conferre velle: contra eludere Poenæ, et arte, non vi, rem gerere, naviumque, quam virorum aut armorum, malle certamen facere: nam ut sociis navalibus adfatim instructam classem, ita inopem milite habebant: et, sicubi conserta navis esset, handquaquam par numerus armatorum ex ea pugnabat. Quod ubi animadversum est, et Romanis multitudo sua auxit annum, et paucitas illis minuit. Extemplo septem naves Punicæ circumventæ; fugam ceteræ ceperunt: mille et septingenti fuere in navibus capti, milites nautæque; in his tres nobiles Karthaginensium. Classis Romana incolunis, una tantum perforata navi, sed ea quoque ipsa reduce, in portum rediit. Secundum hanc pugnam, nondum gnaris ejus, qui Messanæ erant, Ti. Sempronius consul Messanam venit. Ei fretum intranti rex Hiero classem ornatam obviam duxit: transgressusque ex regia in prætoriam navem, gratulatus sospitem cum exercitu et navibus advenisse, precatusque prosperum ac felicem in Siciliam transitum; statum deinde insulæ et Karthaginiensium conata exposuit: pollicitusque est, quo animo priore bello populum Romanum juvenis adjuvisset, eo senem adjuturum. Frumentum vestimentaque sese legionibus consulis sociisque navalibus gratis præbiturum: grande pe-

riculum Lilybæo maritimisque civitatibus esse, et U. C. 534.
A. C. 218.
quibusdam volentibus novas res fore. Ob hæc con-
suli nihil cunctandum visum, quin Lilybæum classe
peteret; et rex regiaque classis una profecti: navi-
gantes inde, pugnatum ad Lilybæum, fusasque et
captas hostium naves, accepere.

LI. A Lilybæo consul, Hierone cum classe regia Sempro-
dimisso, relictoque prætore ad tuendam Siciliæ oram, nius Meli-
ipse in insulam Melitam, quæ a Karthaginiensibus tam capit.
tenebatur, trajecit. Advenienti Hamilcar, Gisgonis
filius, præfectus præsidii, cum paullo minus duobus
millibus militum, oppidumque cum insula traditur:
inde post paucos dies redditum Lilybæum, captivique
et a consule et a prætore, præter insignes nobilitate
viros, sub corona venierunt. Postquam ab ea parte
satis tutam Siciliam censebat consul, ad insulas Vul-
cani (quia fama erat, stare ibi Punicam classem)
trajecit: nec quisquam hostium circa eas insulas
inventus. Jam forte transmiserant ad vastandam
Italiæ oram: depopulatoque Vibonensi agro, urbem
etiam terrebant. Repetenti Siciliam consuli exscen-
sio hostium in agrum Vibonensem facta nunciatur:
literæque ab senatu de transitu in Italiam Hanni- Revocatur
balis, et, ut primo quoque tempore collegæ ferret in Italiam.
auxilium, missæ traduntur. Multis simul anxius
curis, exercitum, extemplo in naves inpositum, Ari-
minum supero mari misit: Sex. Pomponio legato
cum viginti quinque longis navibus Vibonensem
agrum maritimamque oram Italiæ tuendam adtri-
buit: M. Æmilio prætori quinquaginta navium clas- Ad colle-
sem explevit: ipse, compositis Siciliæ rebus, decem gam venit.
navibus oram Italiæ legens, Ariminum pervenit:

U.C. 534. inde cum exercitu suo profectus ad Trebiam flumen,
A.C. 218. collegæ conjungitur.

LII. Jani ambo consules, et quidquid Romanarum virium erat, Hannibali obpositum, aut illis eopiis defendi posse Romanum imperium, aut spem nullam aliam esse, satis declarabat. Tamen consul alter, equestri prælio uno et vulnere suo minutus, trahi rem malebat: recentis animi alter, eoque ferocior, nullam dilationem patiebatur. Quod inter Trebiam Padumque agri est, Galli tum incolebant; in duorum præpotentium populorum certamine, per ambiguum favorem, haud dubie gratiam victoris spectantes. Id Romani, ne quid modo moverent, æquo satis, Pœnus periniquo animo ferebat, ab Gallis ad eum se venisse ad liberandos eos, dictans. Ob eam iram, simul ut præda militem aleret, duo millia peditum et mille equites, Numidas plerosque, mixtos quosdam et Gallos, populari omnem deinceps agruum usque ad Padi ripas jussit. Egentes ope Galli, quum ad id dubios servassent animos, coacti ab auctoribus injuriæ ad vindices futuros declinant: legatisque ad consulem missis, auxilium Romanorum terræ, ob nimiam cultorum fidem in Romanos laboranti, orant. Cornelio nec caussa, nec tempus agendæ rei placebat: suspectaque ei gens erat, quum ob infida multa facinora, tum, ut alia vetustate obsolevissent, ob recentem Boiorum perfidiam. Sempronius contra, continendis in fide sociis maximum vinculum esse primos, qui eguisserint ope, defensos, censebat. Tum, collega cunctante, equitatum suum, mille peditum jaculatoribus ferme admixtis, ad defendendum Gallicum agrum trans-

Trebiam mittit. Ii, sparsos et incompositos, ad U.C. 534.
 hoc graves præda plerosque, quum inopinatos in- A.C. 218.
 vasissent, ingentem terrorem cædemque ac fugam Prœlium
 usque ad castra stationesque hostium fecere: unde equestre
 dubium. multitudine effusa pulsi, rursus subsidio suorum
 prœlium restituere. Varia inde pugna sequentes,
 quamquam ad extremum æquassent certamen, ma-
 jor tamen hostium Romanis fama victoriæ fuit.

LIII. Ceterum nemini omnium major justiorque,
 quam ipsi consuli, videri; gaudio efferri, *qua parte*
copiarum alter consul victus foret, ea se viciisse: resti-
tutos ac refectos militibus animos: nec quemquam esse, Sempro-
præter collegam, qui dilatam dimicationem vellet: eum, nius pug-
animo magis, quam corpore, ægrum, memoria vulneris dus.
næ cupi-
aciem ac tela horrere. Sed non esse cum ægro senes-
cendum. Quid enim ultra differri aut teri tempus?
Quem tertium consulem, quem alium exercitum exspec-
tari? Castra Karthaginensium in Italia, ac prope in
conspectu urbis esse: non Siciliam ac Sardiniam victis
ademtas, nec cis Iberum Hispaniam peti, sed solo pa-
trio terraque, in qua geniti forent, pelli Romanos.
Quantum ingemiscant, inquit, patres nostri, circa mæ-
nia Karthaginis bellare soliti, si videant nos, progeniem
suam, duos consules consularesque exercitus, in media
Italia paventes intra castra? Pœnum, quod inter Alpes
Apenninumque agri sit, suæ ditionis fecisse? Hæc ad-
 sidens ægro collegæ, hæc in prætorio prope concio-
 nabundus agere. Stimulabat et tempus propinquum
 comitiorum, ne in novos consules belluni differretur,
 et occasio in se unum vertendæ gloriæ, dum æger
 collega erat. Itaque, nequidquam dissentiente Cor-
 nelio, parari ad propinquum certamen milites jubet.
 Hannibal, quum, quid optimum foret hosti, cerne-

V. C. 534. ret, vix ullam spem habebat, temere atque impro-
 A. C. 218. vide quidquam consules acturos: quam alterius ingenium, fama prius, deinde re cognitum, percitum ac ferox sciret esse, ferociusque factum prospero cum prædatoribus suis certamine crederet; adesse gerendæ rei fortunam haud diffidebat: cuius ne quod prætermitteret tempus, sollicitus intentusque erat, dum tiro hostium esset miles, dum meliorem ex duabus inutilem vulnus faceret, dum Gallorum animi vigerent: quorum ingentem multitudinem sciebat segnius secuturam, quanto longius ab domo trahe-rentur. Quum ob hæc taliaque speraret propinquum certamen, et facere, si cessaretur, cuperet; speculatoresque Galli ad ea exploranda, quæ vellet, tutiores, quia in utrisque castris militabant, paratos pugnæ esse Romanos retulissent; locum insidiis circum-spectare Pœnus cœpit.

Locum
insidiis
Hannibal
circum-
spectat.

LIV. Erat in medio rivus, præaltis utrimque clausus ripis, et circa obsitus palustribus herbis et, quibus inculta ferme vestiuntur, virgultis vepribusque: quem ubi ad equites quoque tegendos satis latebrosum locum circumvectus ipse oculis perlustravit; *Hic erit locus*, Magoni fratri ait, *quem teneas*. *Delige centenos viros ex omni pedite atque equite; cum quibus ad me vigilia prima venias*. *Nunc corpora curare tempus est*. Ita prætorium niissum: mox cum delectis Mago aderat. *Robora virorum cer-no*, inquit Hannibal: sed, *ut et numero etiam, non animis modo, valeatis, singulis vobis norenos ex turmis manipulisque vestri similes eligite*: *Mago locum monstrabit, quem insideatis*. *Hostem cœcum ad has bellum artes habebitis*. Ita mille equitibus Magoni, mille Trebiam. peditibus dimisis, Hannibal prima luce Numidas

equites, transgressos Trebiam flumen, obequitare U. C. 534.
 jubet hostium portis, jaculandoque in stationes eli- A. C. 218.
 cere ad pugnam hostem: injecto deinde certamine,
 cedendo sensim citra flumen pertrahere. Hæc man-
 data Numidis: ceteris ducibus peditum equitumque
 præceptum, ut prandere omnes juberent: armatos
 deinde, instratisque equis, signum exspectare. Sem-
 pronius, ad tumultum Numidarum primum omnem
 equitatum, ferox ea parte virium, deinde sex millia
 peditum, postremo omnes copias ad destinatum jam
 ante consilio, avidus certaminis, eduxit. Erat forte
 brumæ tempus et nivalis dies in locis Alpibus Apen-
 ninoque interjectis, propinquitate etiam fluminum
 ac palodium prægelidis: ad hoc raptim eductis ho-
 minibus atque equis, non capto ante cibo, non ope-
 ulla ad arcendum frigus adhibita, nihil caloris in-
 erat: et quidquid auræ fluminis adpropinquabant,
 adflabat acrior frigoris vis. Ut vero refugientes Nu-
 midas insequentes aquam ingressi sunt, (et erat pec-
 toribus tenuis aucta nocturno imbris) tum utique
 egressis rigere omnibus corpora, ut vix armorum
 tenendorum potentia essent, et simul lassitudine
 procedente jam die, fame etiam deficere.

LV. Hannibal's interim miles, ignibus ante tentoria factis, oleoque per manipulos, ut mollirent artus, misso, et cibo per otium capto, ubi transgres-
 sos flumen hostes nunciatum est, alacer animis cor-
 poribusque arma capit, atque in aciem procedit.
 Baliares locat ante signa, levem armaturam, octo
 ferme millia hominum; dein graviorem armis pedi-
 tem, quod virium, quod roboris erat: in cornibus
 circumfudit decem millia equitum; et ab cornibus
 in utramque partem divisos elephantes statuit. Con-

U. C. 534. sul effusos sequentes equites, quum ab resistantibus
 A. C. 218. subito Numidis incauti exciperentur, signo receptui
 dato, revocatos circumdedit peditibus. Duodevi-
 ginti millia Romani erant, sociū nominis Latini
 viginti; auxilia præterea Cenomanorum: ea sola in
 fide manserat Gallica gens: his copiis concursum
 est. Prœlium a Baliaribus ortum est; quibus quum
 majore robore legiones obsisterent, deductæ propere
 in cornua leves armaturæ sunt: quæ res efficit, ut
 equitatus Romanus extemplo urgeretur: nam quum
 vix jam per se resisterent decem millibus equitum
 quatuor millia, et fessi plerisque integris, obruti
 sunt insuper velut nube jaculorum a Baliaribus con-
 jecta: ad hoc elephanti, eminentes ab extremis cor-
 nibus, (equis maxime non visu modo, sed odore in-
 solito territis) fugam late faciebant. Pedestrīs pu-
 gna par animis magis quam viribus erat; quas re-
 centes Pœnus, paullo ante curatis corporibus, in
 prœlium adtulerat: contra, jejuna fessaque corpora
 Romanis et rigentia gelu torpebant: restitissent ta-
 men animis, si cum pedite solum foret pugnatum.
 Sed et Baliares, pulso equite, jaculabantur in latera,
 et elephanti jam in medianum peditum aciem sese tu-
 lerant: et Mago Numidæque, simul latebras eorum
 inprovida præterlata acies est, exorti ab tergo in-
 gentem tumultum ac terrorem fecere. Tamen in tot
 circumstantibus malis mansit aliquamdiu innota
 acies, maxime præter spem omnium adversus ele-
 phantos: eos velites, ad id ipsum locati, verutis
 conjectis et avertere, et insecuri aversos sub cavidis,
 qua maxime molli cute vulnera accipiunt, fodie-
 bant.

LVI. Trepidantesque prope jam in suos conster-

natos media acie in extremam, ad sinistrum cornu, U. C. 534. adversus Gallos auxiliares agi jussit Hannibal. Ex- A. C. 218. templo haud dubiam fecere fugam: additus quoque novus terror Romanis, ut fusa auxilia sua viderunt.

Itaque, quum jam in orbem pugnarent, decem milia Vincuntur fermie hominum, quum alii evadere nequissent, Romani. media Afrorum acie, quæ Gallicis auxiliis firmata erat, cum ingenti cæde hostium perrupere: et, quum neque in castra reditus esset flumine interclusis, neque præ imibri satis decernere possent, qua suis opem ferrent, Placentiam recto itinere perrexere. Plures deinde in omnes partes eruptiones factæ; et, qui flumen petiere, aut gurgitibus absunti sunt, aut inter cunctationem ingrediendi ab hostibus obp: es- si: qui passim per agros fuga sparsi erant, vestigia cedentis sequentes agminis, Placentiam contendere: Placentiam aliis timor hostium audaciam ingrediendi flumen fe- fugiunt, cit, transgressique in castra pervenerunt. Inber nive mixtus, et intoleranda vis frigoris, et homines mul- tots, et jumenta, et elephantos prope omnes, absum- sit. Finis insequendi hostis Pœnis flumen Trebia fuit: et ita torpentes gelu in castra rediere, ut vix lætitiam victoriae sentirent. Itaque nocte inse- quenti, quum præsidium castrorum, et quod reli- quum ex magna parte militum erat, ratibus Tre- biam trajicerent, aut nihil sensere, obstrepente plu- via; aut, quia jam moveri præ lassitudine nequi- bant ac vulneribus, sentire sese dissimularunt: qui- etisque Pœnis, tacito agnione ab Scipione consule exercitus Placentiam est perductus: inde Pado tra- jectus Cremonam, ne duorum exercituum hibernis una colonia premeretur.

LVII. Romam tantus terror ex hac clade perla-

U. C. 534. *tus est, ut jam ad urbem crederent infestis signis*
 A. C. 218. *hostem venturum; nec quidquam spei aut auxilii*
 Romæ tre- *esse, quo portis mœnibusque vim arcerent.* *Uno*
 pidatio. *consule ad Ticinum victo, altero ex Sicilia revocato,*
duobus consulibus, duobus consularibus exercitibus vic-
tis, quos alios duces, quas alias legiones esse, quæ ar-
cessantur? Ita territis Sempronius consul advenit,
ingenti periculo per effusos passim ad prædandum
hostium equites (audacia magis, quam consilio aut
spe fallendi resistendive, si non falleret) transgres-
sus. Id quod unum maxime in præsentia desidera-
 Comitia batur, comitiis consularibus habitis, in hiberna red-
 consularia. *iit.* Creati consules Cn. Servilius et C. Flaminius.
 Ceterum ne hiberna quidem Romanis quieta erant,
vagantibus passim Numidis equitibus, et, qua his
inpeditiora erant, Celtiberis Lusitanisque. Omnes
 igitur clausi undique commeatus erant, nisi quos
 Pado naves subvehherent. Emporium prope Pla-
 centiam fuit, et opere magno munitum, et valido
 firmatum præsidio: ejus castelli obpugnandi spe
 cum equitibus ac levi armatura profectus Hannibal,
 quem plurimum in celando incepto ad effectum, spei
 habuisset, nocte adortus, non fecerit vigiles. Tan-
 tus repente clamor est sublatus, ut Placentiae quo-
 que audiretur. Itaque sub lucem cum equitatu con-
 sul aderat, jussis quadrato agmine legionibus sequi.
 Equestre prælium interim commissum: in quo,
 quia saucius Hannibal pugna excessit, pavore hosti-
 bus injecto, defensum egregie præsidium est. Pau-
 corum inde dierum quiete sumta, et vixdum satis
 percusso vulnere, ad Victumvias ire pergit obpug-
 nandas. Id emporium a Romanis Gallico bello fu-
 erat munitum: inde locum frequentaverant adcolæ

mixti undique ex finitimus populis; et tum terror po- U. C. 534.
pulationum eo plerosque ex agris compulerat. Hu- A. C. 218.
jus generis multitudo, fama in pigre defensi ad Pla-
centiam præsidii accensa, armis adreptis obviam
Hannibali procedit. Magis agmina, quam acies, in
via concurrerunt; et, quum ex altera parte nihil,
præter inconditam turbam, esset, in altera et dux
militi, et duci fidens miles, ad triginta quinque mil-
lia hominum a paucis fusa. Postero die, ditione
facta, præsidium intra mœnia accepere: jussique
arma tradere quum dicto paruissent, signum repente
victoribus datur, ut tamquam vi captam urbem di-
riperent: neque ulla, quæ in tali re memorabilis
scribentibus videri solet, prætermissa clades est:
adeo omnis libidinis, crudelitatisque, et inhumanæ
superbiæ editum in miseros est exemplum. Hæ fu-
ere hibernæ expeditiones Hannibalis.

LVIII. Haud longis inde temporibus, dum into-
lerabilia frigora erant, quies militi data est: et ad
prima ac dubia signa veris profectus ex hibernis,
in Etruriam dicit, eam quoque gentem, sicut Gal-
los Liguresque, aut vi aut voluntate adjuncturus.

Transeuntem Apenninum adeo atrox adorta tem- Transitum
pestas est, ut Alpium fœditatem prope superaverit. Apennini
tentat Han-
Vento mixtus imber quum ferretur in ipsa ora, pri- nabal.
mo, quia aut arma omittenda erant, aut contra eni-
tentes vortice intorti adfligebantur, constitere: dein,
quum jam spiritum includeret, nec reciprocare ani-
mam sineret, aversi a vento parumper condescere.
Tum vero ingenti sono cœlum strepere, et inter hor-
rendos fragores micare ignes: capti auribus et oculis
metu omnes torpere. Tandem, effuso imbre,
quum eo magis accensa vis venti esset, ipso illo, quo

U. C. 534. deprehensi erant, loco castra ponere necessarium
 A. C. 218. visum est. Id vero laboris velut de integro initium fuit: nam nec explicare quidquam, nec statuere poterant: nec, quod statutum esset, manebat, omnia percedente vento et rapiente: et mox aqua levata vento, quum super gelida montium juga concreta esset, tantum nivosæ grandinis dejecit, ut, omnibus omissis, procumberent homines, tegminibus suis magis obruti, quam tecti: tantaque vis frigoris insecura est, ut, ex illa miserabili hominum jumentorumque strage quum se quisque adtollere ac levare vellet, diu nequiret, quia, torpentibus rigore nervis, vix flectere artus poterant: deinde, ut tandem agitando sese mouere ac receperere animos, et raris locis ignis fieri est cœptus, ad alienam opem quisque inops tendere. Biduum eo loco, velut obsessi, mansere: multi homines, multa jumenta, elephanti quoque ex his, qui prœlio ad Trebiam facto superfuerant, septem absunti.

Regreditur. **LIX.** Degressus Apennino retro ad Placentiam castra movit, et ad decem millia progressus condit: postero die duodecimi millia peditum, quinque equitum adversus hostem ducit. Nec Senipronius consul (jam enim redierat ab Roma) detractavit certamen: atque eo die tria millia passuum inter bina castra fuere. Postero die ingentibus animis, vario eventu, pugnatum est: primo concursu adeo res Romana superior fuit, ut non acie vincerent solum, sed pulsos hostes in castra persequerentur; mox castra quoque obpugnarent. Hannibal, paucis propugnatoribus in vallo portisque positis, ceteros confertos in media castra recepit, intentosque signum ad erumpendum spectare jubet. Jam nona fer-

Pugna inter Sempronium et Hannibalem.

me diei hora erat, quum Romanus, nequidquam fatigato milite, postquam nulla spes erat potiundi castis, signum receptui dedit. Quod ubi Hannibal accepit, laxatamque pugnam et recessum a castris vidi, extemplo equitibus dextra lævaque emissis in hostem, ipse cum peditum robore medius castris erupit: pugna raro ulla magis sæva, et cum utriusque partis pernicie clarior fuisse, si extendi eam dies in longum spatium sivisset. Nox accensum ingentibus animis prælrium diremit: itaque acrior concursus fuit, quam cædes; et, sicut æquata ferme pugna erat, ita clade pari discessum est: ab neutra parte sexcentis plus peditibus, et dimidium ejus equitum cecidit. Sed major Romanis, quam pro numero, jactura fuit: quia equestris ordinis aliquot, et tribuni militum quinque, et præfecti sociorum tres, sunt interfici. Secundum eam pugnam Hannibal in Ligures, Sempronius Lucam concessit. Venienti in Ligures Hannibali per insidias intercepti duo quæstores Romani, C. Fulvius et L. Lucretius, cum duobus tribunis militum, et quinque equestris ordinis senatorum ferme liberis, quo magis ratam fore cum his pacem societatemque crederet, traduntur.

LX. Dum hæc in Italia geruntur, Cn. Cornelius Res gestæ Scipio, in Hispaniam cum classe et exercitu missus, a Cn. Scipione in quum, ab ostio Rhodani profectus, Pyrenæosque Hispania. montes circumvectus, Emporiis adpulisset classem, exposito ibi exercitu, orsus a Lacetanis, omnem oram usque ad Iberum flumen, partim renovandis societatibus, partim novis instituendis, Romanæ ditioñis fecit. Inde conciliata clementiæ fama, non ad maritimos modo populos, sed, in mediterraneis quo-

U.C. 534. que ac montanis, ad ferociores jam gentes valuit :
 A.C. 218. nec pax modo apud eos, sed societas etiam armorum, parata est : validæque aliquot auxiliorum cohortes ex iis conscriptæ sunt. Hannonis cis Iberum provincia erat: eum reliquerat Hannibal ad regionis ejus præsidium : itaque prius, quam alienarentur omnia, obviam eundum ratus, castris in conspectu hostium positis, in aciem eduxit : nec Romano differendum certamen visum : quippe qui sciret, cum Hannone et Hasdrubale sibi dimicandum esse; malletque adversus singulos separatim, quam adversus duos simul, rem gerere. Nec magni certaminis ea dimicatio fuit: sex millia hostium cæsa, duo capta cum præsidio castrorum : nam et castra expugnata sunt, atque ipse dux cum aliquot principibus capiuntur : et Scisis, propinquum castris oppidum, expugnatur. Ceterum præda oppidi parvi pretii rerum fuit ; supellex barbarica, ac vilium mancipiorum : castra militem ditavere ; non ejus modo exercitus, qui victus erat, sed et ejus, qui cum Hannibale in Italia militabat, omnibns fere caris rebus (ne gravia inpedimenta ferentibus essent) citra Pyrenæum relictis.

LXI. Priusquam certa hujus cladis fama accidet, transgressus Iberum Hasdrubal cum octo milibus peditum, mille equitum, tamquam ad primum adventum Romanorum obcursurus, postquam perditas res ad Scissim amissaque castra accepit, iter ad mare convertit. Haud procul Tarracone classicos milites navalesque socios, vagos palantesque per agros, (quod ferme fit, ut secundæ res negligentiam creent) equite passim dimisso, cum magna cæde, majore fuga ad naves compellit : nec diutius circa

ea loca morari ausus, ne a Scipione obprimeretur, U. C. 534.
 trans Iberum sese recepit. Et Scipio, raptim ad fa- A. C. 218.
 mam novorum hostium agmine acto, quum in pau-
 cos præfectos navium animadvertisset, præsidio Tar-
 racone modico relicto, Emporias cum classe rediit.
 Vixdum digresso eo, Hasdrubal aderat: et, Ilerge-
 tum populo, qui obsides Scipioni dederat, ad defec-
 tionem impulsu, cum eorum ipsorum juventute agros
 fidelium Romanis sociorum vastat. Excito deinde
 Scipione hibernis, toto cis Iberum rursus cedit agro.
 Scipio, relictam ab auctore defectionis Ilergetum
 gentem quum infesto exercitu invasisset, compulsis
 omnibus Athanagiam, urbem (quæ caput ejus po-
 puli erat) circumsedidit: intraque dies paucos, pluri-
 bus quam ante obsidibus imperatis, Ilergetes, pecu-
 nia etiam multatos, in jus ditionemque recepit. In-
 de in Ausetanos prope Iberum, socios et ipsos Pœ-
 norum, procedit: atque, urbe eorum obsessa, Lace-
 tanos auxilium finitimis ferentes nocte, haud procul
 jam urbe, quum intrare vellent, exceptit insidiis.
 Cæsa ad duodecim millia: exuti pene omnes armis,
 domos passim palantes per agros diffugere; nec
 obsessos alia ulla res, quam iniqua obpugnantibus
 hiems, tutabatur: triginta dies obsidio fuit: per
 quos raro umquam nix minus quatuor pedes alta ja-
 cuit: adeoque pluteos ac vineas Romanorum ope-
 ruerat, ut ea sola, ignibus aliquoties conjectis ab
 hoste, etiam tutamentum fuerit. Postremo quum
 Anusitus princeps eorum ad Hasdrubalem profu-
 gisset, viginti argenti talentis pacti deduntur. Tar-
 ráconem in hiberna redditum est.

LXII. Romæ aut circa urbem multa ea hieme Prodigia.
 prodigia facta: aut (quod evenire solet, motis semel

U. C. 534. in religionem animis) multa nunciata, et temere
 A. C. 218. credita sunt: in quîs ingenuum infantem semestrem
 in foro olitorio triumphum clamasse: et foro boario
 bovem in tertiam contignationem sua sponte escen-
 disse: atque inde tumultu habitatorum territum sese
 dejecisse: et navium speciem de cœlo adfulsisse, et
 ædem Spei, quæ est in foro olitorio, fulmine ictam:
 et Lanuvii hastam se commovisse: et corvum in
 ædem Junonis devolasse, atque in ipso pulvinario
 consedisse: et in agro Amiternino multis locis ho-
 minum specie procul candida veste visos, nec cum
 ullo congressos: et in Piceno lapidibus pluisse; et
 Cære sortes extenuatas: et in Gallia lupum vigili
 Procurata. gladium e vagina raptum abstulisse. Ob cetera pro-
 digia libros adire decemviri jussi: quod autem lapi-
 dibus pluisset in Piceno, novemdiale sacrum edic-
 tum, et subinde aliis procurandis prope tota civitas
 operata fuit. Jam primum omnium urbs lustrata
 est, hostiæque majores, quibus editum est, Diis
 cæsæ; et donum ex auri pondo quadraginta Lanu-
 vim ad Junonis portatum est; et signum æneum
 matronæ Junoni in Aventino dedicaverunt; et lec-
 tisternium Cære, ubi sortes adtenuatæ erant, impe-
 ratum; et supplicatio Fortunæ in Algido; Romæ
 quoque et lectisternium Juventati, et supplicatio
 ad ædem Herculis nominatim; deinde universo po-
 pulo circa omnia pulvinaria, indicta: et Genio ma-
 jores hostiæ cæsæ quinque; et C. Atilius Serranus
 prætor vota suscipere jussus, si in decem annos res-
 publica eodem stetisset statu. Hæc procurata vota-
 que ex libris Sibyllinis, magna ex parte levaverant
 religione animos.

LXIII. Consuluni designatorum alter Flaminius,

cui eæ legiones, quæ Placentiæ hibernabant, sorte U. C. 534.
 evenerant, edictum et literas ad consulem misit, ut A. C. 218.
 is exercitus Idibus Martiis Arimini adesset in cas-
 tris. Huic in provincia consulatum inire consilium Temeritas
 erat, memori veterum certaminum cum Patribus; et adrogan-
 quæ tribunus plebis, et quæ postea consul, prius de nii.
 consulatu, qui abrogabatur, dein de triumpho ha-
 buerat: invisus etiam Patribus ob novam legem,
 quam Q. Claudius tribunus plebis adversus senatum
 uno Patrum adjuvante C. Flaminio, tulerat; ne quis
 senator, quive senatoris pater fuisset, maritimam
 navem, quæ plus quam trecentarum amphorarum
 esset, haberet. Id satis habitum ad fructus ex agris
 vectandos: quæstus omnis Patribus indecorus visus.
 Res, per summam contentionem acta, invidiam apud
 nobilitatem suasori legis Flaminio, favorem apud
 plebem alterumque inde consulatum, peperit. Ob
 hæc ratus auspiciis ementiendis, Latinarumque fe-
 riarum mora, et consularibus aliis impedimentis re-
 tenturos se in urbe, simulato itinere privatus clam
 in provinciam abiit. Ea res, ubi palam facta est, Clam in
 novam insuper iram infestis jam ante Patribus mo- provinciam
 vit: Non cum senatu modo, sed jam cum Diis inmor- abit.
 talibus, C. Flaminium bellum gerere: consulem ante
 inauspicato factum revocantibus ex ipsa acie Diis at-
 que hominibus non paruisse; et nunc conscientia spre-
 torum et Capitolium et sollemnem votorum nuncupationem fugisse: ne die initi magistratus Jovis optimi
 maximi templum adiret: ne senatum, invisus ipse, et
 sibi uni invisum, videret consuleretque: ne Latinas in-
 diceret, Jovique Latiari sollemne sacrum in monte fa-
 ceret: ne, auspicato profectus in Capitolium ad vota
 nuncupanda, paludatus inde cum lictoribus ad provin-

U. C. 534. *ciam iret : lixæ modo sine insignibus, sine lictoribus,*

A. C. 218. *profectum clam, furtim, haud aliter quam si exsilii caussa solum vertisset : magis pro majestate videlicet imperii Arimini, quam Romæ, magistratum initurum, et in deversorio hospitali, quam apud penates suos, prætextam sumturum.* Revocandum universi retrahendumque censuerunt ; et cogendum omnibus prius præsentem in Deos hominesque fungi officiis, quam

Frustra re-ad exercitum et in provinciam iret. In eam legationem (legatos enim mitti placuit) Q. Terentius et

M. Antistius profecti, nihilo magis eum moverunt, quam priori consulatu literæ moverant ab senatu

U. C. 535. missæ. Paucos post dies magistratum init, immo-

A. C. 217. *lantique ei vitulus jam ictus e manibus sacrificantium sese quum proripuisset, multos circumstantes cruento respersit. Fuga procul etiam major apud ignaros, quid trepidaretur, et concursatio fuit : id a plerisque in omen magni terroris acceptum. Legionibus inde duabus a Sempronio prioris anni consule, duabus a C. Atilio prætore acceptis, in Etruriā per Apennini tramites exercitus duci est cœptus.*

EPITOME LIBRI XXII.

HANNIBAL, per continuas vigilias in paludibus oculo amisso, venit in Etruriam: per quas paludes quatriduo et tribus noctibus sine ulla requie iter fecit. C. Flaminius consul, homo temerarius, contra auspicia profectus, signis militaribus effossis, quæ tolli non poterant, et ab equo, quem concenderat, per caput devolutus, insidiis ab Hannibale circumventus, ad Trasimenum lacum cum exercitu cæsus est. Sex millia, quæ eruperant, fide ab Maharbale data, perfidia Hannibalis vincta sunt. Quum ad nuncium cladis Romæ luctus esset, duæ matres, ex insperato receptis filiis, gaudio mortuæ sunt. Ob hanc cladem ex Sibyllinis libris versacrum votum. Quum deinde Q. Fabius Maximus dictator, adversus Hannibalem missus, nollet acie cum eo configere, ne, contra ferocem tot victoriis hostem, territum adversis præliis militem pugnæ committeret, et, obponendo se tantummodo, conatus Hannibalis impeditret: M. Minucius magister equitum, ferox et temerarius, criminando dictatorem tamquam segnem et timidum, effecit, ut populi jussu æquaretur ei cum dictatore imperium; divisoque exercitu, quum iniquo loco conflixisset, et in maximo discrimine legiones ejus essent, superveniente cum exercitu Fabio Maximo discrimine liberatus est: quo beneficio victus castra cum eo junxit, et patrem eum salutavit; idemque facere milites jus-

sit. *Hannibal, vastata Campania, inter Casilinum oppidum et Calliculam montem a Fabio clausus, sarmenis ad cornua boum adligatis et incensis, præsidium Romanorum, quod Calliculam insidebat, fugavit: et sic transgressus est saltum: idemque Q. Fabii Maximi dictoris, quem circumposita ureret, agro pepercit, ut illum tamquam proditorem suspectum ficeret. Æmilio deinde Paullo et Terentio Varrone consulibus et ducibus, cum maxima clade adversus Hannibalem ad Cannas pugnatum est: cæsaque eo prælio Romanorum quadraginta quinque millia, cum Paullo consule et senatoribus octoginta, consularibus atque prætoriis aut ædiliciis triginta. Post quam cladem quem a nobilibus adolescentibus propter desperationem consilium de relinquenda Italia iniretur, P. Cornelius Scipio tribunus militum, qui postea Africanus nuncupatus est, stricto super capita deliberantium ferro, juravit, se pro hoste habiturum eum, qui in verba sua non jurasset; effecitque, ut omnes minime relictum iri a se Italianam jurejurando adstringerentur. Præterea trepidationem urbis et luctum, et res in Hispania meliore eventu gestas continet. Opimia et Floronia, Vestales virgines, incesti damnatae sunt. Propter paucitatem vero militum servorum octo millia armata sunt: captivi, quem potestas esset redimenuli, redemti non sunt. Varroni obriam itum est, et gratiæ actæ, quod de republica non desperasset.*

T. LIVII PATAVINI

LIBER XXII.

JAM ver adpetebat, quum Hannibal ex hibernis U.C. 535.
movit, et nequidquam ante conatus transcendere A.C. 217.
Apenninum intolerandis frigoribus, et cum ingenti Hannibal
periculo moratus ac metu. Galli, quos prædæ po- movet ex
pulationumque conciverat spes, postquam pro eo, ut
ipsi ex alieno agro raperent agerentque, suas terras
sedem belli esse, premique utriusque partis exerci-
tuum hibernis viderunt; verterunt retro ad Hannibalem ab Romanis odia: petitusque sæpe principum insidiis, ipsorum inter se fraude, eadem levitate, qua consenserant, consensum indicantium, servatus erat; et, mutando nunc vestem, nunc tegumenta capitis, errore etiam sese ab insidiis muni-
erat. Ceterum hic quoque ei timor caussa fuit mat-
turius movendi ex hibernis. Per idem tempus Cn.
Servilius consul Romæ Idibus Martiis magistratum iniit. Ibi quum de republica retulisset, redintegrata in C. Flaminium invidia est. *Duos se consules cre- Querelæ
asse, unum habere: quod enim illi justum imperium, Romano-
rum de
quod auspicium esse? Magistratus id a domo, publicis Flaminio.*
privatisque penatibus, Latinis feriis actis, sacrificio in monte perfecto, votis rite in Capitolio nuncupatis, secum ferre: nec privatum auspicia sequi, nec sine aus- piciis profectum in externo ea solo nova atque integra

U. C. 535. *concipere posse.* Augebant metum prodigia ex pluri-
 A. C. 217. bus simul locis nunciata : in Sicilia militibus ali-
 Prodigia. quot spicula, in Sardinia autem in muro circum-
 eunti vigilias equiti scipionem, quem manu tenuerat,
 arsisse, et litora crebris ignibus fulsisse, et scuta
 duo sanguine sudasse, et milites quosdam ictos ful-
 minibus, et solis orbem minui visum : et Præneste
 ardentes lapides cœlo cecidisse : et Arpis parmas in
 cœlo visas, pugnantemque cum luna solem : et Ca-
 penæ duas interdiu lunas ortas : et aquas Cæretes
 sanguine mixtas fluxisse ; fontemque ipsum Hercu-
 lis cruentis manasse sparsum maculis : et in Antiati
 metentibus cruentas in corbem spicas cecidisse : et
 Faleriis cœlum findi velut magno hiatu visum ; qua-
 que patuerit, ingens lumen effulsiisse : sortes sua
 sponte adtenuatas, unamque excidisse, ita scriptam :
MAVORS TELUM SUUM CONCUTIT: et per idem tem-
 pus Romæ signum Martis Appia via ad simulacra
 luporum sudasse : et Capuæ speciem cœli ardantis
 fuisse, lunæque inter imbreui cadentis. Inde minori-
 bus etiam dictu prodigiis fides habita: capras la-
 natas quibusdam factas, et gallinam in marem, gal-
 lum in feminam sese vertisse. His, sicut erant nun-
 ciata, expositis, auctoribusque in curiam introductis,
 Procurata. consul de religione Patres consuluit. Decretum, ut
 ea prodigia, partim majoribus hostiis, partim lac-
 tentibus, procurarentur : et uti supplicatio per tri-
 duum ad omnia pulviaria haberetur. Cetera, quum
 decemviri libros inspexissent, ut ita fierent, quem-
 admodum cordi esse Divi carminibus præfarentur.
 Decemvirorum monitu decretum est, Jovi primum
 donum fulmen aureum pondo quinquaginta fieret ;
 Junoni Minervæque ex argento dona darentur : et

Junoni Reginæ in Aventino, Junonique Sospitæ La- U. C. 535.
A. C. 217.
nuvii majoribus hostiis sacrificaretur ; matronæque, pecunia conlata, quantum conferre cuique commodum esset, donum Junoni Reginæ in Aventinum ferrent, lectisterniumque fieret ; quin et libertinæ ut ipsæ, unde Feroniæ donum daretur, pecuniam pro facultatibus suis conferrent. Hæc ubi facta, decemviri Ardeæ in foro majoribus hostiis sacrificarunt : postremo Decembri jam mense ad ædem Saturni Romæ inmolatum est, lectisterniumque imperatum, (et eum lectum senatores straverunt) et convivium publicum ; ac per urbem Saturnalia diem ac noctem clamatum, populusque eum diem festum habere ac servare in perpetuum jussus.

II. Dum consul placandis Romæ Diis trahendo-
que delectu dat operam, Hannibal, profectus ex hi- Hannibal
bernis, quia jam Flaminium consulem Arretium per- Etruriam
venisse fama erat, quum aliud longius, ceterum com- petit.
modius, ostenderetur iter, propiorem viam per paludem petit, qua fluvius Arnus per eos dies solito magis inundaverat. Hispanos et Afros, (id omne veterani erat robur exercitus) admixtis ipsorum impedimentis, necubi consistere coactis necessaria ad usus deessent, primos ire jussit : sequi Gallos, ut id agminis medium esset ; novissimos ire equites : Magonem inde cum expeditis Numidis cogere agmen, maxime Gallos, si tædio laboris longæque viæ (ut est mollis ad talia gens) dilaberentur aut subsistarent, cohidentem. Primi, qua modo præirent du- Molestum
ces per præaltas fluvii ac profundas voragini, hau- iter per
sti pene limo inmergentesque se, tamen signa seque- paludes.
bantur. Galli neque sustinere se prolapsi, neque adsurgere ex voraginibus poterant ; aut corpora ani-

U.C. 535. mis, aut animos spe sustinebant; alii fessa ægre
 A.C. 217. trahentes membra; alii, ubi semel victis tædio ani-
 mis procubuisserunt, inter jumenta, et ipsa jacentia
 passim, morientes: maximeque omnium vigiliæ
 conficiebant, per quatriduum jam et tres noctes to-
 leratæ. Quum, omnia obtinenteribus aquis, nihil, ubi
 in sicco fessa sternerent corpora, inveniri posset,
 cumulatis in aquas sarcinis insuper incumbebant:
 jumentorum itinere toto prostratorum passim acervi
 tantum, quod exstaret aqua, quærerentibus ad quietem
 parvi temporis necessarium cubile dabant. Ipse
 Hannibal, æger oculis ex verna primum intemperie
 variante calores frigoraque, elephanto, qui unus su-
 perfuerat, quo altius ab aqua exstaret, vectus; vigi-
 liis tandem et nocturno humore palustriique cœlo
 gravante caput, et quia medendi nec locus nec tem-
 pus erat, altero oculo capitur.

III. Multis hominibus jumentisque fœde amissis,
 quum tandem de paludibus emersisset, ubi primum
 in sicco potuit, castra locat: certumque per præmis-
 sos exploratores habuit, exercitum Romanum circa
 Arretii mœnia esse: consulis deinde consilia atque
 animum, et situm regionum, itineraque, et copias
 ad commeatus expediendos, et cetera, quæ cognosse
 in rem erat, summa omnia cum cura inquirendo ex-
 sequebatur. Regio erat in primis Italiae fertilis, E-
 trusci campi, qui Fæsulas inter Arretiumque jacent,
 frumenti ac pecoris et omnium copia rerum opu-
 lenti. Consul ferox ab consulatu priore, et non
 Flaminii cos. ferocia. modo legum ac Patrum majestatis, sed ne Deorum
 quidem satis metuens. Hanc insitam ingenio ejus
 temeritatem fortuna prospero civilibus bellicisque
 rebus successu aluerat. Itaque satis adparebat, nec

D eos nec homines consulentem, ferociter omnia ac U.C. 535.
 præpropere acturum : quoque pronior esset in vita
 sua, agitare eum atque irritare Poenus parat : et,
 lœva relicto hoste, Fæsulas petens, medio Etruriæ
 agro prædatum profectus, quantam maximam vasti-
 tatem potest, cædibus incendiisque consuli procul
 ostendit. Flaminius, qui ne quieto quidem hoste
 ipse quieturus erat, tum vero, postquam res socio-
 rum ante oculos prope suos ferri agique vidit, suum
 id dedecus ratus, per mediam jam Italiam vagari
 Pœnum, atque, obstante nullo, ad ipsa Romana
 mœnia ire obpugnanda ; ceteris omnibus in consilio
 salutaria magis, quam speciosa, suadentibus, *colle-*
gam exspectandum, ut conjunctis exercitibus, communi
animo consilioque rem gererent ; interim equitatu aux-
iliisque levium armorum ab effusa prædandi licentia
hostem cohibendum ; iratus se ex consilio proripuit,
 signumque simul itineris pugnæque proposuit. *Quin*
immo Arretii ante mœnia sedeamus, inquit ; hic enim
patria et penates sunt. Hannibal emissus e manibus
 perpopuletur Italiam, vastandoque et urendo omnia ad
 Romana mœnia perveniat ; nec ante nos hinc moveri-
 mus, quam, sicut olim Camillum ab Feiis, C. Flami-
 nium ab Arretio Patres adciverint. Hæc simul incre-
 pans, quum ocios signa convelli juberet, et ipse in
 equum insiluisse, equus repente conruit, consulem-
 que lapsum super caput effundit. Territis omnibus, Ex equo
 qui circa erant, velut fœdo omne incipiendæ rei, prolabitur.
 insuper nunciatur, signum, omni vi moliente signi- Signum
 fero, convelli nequire. Conversus ad nuncium, Num ^{convelli}
 literas quoque, inquit, ab senatu aduers, quæ me rem
 gerere retent ? Abi, nuncia, signum effodiunt, si ad
 convellendum manus præ metu obtorpuerint. Incedere

U. C. 535. inde agmen cœpit: primoribus, super quam quod
 A. C. 217. dissenserant a consilio, territis etiam dupli prodi-
 gio; milite in vulgus lato ferocia ducis, quum spem
 magis ipsam, quam caussam spei, intueretur.

Pugna ad
Trasime-
num.

IV. Hannibal, quod agri est inter Cortonam ur-
 bem Trasimenumque lacum, omni clade belli per-
 vastat, quo magis iram hosti ad vindicandas socio-
 rum injurias acuat. Et jam pervenerant ad loca in-
 sidiis nata, ubi maxime montes Cortonenses Trasi-
 menu subit: via tantum interest perangusta, velut
 ad id ipsum de industria relicto spatio: deinde paul-
 lo latior patescit campus, inde colles adsurgunt.
 Ibi castra in aperto locat, ubi ipse cum Afris modo
 Hispanisque consideret. Baliares ceteramque levem
 armaturam post montes circumducit: equites ad ip-
 sass fauces saltus, tumulis apte tegentibus, locat; ut,
 ubi intrassent Romani, objecto equitatu, clausa om-
 nia lacu ac montibus essent. Flaminius quum pri-
 die solis occasu ad lacum pervenisset, inexplorato,
 postero die, vix dum satis certa luce, angustiis supe-
 ratis, postquam in patentiorem campum pandi ag-
 men cœpit, id tantum hostium, quod ex adverso erat,
 conspexit: ab tergo et super caput decepere insidiæ.
 Pœnus ubi, id quod petierat, clausum lacu ac mon-
 tibus et circumfusum suis copiis habuit hostem, sig-
 num omnibus dat simul invadendi: qui ubi, qua
 euique proximum fuit, decucurrere, eo magis Ro-
 manis subita atque improvisa res fuit, quod orta ex
 lacu nebula campo, quam montibus, densior sede-
 rat, agminaque hostium ex pluribus vallibus ipsa
 inter se satis conspecta, coque magis pariter decu-
 currerunt. Romanus clamore prius undique orto,
 quam satis cerneret, se circumventum esse sensit;

et ante in frontem lateraque pugnari cœptum est, U.C. 535.
quam satis instrueretur acies, aut expediri arma,
stringique gladii possent. A.C. 217.

V. Consul, perculis omnibus, ipse satis, ut in
trepida re, inpavidus, turbatos ordines, vertente se
quoque ad dissonos clamores, instruit, ut tempus
locusque patitur; et, quacumque adire audirique
potest, adhortatur, ac stare et pugnare jubet; *nec enim inde votis aut imploratione Deum, sed vi ac virtute, evadendum esse.* *Per medias acies ferro viam fieri: et, quo timoris minus sit, eo minus ferme periculi esse.* Ceterum præ strepitu ac tumultu nec consilium nec imperium accipi poterat: tantumque abberat, ut sua signa atque ordinem et locum nosceret miles, ut vix ad arma capienda aptandaque pugnæ
competeret animus: obprimerenturque quidam, onerati magis his, quam tecti: et erat in tanta caligine major usus aurium, quam oculorum. Ad gemitus vulnerum ictusque corporum aut armorum, et mixtos strepentium paventiumque clamores, circumferebant ora oculosque. Alii fugientes pugnantium globo inlati hærebant: alios redeentes in pugnam avertebat fugientium agmen. Deinde, ubi in omnes partes nequidquam impetus capti, et ab lateribus montes ac lacus, a fronte et ab tergo hostium acies claudebat, adparuitque, nullam, nisi in dextra ferroque, salutis spem esse; tum sibi quisque dux adhortatorque factus ad rem gerendam, et nova de integro pugna exorta est; non illa ordinata per principes hastatosque ac triarios, nec ut pro signis antesignani, post signa alia pugnaret acies; nec ut in sua legione miles, aut cohorte, aut manipulo esset. Fors congregabat, et animus suus cuique ante

U. C. 535. aut post pugnandi ordinem dabat: tantusque fuit
 A. C. 217. ardor armorum, adeo intentus pugnæ animus, ut
 Terræ eum motum terræ, qui multarum urbium Italiae
 motum magnas partes prostravit, avertitque cursu rapido
 nemo amnes, mare fluminibus invexit, montes lapsu in-
 pugnan- genti proruit, nemo pugnantium senserit.
 tit.

VI. Tres ferme horas pugnatum est, et ubique atrocity: circa consulem tamen acrior infestiorque pugna est. Eum et robora virorum sequebantur, et ipse, quacumque in parte premi ac laborare senserat suos, impigre ferebat opem; insignemque armis et hostes summa vi petebant, et tuebantur cives: donec Insuber eques (Ducario nomen erat) facie quoque noscitans, *Consul, en, inquit, hic est, popularibus suis; qui legiones nostras cecidit, agrosque et urbem est depopulatus. Jam ego hanc victimam manibus per-* emtorum fæde civium dabo: subditisque calcaribus equo, per confertissimam hostium turbam inpetum facit: obtruncatoque prius armigero, qui se infesto venienti obviam objecerat, consulem lancea transfixit: spoliare cupientem triarii objectis scutis arcere. Magnæ partis fuga inde primum cœpit: et jam nec lacus, nec montes obstabant pavori: per omnia arta præruptaque velut cæci evadunt: armaque et viri super alium allii præcipitantur. Pars magna, ubi locus fugæ deest, per prima vada paludis in aquam progressi, quoad capitibus humerisque extare possunt, sese immergunt: fuere, quos inconsultus pavor nando etiam capessere fugam impulerit. Quæ ubi immensa ac sine spe erat, aut deficientibus animis hauriebantur gurgitibus, aut nequidquam fessi vada retro ægerrime repetebant, atque ibi ab ingressis aquam hostium equitibus passim trucidæ-

Mors Flaminii.

Fugiunt Romani.

bantur. Sex millia ferme primi agminis, per ad- U.C. 535.
 versos hostes eruptione in pigre facta, ignari om- A.C. 217.
 nium, quæ post se agerentur, ex saltu evasere : et,
 quum in tumulo quodam constitissent, clamorem
 modo ac sonum armorum audientes, quæ fortuna
 pugnæ esset, neque scire, nec perspicere præ cali-
 gine poterant. Inclinata denique re, quum incandes-
 cente sole dispulsa nebula aperuisset diem, tum li-
 quida jam luce montes campique perditas res stra-
 tamque ostendere fœde Romanam aciem : itaque,
 ne in conspectos procul inmitteretur eques, sublatis
 raptim signis, quam citatissimo poterant agmine,
 sese abripuerunt. Postero die, quum super cetera
 extrema fames etiam instaret, fidem dante Mahar-
 bale, qui cum omnibus equestribus copiis nocte con-
 secutus erat, si arma tradidissent, abire cum singulis
 vestimentis passurum, sese dediderunt : quæ Punica
 religione servata fides ab Hannibale est, atque in
 vincula omnes conjecit.

VII. Hæc est nobilis ad Trasimenum pugna, at-
 que inter paucas memorata populi Romani clades.
 Quindecim millia Romanorum in acie cæsa sunt; Numerus
 decem millia, sparsa fuga per omnem Etruriam, di-
 versis itineribus urbem petiere. Mille quingenti ho-
 stium in acie, multi postea utrimque ex vulneribus
 periere. Multiplex cædes utrimque facta traditur
 ab aliis. Ego, præterquam quod nihil haustum ex
 vano velim, quo nimis inclinant ferme scribentium
 animi, Fabium æqualem temporibus hujusce belli
 potissimum auctorem habui. Hannibal, captivorum
 qui Latini nominis essent, siue pretio dimisis, Ro-
 manis in vincula datis, segregata ex hostium coacer-
 vatorum cumulis corpora suorum quuni sepeliri jus-

U. C. 535. sisset, Flaminii quoque corpus, funeris caussa mag-
 A. C. 217. na cum cura inquisitum, non invenit. Romæ, ad
 Romæ magnus primum nuncium cladis ejus, cum ingenti terrore
 terror. ac tumultu concursus in forum populi est factus.

Matronæ vagæ per vias, quæ repens clades adlata,
 quæve fortuna exercitus esset, obvios percunctan-
 tur: et quum frequentis concionis modo turba in
 comitium et curiam versa magistratus vocaret; tan-
 dem haud multo ante solis occasum M. Pomponius
 prætor, *Pugna*, inquit, *magna victi sumus*: et, quam-
 quam nihil certius ex eo auditum est, tamen alias
 ab alio inpleti rumoribus domos referunt, *consulem*
cum magna parte copiarum cæsum: *superesse paucos*,
aut fuga passim per Etruriam sparsos, aut captos ab
hoste. Quot casus exercitus victi fuerant, tot in
 curas dispertiti eorum animi erant, quorum propin-
 qui sub C. Flaminio consule meruerant, ignoran-
 tium, quæ cujusque suorum fortuna esset: nec quis-
 quam satis certum habet, quid aut speret, aut timeat.
 Postero, ac deinceps aliquot diebus, ad portas major
 prope mulierum, quam virorum, multitudo stetit,
 aut suorum aliquem, aut nuncios de his obperiens:
 circumfundebanturque obviis seiscitantes; neque a-
 velli, utique ab notis, prius, quam ordine omnia in-
 quisissent, poterant. Inde varios vultus digredien-
 tium ab nunciis cerneret, ut cuique aut læta aut
 tristia nunciabantur: gratulantesque aut consolant-
 tes redeuntibus domos circumfusos. Feminarum
 Matres re- præcipue et gaudia insignia erant, et luctus. Unam
 ceptis filiis in ipsa porta, sospiti filio repente oblatam, in con-
 gaudio ex- spectu ejus exspirasse ferunt; alteram, cui mors
 animatæ filii falso nunciata erat, inœstam sedentem domi, ad
 primum conspectum redeuntis filii gaudio nimio ex-

animatam. Senatum prætores per dies aliquot ab U. C. 535,
orto usque ad occidentem solem in curia retinent,
A. C. 217.
consultantes, quonam duce, aut quibus copiis, re-
sististi victoribus Pœnis posset.

VIII. Priusquam satis certa consilia essent, re- Alia clades.
pens alia nunciatur clades : quatuor millia equitum,
cum C. Centenio pro prætore missa ad collegam ab
Servilio consule, in Umbria, quo post pugnam ad
Trasimenum auditam averterant iter, ab Hannibale
circumventa. Ejus rei fama varie homines adfecit :
pars, occupatis majore ægritudine animis, levem, ex
comparatione priorum, ducere recentem equitum
jacturam : pars non id, quod acciderat, per se æsti-
mare, sed, ut in affecto corpore quamvis levis caus-
sa magis, quam valido gravior, sentiretur ; ita tum
ægræ et affectæ civitati quodcumque adversi incide-
rit, non rerum magnitudine, sed viribus extenuatis,
quæ nihil, quod adgravaret, pati possent, æstima-
dum esse. Itaque ad remedium, jam diu neque de-
sideratum nec adhibitum, dictatorem dicendum, ci-
vitas confugit : et quia et consul aberat, a quo uno
dici posse videbatur ; nec per occupatam armis Pu-
nicis Italiam facile erat aut nuncium, aut literas
mitti ; nec dictatorem populus creare poterat, quod
numquam ante eam diem factum erat : prodictatorem
populus creavit Q. Fabium Maximum, et magistrum ^{Fabius pro-}
equitum M. Minucium Rufum. Hisque negotium ab ^{dicator.}
senatu datum, ut muros turresque urbis firmarent, et
præsidia disponerent, quibus locis videretur, pon-
tesque rescinderent fluminum : ad penates pro urbe
dimicandum esse, quando Italiam tueri nequissent.

IX. Hannibal recto itinere per Umbriam usque ^{Hannibal}
^{Spoletum}
ad Spoletum venit : inde, quum perpopulato agro ^{frustra}
^{tentat.}

U. C. 535. urbem obpugnare adortus esset, cum magna cæde
A. C. 217. suorum repulsus, conjectans ex unius coloniæ haud

nihilis prospere tentatæ viribus, quanta moles Romanæ urbis esset; in agrum Picenum avertit iter, non copia solum omnis generis frugum abundantem, sed refertum præda, quam effuse avidi atque egentes rapiebant. Ibi per dies aliquot stativa habita: reffectusque miles, hibernis itineribus ac palustri via prælioque, magis ad eventum secundo, quam levi aut facili, affectus. Ubi satis quieti datum, præda ac populationibus magis, quam otio aut requie, gaudentibus profectus, Prætutianum, Hadrianumque agrum, Marsos inde Marrucinosque et Pelignos devastat, circaque Arpos et Luceriam proximam Apuliae regionem. Cn. Servilius consul, levibus præliis cum Gallis actis, et uno oppido ignobili expugnato, postquam de collegæ exercitusque cæde audit, jam mœnibus patriæ metuens, ne abesset in discrimine extremo, ad urbem iter intendit. Q. Fabius Maximus dictator iterum, quo die magistratum iniit, vocato senatu, ab Diis orsus, quum edœcisset Patres, plus negligentia ceremoniarum auspiciorumque, quam temeritate atque inscitia, peccatum a C. Flaminio consule esse, quæque piacula iræ Deum essent, ipsos Deos consulendos esse; pervicit, ut, quod non ferme decernitur, nisi quum tetra prodigia

Libri Sibyllini in specti. nunciata sunt, decemviri libros Sibyllinos adire jubarentur: qui, inspectis fatalibus libris, retulerunt Patribus, quod ejus belli caussa votum Marti foret, id non rite factum, de integro atque amplius faciendum esse: et Jori ludos magnos, et ædes Veneri Erycinæ ac Menti vovendas esse, et supplicationem lectisterniumque habendum, et ver sacrum vovendum, si bellatum pros-

*pere esset, resque publica in eodem, quo ante bellum U. C. 535.
fuisset, statu permansisset.* Senatus, quoniam Fabium
belli cura occupatura esset, M. Æmilium prætorem,
ex collegii pontificum sententia, omnia ea ut mature
fiant, curare jubet.

A. C. 217.

X. His senatusconsultis perfectis, L. Cornelius Lentulus pontifex maximus, consulente collegio prætorum, omnium primum populum consulendum de vere sacro censet: injussu populi voveri non posse. Rogatus in hæc verba populus, *Velitis ju-* Ver sacrum *beatissne hoc sic fieri? si res publica populi Romani votum.* *Quiritium ad quinquennium proximum, sicut velim eam, salva servata erit hisce duellis; datum donum duit populus Romanus Quiritium, (quod duellum populo Romano cum Karthaginiensi est, quæque duella cum Gallis sunt, qui cis Alpes sunt) quod ver adtulerit ex suillo, ovillo, caprino, bovillo grege, quæque profana erunt, Jori fieri, ex qua die senatus populusque jusserit. Qui faciet, quando volet, quaque lege volet, facito: quo modo faxit, probe factum esto. Si id moritur, quod fieri oportebit, profanum esto, neque scelus esto: si quis rumpet occidetve insciens, ne frauds esto: si quis clepsit, ne populo scelus esto, neve cui cleptum erit: si atro die faxit insciens, probe factum esto: si nocte sive luce, si servus sive liber faxit, probe factum esto: si anteidea senatus populusque jusserit fieri, ac faxit, eo populus solitus, liber esto. Eiusdem rei caussa ludi magni voti æris trecentis triginta tribus millibus, trecentis triginta tribus, triente: præterea bubus Jovi trecentis, multis aliis Divis bubus albis, atque ceteris hostiis. Votis rite nuncupatis, supplicatio edicta: supplicatumque iere cum conjugibus ac liberis non urbana multitudo tantum, sed agre-*

U. C. 535. stium etiam, quos in aliqua sua fortuna publicæ
 A. C. 217. quoque contingebat cura. Tum lectisternium per
 Lectister-
 nium. triduum habitum, decemviris sacrorum curantibus :
 sex pulvinaria in conspectu fuere : Jovi ac Junoni
 unum ; alterum Neptuno ac Minervæ ; tertium Marti
 ac Veneri ; quartum Apollini ac Dianæ ; quintum
 Vulcano ac Vestæ ; sextum Mercurio ac Cereri.
 Tum ædes votæ. Veneri Erycinæ ædem Q. Fabius
 Maximus dictator vovit ; quia ita ex fatalibus libris
 editum erat, ut is voveret, cuius maximum imperium
 in civitate esset. Menti ædem T. Otacilius prætor
 vovit.

XI. Ita rebus divinis peractis, tum de bello reque
 de publica dictator retulit, quibus quotve legionibus
 victori hosti obviam eundum esse Patres censerent.
 Decretum, *ut ab Cn. Servilio consule exercitum acci-*
peret : scriberet præterea ex civibus sociisque, quantum
equitum ac peditum videretur : cetera omnia ageret fa-
 Fabii con-
 silia de
 bello ge-
 rendo. *ceretque, ut e re publica duceret.* Fabius duas se le-
 giones adjecturum ad Servilianum exercitum dixit :
 his, per magistrum equitum scriptis, Tibur diem ad
 conveniendum edixit : edictoque proposito, ut, qui-
 bus oppida castellaque inmunita essent, uti in loca
 tuta conmigrarent ; ex agris quoque demigrarent
 omnes regionis ejus, qua iturus Hannibal esset :
 tectis prius incensis ac frugibus corruptis, ne cuius
 rei copia esset ; ipse, via Flaminia profectus obviam
 consuli exercituique, quum ad Tiberim circa Ocri-
 culum prospexisset agmen, consulemque cum equi-
 tibus ad se prodeuntem, viatorem misit, qui consuli
 nunciaret, ut sine lictoribus ad dictatorem veniret.
 Qui quum dicto paruisse, congressusque eorum in-
 gentem speciem dictaturæ apud cives sociisque, ve-

tustate jam prope oblitos ejus imperii, fecisset; li- U.C. 535.
teræ ab urbe adlatæ sunt, naves onerarias, commea- A.C. 217.
tum ab Ostia in Hispaniam ad exercitum portantes,
æ classe Punica circa portum Cosanum captas esse.
Itaque extemplo consul Ostiam proficisci jussus, na-
vibusque, quæ ad urbem Romanam aut Ostiæ essent,
completis milite ac navalibus sociis, persecuti ho-
stium classem, ac litora Italiæ tutari. Magna vis
hominum conscripta Romæ erat: libertini etiam,
quibus liberi essent, et ætas militaris, in verba ju-
raverant. Ex hoc urbano exercitu, qui minores
quinque et triginta annis erant, in naves impositi.
alii, ut urbi præsiderent, relicti.

XII. Dictator, exercitu consulis accepto a Fulvio Flacco legato, per agrum Sabinum Tibur, quo die ad conveniendum edixerat novis militibus, venit: inde Præneste, ac transversis limitibus in viam Latinam est egressus: unde, itineribus summa cum cura exploratis, ad hostem dicit; nullo loco, nisi quantum necessitas cogeret, fortunæ se commissurus. Quo primum die haud procul Arpis in con- spectu hostium posuit castra, nulla mora facta, quin Pœnus educeret in aciem, copiamque pugnandi fa- ceret: sed ubi quieta omnia apud hostes, nec castra ullo tumultu mota videt; increpans quidem, victos tandem quoque Martios animos Romanis, debellataque, et concessum propalam de virtute ac gloria esse, in castra rediit: ceterum tacita cura animum incensus, quod cum duce, haudquaquam Flaminio Sempronioque simili, futura sibi res esset; ac tum demum edocti malis Romani parem Hannibali ducem quæsissent. Et prudentiam quidem, non vim, dictatoris extempo timuit: constantiam haud dum

Fabius pu-
gnam de-
tractat.

U. C. 535. expertus, agitare ac tentare animum movendo crebro castra, populandoque in oculis ejus agros sociorum, cœpit: et modo citato agmine e conspectu abibat, modo repente in aliquo flexu viæ, si excipere degressum in æquum posset, occultus subsistebat. Fabius per loca alta agmen ducebat, modico ab hoste intervallo, ut neque omitteret eum, neque congrederetur. Castris, nisi quantum usus necessario cogeret, tenebatur miles: pabulum et ligna nec pauci petebant, nec passim. Equitum levisque armaturæ statio, composita instructaque in subitos tumultus, et suo militi tuta omnia, et infesta effusis hostium populatoribus præbebat: neque universo periculo summa rerum committebatur: et parva momenta levium certaminum ex tuto cœptorum, finitimo receptu, adsuefaciebant territum pristinis cladibus militem, minus jam tandem aut virtutis, aut fortunæ pœnitere suæ. Sed non Hannibalem magis infestum tam sanis consiliis habebat, quam magistrum equitum: qui nihil aliud, quam quod inpar erat imperio, moræ ad rempublicam præcipitandam habebat, ferox rapidusque in consiliis, ac lingua immodicus; primo inter paucos, dein propalam in vulgus, pro cunctatore segnem, pro cauto timidum, adfingens vicina virtutibus vitia, compellabat: pre mendorumque superiorum arte (quæ pessima ars nimis prosperis multorum successibus crevit) sese extollebat.

Mag.
equitum
ferocia.

XIII. Hannibal ex Hirpinis in Samnum transit: Beneventanum depopulatur agrum: Telesiam urbem capit: irritat etiam de industria ducem, si forte accensum tot indignitatibus cladibusque sociorum detrahere ad æquum certamen possit. Inter multitu-

dinem sociorum Italici generis, qui ad Trasimenum U. C. 535.
 capti ab Hannibale dimissique fuerant, tres Cam- A. C. 217.
 pani equites erant, multis jam tum inlecti donis pro- Hannibal
 missisque Hannibalis ad conciliandos popularium am petit.
 animos. Hi nunciantes, si in Campaniam exercitum
 admovisset, Capuae potiendae copiam fore, quum res
 major, quam auctores, esset, dubium Hannibalem,
 alternisque fidentem ac diffidentem, tamen, ut Cam- Campani-
 panos ex Samnio peteret, moverunt: monitos, ut
 etiam atque etiam promissa rebus adfirmarent, jus-
 sosque, cum pluribus et aliquibus principum redire
 ad se, dimisit. Ipse imperat duci, ut se in agrum
 Casinatem ducat: edoctus a peritis regionum, si Errore
 eum saltum occupasset, exitum Romano ad opem ducis ad
 ferendam sociis interclusurum. Sed Punicum ab- Casilinum
 deducitur.
 horrens os ab Latinorum nominum prolatione, pro
 Casino Casilinum dux ut acciperet, fecit; aversus-
 que ab suo itinere, per Allifanum, Calatinumque, et
 Calenum agrum, in campum Stellatem descendit:
 ubi quum montibus fluminibusque clausam regio-
 nem circumspexisset, vocatum ducem percunctatur,
 ubi terrarum esset? Quum is Casilini eo die man-
 surum eum dixisset, tum demum cognitus est error,
 et Casinum longe inde alia regione esse: virgisque
 cæso duce, et ad reliquorum terrorem in cruceim
 sublato, castris communitis, Maharbalem cum equi-
 tibus in agrum Falernum prædatum dimisit. Usque
 ad aquas Sinuissanæ populatio ea pervenit: ingen-
 tem cladem, fugam tamen terroremque latius, Nu-
 midæ fecerunt. Nec tamen is terror, quum omnia
 bello flagrarent, fide socios dimovit: videlicet quia
 justo et moderato regebantur imperio; nec abnue-

U. C. 535. bant, quod unum vinculum fidei est, melioribus pa-
A. C. 217. rere.

Seditio in
castris Fa-
bii.

Minucii
seditionis
oratio.

XIV. Ut vero ad Vulturenum flumen castra sunt posita, exurebaturque amoenissimus Italiæ ager, vilæque passim incendiis fumabant, per juga Massici montis Fabio ducente, tum prope de integro seditio accensa: quieverant enim per paucos dies; quia quum celerius solito ductum agmen fuisset, festinari ad prohibendam populationibus Campaniam crediderant. Ut vero in extrema juga Massici montis ventum est, hostesque sub oculis erant, Falerni agri colonorumque Sinucessæ tecta urentes, nec ulla erat mentio pugnæ, *Spectatumne huc*, inquit Minucius, *ut rem frumentum oculis, sociorum cædes et incendia venimus?* nec si nullius alterius nos, ne civium quidem horum pudet, *quos Sinucessam colonos patres nostri miserunt*, ut ab Samnite hoste tuta hæc ora esset: *quam nunc non vicinus Samnis urit, sed Pænus advena, ab extremis orbis terrarum terminis, nostra cunctatione et socordia, jam huc progressus.* Tantum (*pro!*) degeneramus a parentibus nostris, ut, præter quam oram illi Punicas vagari classes, dedecus esse imperii sui duxerint, eam nos nunc plenam hostium Numidarumque ac Maurorum jam factam videamus? Qui modo, Saguntum obpugnari indignando, non homines tantum, sed fædera et Deos, ciebamus, scandentem mænia Romanæ coloniæ Hannibalem lenti spectamus. Fumus ex incendiis villarum agrorumque in oculos atque ora venit; strepunt aures clamoribus plorantium sociorum, saepius nos, quam Deorum invocantium opem: nos hic pecorum modo per æstivos saltus deviasque calles exercitum ducimus, conditi nubibus silvisque. Si hoc modo

peragrando cacumina saltusque M. Furius recipere a Gallis urbem voluisse, quo hic novus Camillus (nobis dictator unicus in rebus affectis quæsusitus) Italiam ab Hannibale recuperare parat, Gallorum Roma esset: quam vereor, ne, sic cunctantibus nobis, Hannibali ac Pænis toties servaverint majores nostri: sed vir, ac vere Romanus, quo die, dictatorem eum ex auctoritate Patrum jussuque populi dictum, Veios adlatum est, quem esset satis ultum Janiculum, ubi sedens prospectaret hostem, descendit in æquum: atque illo ipso die media in urbe, qua nunc busta Gallica sunt, et postero die citra Gabios cecidit Gallorum legiones. Quid? post multos annos, quum ad Furculas Caudinas ab Samnite hoste sub jugum missi sumus, utrum tandem L. Papirius Cursor juga Samnii perlustrando, an Lucretiam premendo obsidendoque, et lacessendo victorem hostem, depulsum ab Romanis cervicibus jugum superbo Samniti inposuit? Modo C. Lutatio quæ alia res, quam celeritas victoriam dedit? quod postero die, quam hostem vidit, classem gravem commeatibus, inpeditam suomet ipsam instrumento atque adparatu, obpressit. Stultitia est, sedendo aut votis debellari credere posse: armari copias oportet, deducendas in æquum, ut vir cum viro congregari. Audendo atque agendo res Romana crevit, non his segnibus consiliis, quæ timidi cauta vocant. Hæc velut concionanti Minucio circumfundebatur tribunorum equitumque Romanorum multitudo, et ad aures quoque militum dicta ferocia volabantur: ac, si militaris suffragii res esset, haud dubie ferebant, Minucium Fabio duci prælaturos.

XV. Fabius pariter, in suos haud minus quam in hostes intentus, prius ab illis invictum animum præstat: quamquam probe scit, non in castris modo

U.C. 535.
A.C. 217.

U. C. 535 suis, sed jam etiam Romæ infamem suam cunctatio-
 A. C. 217 nem esse, obstinatus tamen eodem consiliorum te-
 nore æstatis reliquum extraxit: ut Hannibal, desti-
 tutus ab spe summopere petiti certaminis, jam hi-
 bernis locum circumspectaret: quia ea regio præ-
 sentis erat copiæ, non perpetuæ, arbusta vineæque,
 et consita omnia magis amœnis, quam necessariis
 fructibus. Hæc per exploratores relata Fabio. Quum
 satis sciret, per easdem angustias, quibus iutraverat
 Falernum agrum, redditum, Calliculam montem et
 Casilinum occupat modicis præsidiis; quæ urbs,
 Vulturno flumine direpta, Falernum ac Campanum
 agros dividit: ipse jugis iisdem exercitum reducit,
 misso exploratum cum quadringentis equitibus so-
 ciorum L. Hostilio Mancino: qui ex turba juvenum
 audientium sæpe ferociter concionantem magistrum
 equitum, progressus primo exploratoris modo, ut ex
 tuto specularetur hostem, ubi vagos passim per vi-
 cos Numidas vidit, per occasionem etiam paucos
 occidit: extemplo occupatus certamine est animus,
 excideruntque præcepta dictatoris; qui, quantum
 tuto posset, progressum prius recipere sese jusserat,
 quam in conspectum hostium veniret. Numidæ, alii
 atque alii obcurantes refugientesque, ad castra prope
 ipsum cum fatigatione equorum atque hominum per-
 traxere: inde Karthalo, penes quem summa equestris
 imperii erat, concitatis equis inventus, quum prius,
 quam ad conjectum teli veniret, avertisset hostem,
 quinque millia ferme continentि cursu secutus est
 fugientes. Mancinus, postquam nec hostem desis-
 tere sequi, nec spem vidi effugiendi esse, cohortatus
 suos in prælium rediit, omni parte virium inpar.
 Itaque ipse, et delecti equitum, circumventi occi-

duntur: ceteri effuso rursus cursu Cales primum, U.C. 535.
inde prope inviis callibus ad dictatorem perfugerunt. A.C. 217.
Eo forte die Minucius se conjunxerat Fabio, missus
ad firmandum præsidio saltum, qui super Tarraci-
nam, in artas coactus fauces, inminet mari, ne in-
munito Appiæ limite Pœnus pervenire in agrum Ro-
manum posset. Conjunctis exercitibus dictator ac
magister equitum castra in viam deferunt, qua
Hannibal ducturus erat: duo inde millia hostes
aberant.

XVI. Postero die Pœni, quod viæ inter bina
castra erat, agmine complevere. Quum Romani sub
ipso constitissent vallo, haud dubie æquiore loco,
successit tamen Pœnus cum expeditis equitibus, at-
que ad laccessendum hostem carptim et procursando
recipiendoque sese pugnavere: restitit suo loco Ro-
mana acies: lenta pugna et ex dictatoris magis,
quam Hannibal, fuit voluntate: ducenti ab Ro-
manis, octingenti hostium cecidere. Inclusus inde
videri Hannibal, via ad Casilinum obsessa: quum
Capua et Samnium, et tantum ab tergo divitum so-
ciorum Romanis commeatus subvehheret; Pœnus
contra inter Formiana saxa ac Literni arenas stag-
naque perhorrida situ hibernaturus esset. Nec Han- Inclusus
nibalem fefellit, suis se artibus peti: itaque, quum Hannibal
per Casilinum evadere non posset, petendique montes arte.
et jugum Calliculae superandum esset, necubi Ro-
manus inclusum vallibus agmen adgrederetur; lu-
dibrium oculorum, specie terrible, ad frustrandum
hostem commentus, principio noctis furtim succe-
dere ad montes statuit. Fallacis consilii talis adpa-
ratus fuit. Faces undique ex agris conlectæ, fasces-
que virgarum, atque arida sarmenta præligantur cor-

U.C. 535. nibus boum, quos domitos indomitosque multos in-
A.C. 217. Boves ac- ter ceteram agrestem prædam agebat: ad duo mil-
censis cor- lia ferme boum effecta: Hasdrubalique negotium
nibus. datum, ut primis tenebris noctis id armentum ac-
censis cornibus ad montes ageret; maxime, si pos-
set, super saltus ab hoste insessos.

XVII. Primis tenebris silentio mota castra; boves aliquanto ante signa acti: ubi ad radices montium viasque angustas ventum est, signum extemplo datur, ut accensis cornibus armenta in adversos concitentur montes: et metus ipse relucentis flammæ ex capite, calorque, jam ad vivum, ad imaque cornuum adveniens, velut stimulatos furore agebat boves: quo repente discursu, hand secus quam silvis montibus que accensis, omnia circum virgulta ardere: capitumque irrita quassatio, excitans flammam, hominum passim discurrentium speciem præbebat. Qui ad transitum saltus insidendum locati erant, ubi in summis montibus ac super se quosdam ignes conspexerunt, circumventos se esse rati, præsidio excessere; qua minime densæ micabant flammæ, velut tutissimum iter, petentes summa montium juga, tamen in quosdam boves palatos ab suis gregibus inciderunt. Et primo, quum procul cernerent, veluti flamas spirantium miraculo adtoniti constiterunt: deinde, ut humana adparuit fraus, tum vero insidias rati esse, dum majore metu concitant se in fugam, levi quoque armaturæ hostium incurrere: ceterum nox æquato timore neutros pugnam incipientes ad lucem tenuit. Interea, toto agmine Hannibal transducto per saltum, et quibusdam in ipso saltu hostium obpressis, in agro Allifano posuit castra.

XVIII. Hunc tumultum sensit Fabius: ceterum

et insidias esse ratus, et ab nocturno utique abhor- U. C. 535.
 rents certamine, suos munitum A. C. 217.
 tens tenuit. Luce pri-
 ma sub jugo montis praelium fuit; quo interclusam
 ab suis levem armaturam facile (etenim numero ali-
 quantum praestabant) Romani superassent, nisi His-
 panorum cohors, ad id ipsum remissa ab Hannibale,
 pervenisset: ea adsuetior montibus, et ad concur-
 sandum inter saxa rupesque aptior ac levior, cum
 velocitate corporum, tum armorum habitu, campes-
 trem hostem, gravem armis statariumque, pugnæ ge-
 nere facile elusit. Ita haudquaquam pari certamine
 digressi, Hispani fere omnes incolumes, Romani,
 aliquot suis amissis, in castra contenderunt. Fabius
 quoque movit castra: transgressusque saltum super
 Allifas, loco alto ac munito consedit. Tum, per
 Samnium Romam se petere simulans, Hannibal us-
 que in Pelignos populabundus rediit. Fabius medius
 inter hostium agmen urbemque Romam jugis duce-
 bat; nec absistens, nec congregiens. Ex Pelignis
 Poenus flexit iter, retroque Apuliam repetens, Gero-
 nium pervenit; urbem metu, quia conlapsa ruinis
 pars moenium erat, ab suis desertam. Dictator in Dictator it
 Larinate agro castra communiit: inde sacrorum Romam.
 caussa Romam revocatus, non imperio modo, sed
 consilio etiam, ac prope precibus agens cum ma-
 gistro equitum, *ut plus consilio, quam fortunæ, con-*
fidat: et se potius ducem, quam Sempronium, Flami-
niumque, imitetur: ne nihil actum censeret, extracta
prope æstate per ludificationem hostis: medicos quoque
plus interdum quiete, quam movendo atque agendo,
proficere. Haud parvam rem esse, ab toties victore
hoste vinci desisse, et ab continuis cladibus respirasse:

U. C. 535. Hæc nequidquam præmonito magistro equitum, Ro-
A. C. 217. mam est profectus.

Res gestæ in His-pania. **XIX.** Principio æstatis, qua hæc gerebantur, in Hispania quoque terra marique cœptum bellum est. Hasdrubal ad eum navium numerum, quem a fratre instructum paratumque acceperat, decem adjecit: quadraginta navium classem Himilconi tradidit: atque ita Karthagine profectus navibus prope terram, exercitum in litore ducebat, paratus configere, quamcumque parte copiarum hostis obcurrisset. Cn. Scipioni, postquam movisse ex hibernis hostem audivit, primo idem consilii fuit: deinde, minus terra, propter ingentem famam novorum auxiliorum, concurrere ausus, delecto milite ad naves inposito, quinque et triginta navium classe ire obviam hosti pergit. Altero ab Tarracone die ad stationem, decem millia passuum distantem ab ostio Iberi amnis, pervenit: inde duæ Massiliensium speculatoriæ præmissæ retulerunt, classem Punicam stare in ostio fluminis, castraque in ripa posita. Itaque, ut improvidos incautosque universo simul effuso terrore obprimeret, sublatis ancoris ad hostem vadit. Multas et locis altis positas turres Hispania habet, quibus et speculis et propugnaculiis adversus latrones utuntur: inde primo, conspectis hostium navibus, datum signum Hasdrubali est; tumultusque prius in terra et castris, quam ad mare et ad naves, est ortus, nondum aut pulsu remorum strepitumque alio nautico exaudito, aut aperientibus classem promontoriis: quin repente eques, aliis super alium ab Hasdrubale missis, vagos in litore quietosque in tentoriis suis, nihil minus quam hostem aut prælium eo die exspec-

tantes, concendere naves propere atque arma ca- U. C. 535.
pere jubet: classem Romanam jam haud procul A. C. 217.
portu esse. Hæc equites dimissi passim impera-
bant: mox Hasdrubal ipse cum omni exercitu ade-
rat: varioque omnia tumultu strepunt, ruentibus in
naves simul remigibus militibusque, fugientium ma-
gis e terra, quam in pugnam euntium modo. Vix
dum omnes concenderant, quum alii resolutis oris
in ancoras evehuntur; alij, ne quid teneat, ancoralia
incident: raptimque omnia præpropere agendo, mi-
litum adparatu nautica ministeria inpediuntur, tre-
pidatione nantarum capere et aptare arma miles pro-
hibetur. Et jam Romanus non adpropinquabat mo- Classis Pu-
do, sed direxerat etiam in pugnam naves: itaque non nica in fu-
ab hoste et prælio magis Poeni, quam suomet ipsi
tumultu turbati, tentata verius pugna, quam inita,
in fugam averterunt classem: et quum adversi am-
nis os lato agmine ac tam multis simul venientibus
haud sane intrabile esset, in litus passim naves ege-
runt: atque alii vadis, alii sicco litore excepti, par-
tim armati, partim inermes, ad instructam per litus
aciem suorum perfugere. Duæ tamen primo con-
cursu captæ erant Punicæ naves, quatuor sub-
pressæ.

XX. Romani, quamquam terra hostium erat, ar-
matamque aciem toto prætentam in litore cernebant,
haud cunctanter insecuri trepidam hostium classem,
naves omnes, quæ non aut perfregerant proras litore
inlisas, aut carinas fixerant vadis, religatas pupibus
in altum extraxere: ad quinque et viginti naves ex
quadraginta cepere. Neque id pulcherrimum ejus
victoriæ fuit, sed quod una levi pugna toto ejus oræ
mari potiti erant: itaque ad Honoscam classe pro-

U. C. 535. fecti, exscensione ab navibus in terram facta, quum
A. C. 217. urbem vi cepissent, captamque diripuissent, Karthaginem inde petunt: atque, omnem agrum circa depopulati, postremo tecta quoque conjuncta muro portisque incenderunt. Inde jam præda gravis ad Longunticam pervenit classis: ubi vis magna sparti ad rem nauticam congesta ab Hasdrubale: quod satis in usum fuit, sublato, ceterum omne incensum est. Nec continentis modo projectas oras prætervecta, sed in Ebusum insulam transmissum: ubi urbe, quæ caput insulæ est, biduum nequidquam summo labore obpugnata, ubi in spem irritam frustra teri tempus animadversum est, ad populationem agri versi, direptis aliquot incensisque vicis, majore, quam ex continenti, præda parta, quum in naves se recepissent, ex Balariibus insulis legati pacem petentes ad Scipionem venerunt. Inde flexa retro classis, redditumque in citeriora provinciæ; quo omnium populorum, qui Iberum incolunt, multorum et ultimæ Hispaniæ legati concurrerunt. Sed, qui vere ditio-
nis imperiique Romani facti sunt, obsidibus datis, populi amplius fuerunt centum viginti. Igitur terrestribus quoque copiis satis fidens Romanus usque ad saltum Castulonensem est progressus. Hasdrubal in Lusitaniam ac propius oceanum concessit.

XXI. Quietum inde fore videbatur reliquum æstatis tempus, fuisseque per Pœnum hostem; sed, præterquam quod ipsorum Hispanorum inquieta avidaque in novas res sunt ingenia, Mandonius Indibilisque, qui antea Ilergetum regulus fuerat, postquam Romani ab saltu recessere ad maritimam oram, concitis popularibus, in agrum pacatum sociorum Romanorum ad populandum venerunt. Adversus eos

tribunus militum cum expeditis auxiliis, a Scipione U. C. 535.
 missi, levi certamine, ut tumultuariam manum, fu- A. C. 217.
 dere omnes; occisis quibusdam captisque, magna pars armis exuta. Hic tamen tumultus cedentem ad oceanum Hasdrubalem cis Iberum ad socios tutandos retraxit. Castra Punica in agro Illecaonen-sium, castra Romana ad novam classem erant, quum fama repens alio avertit bellum. Celtiberi, qui prin-Celtiberi
 cipes regionis suæ legatos miserant, obsidesque de-arma ad-
 derant Romanis, nuncio misso a Scipione exciti, versus Po-
 arma capiunt, provinciamque Karthaginiensium va-nos ca-
 lido exercitu invadunt: tria oppida vi expugnant:
 inde, cum ipso Hasdrubale dñobus præliis egregie pugnantes, quindecim millia hostium occiderunt, quatuor millia cum multis militaribus signis ca-piunt.

XXII. Hoc statu rerum in Hispania, P. Scipio P. Scipio
 in provinciam venit, prorogato post consulatum im-classe ad-
 perio ab senatu missus, cum triginta longis navibus, Hispaniam.
 et octo millibus militum, magnoque commeatu ad-vehitur in
 vecto. Ea classis ingens agmine oneriarum pro-
 cul visa, cum magna lætitia civium sociorumque,
 portum Tarragonis ex alto tenuit: ibi milite expo-
 sito, profectus Scipio fratri se conjungit: ac deinde
 communi animo consilioque gerebant bellum. Oc-
 cupatis igitur Karthaginiensibus Celtiberico bello,
 haud cunctanter Iberum transgrediuntur; nec ullo
 viso hostile, Saguntum pergunt ire, quod ibi obsides Obsides
 totius Hispaniæ custodiæ traditos ab Hannibale fa-Hispano-
 ma erat modico in arce custodiri præsidio: id unum gunti.
 pignus inclinatos ad Romanam societatem omnium
 Hispaniæ popolorum animos morabatur, ne sanguine
 liberûm suorum culpa defectionis lueretur. Eo vin-

U.C. 535. culo Hispaniam vir unus, solerti magis quam fidelis
A.C. 217. consilio, exsolvit. Abelux erat Sagunti nobilis His-
Eos Abe-panus, fidus ante Poenis: tum (qualia plerumque
lux tradit Romanis. sunt barbarorum ingenia) cum fortuna mutaverat
fidem: ceterum, transfugam, sine magnæ rei prodi-
tione venientem ad hostes, nihil aliud quam unum
vile atque infame corpus esse ratus, id agebat, ut
quam maximum emolumentum novis sociis esset.
Circumspectis igitur omnibus, quæ fortuna potesta-
tis ejus poterat facere, obsidibus potissimum traden-
dis animum adjecit: eam unam rem maxime ratus
conciliaturam Romanis principum Hispaniæ amici-
tiam. Sed quum, injussu Bostaris præfecti, satis
sciret, nihil obsidum custodes facturos esse, Bosta-
rem ipsum arte adgreditur. Castra extra urbem in
ipso litore habebat Bostar, ut aditum ex portu in-
tercluderet Romanis: ibi eum in secretum abduc-
tam, velut ignorantem, monet, quo statu sit res.
Metum continuisse ad eam diem Hispanorum animos,
quia procul Romani abessent: nunc cis Iberum castra
Romana esse, areem tutam perfugiumque novas volen-
tibus res: itaque, quos metus non teneat, beneficio et
gratia devincendos esse. Miranti Bostari percunc-
tantique, quodnam id subitum tantæ rei donum pos-
sit esse? *Obsides, inquit, in civitates remitte: id et*
privatum parentibus, quorum maximum nomen in civi-
tatibus est suis, et publice populis gratum erit. *Vult*
sibi quisque credi, et habita fides ipsam plerumque ob-
ligat fidem. Ministerium restituendorum domos obsi-
dum mihi met deposco ipse, ut opera quoque in pensa
consilium adjuvem meum, et rei suapte natura gratæ,
quantam insuper gratiam possim, adjiciam. Homini,
non ad cetera Punica ingenia callido, ut persuasit,

nocte clam progressus ad hostium stationes, con- U. C. 535.
 ventis quibusdam auxiliaribus Hispanis, et ab iis ad A. C. 217.
 Scipionem perductus, quid adferret, expromit. Fide
 accepta dataque, ac loco et tempore constituto ad
 obsides tradendos, Saguntum redit; diem insequen-
 tem absumsit cum Bostare, mandatis ad rem agen-
 dam accipiendis: dimissus, quum se nocte iturum,
 ut custodias hostium falleret, constituisset, ad com-
 positam cum iis horam excitatis custodibus puerorum
 profectus, veluti ignarus in præparatas sua fraude
 insidias dicit. In castra Romana perducti: cetera In castra
 omnia de redlendis obsidibus, sicut cum Bostare Romana
 constitutum erat, acta per eundem ordinem, quo si peructos
 Karthaginiensium nomine sic ageretur. Major ali- Scipio.
 quanto Romanorum gratia fuit in re pari, quam
 quanta futura Karthaginiensium fuerat: illos enim,
 graves superbosque in rebus secundis expertos, for-
 tuna et timor mitigasse videri poterat. Romanus
 primo adventu, incognitus ante, ab re clementi li-
 beralique initium fecerat: et Abelux, vir prudens,
 haud frustra videbatur socios mutasse: itaque in-
 genti consensu defectionem omnes spectare: arma-
 que extemplo mota forent, ni hiems, quæ Romanos
 quoque et Karthaginienses concedere in tecta coë-
 git, intervenisset.

XXIII. Hæc in Hispania quoque secunda æstate
 Punici belli gesta, quum in Italia paullum intervalli
 cladibus Romanis solers cunctatio Fabii fecisset:
 quæ ut Hannibalem non mediocri sollicituni cura ha-
 bebat, tandem eum militiæ magistrum delegisse Ro-
 manos cernentem, qui bellum ratione, non fortuna, Fabii cunc-
 gereret; ita contenta erat inter cives, armatos pa- tatio Romæ
 riter togatosque; utique postquam, absente eo, te- invisa.

U. C. 535. meritate magistri equitum, læto verius dixerim, quam
A. C. 217. prospero eventu, pugnatum fuerat. Accesserant duæ

Hanniba- res ad augendam invidiam dictatoris: una fraude ac
lis dolus dolo Hannibal, quod, quum a perfugis ei monstrau-
ad augen- tus ager dictatoris esset, omnibus circa solo æquatis,
dam in- ab uno eo ferrum ignemque et vim omnem hostium
vidiam abstineri jussit, ut occulti alicujus pacti ea merces
dictato- videri posset: altera ipsius facto, primo forsitan
ris.
dubio, quia non exspectata in eo senatus auctoritas
est; ad extremum haud ambigue in maximam lau-
dem verso, in permutandis captivis: quod, sicut pri-
mo Punico bello factum erat, convenerat inter duces
Romanum Pœnumque, ut, quæ pars plus reciperet,
quam daret, argenti pondo bina et selibras in mili-
tem præstaret. Ducentos quadraginta septem quum

Fabius pe- plures Romanus, quam Pœnus, recepisset, argen-
cunia sua tumque pro eis debitum, sæpe jaetata in senatu re,
captivos qnoniam non consuluisset Patres, tardius erogare-
redimit. tur: inviolatum ab hoste agrum, misso Romam
Quinto filio, vendidit, fideinque publicam inpendio
privato exsolvit. Hannibal pro Geronii mœnibus,
cujus urbis, captæ atque incensæ ab se, in usum
horreorum pauca reliquerat tecta, in stativis erat:
inde frumentatum duas exercitus partes mittebat:
cum tertia ipse expedita in statione erat, simul ca-
stris præsidio, et circumspectans, necunde inpetus
in frumentatores fieret.

Eo ab- XXIV. Romanus tunc exercitus in agro Larinati
sente Mi- erat: præerat Minucius magister equitum, profecto,
nucius sicut ante dictum est, ad urbem dictatore. Cete-
rem non rum castra, quæ in monte alto ac tuto loco posita
inpro- fuerant, jam in planum deferuntur: agitabanturque
spere gerit. pro ingenio ducis consilia calidiora, ut inpetus aut

in frumentatores palatos, aut in castra, relicta cum U. C. 535.
levi præsidio, fieret. Nec Hannibalem fefellit, cum A. C. 217.
duce mutatam esse belli rationem, et ferocius, quam
consultius, rem hostes gesturos. Ipse autem, (quod
minime quis crederet) quum hostis propius esset,
tertiam partem militum frumentatum, duabus in ca-
stris retentis, dimisit; dein castra ipsa propius ho-
stem movit, duo ferme a Geronio millia, in tumulum
hosti conspectum; ut intentum sciret esse ad fru-
mentatores, si qua vis fieret, tutandos. Propior in-
de ei, atque ipsis inminens Romanorum castris tu-
mulus adparuit: ad quem capiendum si luce palam
iretur, quia haud dubie hostis breviore via præventu-
rus erat, nocte clam missi Numidæ ceperunt: quos
tenentes locum, contemta paucitate, Romani pos-
tero die quum ejecissent, ipsi eo transferunt castra.
Tum itaque, ut exiguum spatii vallum a vallo aberat,
et id ipsum totum prope compleverat Romana acies,
simul et per aversa castra a castris Hannibalis equi-
tatus, cum levi armatura emissus in frumentatores,
late cædem fugamque hostium palatorum fecit: nec
acie certare Hannibal ausus; quia tanta paucitate
vix castra, si obpugnarentur, tutari poterat. Jamque
artibus Fabii, (pars exercitus aberat) jam ferme se-
dendo et cunctando bellum gerebat, receperatque
suos in priora castra, quæ pro Geronii mœnibus
erant. Justa quoque acie et conlatis signis dimica-
tum, quidam auctores sunt: primo concursu Pœ-
num usque ad castra fusum, inde eruptione facta re-
pente versum terrorem in Romanos: Num. Deci-
mii Samnitis deinde interventu prœlium restitu-
tum. Hunc, principem genere ac divitiis non Bo-
viani modo, unde erat, sed toto Samnio, jussu dic-

U. C. 535. tatoris octo millia peditum, et equites quingentos
 A. C. 217. ducentem in castra, ab tergo quum adparuisset Hannibali, speciem parti utriusque præbuisse novi præsidii, cum Q. Fabio ab Roma venientis: Hannibalem insidiarum quoque aliquid timentem recepisse suos: Romanum insecutum, adjuvante Samnite, duo castella eo die expugnasse: sex millia hostium cæsa, quinque admodum Romanorum: tamen in tam pari prope clade fainam egregiæ victoriæ cum vanioribus literis magistri equitum Romam perlatam.

XXV. De his rebus persæpe et in senatu et in concione actum est. Quum, læta civitate, dictator unus nihil nec famæ, nec literis crederet; ut vera omnia essent, secunda se magis, quam adversa, timere diceret: tum M. Metilius tribunus plebis, id

*Oratio Metilii
trib. pl. in enim ferendum esse negat. Non præsentem solum dic-
Fabium. tatorem obstitisse rei bene gerendæ, sed absentem etiam gestæ obstarare: et in ducendo bello sedulo tempus terere, quo diutius in magistratu sit, solusque et Romæ et in exercitu imperium habeat. Quippe consulum alterum in acie cecidisse; alterum, specie classis Punicæ persequendæ, procul ab Italia ablegatum. Duos prætores Sicilia atque Sardinia occupatos, quorum neutra hoc tempore provincia prætore egeat. M. Minucium magistrum equitum, ne hostem videret, ne quid rei bellicæ gereret, prope in custodiam habitum. Itaque, Hercule, non Samnum modo, quo jam, tamquam trans Iberum agro, Pænis concessum sit, et Campanum, Calenumque, et Falernum agros pervastatos esse, sedente Casilini dictatore, et legionibus populi Romani agrum suum tutante: exercitum cupientem pugnare, et magistrum equitum, clausos prope intra vallum retentos; tamquam hostibus captivis arma ademta: tandem, ut abscesserit*

inde dictator, ut obsidione liberatos, extra vallum egres- U. C. 535.
sos fudisse ac fugasse hostes. Quas ob res, si antiquus
animus plebi Romane esset, audaciter se laturum fuisse
de abrogando Q. Fabii imperio: nunc modicam roga-
tionem promulgaturum de æquando magistri equitum
et dictatoris jure: nec tamen ne ita quidem prius mit-
tendum ad exercitum Q. Fabium, quam consulem in lo-
cum C. Flaminii subfecisset. Dictator concionibus se Fabius se
abstinuit, in actione minime popularis: ne in senatu defensit
quidem satis æquis auribus audiebatur, tunc quum apud sena-
hostem verbis extolleret, bienniique clades per te-
meritatem atque inscientiam ducum acceptas refer-
ret: magistroque equitum, quod contra dictum suum
pugnasset, rationem diceret reddendam esse. Si penes
se summa imperii consiliique sit, propediem effecturum,
ut sciant homines, bono imperatori haud magni fortu-
nam momenti esse: mentem rationemque dominari. Se
in tempore et sine ignominia servasse exercitum, quam
multa millia hostium occidisse, majorem gloriam esse.
Hujus generis orationibus frustra habitis, et consule
creato M. Atilio Regulo, ne præsens de jure imperii M. Atilius
dimicaret, pridie quam rogationis ferendæ dies ad- subfectus
esset, nocte ad exercitum abiit. Luce orta, quum cos.
plebis concilium esset, magis tacita invidia dictato-
ris favorque magistri equitum animos versabat, quam
satis audebant homines ad suadendum, quod vulgo
placebat, prodire: et, favore superante, auctoritas
tamen rogationi deerat. Unus inventus est suasor
legis C. Terentius Varro, qui priore anno prætor C. Teren-
fuerat, loco non humili solum, sed etiam sordido, tius Varro
ortus: patrem lanium fuisse ferunt, ipsum instito-
rem mercis, filioque hoc ipso in servilia ejus artis
ministeria usum.

U. C. 535. **XXVI.** Is juvenis, ubi ex eo genere quæstus p-
 A. C. 217. cunia a patre relicta animos ad spem liberalioris for-
 tunæ fecit, togaque et *forum* placuere, proclaimando
 pro sordidis hominibus caussisque adversus rem et
 famam bonorum, primum in notitiam populi, deinde
 ad honores pervenit: quæstura quoque et duabus
 ædilitatibus, plebeia et curuli, postremo et prætura
 perfunctus, jam ad consulatus spem quum adtolleret
 animos, haud parum callide auram favoris popularis
 Æquatur ex dictoria invidia petiit, scitique plebis unus gra-
 dictatori mag. tiam tulit. Omnes eam rogationem, quique Romæ,
 equitum. quique in exercitu erant, æqui atque iniqui, præter
 ipsum dictatorem, in contumeliam ejus latam acce-
 perunt: ipse, qua gravitate animi criminantes se ad
 multitudinem inimicos tulerat, eadem et populi in
 se sævientis injuriam tulit: acceptisque in ipso iti-
 nere literis senatusconsulti de æquato imperio, satis
 fidens, haudquaquam cum imperii jure artem impe-
 randi æquatam, cumque invicto a civibus hostibus-
 que animo ad exercitum rediit.

XXVII. Minucius vero, quum jam ante vix tolerabilis fuisset secundis rebus ac favore vulgi, tum utique inmodice inmodesteque, non Hannibale magis victo ab se, quam Q. Fabio, gloriari: *Illum in rebus asperis unicum ducem ac parem quæsitum Hannibali, majorem minori, dictatorem magistro equitum, quod nulla memoria habeat annalium, jussu populi æquatum in eadem civitate, in qua magistri equitum virgas ac secures dictatoris tremere atque horrere soliti sint. In tantum suam felicitatem virtutemque enituisse. Ergo secuturum se fortunam suam, si dictator in cunctatione ac segnitie, Deorum hominumque judicio dam- nata, perstaret.* Itaque, quo die primum congressus

est cum **Q.** Fabio, *statuendum omnium primum*, ait, U. C. 535.
esse, quemadmodum imperio æquato utantur. Se op- A. C. 217.
timum ducere, aut diebus alternis, aut, si majora in-
tervalla placerent, partitis temporibus, alterius sum-
mum jus imperiumque esse: ut par hosti non solum
consilio, sed viribus etiam esset, si quam occasionem
rei gerendæ habuisset. **Q.** Fabio haudquaquam id pla-
cere: omnia enim fortunam habituram, quæcumque
temeritas collegæ habuisset. *Sibi communieatum cum*
illo, non ademtum, imperium esse. *Itaque se numquam*
volentem parte, qua posset, rerum consilio gerendarum
cessurum: nec se tempora aut dies imperii cum eo, ex-
ercitus divisurum, suisque consiliis, quoniam omnia non
liceret, quæ posset, servaturum. Ita obtinuit, uti le- Exercitus
giones, sicut consulibus mos esset, inter se divide- inter eos
rent: prima et quarta Minucio, secunda et tertia Fa-
bio evenerunt. Item equites pari numero, socium- dividuntur.
que et Latini nominis auxilia divisorunt: castris se
quoque separari magister equitum valuit.

XXVIII. Duplex inde Hannibali gaudium fuit: neque enim quidquam eorum, quæ apud hostes age-
 rentur, eum fallebat, et perfugis multa indicantibus,
 et per suos explorantem: nam et liberam Minucii
 temeritatem se suo modo captaturum, et solertiae
 Fabii dimidium virium decessisse. Tumulus erat
 inter castra Minucii Pœnorumque: eum qui occu-
 passet, haud dubie iniquiorem erat hosti locum fac-
 turus: eum non tam capere sine certamine volebat
 Hannibal, (quamquam id operæ pretium erat) quam
 caussam certaminis cum Minucio, quem semper ob-
 cursurum ad obsistendum satis sciebat, contrahere.
Ager *omnis medius erat prima specie inutilis insi-*
diatori, quia non modo silvestre quidquam, sed ne

U.C. 535. vepribus quidem vestitum habebat: re ipsa natus
A.C. 217. tegendis insidiis, eo magis quod in nuda valle nulla talis fraus timeri poterat: et erant in amfractibus cavæ rupes, ut quædam earum ducenos armatos possent capere. In has latebras, quot quemque locum apte insidere poterant, quinque millia conduntur peditum equitumque: necubi tamen aut motus alicujus temere egressi, aut fulgor armorum fraudem in valle tam aperta detegeret; missis paucis prima luce ad capiendum, quem ante diximus, tumulum, avertit oculos hostium. Primo statim conspectu contemta paucitas: ac sibi quisque deponscere pellendos inde hostes: ad locum capiendum dux ipse inter stolidissimos ferocissimosque ad arma vocat; et vanis animis et minis increpat hostem. Principio levem armaturam dimittit, deinde conferto agmine mittit equites: postremo, quum hostibus quoque subsidia mitti videret, instructis legionibus procedit. Et

Pugna in-
Hanni-
balem et
Minu-
cium. Hannibal, laborantibus suis alia atque alia, crescente certamine, mittens auxilia peditum equitumque, jam justam expleverat aciem, ac totis utrimque viribus certabatur. Prima leveis armatura Romanorum, præoccupatum inferiore loco succedens tumulum, pulsa detrusaque terrorem in succendentem intulit equitem, et ad signa legionum refugit: peditum acies inter percuslos inpavida sola erat, videbaturque, si justa aut si recta pugna esset, haudquam inpar futura: tantum animorum fecerat prospere ante paucos dies res gesta. Sed exorti repente insidiatores eum tumultum terroremque, in latera utrimque ab tergoque incursantes, fecerunt, ut neque animus ad pugnam, neque ad fugam spes cuiquam superesset.

Laborat

Minucius.

XXIX. Tunc Fabius, primo clamore paventium U. C. 535.
 audito, dein conspecta procul turbata acie, *Ita est,* A. C. 217.
 inquit, *non celerius, quam timui, deprehendit fortuna* ^{A Fabio}
temeritatem. *Fabio æquatus imperio Hannibalem et*
virtute et fortuna superiorem videt. Sed aliud jur-
 gandi succensendique tempus erit: nunc signa extra
 vallum proferte. Victoriam hosti extorqueamus, con-
 fessionem erroris civibus. Jam magna ex parte cæsis
 aliis, aliis circumspectantibus fugam, Fabiana se
 acies repente, velut cœlo demissa, ad auxilium
 ostendit. Itaque, priusquam ad conjectum teli ve-
 niret, aut manum consereret, et suos a fuga effusa,
 et ab nimis feroci pugna hostes continuit: qui so-
 lutis ordinibus vage dissipati erant, undique confu-
 gerunt ad integrum aciem; qui plures simul terga
 dederant, conversi in hostem, volventesque orbem,
 nunc sensim referre pedem, nunc conglobati restare:
 ac jam prope una acies facta erat victi atque integri
 exercitus, inferebantque signa in hostem; quum
 Pœnus receptui cecinit, palam ferente Hannibale,
 ab se Minucium, se a Fabio victum. Ita per variam
 fortunam diei majore parte exacta, quum in castra
 redditum esset, Minucius, convocatis militibus, *Sæpe Minucius*
ego, inquit, audiri, milites, eum primum esse virum, ^{errorem} *suum ag-*
qui ipse consulat, quid in rem sit; secundum eum, noscit.
qui bene monenti obediatur: qui nec ipse consulere, nec
alteri parere sciatur, eum extremi ingenii esse. Nobis quo-
 niam prima animi ingenii negata sors est, secundam
 ac medium teneamus: et, dum imperore discimus, pa-
 rere prudenti in animum inducamus. Castra cum Fabio
 jungamus: ad prætorium ejus signa quum tulerimus, ubi
 ego eum parentem adpellavero, quod beneficio ejus er-
 ga nos ac majestate ejus dignum est; vos, milites, eos,

U. C. 535. *quorum vos modo arma dexteræque texerunt, patronos*
 A. C. 217. *salutabitis, et, si nihil aliud, gratorum certe nobis ani-*
morum gloriam dies hæc dederit.

Sub impe- XXX. Signo dato, conclamatur inde, ut conli-
 riūm Fabii gantur vasa: profecti et agmine incidentes ad dicta-
 roris castra in admirationem et ipsum, et omnes, qui
 circa erant, converterunt. Ut constituta sunt ante

tribunal signa, progressus ante alios magister equi-
 tum, quum patrem Fabium adpellasset, circumfusos-
 que militum ejus totum agmen *patronos consalutas-*
set, Parentibus, inquit, meis, dictator, (quibus te modo
nomine, quo fando possum, æquavi) vitam tantum de-
beo: tibi quum meam salutem, tum omnium horum.
Itaque plebeiscitum, quo oneratus magis, quam hono-
ratus sum, primus antiquo abrogoque: et, quod tibi
mihique, quod exercitibusque his tuis, servato ac con-
servatori, sit felix, sub imperium auspiciumque tuum
redeo, et signa hæc legionesque restituo. Tu, quæso,
placatus me magisterium equitum, hos ordines suos
quemque tenere jubeas. Tum dextræ interjunctæ, mi-
litesque, concione dimissa, a notis ignotisque be-
nigne atque hospitaliter invitati: lætusque dies, ex
admodum tristi paullo ante ac prope exsecribili,
factus. Romæ, ut est perlata fama rei gestæ, dein
literis non magis ipsorum imperatorum, quam vulgo
militum ex utroque exercitu adfirmata, pro se quis-
que Maximum laudibus ad cœlum ferre. Par gloria
apud Hannibalem hostesque Pœnos erat: ac tum
denum sentire, cum Romanis atque in Italia bellum
esse. Nam biennio ante adeo et duces Romanos et
milites spreverant, ut vix cum eadem gente bellum
esse crederent, cuius terribilem eam famam a patri-
bus accepissent. Hannibalem quoque ex acie rede-

untem dixisse ferunt, tandem eam nubem, quæ sedere U. C. 585.
in jugis montium solita sit, cum procella imbre rem dedisse. A. C. 217.

XXXI. Dum hæc geruntur in Italia, Cn. Ser- Servilius
vilius Geminus consul cum classe centum viginti cos. male
navium, circumvectus Sardinæ et Corsicæ oram, et in Africa
obsidibus utrimque acceptis, in Africam transmisit :
et, priusquam in continentem exscensiones faceret,
Menige insula vastata, et ab incolentibus Cercinam,
ne et ipsorum ureretur diripereturque ager, decem
talentis argenti acceptis, ad litora Africæ accessit,
copiaisque exposuit. Inde ad populandum agrum
ducti milites, navalesque socii juxta effusi, ac si in-
sulis cultorum egentibus prædarentur : itaque in in-
sidias temere inlati, quum a frequentibus palantes,
ab locorum gnaris ignari circumvenirentur, cum
multa cæde ac fœda fuga retro ad naves compulsi
sunt. Ad mille hominum, cum his Sempronio Blæso
quæstore, amissum : classis, a litoribus hostium ple-
nis trepide soluta, in Siciliam cursum tenuit : tradi-
taque Lilybæi T. Otacilio prætori, ut ab legato ejus
P. Sura Romam reduceretur : ipse, per Siciliam pe-
dibus profectus, freto in Italiam trajecit, literis Q.
Fabii aditus et ipse, et collega ejus M. Atilius, ut
exercitus ab se, exacto jam prope semestri imperio,
acciperent. Omnia prope annales Fabium dicta- Utrum Fa-
toreni adversus Hannibalem rem gessisse tradunt. bius dicta-
Cœlius etiam eum primum a populo creatum dicta- tor, an pro
torem scribit. Sed et Cœlium et ceteros fugit, uni fuerit.
consuli Cn. Servilio, qui tum procul in Gallia pro-
vincia aberat, jus fuisse dicendi dictatoris : quam
moram quia exspectare territa jam clade civitas non
poterat, eo decursum esse, ut a populo crearetur,
qui pro dictatore esset : res inde gestas gloriampque

U. C. 535. insignem ducis et augentes titulum imaginis posteros, ut, qui pro dictatore, dictator diceretur, facile obtinuisse.

Coss. artibus Fabii bellum gerunt. **XXXII.** Consules, Atilius Fabiano, Geminus Servilius Minuciano exercitu accepto, hibernaculis mature communitis, (extremum autumni erat) Fabii artibus cum summa inter se concordia bellum gesserunt. Frumentatum exeunti Hannibali diversis locis opportuni aderant, carpentes agmen, palatosque excipientes: in casum universæ dimicationis, quam omnibus artibus petebat hostis, non veniebant: adeoque inopia est coactus Hannibal, ut, nisi tum fugae speciem abeundo timuisset, Galliam repetiturus fuerit, nulla relicta spe alendi exercitus in eis locis, si insequentes consules eisdem artibus bellum gerrent. Quum ad Geronium jam hieme impediente constitisset bellum, Neapolitani legati Romam vene: ab iis quadraginta pateræ aureæ magni ponderis in curiam inlatæ, atque ita verba facta, ut dicerent: *Scire sese, Romani populi ærarium bello extini aurum hauriri: et, quum juxta pro urbibus agrisque sociorum, obferunt Romanis. ac pro capite atque arce Italæ, urbe Romana atque imperio geratur, æquum censuisse Neapolitanos, quod auri sibi quum ad templorum ornatum, tum ad subsidium fortunæ a majoribus relictum foret, eo jurare populum Romanum.* Si quam opem in sese crederent, eodem studio fuisse oblaturos: gratum sibi Patres Romanos populumque facturum, si omnes res Neapolitanorum suas duxissent; dignosque judicaverint, ab quibus donum, animo ac voluntate eorum, qui libentes darent, quam re, majus ampliusque, acciperent. Legatis gratiæ actæ pro munificentia curaque: patera, quæ ponderis minimi fuit, accepta.

XXXIII. Per eosdem dies speculator Karthagi-
niensis, qui per biennium fefellerat, Romæ depre-
hensus, præcisisque manibus dimissus : et servi quin-
que et viginti in crucem acti, quod in Campo Martio
conjurassent : indici data libertas et æris gravis vi-
ginti millia. Legati et ad Philippum Macedonum Legati in
regem missi ad deposendum Demetrium Pharium,
qui, bello victus, ad eum fugisset : et alii in Ligures
ad expostulandum, quod Pœnum opibus auxiliisque
suis juvissent : simul ad visendum ex propinquo, quæ
in Boiis atque Insubribus gererentur. Ad Pineum
quoque regem in Illyrios legati missi ad stipendium,
cujus dies exierat, poscendum ; aut, si diem proferre
vellet, obsides accipiendos : adeo, etsi bellum ingens
in cervicibus erat, nullius usquam terrarum rei cura
Romanos, ne longinqua quidem, effugiebat. In re-
ligionem etiam venit, ædem Coneordiæ, quam per
seditiōnem militarem biennio ante L. Manlius præ-
tor in Gallia vovisset, locatam ad id tempus non
esse : Itaque duumviri ad eam rem creati a M. Æmi-
lio prætore urbis, Cn. Pupius et K. Quintius Flami-
ninus, ædem in arce faciendam locaverunt. Ab eo-
dem prætore ex senatusconsulto literæ ad consules
missæ, ut, si iis videretur, alter eorum ad consules
creandos Romanam veniret : se in eam diem, quam
jussissent, comitia edicturum. Ad hæc a consulibus
rescriptum, *Sine detimento reipublicæ abscedi non
posse ab hoste : itaque per interregem comitia habenda
esse potius, quam consulum alter a bello avocaretur.*
Patribus rectius visum est, dictatorem a consule dici
comitiorum habendorum caussa : dictus L. Veturius
Philo, M. Pomponium Mathonem magistrum equi-
tum dixit. His vitio creatis, jussisque die quarto-

decimo se magistratu abdicare, ad interregnum res rediit.

U. C. 536. XXXIV. Consulibus prorogatum in annum imperium: interreges proditi a Patribus C. Claudius, A. C. 216. Interreges. Ap. filius, Centho, inde P. Cornelius Asina. In ejus interregno comitia habita magno certamine Patrum

C. Terentius Varro ac plebis. C. Terentio Varroni, quem, sui generis consulatus candidatus busque artibus conciliatum, ab Q. Fabii opibus et datus.

dictatorio imperio concussis aliena invidia splendentem, vulgus et extrahere ad consulatum nitebatur, Patres summa ope obstabant, ne se insectando sibi æquari adsuescerent homines. Q. Bæbius Herennius tribunus plebis, cognatus C. Terentii, criminando non senatum modo, sed etiam augures, quod dictatorem prohibuissent comitia perficere, per invidiam eorum favorem candidato suo conciliabat.

Bæbii trib. pl. oratio in nobiles. *Ab hominibus nobilibus, per multos annos bellum quærentibus, Hannibalem in Italiam adductum: ab iisdem, quum debellari possit, fraude id bellum trahi: cum quatuor militum legionibus universis pugnari posse adparuisse eo, quod M. Minucius, absente Fabio, prospere pugnasset; duas legiones hosti ad cædem objectas, deinde ex ipsa cæde creptas, ut pater patronusque adpellaretur, qui prius vincere prohibuisset Romanos, quam vinci. Consules deinde Fabianis artibus, quum debellare possent, bellum traxisse. Id fædus inter omnes nobiles ictum: nec finem ante belli habituros, quam consulem vere plebeium, id est, hominem novum, fecissent: nam plebeios nobiles jam eisdem initiatos esse sacris, et contemnere plebem, ex quo contemni desierint a Patribus, cœpisse. Cui non id adparere, id actum et quæsumum esse, ut interregnum iniretur, ut in Patrum*

potestate comitia essent? Id consules ambos ad exercitum morando quæsisse: id postea, quia invitatis iis dictator esset dictus comitiorum caussa, expugnatum esse, ut vitiosus dictator per augures fieret. Habere igitur interregnū eos: consulatum unum certe plebis Romanæ esse: populum liberum habiturum ac daturum ei, qui magis vere vincere, quam diu imperare, malit.

U. C. 536.

A. C. 216.

XXXV. Quum his orationibus accensa plebs esset, tribus patriciis potentibus, P. Cornelio Merenda, L. Manlio Vulsone, M. Æmilio Lepido, duobus nobilibus jam familiarum plebei, C. Atilio Serrano et Q. Ælio Pæto, quorum alter pontifex, alter augur erat, C. Terentius consul unus creatur, ut in manu ejus essent comitia rogando collegæ. Tum experta nobilitas, parum fuisse virium in competitoribus, L. Æmilium Paullum, qui cum M. Livio consul fuerat, et damnatione collegæ, et sua prope, ambustus evaserat, infestum plebei, diu ac multum recusantem, ad petitionem compellit: is proximo comitiali die, concedentibus omnibus, qui cum Varrone certaverant, par magis in adversandum, quam collega, datur consuli. Inde prætoria comitia habita. Creati M'. Pomponius Matho et P. Furius Philus. Romæ juri dicundo urbana sors Pomponio, inter cives Romanos et peregrinos P. Furio Philo evenit. Additi duo prætores, M. Claudius Marcellus in Siciliam, L. Prætores.

Postumius Albinus in Galliam. Omnes absentes creati sunt; nec cuiquam eorum, præter Terentium consulem, mandatus honos, quem jam non antea gessisset, præteritis aliquot fortibus ac strenuis viris; quia in tali tempore nulli novus magistratus videbatur mandandus.

XXXVI. Exercitus quoque multiplicati sunt.

U. C. 536. Quantæ autem peditum equitumque additæ sint co-
A. C. 216. Exercitus multipli- piæ, adeo et numero et genere copiarum variant
ætati. auctores, ut vix quidquam satis certum adfirmare
ausim. Decem millia novorum militum alii scripta
in supplementum ; alii novas quatuor legiones, ut
octo legionibus rem gererent : numero quoque pe-
ditum equitumque legiones auctas, millibus peditum
et centenis equitibus in singulas adjectis ; ut quina
millia peditum, trecenti equites essent ; socii dupli-
cem numerum equitum darent, pedites æquarent.
Septem et octoginta millia armatorum et ducentos
in castris Romanis, quum pugnatum ad Cannas est,
quidam auctores sunt. Ilud haudquaquam discre-
pat, majore conatu atque inpetu rem actam, quam
prioribus annis ; quia spem, posse vincī hostem,
dictator præbuerat. Ceterum, priusquam signa ab
urbe novæ legiones moverent, decemviri libros adire
atque inspicere jussi propter territos vulgo homines
novis prodigiis : nam, et Romæ in Aventino et Ari-
ciae, nunciatum erat, sub idem tempus lapidibus plu-
isse : et multo cruento signa in Sabinis cædis, aquas
e fonte calidas manasse. Id quidem etiam, quod
sæpius acciderat, magis terrebat : et in via Forni-
cata, quæ ad Campum erat, aliquot homines de cœlo-
tacti exanimatique fuerant. Ea prodigia ex libris
procurata. Legati a Pæsto pateras aureas Romam
adtulerunt : iis, sicut Neapolitanis, gratiæ actæ, au-
rum non acceptum.

XXXVII. Per eosdem dies ab Hierone classis
Legati cum donis ab Hierone Ostiam cum magno commeatu accessit. Legati Sy-
missi. raeusani in senatum introducti nunciarunt : *Cædem C. Flaminii consulis exercitusque adlatum adeo ægre tulisse regem Hieronem, ut nulla sua propria regnique*

*sui clade moveri magis potuerit. Itaque, quinquam U. C. 536.
 probe sciat, magnitudinem populi Romani admirabili- A. C. 216.
 orem prope adversis rebus, quam secundis, esse; tamen
 se omnia, quibus a bonis fidelibusque sociis bella jurari
 soleant, misisse: quae ne accipere abiuant, magno opere
 se Patres conscriptos orare. Jam omnium primum omni-
 nis caussa Victoriam auream pondo trecentum viginti
 adferre sese: acciperent eam, tenerentque, et haberent
 propriam et perpetuam. Advexit etiam trecenta mil-
 lia modium tritici, ducenta hordei, ne commeatus dees-
 sent: et, quantum praeterea opus esset, quo jussissent,
 subvecturos. Milite atque equite scire, nisi Romano
 Latinique nominis, non uti populum Romanum: le-
 vium armatorum auxilia etiam externa vidisse in ca-
 stris Romanis. Itaque misisse mille sagittariorum ac
 funditorum, aptam manum adversus Balares ac Mau-
 ros, pugnacesque alias missili telo gentes. Ad ea dona
 consilium quoque addebant, Ut praetor, cui provincia
 Sicilia evenisset, classem in Africam trajiceret; ut et
 hostes in terra sua bellum haberent, minusque laxamenti
 daretur iis ad auxilia Hannibali submittenda. Ab se-
 natu ita responsum regi est: Virum bonum egregi-
 umque socium Hieronem esse, atque uno tenore, ex quo
 in amicitiam populi Romani venerit, fidem coluisse, ac
 rem Romanam omni tempore ac loco munifice adjurisse:
 id, perinde ac deberet, gratum populo Romano esse.
 Aurum et a civitatibus quibusdam adlatum, gratia rei
 accepta, non accepisse populum Romanum. Victoriam
 omenque accipere; sedemque ei se Divæ dare, dicare
 Capitolium, templum Jovis Optimi Maximi: in ea arce
 urbis Romanæ sacratam, volentem propitiamque, fir-
 mam ac stabilem fore populo Romano. Funditores,
 sagittariique, et frumentum traditum consulibus.*

U. C. 536. Quinqueremes ad navium classem, quæ cum T. Otacilio proprætore in Sicilia erant, quinque et viginti additæ, permissumque est, ut, si e republica censemret esse, in Africam trajiceret.

XXXVIII. Delectu perfecto, consules paucos morati dies, dum socii ab nomine Latino venirent. **Milites ju-** Milites tunc, quod numquam antea factum erat, **ju-** rejurando **rejurando** ab tribunis militum adacti, jussu **adacti.** consulum conventuros, neque injussu abituros: nam ad eam diem nihil præter sacramentum fuerat; et, ubi ad decuriatum aut centuriatum convenissent, sua voluntate ipsi inter se equites decuriati, centuriati pedites conjurabant, sese fugæ atque formidinis ergo non abituros, neque ex ordine recessuros, nisi teli sumendi, aut petendi, et aut hostis feriendi, aut ci-vis servandi caussa: id ex voluntario inter ipsos fædere a tribunis ad legitimam jurisjurandi adactio-nem translatum. Conciones, priusquam ab urbe signa moverentur, consulis Varronis multæ ac fe-roces fuere, denunciantes, bellum arcessitum in Italiæ ab nobilibus, mansurumque in visceribus re-publicæ, si plures Fabios imperatores haberet; se, quo die hostem vidisset, perfecturum. Collegæ ejus Paulli una, pridie quam ex urbe proficiserentur, concio fuit verior, quam gratior populo, qua nihil inclementer in Varronem dictum, nisi id modo; *Mirari se, quomodo quis dux, priusquam aut suum, aut hostium exercitum, locorum situm, naturam regionis nosset, jam nunc locatus in urbe sciret, quæ sibi agenda armato forent; et diem quoque prædicere posset, qua cum hoste signis conlatis esset dimicaturus.* Se, quæ consilia magis res dent hominibus, quam homines rebus, ea ante tempus immatura non præcepturum: optare,

*ut, quæ caute atque consulte gesta essent, satis pro- U. C. 536.
spere evenirent. Temeritatem, præterquam quod stulta A. C. 216.
sit, infelicem etiam ad id locorum fuisse. Id sua sponte
adparebat, tuta celeribus consiliis præpositurum : et,
quo id constantius perseveraret, Q. Fabius Maximus
sic eum proficiscentem allocutus fertur.*

XXXIX. *Si aut collegam (id quod mallem) tui si- Monet Fa-
milem, L. Æmili, haberet, aut tu collegæ tui similis bius Paul-
lum.
esses, supervacanea esset oratio mea : nam et duo boni
consules, etiam me indicente, omnia e republica fide ve-
stra faceretis : et mali nec mea verba auribus vestris,
nec consilia animis acciperetis. Nunc et collegam tuum
et te talem virum intuenti mihi tecum omnis oratio est :
quem video nequidquam et virum bonum et civem fore,
si altera parte claudicet respublica : malis consiliis idem
ac bonis juris et potestatis erit. Erras enim, L. Paulle,
si tibi minus certaminis cum C. Terentio, quam cum
Hannibale, futurum censes : nescio, an infestior hic ad-
versarius, quam ille hostis maneat : cum illo in acie
tantum, cum hoc omnibus locis ac temporibus certatu-
rus es : et adversus Hannibalem legionesque ejus tuis
equitibus ac peditibus pugnandum tibi est : Varro dux
tuis militibus te est obpugnaturus. Ominis etiam tibi
caussa absit C. Flaminii memoria : tamen ille consul
demum, et in provincia, et ad exercitum, cœpit furere.
Hic, priusquam peteret consulatum, deinde in petendo
consulatu ; nunc quoque consul, priusquam castra vi-
deat aut hostem, insunit : et, qui tantas jam nunc pro-
cellas, prælia atque acies jactando, inter togatos ciet,
quid inter armatam juventutem censes facturum, et ubi
extemplo verba res sequitur ? Atqui si hic, quod factu-
rum se denunciat, extemplo pugnaverit ; aut ego rem
militarem, belli hoc genus, hostem hunc ignoro, aut no-*

U. C. 536. *bilior alius Trasimeno locus nostris cladibus erit. Nec
A. C. 216.*

gloriandi tempus adversus unum est; ut ego, contemnendo potius, quam adpetendo, gloriam, modum excesserim. Sed ita res habet: una ratio belli gerendi adversus Hannibalem est, qua ego gessi: nec eventus modo hoc docet, (*stultorum iste magister est*) sed eadem ratio, quæ fuit, futuraque, donec res eadem manebunt, inmutabilis est. In Italia bellum gerimus, in sede ac solo nostro: omnia circa plena civium ac sociorum sunt: armis, viris, equis, commeatibus juvant, juvabuntque: id jam fidei documentum in adversis rebus nostris dederunt: meliores, prudentiores, constantiores nos tempus diesque facit. Hannibal contra in aliena, in hostili est terra, inter omnia inimica infestaque, procul ab domo, procul ab patria: neque illi terra, neque mari est pax: nullæ eum urbes accipiunt, nulla mænia: nihil usquam sui videt: in diem rapto rivot. Partem vix tertiam exercitus ejus habet, quem Iberum amnem trajecit: plures fames, quam ferrum, absursum sit; nec his paucis jam victus subpeditat. Dubitas ergo, quin sedendo superaturi simus eum, qui sencscat in dies? non commeatus, non subplementum, non pecuniam habeat? Quamdiu pro Geronii, castelli Apuliæ inopis, tamquam pro Karthaginis mæniibus? Sed ne adversus te quidem ego gloriabor. Cn. Servilius atque Atilius, proximi consules, ride, quemadmodum eum ludificati sint. Hæc una salutis est via, L. Paulle, quam difficilem infestamque cives sibi magis, quam hostes, facient. Idem enim tui, quod hostium milites, roalent; idem Varro, consul Romanus, quod Hannibal, Pænus imperator, cupiet: duobus ducibus unus resistas, oportet: resistes autem, adversus famam rumoresque hominum si satis firmus steteris: si te neque collegæ vana

gloria, neque tua falsa infamia moverit. *Veritatem U. C. 536.*
laborare nimis sëpe, aiunt, exstingui numquam. Glo-^{A. C. 216.}
riam qui spreverit, veram habebit. Sine, timidum pro
cauto, tardum pro considerato, inbellem pro perito bel-
li rocent: malo te sapiens hostis metuat, quam stulti
cives laudent. Omnia audentem contemnet Hannibal;
nil temere agentem metuet. Nec ego, ut nihil agatur,
moneo; sed ut agentem te ratio ducat, non fortuna:
tuae potestatis semper, tuaque omnia sint: armatus in-
tentusque sis, neque occasioni tuae desis, neque suam oc-
casionem hosti des. Omnia non properanti clara cer-
taque erunt: festinatio improvida est et cœca.

XL. Adversus ea oratio consulis haud sane læta
 fuit, magis fatentis, ea, quæ diceret, vera, quam fa-
 cilia factu, esse. *Dictatori magistrum equitum into-*^{Paulli re-}
lerabilem fuisse; quid consuli adversus collegam sedi-^{sponsum.}
tiosum ac temerarium virium atque auctoritatis fore?
Se populare incendium priore consulatu semiustum ef-
fugisse: optare, ut omnia prospere evenirent: at, si
quid adversi caderet, hostium se telis potius, quam suf-
fragiis iratorum civium, caput objecturum. Ab hoc
 sermone profectum Paullum tradunt, prosequenti-
 bus primoribus Patrum. Plebeium consulem sua
 plebes prosecuta, turba, quam dignitate, conspec-
 tior. Ut in castra venerunt, permixto novo exer-
 citu ac vetere, castris bifariam factis, ut nova mino-
 ra essent proprius Hannibalem, in veteribus major
 pars et omne robur virium esset; tum consulum an-
 ni prioris M. Atilium, ætatem excusantem, Romam
 miserunt; Geminum Servilium in minoribus castris
 legioni Romanæ et sociūm peditum equitumque
 duobus millibas præficiunt. Hannibal, quamquam ^{Hannibalis} parte dimidia auctas hostium copias cernebat, tamen ^{angustia}

U. C. 536. adventu consulum mire gaudere: non solum enim
 A. C. 216. nihil ex raptis in diem commeatibus superabat, sed
 ne, unde raperet, quidem quidquam reliqui erat, om-
 ni undique frumento, postquam ager parum tutus
 erat, in urbes munitas convecto: ut vix decem die-
 rum (quod compertum postea est) frumentum super-
 esset, Hispanorumque ob inopiam transitio parata
 fuerit, si maturitas temporum exspectata foret.

XLI. Ceterum temeritati consulis ac præpropero
 ingenio materiam etiam fortuna dedit: quod in pro-
 hibendis prædatoribus tumultuario prælio, ac pro-
 cursu magis militum, quam ex præparato aut jussu
 imperatorum, orto, haudquaquam par Pœnis dimi-
 catio fuit: ad mille et septingenti cæsi, non plus
 centum Romanorum sociorumque occisis: ceterum
 victoribus effuse sequentibus metu insidiarum obsti-
 tit Paullus consul; cuius eo die (nam alternis im-
 peritabant) imperium erat, Varrone indignante ac
 vociferante, emissum hostem e manibus; debellari-
 que, ni cessatum foret, potuisse. Hannibal id dam-
 num haud ægerrime pati: quin potius credere, vel-
 ut inescatam temeritatem ferocioris consulis ac no-
 vorum maxime militum esse: et omnia ei hostium,
 haud secus quam sua, nota erant: dissimiles discor-
 desque imperitare, duas prope partes tironum mili-
 tum in exercitu esse. Itaque, locum et tempus in-
 sidiis aptum se habere ratus, nocte proxima nihil
 præter arma ferentes secum milites ducens, castra
 plena omnis fortunæ publicæ privatæque relinquit;
 transque proximos montes læva pedites instructos
 condit, dextra equites, impedimenta per convallem,
 medium agmen, traducit: ut diripiendis velut de-
 sertis fuga dominorum castris occupatum impedi-

Pabulato-
res Pœnos
cædunt
Romani.

Hanni-
balis in-
sidiæ.

tumque hostem obprimeret. Crebri relictii in castris U.C. 536.
ignes, ut fides fieret, dum ipse longius spatium fuga A.C. 216.
præciperet, falsa imagine castrorum (sicut Fabium
priore anno frustratus esset) tenere in locis consules
voluisse.

XLII. Ubi inluxit, subductæ primo stationes, de-
inde propius adeuntibus insolitum silentium admirationem fecit. Jam satis comperta solitudine, in cas-
tris concursus fit ad prætoria consulum, nunciantum fugam hostium adeo trepidam, ut, tabernaculis stan-
tibus, castra reliquerint: quoque fuga obscurior es-
set, crebros etiam relictos ignes. Clamor inde ortus,
ut signa proferri juberent, ducerentque ad perse-
quendos hostes, ac protinus castra diripienda. Et consul alter velut unus turbæ militaris erat. Paullus etiam atque etiam dicere, providendum præca-
vendumque esse: postremo, quum aliter neque sedi-
tionem neque ducem seditionis sustinere posset, Ma-
rium Statilium præfectum cum turma Lucana explo-
ratum mittit: qui, ubi adequitavit portis, subsistere extra munimenta ceteris jussis, ipse cum duobus equitibus vallum intravit: speculatusque omnia cum cura renunciat, insidias profecto esse: ignes in parte castrorum, quæ vergat in hostem, relictos: taberna-
cula aperta, et omnia cara in promtu relicita: argen-
tum quibusdam locis temere per vias, velut objectum ad prædam, vidisse. Quæ ad deterrendos a cupiditate animos nunciata erant, ea accenderunt; et, clamo-
re orto a militibus, *ni signum detur, sine ducibus ituros*, haudquaquam dux defuit: nam exemplo Varro signum dedit proficisciendi. Paullus, quum ei sua sponte cunctanti pulli quoque auspicio non addixi-
sent, obnunciarum jam efferenti porta signa collegæ jus-

U.C. 536. sit: quod quamquam Varro ægre est passus, Flami-
 A.C. 216. nii tamen recens casus, Claudiique consulis primo
 Punico bello memorata navalis clades, religionem
 animo incussit. Dii prope ipsi eo die magis distul-
 lere, quam prohibuere, imminentem pestem Roma-
 nis: nam forte ita evenit, ut, quum referri signa in
 castra jubenti consuli milites non parerent, servi
 duo, Formiani unus, alter Sidicini equitis, qui, Ser-
 vilio atque Atilio consulibus, inter pabulatores ex-
 cepti a Numidis fuerant, profugerent eo die ad do-
 minos: qui deducti ad consules nunciant, omnem ex-
 ercitum Hannibalis trans proximos montes sedere in
 insidiis. Horum opportunus adventus consules im-
 perii potentes fecit, quum ambitio alterius suam pri-
 mum apud eos prava indulgentia majestatem solvis-
 set.

XLIII. Hannibal, postquam motos magis inconsulte Romanos, quam ad ultimum temere evectione, vedit; nequidquam, detecta fraude, in castra redit. Ibi plures dies propter inopiam frumenti manere ne-
 quibat; novaque consilia in dies non apud milites solum, mixtos ex conluvione omnium gentium, sed

Hanniba-
lis inopia
et anxie-
tas.

etiam apud ipsum ducem, oriebantur: nam quum initio fremitus, deinde aperta vociferatio fuisse ex- poscentium stipendum debitum, querentiumque annonam primo, postremo famem; et mercenarios milites, maxime Hispani generis, de transitione cepisse consilium fama esset: ipse etiam interdum Hannibal de fuga in Galliam dicitur agitasse, ita ut, relicto peditatu omni, cum equitibus se proriperet. Quum hæc consilia atque hic habitus animorum esset in castris, moyere inde statuit, in calidiora atque eo maturiora messibus Apuliae loca: simul ut, quo lon-

Castra
moyet.

gius ab hoste recessisset, transfugia impeditiora levi- U. C. 536.
bus ingeniis essent. Profectus est nocte, ignibus si- A. C. 216.
militer factis, tabernaculisque paucis in speciem re-
lictis, ut insidiarum par priori metus contineret Ro-
manos. Sed, per eumdem Lucanum Statilium, omni-
bus ultra castra transque montes exploratis, quum
relatum esset, visum procul hostium agmen; tum
de insequendo eo consilia agitari cœpta. Quum
utriusque consulis eadem, quæ semper ante, fuisse
sententia; ceterum Varroni fere omnes, Paullo ne-
mo, præter Servilium prioris anni consulem, adsen-
tiretur; majoris partis sententia ad nobilitandas cla-
de Romana Cannas, urgente fato, profecti sunt. Ad Cannas
Prope eum vicum Hannibal castra posuerat aversa a ^{castra po-}
Vulturno vento, qui campis torridis siccitate nubes
pulveris vehit: id quum ipsis castris percommodum
fuit, tum salutare præcipue futurum erat, quum
aciem dirigerent, ipsi aversi, terga tantum adflante
vento, in obcæcatum pulvere effuso hostem pugna-
turi.

XLIV. Consules, satis exploratis itineribus, se- Romani
quentes Pœnum, ut ventum ad Cannas est, ubi in ^{bina castra} muniunt.
conspectu Pœnum habebant, bina castra communi-
unt, eodem ferme intervallo, quo ad Geronium, sic-
ut ante, copiis divisis. Aufidus amnis, utrisque cas-
tris adfluens, aditum aquatoribus ex sua ejusque
opportunitate haud sine certamine dabat: ex mino-
ribus tamen castris, quæ posita trans Aufidum erant,
liberius aquabantur Romani, quia ripa ulterior nul-
lum habebat hostium præsidium. Hannibal spem
nactus, locis natis ad equestrem pugnam, qua parte
virium invictus erat, facturos copiam pugnandi con-
sules, dirigit aciem, lacescitque Numidarum procur-

U.C. 536. satione hostes. Inde rursus sollicitari seditione mi-
 A.C. 216. litari ac discordia consulum Romana castra : quum
 Discordia coss. Paulus Semproniique et Flaminii temeritatem Var-
 roni, Varro speciosum timidis ac segnibus ducibus
 exemplum Fabium objiceret : testareturque Deos
 hominesque hic, *nullam penes se culpam esse, quod Hannibal jam velut usucepisset Italiam : se constrictum a collega teneri ; ferrum atque arma iratis et pugnare cupientibus adimi militibus* ; ille, si quid projectis ac
proditis ad inconsultam atque improvidam pugnam legionibus accideret, se omnis culpea exortem, omnis even-
tus participem fore diceret : videret, ut, quibus lingua
tam promta ac temeraria, æque in pugna vigerent manus.

XLV. Dum altercationibus magis, quam consiliis, tempus teritur, Hannibal ex acie, quam ad multum diei tenuerat instructam, quum in castra ceteras reciperet copias, Numidas ad invadendos ex minoribus castris Romanorum aquatores trans flumen mittit : quam inconditam turbam quum vixdum in ripam egressi clamore ac tumultu fugassent, in stationem quoque pro vallo locatam atque ipsas proprie portas evecti sunt. Id vero indignum visum, ab tumultuorio auxilio jam etiam castra Romana terrori : ut ea modo una caussa, ne exemplo transirent flumen, dirigerentque aciem, tenuerit Romanos, quod summa imperii eo die penes Paullum fuerit.

Varro signum pugnæ proponit. Itaque Varro postero die, cui sors ejus diei imperii erat, nihil consulto collega, signum pugnæ proposuit, instructasque copias flumen traduxit, sequente Paullo ; quia magis non probare, quam non adjuvare, consilium poterat. Transgressi flumen eas quoque, quas in castris minoribus habuerant, copias

suis adjungunt : atque ita instructa acie, in dextro U. C. 536.
cornu (id erat flumini proprius) Romanos equites lo- A. C. 216.
cant, deinde pedites : lævum cornu extremi equites
sociorum, intra pedites, ad medium juncti legionibus
Romanis tenuerunt jaculatores : ex ceteris levium
armorum auxiliis prima acies facta. Consules cor-
nua tenuerunt ; Terentius lævum, Æmilius dex-
trum. Gemonio Servilio media pugna tuenda data.

XLVI. Hannibal luce prima, Baliliaribus levique Hannibal
alia armatura præmissa, transgressus fluumen, ut aciem in-
struit. quoque traduxerat, ita in acie locabat. Gallos
Hispanosque equites prope ripam lævo in cornu ad-
versus Romanum equitatum : dextrum cornu Numi-
dis equitibus datum, media acie peditibus firmata ;
ita, ut Afrorum utraque cornua essent, interpone-
rentur his medii Galli atque Hispani. Afros Roma-
nam magna ex parte crederes aciem : ita armati
erant, armis et ad Trebiam, ceterum magna ex par-
te ad Trasimenum captis. Gallis Hispanisque scuta
ejusdem formæ fere erant : dispare ac dissimiles
gladii : Gallis prælongi ac sine mucronibus : His-
pano, punctum magis, quam cæsim, adsueto petere
hostem, brevitatem habiles et cum mucronibus : ante
ceteros habitus gentium harum tum magnitudine
corporum, tum specie terribilis erat. Galli super
umbilicum erant nudi : Hispani linteis prætextis
purpura tunicis, candore miro fulgentibus, consti-
rant. Numerus omnium peditum, qui tum stete-
runt in acie, millium fuit quadraginta, decem equi-
tum. Duces cornibus præerant : sinistro Hasdru-
bal, dextro Maharbal : medium aciem Hannibal ipse
cum fratre Magone tenuit. Sol, seu de industria
ita locatis, seu quod forte ita starent, peropportune

U. C. 536. utriusque parti obliquus erat, Romanis in meridiem,

A. C. 216. Pœnis in septentrionem versis : ventus, (Vulturnum incolæ regionis vocant) adversus Romanis coortus, multo pulvere in ipsa ora volvendo prospectum admitt.

Prælium
ad Can-
nas.

XLVII. Clamore sublato, procursum ab auxiliis, et pugna levibus primum armis commissa : deinde equitum Gallorum Hispanorumque lœvum cornu cum dextro Romano concurrit, minime equestris more pugnæ : frontibus enim adversis concurrendum erat, quia, nullo circa ad evagandum relieto spatio, hinc amnis, hinc peditum acies claudebant in directum utrimque nitentes. Stantibus ac confertis postremo turba equis, vir virum amplexus detrahebat equo : pedestre magna jam ex parte certamen factum erat : acrius tamen, quam diutius, pugnatum est ; pulsique Romani equites terga vertunt. Sub equestris finem certaminis coorta est peditum pugna : primo et viribus et animis parés constabant ordines Gallis Hispanisque : tandem Romani, diu ac sæpe connisi, æqua fronte acieque densa inpulere hostium cuneum nimis tenuem, eoque parum validum, a cetera prominentem acie : impulsis deinde ac trepide referentibus pedem insistere : ac tenore uno per præceps pavore fugientium agmen in medium primum aciem inlati, postremo, nullo resistente, ad subsidia Afrorum pervenerunt ; qui utrumque redditis alis constiterant, media, qua Galli Hispanique steterant, aliquantum prominente acie : qui cuneus ut pulsus æquavit frontem primum, deinde nitendo etiam sinum in medio dedit, Afri circa jam cornua fecerant ; inruentibusque incaute in medium Romanis, circumdedere alas : mox, cornua extendendo,

clausere et ab tergo hostes. Hinc Romani, defuncti U. C. 536.
nequidquam prælio uno, omissis Gallis Hispanisque, A. C. 216.
quorum terga ceciderant, etiam adversus Afros inte-
gram pugnam ineunt, non tantum eo iniquam, quod
inclusi adversus circumfusos, sed etiam quod fessi
cum recentibus ac vegetis pugnabant.

XLVIII. Jam et in sinistro cornu Romano, ubi
sociorum equites adversus Numidas steterant, con-
sertum prælium erat, segne primo, et a Punica cœp-
tum fraude. Quingenti ferme Numidæ, præter so-
lita arma telaque, gladios occultos sub loricis ha-
bentes, specie transfugarum quum ab suis, parmas
post terga habentes, adequitassent, repente ex equis
desiliunt; parmisque et jaculis ante pedes hostium
projectis, in medium aciem accepti, ductique ad ul-
timos, considere ab tergo jubentur; ac, dum præ-
lium ab omni parte conseritur, quieti manserunt:
postquam omnium animos oculosque occupaverat
certamen, tum, adreptis scutis, quæ passim inter
acervos cæsorum corporum strata erant, aversam
adoriuntur Romanam aciem; tergaque ferientes, ac
poplites cædentes, stragem ingentem, ac majorem
aliquanto pavorem ac tumultum, fecerunt. Quum
alibi terror ac fuga, alibi pertinax in mala jam spe
prælium esset; Hasdrubal, qui ea parte præerat,
subductos ex media acie Numidas, quia segnis eorum
cum adversis pugna erat, ad persecundos passim
fugientes mittit: Hispanos et Gallos pedites, jam
Afris prope fassis, cæde magis quam pugna, adjun-
git.

XLIX. Parte altera pugnæ Paullus, quamquam
primo statim prælio funda graviter ictus fuerat, ta-
nuen et obcurrit sæpe cum confertis Hannibali, et

U.C. 536. aliquot locis prœlium restituit, protegentibus eum
 A. C. 216. equitibus Romanis; omissis postremo equis, quia
 consulem et ad regendum equum vires deficiebant:
 tum denuncianti cuidam, jussisse consulem ad pedes
 descendere equites, dixisse Hannibalem ferunt:

Vincit Hannibal. *Quam mallem, vincitos mihi traderet!* Equitum pedes-
 tre prœlium, quale jam haud dubia hostium victoria,
 fuit; quum victi mori in vestigio mallent, quam fu-
 gere; victores, morantibus victoriam irati, trucida-
 rent, quos pellere non poterant: pepulerunt tamen
 jam paucos superantes, et labore ac vulneribus fes-
 sos. Inde dissipati omnes sunt, equosque ad fugam,
 qui poterant, repetebant. Cn. Lentulus tribunus
 militum, quum, prætervehens equo, sedentem in saxo

L. Æmilius cruore oppletum consulem vidisset: *L. Æmili, in-*
cos. mors. *quit, quem unum insontem culpæ cladis hodiernæ Dii*
respicere debent, cape hunc equum: dum et tibi virium
aliquid superest, comes ego te tollere possum ac prote-
gere: ne funestam hanc pugnam morte consulis feceris.
Etiam sine hoc lacrimarum satis luctusque est. Ad ea
consul: Tu quidem, Cn. Corneli, macte virtute esto!
Sed care, frustra miserando exignum tempus e manibus
hostium evadendi absumas. Abi, nuncia publice Pa-
tribus, urbem Romanam muniāt, ac prius, quam hos-
tis victor adreniat, præsidiis firment: priratimque Q.
Fabio, L. Æmiliūm præceptorum ejus memorem et vir-
isse, et adhuc mori. Me in hac strage militum meo-
rum patere exspirare, ne aut reus iterum e consulatu
sim, aut accusator collegæ exsistam, ut alieno crimine
innocentiam meam protegam. Hæc exigentes prius
turba fugientium civium, deinde hostes, obpressere:
consulem, ignorantes quis esset, obruere telis:
Lentulum inter tumultum abripuit equus: tum

inde effuse fugiunt. Septem millia hominum in U. C. 536.
minora castra, deceni in majora, duo ferme in vicum
ipsum Cannas perfugerunt: qui extemplo a Kartha-
lone atque equitibus, nullo munimento tegente vi-
cium, circumventi sunt. Consul alter, seu forte, seu
consilio, nulli fugientium infestus agmini, cum sep-
tuaginta fere equitibus Venusiam perfugit. Qua- Clades
draginta millia peditum, duo millia septingenti equi- quanta
fuerit.
tes, et tanta prope civium sociorumque pars, cæsi
dicuntur; in his ambo consulum quæstores L. Ati-
lius et L. Furius Bibaculus: unus et viginti tri-
buni militum; consulares quidam prætoriique et
ædilicij: inter eos Cn. Servilium Geminum et M.
Minucium numerant, qui magister equitum priore
anno, aliquot ante consul fuerat: octoginta præter-
ea aut senatores, aut qui eos magistratus gessissent,
unde in senatum legi deberent, quum sua voluntate
milites in legionibus facti essent. Capta eo prœ-
lio tria millia peditum et equites trecenti dicuntur.

L. Hæc est pugna Cannensis, Alliensi cladi nobilitate par: ceterum ut illis, quæ post pugnam accidere, levior, quia ab hoste cessatum est; sic strage exercitus gravior fœdiorque: fuga namque ad Aliliam sicut urbem prodidit, ita exercitum servavit: ad Cannas fugientem consulem vix septuaginta secuti sunt: alterius morientis prope totus exercitus fuit. Binis in castris quum multitudo semiermis sine du-
cibus esset, nuncium, qui in majoribus erant, mit-
tunt; dum prælio, deinde ex lætitia epulis fatigatos,
quies nocturna hostes premeret, ut ad se transirent: uno
agmine Canusium abituros esse. Eam sententiam alii Canusium
totam adspernari: Cur enim illos, qui se arcessant, multi Ro-
manorum manorum
ipsos non venire, quum aq[ue] conjungi possent: quia fugiunt.

U. C. 536. videlicet plena hostium omnia in medio essent : et aliorum, quam sua, corpora tanto periculo mallent objicere.
A. C. 216.

Aliis non tam sententia displicere, quam animus deesse. P. Sempronius Tuditanus tribunus militum, *Capi ergo mavultis, inquit, ab avarissimo et crudelissimo hoste, æstimarique capita vestra, et exquiri pretia ab interrogantibus, Romanus civis sis, an Latinus socius, ut ex tua contumelia et miseria alteri honos quæratur ? Non tu : si quidem L. Æmilii consulis, qui se bene mori, quam turpiter vivere, maluit, et tot fortissimorum virorum, qui circa eum cumulati jacent, cives estis. Sed ante, quam obprimit lux, majoraque hostium agmina obsepiunt iter, per hos, qui inordinati atque incompositi obstrepunt portis, erumpamus. Ferro atque audacia via fit, quamvis per confertos hostes : cuneo quidem hoc laxum atque solutum agmen, ut si nihil obstat, transibimus. Itaque ite mecum, qui et vosmetipsos et rempublicam salvam vultis.* Hæc ubi dicta dedit, stringit gladium, cuneoque facto per medios vadit hostes : et, quum in latus dextrum, quod patebat, Numidæ jacularentur, translatis in dextrum scutis, in majora castra ad sexcentos evaserunt : atque inde protinus, alio magno agmine adjuncto, Canusium incolumes pervenient. Hæc apud victos magis in petu animorum, quod ingenium suum cuique aut fors dabat, quam ex consilio ipsorum, aut imperio cujusquam, agebantur.

Hannibal
victoria
uti nescit.

LI. Hannibali victori quum ceteri circumfusi gratularentur, suaderentque, ut, tanto perfunctus bello, diei quod reliquum esset, noctisque insequentis, quietem et ipse sibi sumeret, et fessis daret militibus ; Maharbal, præfectus equitum, minime cessandum ratus, *Immo, ut, quid hac pugna sit actum, scias, die*

*quinto, inquit, victor in Capitolio epulaberis. Sequere : U. C. 536.
cum equite, ut prius venisse, quam venturum, sciant, A. C. 216.
præcedam.* Hannibali nimis læta res est visa, ma-
jorque, quam ut eam statim capere animo posset.
Itaque, voluntatem se laudare Maharbalis, ait : *ad
consilium pensandum temporis opus esse.* Tum Ma-
harbal, *Non omnia, nimirum, eidem Dii dedere : vin-
cere scis, Hannibal; victoria uti nescis.* Mora ejus
diei satis creditur saluti fuisse urbi atque imperio.
Postero die ubi primum inluxit, ad spolia legenda
fœdumque etiam hostibus spectandam stragem in-
sistunt. Jacebant tot Romanorum millia, pedites Strages
passim equitesque, ut quem cuique fors aut pugna ^{etiam} hostibus
junxerat aut fuga : adsurgentes quidam ex strage miserabi-
media cruenti, quos stricta matutino frigore excita-
verant vulnera, ab hoste obpressi sunt. Quosdam
et jacentes vivos succisis feminibus poplitibusque
invenerunt, nudantes cervicem jugulumque, et reli-
quum sanguinem jubentes haurire. Inventi sunt
quidam mersis in effossam terram capitibus, quos
sibi ipsos fecisse foveas, obruentesque ora superjecta
humo interclusisse spiritum adparebat. Præcipue
convertit omnes substratus Numida mortuo superin-
cubanti Romano vivus, naso auribusque laceratis :
quum, manibus ad capiendum telum inutilibus, in
rabiem ira versus, laniando dentibus hostem exspi-
rasset.

LII. Spoliis ad multum diei lectis, Hannibal ad Bina Ro-
minora dicit castra obpugnanda, et omnium pri- ^{mianorum}
mum, brachio objecto, flumine eos excludit. Cete- ^{castra se}
rum ab omnibus, labore, vigiliis, vulneribus etiam ^{dedunt} ^{victori.}
fassis, maturior ipsius spe deditio est facta : pacti,
ut arma atque equos traderent, in capita Romana

U.C. 536. trecenis nummis quadrigatis, in socios ducenis, in
 A.C. 216. servos centenis, et ut, eo pretio persoluto, cum singulis abirent vestimentis, in castra hostes acceperunt; traditique in custodiam omnes sunt, seorsum cives sociique. Dum ibi tempus teritur, interea quum ex majoribus castris, quibus satis virium aut animi fuit, ad quatuor millia hominum et ducenti equites, alii agmine, alii palati passim per agros, quod haud minus tutum erat, Canusium perfugissent, castra ipsa ab sauciis timidisque eadem conditione, qua altera, tradita hosti. Præda ingens parta est: et, præter equos virosque, et si quid argenti, (quod plurimum in phaleris equorum erat; nam ad vescendum facto perexiguo, utique militantes, utebantur) omnis cetera præda diripienda data est. Tum sepelendi caussa conferri in unum corpora suorum jussit. Pœnorum ad octo millia in acie cæsi. Ad octo millia fuisse dicuntur fortissimorum viorum. Consulem quoque Romanum conquisitum sepultumque, quidam auctores sunt. Eos, qui Canusium perfugerant, mulier Apula, nomine Busa, genere clara ac divitiis, mœnibus tantum tectisque a Canusinis acceptos, frumento, veste, viatico etiam juvit; pro qua ei munificentia postea, bello perfecto, ab senatu honores habitи sunt.

LIII. Ceterum, quum ibi tribuni militum quatuor essent, Fabius Maximus de legione prima, cuius pater priore anno dictator fuerat, et de legione secunda L. Publicius Bibulus et P. Cornelius Scipio, et de legione tertia Ap. Claudius Pulcher, qui proxime ædilis fuerat; omnium consensu ad P. Scipionem, admodum adolescentem, et ad Ap. Claudium summa imperii delata est: quibus consultantibus inter paucos de summa rerum nunciat P. Furius Philus, con-

sularis viri filius, *Nequidquam eos perditam spem fo-* U.C. 536.
vere : desperatam comploratamque rem esse publicam. A.C. 216.
Nobiles juvenes quosdam, quorum principem L. Cæci- Conjuratio
lum Metellum, mare ac naves spectare, ut, deserta rendæ Ita-
Italia, ad regem aliquem transfugiant. Quod malum, sa.
præterquam atrox, super tot clades etiam novum,

quum stupore ac miraculo torpidos defixisset, et,
qui aderant, consilium advocandum de eo censerent ;
negat consilii remi esse Scipio juvenis, fatalis dux
hujusce belli. Audendum atque agendum, non con-
sultandum, ait, in tanto malo esse. Irent secum ex-
templo armati, qui rempublicam salvam vellent : nullo
verius, quam ubi ea cogitentur, hostium castra esse.

Pergit ire, sequentibus paucis, in hospitium Metelli : A Scipione
 et, quum concilium ibi juvenum, de quibus adlatum obprimitur.
 erat, invenisset, stricto super capita consultantium
 gladio, *Ex mei animi sententia, inquit, ut ego rem-*
publicam populi Romani non deseram, neque alium ci-
vem Romanum deserere patiar. Si sciens fallo, tum
me, Jupiter optime maxime, domum, familiam, rem-
que meam pessimo leto adficias ! In hæc verba, L. Cæ-
cili, jures, postulo, ceterique, qui adestis : qui non ju-
raverit, in se hunc gladium strictum esse sciat. Haud
 secus pavidi, quam si victorem Haunibalem cerne-
 rent, jurant omnes : custodiendosque semet ipsos
 Scipioni tradunt.

LIV. Eo tempore, quo hæc Canusii agebantur, Venusiam
 Venusiam ad consulem ad quatuor millia peditum ex fuga
 equitumque, qui sparsi fuga per agros fuerant, per- coeunt ad
 venere. Eos omnes Venusini per familias benigne quatuor
 accipiendos curandosque quuni divisissent, in singu- hominum
 los equites togas et tunicas et quadrigatos nummos
 quinos vicenos, et peditibus denos, et arma, quibus millia.

U. C. 536. deerant, dederunt: ceteraque publice ac privatim
A. C. 216. hospitaliter facta: certatumque, ne a muliere Ca-
nusina populus Venusinus officiis vinceretur. Sed
gravius onus Busæ multitudo faciebat, et jam ad
decem millia hominum erant. Appiusque et Scipio,
postquam incolumem esse alterum consulem acce-
perunt, nuncium extemplo mittunt, quantæ secum
peditum equitumque copiæ essent: sciscitatumque
simul, utrum Venusiam adduci exercitum, an ma-
nere juberet Canusii? Varro ipse Canusium copias
traduxit: et jam aliqua species consularis exercitus
erat; mœnibusque se certe, si non armis, ab hoste
Pavor Ro- videbantur defensuri. Romam, ne has quidem re-
mæ max- liquias superesse civium sociorumque, sed occidione
imus. occisos cum duobus exercitibus consules, deletasque
omnes copias, adlatum fuerat. Numquam, salva
urbe, tantum pavoris tumultusque intra mœnia Ro-
mana fuit: itaque subcumbam oneri, neque adgre-
diar narrare, quæ edissertando minora vero fecero.
Consule exercituque ad Trasimenum priore anno
amisso, non vulnus super vulnus, sed multiplex
clades, cum duobus consulibus duo consulares ex-
ercitus amissi nunciabantur: nec ulla jam castra
Romana, nec ducem, nec militem esse: Hannibalis
Apuliam, Saninium, ac jam prope totam Italianam
factam. Nulla profecto alia gens tanta mole cladis
non obruta esset. Comparem cladem ad Ægates
insulas Karthaginiensium prœlio navali acceptam,
qua fracti Sicilia ac Sardinia cessere, hinc vectigales
ac stipendiarios fieri se passi sunt? aut pugnam ad-
versam in Africa, cui postea hic ipse Hannibal sub-
cubuit? nulla ex parte comparandæ sunt, nisi quod
minore animo latæ sunt.

LV. P. Furius Philus et M'. Pomponius prætores U. C. 536.
 senatum in curiam Hostiliam vocaverunt, ut de ur- A. C. 216.
 bis custodia consulerent: neque enim dubitabant, Senatus
 deletis exercitibus, hostem ad obpugnandam Ro- consultur
 mam, quod unum opus belli restaret, venturum. de urbis
 clamor lamentantium mulierum, et, nondum palam
 facto, vivi mortuique per omnes pene domos pro- custodia.
 miscue complorarentur; tum Q. Fabius Maximus Sententia
 censuit, *equites expeditos et Appia et Latina via mit-* Fabii Max.
tendos, qui, obvios percunctando aliquos profectos ex
fuga, passim dissipatos, forte referant, quæ fortuna
consulum atque exercituum sit; et si quid Dii immor-
tales, miseriti imperii, reliquum Romano nomini fece-
rint: ubi eæ copiae sint: quo se Hannibal post prælium
contulerit: quid paret, quid agat, acturusque sit. Hæc
exploranda noscendaque per in pigros juvenes esse: il-
lud per Patres ipsos agendum, quoniam magistratum
parum sit, ut tumultum ac trepidationem in urbe tol-
lant, metronas publico arceant, continerique intra suum
quamque limen cogant: comploratus familiarum coér-
ceant: silentium per urbem faciant: nuncios rerum
omnium ad prætores deducendos curent: suæ quisque
fortunæ domi auctorem exspectent, custodesque præterea
ad portas ponant, qui prohibeant, quemquam egredi
urbem; cogantque homines nullam, nisi urbe ac mani-
bis salvis, salutem sperare. Ubi conticuerit tumultus,
recte tum in curiam Patres revocandos, consulendumque
de urbis custodia esse.

LVI. Quum in hanc sententiam pedibus omnes
 issent, submotaque foro per magistratus turba, Pa-
 tres diversi ad sedāndos tumultus discessissent; tun

U. C. 536. demum literæ a Terentio consule adlatæ sunt ; L.
A. C. 216. *Æmilium consulem exercitumque cæsum ; sese Canusii esse, reliquias tantæ cladis velut ex naufragio conligentem : ad decem millia militum ferme esse incompositorum inordinatorumque. Pœnum sedere ad Cannas, in captivorum pretiis prædaque alia, nec victoris animo, nec magni ducis more, nundinantem.*

Tum privatæ quoque per domos clades vulgatæ sunt ; adeoque totam urbem opplevit luctus, ut sacrum anniversarium

Cereris sa-
cerum in-
termis-
sum.

*Cereris intermissum sit ; quia nec lugentibus id facere est fas, nec ulla in illa tempestate matrona expers luctus fuerat. Itaque, ne ob eamdem caussam alia quoque sacra publica aut privata desererentur, senatusconsulto diebus triginta luctus est finitus. Ceterum quum sedato urbis tumultu, revocati in curiam Patres essent, aliæ insuper ex Sicilia literæ adlatæ sunt ab T. Otacilio pro prætore, *Regnum Hieronis classe Punica vastari : cui quum opem inploranti ferre vellet, nunciatum sibi esse, aliam classem ad Ægates insulas stare, paratam instructamque ; ut, ubi se versum ad tuendam Syracusanam oram Pœni sensissent, Lilybæum extemplo provinciamque aliam Romanam adgredierentur : itaque classe opus esse, si regem socium Siciliamque tueri vellent.**

LVII. Literis consulis prætorisque lectis, M. Claudium, qui classi ad Ostiam stanti præasset, Canusium ad exercitum mittenendum, scribendumque consuli, ut, quum prætori exercitum tradidisset, primo quoque tempore, quantum per commodum recipublicæ fieri posset, Romam veniret. Territi etiam super tantas clades, quum ceteris prodigiis, tum quod duæ Vestales eo anno, Opimia atque Flora, stupri compertæ, et altera sub terra, ut mos

Vestales
stupri
compertæ.

est, ad portam Collinam necata fuerat, altera sibi- U.C. 536.
met ipsa mortem conciverat. L Cantilius, scriba A.C. 216.
Pontificis, quos nunc minores pontifices appellant,
qui cum Floronia stuprum fecerat, a pontifice maxi-
mo eo usque virgis in comitio cæsus erat, ut inter
verbera exspiraret. Hoc nefas quuin inter tot, ut
fit, clades in prodigium versum esset, decemviri li-
bros adire jussi sunt. Et Q. Fabius Pictor Delphos
ad oraculum missus est sciscitatum, quibus precibus
suppliciisque Deos possent placare, et quænam futu-
ra finis tantis cladibus foret. Interim ex fatalibus
libris sacrificia aliquot extraordinaria facta; inter
quæ Gallus et Galla, Græcus et Græca, in foro bo- Hostiæ hu-
ario sub terra vivi demissi sunt in locum saxo con- manæ in-
septum, jam ante hostiis humanis, minime Romano molatæ.
sacro, inbutum. Placatis satis, ut rebantur, Deis,
M. Claudius Marcellus ab Ostia mille et quingentos
milites, quos in classem scriptos habebat, Romam,
ut urbi præsidio essent, mittit; ipse, legione classis
(ea tertia legio erat) cum tribunis militum Teanum
Sidicinum præmissa, classe tradita P. Furio Philo
collegæ, paucos post dies Canusium magnis itineri-
bus contendit. Dictator ex auctoritate Patrum dictus
M. Junius, et Ti. Sempronius magister equitum, de-
lectu edicto, juniores ab annis septemdecim, et quos-
dam prætextatos, scribunt: quatuor ex his legiones
et mille equites effecti. Item ad socios Latinumque
nomen, ad milites ex formula accipiendo, mittunt:
arma, tela, alia parari jubent: et vetera hostium
spolia detrahunt templis porticibusque. Et aliam Octo millia
formam novi delectus inopia liberorum capitum ac servorum
necessitas dedit: octo millia juvenum validorum ex armantur.
servitiis, prius sciscitantes singulos, yellentue mili-

U. C. 536. tare, emta publice armaverunt. Hic miles magis
 A. C. 216. placuit, quum pretio minore redimendi captivos
 copia fieret.

LVIII. Namque Hannibal, secundum tam prosperam ad Cannas pugnam, victoris magis, quam bellum gerentis, intentus curis, quum, captivis productis segregatisque, socios, sicut ante ad Trebiam Trasimenumque lacum, benigne adlocutus, sine pretio dimisisset; Romanos quoque vocatos (quod numquam alias antea) satis miti sermone adloquitur: *Non internecinum sibi esse cum Romanis bellum: de dignitate atque imperio certare. Et patres virtuti Romanae cessisse: et se id adniti, ut suæ in vicem simul felicitati et virtuti cedatur. Itaque redimendi se captivis copiam facere: pretium fore in capita, equiti quingenos quadrigatos nummos, trecenos pediti, servo centum.* Quamquam aliquantum adjiciebatur equitibus ad id pretium, quod pepigerant dedentes se; laeti tamen quamcumque conditionem paciscendi acceperunt. Placuit suffragio ipsorum decem deligi, qui Romam ad senatum irent: nec pignus aliud fidei, quam ut jurarent se reddituros, acceptum. Missus cum bis Karthalo nobilis Karthaginiensis: qui, si forte ad pacem inclinarent animos, conditiones ferret. Quum egressi castris essent, unus ex iis, minime Romani ingenii homo, velut aliquid oblitus, jurisjurandi solvendi caussa quum in castra redisset, ante noctem comites adsequitur. Ubi eos Romanum venire nunciatum est, Karthaloni obviam lictor missus, qui dictatoris verbis nunciaret, ut ante noctem excederet finibus Romanis.

Hannibalis oratio
ad captivos Rom.

Legati
captivorum.

Eorum
principis
oratio in
senatu.

LIX. Legatis captivorum senatus ab dictatore datus est. Quorum princeps M. Junius, Patres con-

scripti, inquit, *nemo nostrum ignorat, nulli umquam U.C. 536.*
civitati viliores fuisse captivos, quam nostrae. Cete- A.C. 216.
rum, nisi nobis plus justo nostra placet caussa, non alii
umquam minus negligendi vobis, quam nos, in hostium
potestatem venerunt: non enim in acie per timorem ar-
ma tradidimus; sed, quum prope ad noctem super-
stantes cumulis cæsorum corporum prælium extraxisse-
mus, in castra recepimus nos. Diei reliquum ac noctem
insequentem, fessi labore ac vulneribus, vallum sumus
tutati. Postero die, quum circumsessi ab exercitu vic-
tore aqua arceremur, nec ulla jam per confertos hostes
erumpendi spes esset, nec esse nefas duceremus, quin-
quaginta millibus hominum ex acie nostra trucidatis,
aliquem ex Cannensi pugna Romanum militem restare;
tum demum pacti sumus pretium, quo redemti dimitte-
remur: arma, in quibus nihil jam auxiliū erat, hosti
tradidimus. Majores quoque acceperamus se a Gallis
auro redemisse: et patres vestros, asperrimos illos ad
conditionem pacis, legatos tamen captivorum redimen-
dorum gratia Tarentum misisse: atqui, et ad Alliam
cum Gallis, et ad Heracleam cum Pyrrho, utraque non
tam clade infamis, quam pavore ac fuga, pugna fuit.
Cannenses campos acervi Romanorum corporum tegunt:
nec supersumus pugnæ, nisi in quibus trucidandis et fer-
rum et vires hostem defecerunt. Sunt etiam de nostris
quidam, qui ne in acie quidem refugerunt: sed, præsi-
dio castris relictæ, quum castra traderentur, in potesta-
tem hostium venerunt. Haud equidem ullius civis et
commilitonis fortunæ aut conditioni invideo, nec pre-
mendo alium me extulisse velim: ne illi quidem, (nisi
pernicitatis pedum et cursus aliquod præmium est) qui
plerique inermes ex acie fugientes non prius, quam Ve-
nusice aut Canusii, constiterunt, se nobis merito prætu-

U.C. 536. *lerint, gloriatiique sint, in se plus, quam in nobis, præ-*
A. C. 216. *sidiū reipublicæ esse. Sed illis et bonis ac fortibus mi-*
litibus utemini : et nobis etiam promtioribus pro patria,
quod beneficio vestro redempti atque in patriam restituti
fuerimus. Delectum ex omni ætate et fortuna habetis :
octo millia servorum audio armari : non minor nume-
rus noster est, nec majore pretio redimi possumus, quam
hi emuntur : nam si conferam nos cum illis, injuriam
nomini Romano faciam. Illud etiam in tali consilio
animadvertisendum vobis censeam, Patres conscripti, (si
tamen duriores esse velitis, quod nullo nostro merito fa-
ciatis) cui nos hosti relicturi sitis. Pyrrho videlicet,
qui nos hospitum numero habuit captivos, an barbaro
ac Pæno ; qui utrum avarior, an crudelior, sit, vix ex-
istimari potest. Si videatis catenas, squalorem, defor-
mitatem civium vestrorum, non minus profecto vos ea
species moveat, quam si ex altera parte cernatis stratas
Cannensibus campis legiones vestras. Intueri potestis
sollicitudinem et lacrimas in vestibulo curiæ stantium
cognatorum nostrorum, exspectantiumque responsum ve-
strum : quum ii pro nobis proque iis, qui absunt, ita
suspensi ac solliciti sint ; quem censemus animum ipso-
rum esse, quorum in discrimine vita libertasque est ? Si,
me Dius fidius, ipse in nos mitis Hannibal contra na-
turam suam esse velit, nihil tamen nobis vita opus esse
censeamus, quum indigni, ut a robis redimeremur, visi
sumus. Rediere Roman quondam remissi a Pyrrho
sine pretio capti : sed rediere eum legatis, primoribus
civitatis, ad redimendos sese missis. Redeam ego in
patriam, trecentis nummis non astimatus civis ? Suum
quisque habet animum, Patres conscripti. Scio in dis-
crimine esse vitam corpusque meum. Magis me famæ
periculum movet, ne a vobis damnati ac repulsi abea-

mus: neque enim vos pretio pepercisse homines cre- U. C. 536.
dent. A. C. 216.

LX. Ubi is finem fecit, extemplo ab ea turba, quæ in comitio erat, clamor flebilis est sublatus, manusque ad curiam tendebant orantes, ut sibi liberos, fratres, cognatos redderent. Feminas quoque metus ac necessitas in foro turbæ huic virorum inniscuerat. Senatus, submotis arbitris, consuli cœptus. Ibi quum sententiis variaretur, et alii redimendos de publico, alii nullam publice impensam faciendam, nec prohibendos ex privato redimi; si quibus argentum in præsentia deesset, dandam ex ærario pecuniam mutuam, prædibusque ac prædiis cavendum populo, censerent; tum T. Manlius Tor- Manlius
 quatus, priscae ac nimis duræ, ut plerisque videba- suadet ne
 tur, severitatis, interrogatus sententiam, ita locutus captivi re-
 dimetur: *Si tantummodo postulassent legati pro iis, qui in hostium potestate sunt, ut redimerentur, sine ullius insectatione eorum, brevi sententiam peregrissem.* Quid enim aliud quam admonendi essetis, ut morem traditum a patribus, necessario ad rem militarem exemplo, servaretis? Nunc autem quum prope gloriati sint, quod se hostibus dediderint, præferrique non captis modo in acie ab hostibus, sed etiam iis, qui Venusiam Canusiumque pervenerunt, atque ipsi C. Terentio consuli, æquum censuerint; nihil vos eorum, Patres conscripti, quæ illic acta sunt, ignorare patiar. Atque utinam hæc, quæ apud vos acturus sum, Canusii apud ipsum exercitum agerem, optimum testem ignaviae cujusque et virtutis: aut unus hic saltem adesset P. Sempronius, quem si isti ducem secuti essent, milites hodie in castris Romanis, non captivi in hostium potestate essent? Sed quum, fassis pugnando hostibus, tum victoria lætis, et

U. C. 536. *ipsis plerisque regressis in castra sua, noctem ad erum-*
 A. C. 216. *pendum liberam habuissent, et septem armatorum ho-*
minum millia perrumpere etiam confertos hostes po-
tuisserent; neque per se ipsi id facere conati sunt, neque
alium sequi voluerunt. Nocte prope tota P. Sempro-
nus Tuditanus non destitit monere, adhortari eos, dum
paucitas hostium circa castra, dum quies ac silentium
esset, dum nox incepturn tegeret, se ducem sequerentur:
ante lucem pervenire in tuta loca, in sociorum urbes
posse. Sicut avorum memoria P. Decius tribunus mi-
litum in Samnio; sicut, nobis adolescentibus, priore
Punico bello Calpurnius Flamma trecentis voluntariis,
quum ad tumulum eos capiendum situm inter medios
hostes, duceret, dixit: Moriamur, milites, et morte
nostra eripiamus ex obsidione circumventas legio-
nes. Si hoc P. Sempronius diceret; nec viros quidem,
nec Romanos vos duceret, si nemo tantæ virtutis exti-
tisset comes. Viam non ad gloriam magis, quam ad
salutem, ferentem demonstrat; reduces in patriam, ad
parentes, ad conjuges ac liberos facit. Ut servemini,
deest vobis animus? quid, si moriendum pro patria
esset, faceretis? Quinquaginta millia civium sociorum-
que circa vos eo ipso die cæsa jacent: si tot exempla
virtutis non movent, nihil umquam movebit: si tanta
clades vilem vitam non fecit, nulla faciet. Liberi at-
que incolumes desiderate patriam: immo desiderate,
dum patria est, dum cives ejus estis: sero nunc deside-
ratis, deminuti capite, abalienati jure civium, servi
Karthaginiensium facti. Pretio reddituri estis eo, unde
ignavia ac nequitia abistis? P. Sempronium, civem ve-
strum, non audistis, arma capere ac sequi se jubentem:
Hannibalem post paullo audistis, castra prodi et arma
tradi jubentem. Quam ego ignaviam istorum accuso,

quam scelus possim accusare? Non enim modo sequi U. C. 536.
 recusarunt bene monentem, sed obsistere ac retinere co- A. C. 216.
 nati sunt, ni strictis gladiis viri fortissimi inertes sub-
 morisset: prius, inquam, P. Sempronio per civium
 agmen, quam per hostium, fuit erumpendum. Hos
 cives patria desideret? quorum si ceteri similes fuis-
 sent, neminem hodie ex iis, qui ad Cannas pugnave-
 runt, civem haberet. Ex millibus septem armatorum
 sexcenti extiterunt, qui erumpere auderent, qui in pa-
 triam liberi atque armati redirent: neque iis quadra-
 ginta millia hostium obstitere. Quam tutum iter duar-
 rum prope legionum agmini futurum censem fuisse?
Haberetis hodie viginti millia armatorum Canusii, for-
 tia, fidelia, Patres conscripti: nunc autem quemadmo-
 dum hi boni fidelesque (nam fortes ne ipsi quidem dixer-
 int) cives esse possunt? nisi quis credere potest fuisse,
 ut erumpentibus, quin erumperent, obsistere conati
 sunt: aut non invidere eos, quum incolumitati, tum
 gloriæ illorum per virtutem partæ, quum sibi timorem
 ignaviamque servitutis ignominiosæ caussam esse sciант.
Maluerunt in tentoriis latentes simul lucem atque ho-
 stem exspectare, quum silentio noctis erumpendi occasio
 esset. At enim ad erumpendum e castris defuit animus;
 ad tutanda fortiter castra animum habuerunt. Dies
 noctesque aliquot obsessi, vallum armis, se ipsi tutati
 vallo sunt: tandem ultima ausi passique, quum omnia
 subsidia vitæ abessent, adfectisque fame viribus, arma
 jam sustinere nequirent, necessitatibus magis humanis,
 quam armis, victi sunt. Orto sole hostis ad vallum
 accessit: ante secundam horam, nullam fortunam cer-
 taminis experti, tradiderunt arma ac se ipsos. Hæc
 vobis ipsorum per biduum militia fuit: quum in acie
 stare ac pugnare decuerat, tum in castra refugerunt:

U. C. 536. *quum pro vallo pugnandum erat, castra tradiderunt,*
 A. C. 216. *neque in acie neque in castris utiles.* *Vos redimam?*
quum erumpere castris oportet, cunctamini ac manetis:
quum manere, castra tutari armis necesse est; et castra
et arma et vos ipsos traditis hosti. *Ego non magis istos*
redimendos, Patres conscripti, censeo, quam illos de-
dendos Hannibali, qui per medios hostes e castris eru-
perunt, ac per summam virtutem se patriæ restitu-
erunt.

Senatus
censem
captivos
non esse
redimen-
dos.

LXI. Postquam Manlius dixit, quamquam Pa-
 trum quoque plerosque captivi cognatione adtinge-
 bant, præter exemplum civitatis minime in captivos
 jam inde antiquitus indulgentis, pecuniae quoque
 summa homines movit: quia nec ærarium exhauri-
 re, magna jam summa erogata in servos ad militiam
 emendos armandosque, nec Hannibalem maxime hu-
 jusce rei, ut fania erat, egentem locupletari vole-
 bant. Quum triste responsum, *non redimi captivos,*
 redditum esset, novusque super veterem luctus tot
 jactura civium adjectus esset, cum magnis fletibus

Nimis cal- questibusque legatos ad portam prosecuti sunt. Unus
 lida juris- ex iis domum abiit, quod fallaci reditu in castra ju-
 jurandi
interpreta- rejurando se exsolvisset. Quod ubi innotuit, rela-
 tio.

tumque ad senatum est, omnes censuerunt, compre-
 hendum et custodibus publice datis deducendum
 ad Hannibalem esse. Est et alia de captivis fama,
 decem primos venisse: de eis quum dubitatum in
 senatu esset, admitterentur in urbem, nec ne; ita
 admissos esse, ne tamen iis senatus daretur. Mo-
 rantibus deinde longius omnium spe, alios tres insu-
 per legatos venisse, L. Scribonium, et C. Calpur-
 nium, et L. Manlium: tum demum ab cognato Scri-
 bonii tribuno plebis de redimendis captivis relatum

esse, nec censuisse redimendos senatum: et novos U. C. 536.
 legatos tres ad Hannibalem revertisse, decem vete- A. C. 216.
 res remansisse; quod, per caussam recognoscendi
 nomina captivorum ad Hannibalem ex itinere re-
 gressi, religione sese exsolvissent: de iis dedendis
 magna contentione actum in senatu esse: victosque
 paucis sententiis, qui dedendos censerint: ceterum
 proximis censoribus adeo omnibus notis ignominia-
 isque confectos esse, ut quidam eorum mortem sibi
 ipsi extemplo conciverint: ceteri non foro solum
 omni deinde vita, sed prope luce ac publico, carue-
 rint. Mirari magis, adeo discrepanre inter auctores,
 quam, quid veri sit, discernere queas. Quanto au-
 tem major ea clades superioribus cladibus fuerit, vel
 ea res indicio est, quod, qui sociorum ad eam diem
 firmi steterant, tum labare cœperunt, nulla profecto
 alia de re, quam quod desperaverant de imperio.
 Defecere autem ad Pœnos hi populi: Atellani, Ca- Defectio so-
 latini, Hirpini, Apulorum pars, Samnites præter ciorum.
 Pentros, Brutii omnes, Lucani: præter hos Surren-
 tini, et Græcorum omnis ferme ora, Tarentini, Me-
 tapontini, Crotonienses, Locri, et Cisalpini om-
 nes Galli. Nec tamen hæ clades defectionesque so-
 ciorum moverunt, ut pacis umquam mentio apud Pacis ta-
 Romanos fieret; neque ante consulis Romam ad- men men-
 ventum, nec postquam is rediit, renovavitque me-
 nioriam acceptæ cladis: quo in tempore ipso adeo
 magno animo civitas fuit, ut consuli, ex tanta clade,
 cuius ipse caussa maxima fuisset, redeunti, et obviam Varroni ob-
 itum frequenter ab omnibus ordinibus sit, et gratiæ viam itum,
 actæ, quod de republica non desperasset: cui, si et gratiæ
 Karthaginiensium duotor fuisset, nihil recusandum
 supplicii foret.

EPITOME LIBRI XXII.

CAMPANI ad Hannibalem defecerunt. Nuncius Cannensis victoriæ Mago Karthaginem missus annulos aureos, a digitis occisorum Romanorum detractos, in vestibulo curiæ effudit: quos excessisse modii mensuram traditur. Post quem nuncium Hanno, vir ex Pœnis nobilissimus, suadebat senatui Karthaginien-sium, ut pacem a populo Romano peterent: nec tenuit, obstrepente Barcina factio-ne. Claudius Marcellus prætor ad Nolim, eruptione ulversus Hannibalem ex oppido facta, prospere pugnavit. Exercitus Hannibalis per hiberna Capuæ ita luxuriatus est, ut corporum viribus atque animorum enervaretur. Casilinum, a Pœnis obsessum, ita fame vexatum est, ut lora et pelles scutis distractas, item mures, essent; et nucibus, per Vulturnum amnem a Romanis missis, vixerint. Senatus ex equestri ordin'e hominibus centum nonaginta septem suppletus est. L. Postumius prætor a Gallis cum exercitu easus est. Cn. et P. Scipiones in Hispania Hasdrubalem ricerunt, et Hispaniam suam fecerunt. Reliquie Cannensis exercitus in Siciliam relegatae sunt; ne reced rent inde, nisi finito bello. Inter Philippum Macedonum regem et Hannibalem societas juncta est. Sempronius Gracchus consul Campanos cecidit. Præterea in Sardinia feliciter a T. Manlio prætore adversus Panos Sardosque res gestas continet: a quo Hasdrubal

*dux, et Mago, et Hanno capti. Claudius Marcellus
prætor Hannibalis exercitum ad Nolam prælio fudit et
vicit: primusque tot cladibus fessis Romanis meliorem
spem belli dedit.*

T. LIVII PATAVINI

LIBER XXIII.

U. C. 536. A. C. 216. **H**ANNIBAL, post Cannensem pugnam, castra
Hannibal in Sam- capta ac direpta, confestim ex Apulia in Sam-
nium moverat: aditus in Hirpinos a Statio, polli-
nium mo- cente se Compsam traditurum. Compsanus erat
vet.

Trebius nobilis inter suos: sed premebat eum Mop-
siorum factio, familiæ per gratiam Romanorum pot-
tentis. Post famam Cannensis pugnæ, vulgatum-
que Trebii sermonibus adventum Hannibal, quum
Mopsiani urbem excessissent; sine certamine tradita
urbs Pœno, præsidiumque acceptum est. Ibi præda
omni atque impedimentis relictis, exercitu partito,
Magonemi regionis ejus urbes, aut deficientes ab
Romanis accipere, aut detractantes cogere ad de-
fectionem jubet: ipse per agrum Campanum mare
inferum petit, obpugnaturus Neapolim, ut urbem
maritimam haberet. Ubi fines Neapolitanorum in-
travit, Numidas partim in insidiis, (et pleræque
cavæ sunt viæ, sinusque occulti) quacumque apte
poterat, dispositus: alios, præ se actam prædam ex
agris ostentantes, obequitare portis jussit: in quos,
quia nec multi, et incompositi videbantur, quum
turma equitum erupisset, ab cedentibus consulto
tracta in insidias, circumventa est: nec evasisset
quisquam, ni mare propinquum, et haud procul li-

Tum in
Campagna-
m.

tore naves piscatoriæ pleræque conspectæ peritis U. C. 536.
nandi dedissent effugium. Aliquot tamen eo prælio A. C. 216.
nobiles juvenes capti cæsique sunt: inter quos et
Hegeas præfектus equitum, intemperantius cedentes
secutus, cecidit. Ab urbe obpugnanda Pœnum abs-
terruere conspecta mœnia, haudquaquam promta
obpugnantि.

II. Inde Capuam flectit iter, luxuriantem longe
felicitate atque indulgentia fortunæ, maxime tamen,
inter corrupta omnia, licentia plebis sine modo li-
bertatem exercentis. Senatum et sibi et plebi ob-
noxium Pacuvius Calavius fecerat; nobilis idem ac Pacuvius
popularis homo, ceterum malis artibus nactus opes: Calavius
is quum eo forte anno, quo res male gesta ad Tra- senatum
simenum est, in summo magistratu esset, jam diu Campa-
infestam senatui plebem, ratus, per occasionem diu obnoxium
vandi res, magnum ausuram facinus, ut, si in ea lo-
ca Hannibal cum victore exercitu venisset, trucidato
senatu traderet Capuam Pœnis; improbus homo, sed
non ad extremum perditus, quum mallet incolumi,
quam eversa, republica dominari; nullam autem in-
columiem esse orbatam publico consilio crederet, ra-
tionem iniit, qua et senatum servaret, et obnoxium
sibi ac plebi faceret. Vocato senatu, quum, sibi de-
fectionis ab Romanis consilium placitum nullo
modo, nisi necessarium fuisset, præfatus esset; quip-
pe qui liberos ex Ap. Claudii filia haberet, filiamque
Romam nuptum Livio dedisset; ceterum majorem mul-
to rem magisque timendam instare. Non enim per de-
fectionem ad tollendum ex civitate senatum plebem
spectare, sed per cædem senatus vacuam rempublicam
tradere Hannibali ac Pœnis velle. Eo se periculo posse
liberare eos, si se permittant sibi, et, certaminum in re-

U. C. 536. *publica oblii, credant.* Quum omnes victi metu per-
 A. C. 216. mitterent; *Claudam in curia vos, inquit, et tamquam*
et ipse cogitati facinoris particeps, adprobando consilia,
quibus nequidquam adversarer, riam saluti vestrae in-
veniam. *In hoc fidem, quam vultis ipsi, accipite.* Fide
 data egressus, claudi curiam jubet, præsidiumque in
 vestibulo reliquit; ne quis adire curiam injussu suo,
 neve inde egredi possit.

III. Tunc vocato ad concionem populo, *Quod*
sæpe, inquit, optastis, Campani, ut supplicii sumendi
vobis ex improbo ac dætestabili senatu potestas esset; eam
nunc, non per tumultum expugnantes domos singulo-
rum, quas præsidiis clientium servorumque tueruntur,
cum summo vestro periculo, sed tutam habetis ac libe-
ram. *Clausos omnes in curiam accipite, solos, iner-*
mes: nec quidquam raptim, aut forte temere egeritis:
de singulorum capite vobis jus sententiæ dicendæ fa-
ciam, ut, quas quisque meritus est, pœnas pendat. Sed
ante omnia ita vos iræ indulgere oportet, ut potiorem
ira salutem atque utilitatem vestram habeatis: etenim
hos (ut opinor) odistis senatores; non senatum omnino
habere non vultis: quippe aut rex, (quod abominan-
dum) aut, quod unum liberæ civitatis consilium est, se-
natus habendus est. Itaque duæ res simul agendæ sunt
vobis, ut et veterem senatum tollatis, et norum coopte-
tis. Citari singulos senatores jubebo, de quorum capite
vos consulam; quod de quoque censueritis, fiet. Sed
prius in ejus locum virum fortem ac strenuum novum
senatorem cooptabis, quem de noxio supplicium su-
matur. Inde consedit, et, nominibus in urnam con-
 jectis, citari, quod primum sorte nomen excidit, ip-
 sumque e curia produci jussit. Ubi auditum est no-
 men, malum et improbum pro se quisque clamare, et

suppicio dignum. Tum Pacuvius, *Video, quæ de U. C. 536.
hoc sententia sit data. Eligite pro malo atque inprobo
bonum senatorem et justum.* A. C. 216. Primo silentium erat
inopia potioris subjiciundi; deinde, quum aliquis,
omissa verecundia, quempiam nominasset, multo
major extemplo clamor oriebatur, quum alii nega-
rent nosse; alii nunc probra, nunc humilitatem sor-
didamque inopiam, et pudendæ artis aut quæstus ge-
nus, objicerent. Hoc multo magis in secundo ac
tertio citato senatore est factum: ut ipsius pœnitere
homines adpareret; quem autem in ejus substitue-
rent locum, deesse: quia nec eosdem nominari ad-
tinebat, nihil aliud quam ad audienda probra nomi-
natos, et multo humiliores obscurioresque ceteri
erant eis, qui primi memoriæ obcurrabant. Ita di-
labi homines, notissimum quodque malum maxime
tolerable dicentes esse, jubentesque senatum ex
custodia dimitti.

IV. Hoc modo Pacuvius quum obnoxium vitæ
beneficio senatum multo sibi magis, quam plebi, fe-
cisset, sine armis, jam omnibus concedentibus, do-
minabatur. Hinc senatores, omissa dignitatis li-
bertatisque memoria, plebem adulari, salutare, be-
nigne invitare, adparatis accipere epulis, eas caussas
suscipere, ei semper parti adesse, secundum eam li-
tem judices dare, quæ magis popularis aptiorque in
vulgus favori conciliando esset. Jam vero nihil in
senatu actum aliter, quam si plebis ibi esset concilium.
Prona semper civitas in luxuriam, non inge-
niorum modo vitio, sed adfluenti copia voluptatum,
et inlecebris omnis amoënitatis maritimæ terrestris-
que; tum vero ita obsequio principum et licentia
plebei lascivire, ut nec libidini nec sumtibus modus

U. C. 536. esset : ad contemtum legum, magistratum, senatus,
A. C. 216. accessit tum, post Cannensem cladem, ut, cuius aliqua erat verecundia, Romanum quoque imperium spernerent : id modo erat in mora, ne extemplo deficerent, quod connubium vetustum multas familias claras ac potentes Romanis miscuerat : et quod, quum militarent aliquot apud Romanos, maximum vinculum erant trecenti equites, nobilissimus quisque Campanorum, in præsidia Sicularum urbium delecti ab Romanis ac missi.

Legati
Campanorum
ad cos.
Rom.

Respon-
sum con-
sulis.

V. Horum parentes cognatiæ ægre pervicerunt, ut legati ad consulem Romanum mitterentur. Ii, nondum Canusium prefectum, sed Venusiae cum paucis ac semiermibus consulem invenerunt, quam poterat maxime miserabilem bonis sociis ; superbis atque infidelibus, ut erant Campani, spernendum. Et auxit rerum suarum suique contemtum consul nimis detegendo cladem nudandoque. Nam quum legati, ægre ferre senatum populumque Campanum, adversi quidquam evenisse Romanis, nunciassent, pollicerenturque omnia, quæ ad bellum opus essent ; *Morem magis, inquit, loquendi cum sociis servastis, Campani, jubentes, quæ opus essent ad bellum, impetrare, quam convenienter ad præsentem fortunæ nostræ statum locuti estis. Quid enim nobis ad Cannas relictum est, ut, quasi aliquid habeamus, id, quod deest, expleri ab sociis velimus ? Pedites vobis imperemus, tamquam equites habeamus ? pecuniam deesse dicamus, tamquam ea tantum desit ? Nihil, ne quod suppleremus quidem, nobis reliquit fortuna : legiones, equitatus, arma, signa, equi virique, pecunia, commeatus, aut in acie, aut binis postero die amissis castris perierunt. Itaque non juventis nos in bello oportet, Campani, sed pene bellum pro*

nobis suscipiatis. Veniat in mentem, ut trepidos quon- U. C. 536.
dam majores vestros intra mœnia compulsos, nec Sam- A. C. 216.
nitem modo hostem, sed etiam Sidicinum parentes, re-
ceptos in fidem apud Saticulam defendemus, cœptum-
que propter vos cum Samnitibus bellum per centum
prope annos, variante fortuna eventum, tulerimus. Ad-
jicite ad hæc, quod fœdus æquum deditis, quod leges
vestras, quod ad extremum (id quod ante Cannensem
certe cladem maximum fuit) civitatem nostram magnæ
parti vestrūm dedimus, communicavimusque robiscum.
Itaque communem vos hanc cladem, quæ accepta est,
credere, Campani, oportet, communem patriam tuen-
dam arbitrari esse. Non cum Samnite aut Etrusco res
est, ut, quod a nobis ablatum sit, in Italia tamen im-
perium maneat. Pœnus hostis, ne Africæ quidem in-
digenam, ab ultimis terrarum oris, freto Oceani Her-
culisque columnis, expertem omnis juris et conditionis
et linguae prope humanæ, militem trahit. Hunc, na-
tura et moribus inimitem ferumque, insuper dux ipse
efferavit, pontibus ac molibus ex humanorum corporum
strue faciendis, et (quod proloqui etiam piget) vesci hu-
manis corporibus docendo. Hos, infandis pastos epulis,
quos contingere etiam nefas sit, videre atque habere do-
minos, et ex Africa et a Karthagine jura petere, et Ita-
liam Numidarum ac Maurorum pati provinciam esse,
cui non, genito modo in Italia, detestabile sit? Pul-
chrum erit, Campani, prolapsum clade Romanum im-
perium vestra fide, vestris viribus retentum ac recupe-
ratum esse. Triginta millia peditum, quatuor equitum
arbitror ex Campania scribi posse: jam pecuniæ adfa-
tim est frumentique. Si parem fortunæ restræ fidem
habetis, nec Hannibal se viciisse sentiet, nec Romani
victos esse.

U. C. 536. VI. Hac oratione consulis dimissis redeuntibusque
A. C. 216.

domum legatis, unus ex iis, Vibius Virrius, *Tempus venisse*, ait, quo *Campani non agrum solum, ab Romanis quondam per injuriam ademtum, recuperare, sed imperio etiam Italiae potiri possint*. *Fædus enim cum Hannibale, quibus velint legibus, facturos: neque controversiam fore, quin, quem ipse confecto bello Hannibal victor in Africam decedat, exercitumque deportet, Italæ imperium Campanis relinquatur*. Hæc Virrio loquenti adsensi omnes, ita renunciant legationem, uti deletum omnibus videretur nomen Romanum. Extremo plebes ad defectionem ac pars major senatus spectare: extracta tamen, auctoritatibus seniorum, per paucos dies est res: postremo vicit sententia plurium, ut iidem legati, qui ad consulem Romanum Campani deficiunt ad Hannibalem. ierant, ad Hannibalem mitterentur. Quo priusquam iretur, certumque defectionis consilium esset, Romanum legatos missos a Campanis, in quibusdam analibus invenio, postulantes, ut alter consul Campanus fieret, si rem Romanam adjuvari vellent: indignatione orta, submoveri a curia jussos esse: missumque lictorem, qui ex urbe educeret eos, atque eodem manere extra fines Romanos juberet. Quia nimis compar Latinorum quondam postulatio erat, Cœliusque et alii id haud sine caussa prætermiserant scriptores, ponere pro certo sum veritus.

VII. Legati ad Hannibalem venerunt, pacemque cum eo conditionibus fecerunt: Ne quis imperator magistratusve Pœnorum jus ullum in civem Campanum haberet, neve civis Campanus invitus militaret, munusve faceret: ut suæ leges, sui magistratus Capuae essent: ut trecentos ex Romanis captivis Pœnus daret Campanis, quos ipsi elegissent; cum quibus equitum Campanis,

norum, qui in Sicilia stipendia facerent, permutatio U.C. 536.
fieret. Hæc pacta: illa insuper, quam quæ pacta A.C. 216.
erant, facinora Campani ediderunt: nam præfectos
sociūm civesque Romanos alios, partim aliquo mi-
litiæ munere occupatos, partim privatis negotiis in-
plicitos, plebs repente omnes comprehensos, velut
custodiæ caussa, balneis includi jussit: ubi, fervore
atque æstu anima interclusa, foedumi in modum ex-
spirarent. Ea ne fierent, neu legatio mitteretur ad
Pœnum, summa ope Decius Magius, vir cui ad Decius Ma-
summam auctoritatem nihil, præter sanam civium gius adver-
mentem, defuit, restiterat: ut vero præsidium mitti satur Pœ-
nis.
ab Hannibale audivit, Pyrrhi superbam dominatio-
nem, miserabilemque Tarentinorum servitutem, ex-
empla referens, primo, ne reciperetur præsidium,
palam vociferatus est: deinde, ut receptum aut eji-
ceretur, aut, si malum facinus, quod a vetustissimis
sociis consanguineisque defecissent, forti ac memo-
rabili facinore purgare vellent, ut, imperfecto Punico
præsidio, restituerent se Romanis. Hæc (neque
enim occulte agebantur) quum relata Hannibali es-
sent, primo misit, qui vocarent Magium ad sese in
castra: deinde, quum is ferociter negasset se itu-
rum, (nec enim Hannibali jus esse in civem Cam-
panum) concitatus ira Pœnus, comprehendi homi-
nem, vinclumque adtrahi ad se jussit: veritus deinde,
ne quid inter vim tumultus, atque ex concitatione
animorum inconsulti certaminis oriretur, ipse, præ-
misso nuncio ad Marium Blosium prætorem Cam-
panum, postero die se Capuae futurum, proficiscitur
e castris cum modico præsidio. Marius concione
advocata edicit, ut frequentes cum conjugibus ac li-
beris obviam irent Hannibali. Ab universis id non

U. C. 536. obedienter modo, sed enise, favore etiam vulgi, et
 A. C. 216. studio visendi tot jam victoriis clarum imperatorem,
 Ejus con- factum est. Decius Magius nec obviam egressus
 stantia. est, nec, quo timorem aliquem ex conscientia sig-
 nificare posset, privatim se tenuit: in foro cum filio
 clientibusque paucis otiose inambulavit, trepidante
 tota civitate ad excipiendum Pœnum visendumque.
 Hannibal, ingressus urbem, senatum extemplo pos-
 tulat, precantibusque inde prærioribus Campanorum,
 ne quid eo die seriæ rei gereret, diemque ut ipse ad-
 ventu suo festum latus ac libens celebraret; quam-
 quam præceps ingenio in iram erat, tamen, ne quid
 in principio negaret, visenda urbe magnam diei par-
 tem consumsit.

VIII. Deversatus est apud Ninnios Celeres, Ste-
 nium Pacuviumque, inclitos nobilitate ac divitiis.
 Eo Pacuvius Calavius, de quo ante dictum est, prin-
 ceps factionis ejus, quæ traxerat rem ad Pœnos,
 filium juvenem adduxit, abstractum abs Decii Magii
 latere, cum quo ferocissime pro Romana societate
 adversus Punicum fœdus steterat; nec eum aut in-
 clinata in partem alteram civitas, aut patria majes-
 tas sententia depulerat. Huic tum pater juveni

Pacuvius veniam in- Hannibalem deprecando magis, quam purgando, pla-
 petrat filio suo Pe- cavit, virtusque patris precibus lacrimisque etiam ad
 rollæ. coenam eum cum patre vocari jussit: cui convivio
 neminem Campanum, præterquam hospites, Jubel-
 liumque Tauream, insignem bello virum, adhibitu-
 rus erat. Cœperunt epulari de die, et convivium
 non ex more Punico, aut militari disciplina esse;
 sed, ut in civitate atque etiam domo luxuriosa, om-
 nibus voluptatium inlecebris instructum. Unus nec
 dominorum invitatione, nec ipsius interdum Hanni-

balis, Calavii filius Perolla vinci potuit; ipse vale- U. C. 536.
 tudinem excusans, patre animi quoque ejus haud A. C. 216.
 mirabilem interturbationem caussante. Solis ferme
 occasu patrem Calavium, ex convivio egressum, se-
 cutus filius, ubi in secretum (hortus erat posticis
 ædium partibus) pervenerunt, *Consilium*, inquit, *ad Perolla oce-*
fero, pater, quo non veniam solum peccati, quod defe-
cimus ad Hannibalem, inpetraturi ab Romanis, sed in cisurus
multo majore dignitate et gratia simus Campani, quam Hanniba-
umquam fuimus. *Quum mirabundus pater, quidnam*
id esset consilii, quæreret; toga rejecta ab humero,
latus subcinctum gladio nudat: Jam ego, inquit,
sanguine Hannibalis sanciam Romanum fædus: te id
prius scire volui, si forte abesse, dum facinus patratur,
malles.

IX. Quæ ubi vidit audivitque senex, velut si jam Dehortatur
 agendis, quæ audiebat, interesset, amens metu, *Per eum pater.*
ego te, inquit, fili, quæcumque jura liberos jungunt pa-
rentibus, precor quæsoque, ne ante oculos patris facere
et pati omnia infanda velis. Paucæ horæ sunt, intra
quas jurantes per quidquid Deorum est, dextræ dexteræ
jungentes, fidem obstrinximus, ut sacratas fide ma-
nus, digressi ab conloquio, extemplo in eum armare-
mus? Ab hospitali mensa surgis, ad quam tertius Cam-
panorum adhibitus es ab Hannibale, ut eam ipsam
mensam cruentares hospitis sanguine? Hannibalem pa-
ter filio meo potui placare, filium Hannibali non pos-
sum? Sed sit nihil sancti, non fides, non religio, non pie-
tas: audeantur infanda, si non perniciem nobis cum sce-
lere adferunt. Unus adgressurus es Hannibalem? quid
illa turba tot liberorum servorumque? quid in unum
intenti omnium oculi? quid tot dextræ? torpescenre
in amentia illa? Vultum ipsius Hannibal, quem ar-

U.C. 536. *mati exercitus sustinere nequeunt, quem horret populus*

A.C. 216. *Romanus, tu sustinebis? et, alia auxilia desint, me*

*ipsum scribere, corpus meum obponentem pro corpore
Hannibalis, sustinebis? Atqui per meum pectus peten-
dus ille tibi transfigendusque est: deterreri hic sine te*

Patri cedit potius, quam illic vinci. Valeant preces apud te meæ,
Perolla.

*sicut pro te hodie valuerunt. Lacrimantem inde ju-
venem cernens, medium complectitur, atque, osculo
lærens, non ante precibus abstitit, quam pervicit,
ut gladium poneret, fidemque daret, nihil facturum
tale. Tum juvenis, Ego quidem, inquit, quam patriæ
debeo, pietatem ersolvam patri: tuam doleo vicem, cui
ter proditæ patriæ sustinendum est crimen; semel, quum
defectionis ab Romanis; iterum, quum pacis cum Han-
nibile fuisti auctor; tertio hodie, quum restituendæ
Romanis Capuæ mora atque impedimentum es. Tu,
patria, ferrum, quo pro te armatus hanc arcem defen-
dere volebam, hosti minime parcens, quando parens ex-
torquet, recipe. Hæc quum dixisset, gladium in pub-
licum trans maceriam horti abjecit: et quo minus
res suspecta esset, se ipse convivio reddidit.*

Hannibal
Dec. Magi-
um sibi
didi postu-
lat.

X. Postero die senatus frequens datus Hannibali:
ubi prima ejus oratio perblanda ac benigna fuit,
qua gratias egit Campanis, quod amicitiam suam
Romanæ societati præposuissent: et inter cetera
magnifica promissa pollicitus, brevi caput Italiæ
omni Capuam fore, juraque inde cum ceteris populis
Romanum etiam petiturum. Unum esse exsortem
Punicæ amicitiae fœderisque secum facti, quem ne-
que esse Campanum, neque dici debere, Magium
Decium: cum postulare, ut sibi dedatur, ac se præ-
sente de eo referatur, senatusque consultum fiat.
Omnes in eam sententiam ierunt: quamquam ma-

gnæ parti et vir indignus ea calamitate, et haud U. C. 536.
parvo initio minui videbatur jus libertatis. Egres- A. C. 216.
sus curia, in templo magistratus consedit; compre-
hendique Decium Magium, atque ante pedes destitu-
tum caussam dicere jussit. Qui quum, manente fe-
rocia animi, negaret lege fœderis id cogi posse, tum
injectæ catenæ, ducique ante lictorem in castra est
jussus. Quoad capite aperto est ductus, conciona- Magius ab-
bundus incessit, ad circumfusam undique multitudi- ducitur in
castra Han-
nem vociferans: *Habetis libertatem, Campani, quam nibalis.*
petistis: foro medio, luce clara, videntibus vobis, nulli
Campanorum secundus, vincetus ad mortem rapior. Quid
violentius Capua capta fieret? Ite obviam Hannibali,
exornate urbem, diemque adventus ejus consecrate, ut
hunc triumphum de civi vestro spectetis. Hæc voci-
feranti, quum moveri vulgus videretur, obvolutum
caput est, oculisque rapi extra portam jussus: ita in
castra perducitur: extemploque inpositus in navim,
et Karthaginem missus; ne, motu aliquo Capuae ex
indignitate rei orto, senatum quoque pœniteret de-
diti principis: et, legatione missa ad repetendum
eum, ne aut negando rem, quam primum peterent,
obfendendi sibi novi socii; aut tribuendo, habendus
Capuae esset seditionis ac turbarum auctor. Navem Cyrenas
Cyrenas detulit tempestas, quæ tum in ditione regum ad impulsu^ce
erant: ibi quum Magius ad statuam Ptolemæi regis confugit
confugisset, deportatus a custodibus Alexandriani ad sta-
tuam re gis.
Ptolemæum, quum eum docuisse, contra jus fœderis
vincum se ab Hannibale esse, vinculis liberatur;
permissumque, ut rediret, seu Romanam, seu Capuam
mallet. Nec Magius Capuam sibi tutam dicere; et
Romam eo tempore, quo inter Romanos Campanosque
bellum sit, transfugæ magis, quam hospitis, fore domi-

U. C. 536. *cilium: nusquam malle, quam in regno ejus, vivere,*
 A. C. 216. *quem vindicem atque auctorem habeat libertatis.*

Redit a
Delphis
legatus
Roma-
nus.

XI. Dum hæc geruntur, Q. Fabius Pictor legatus a Delphis Romam rediit, responsumque ex scripto recitavit: *Divi quoque in eo erant, quibus quoque modo supplicaretur: tum, Si ita faxitis, Romani, restræ res meliores facilioresque erunt: magisque ex sententia respublica restra robis procedet, victoriaque duelli populi Romani erit. Pythio Apollini, respublica vestra bene gesta servataque, lucris meritis donum mititote, deque præda, manubiis, spoliisque honorem habetote, lasciviam a vobis prohibetote.* Hæc ubi ex Græco carmine interpretata recitavit, tum dixit, *se oraculo egressum extemplo his omnibus Divis rem divinam ture ac vino fecisse: jussumque ab templi antistite, sicut coronatus laurea corona et oraculum adisset, et rem divinam fecisset; ita coronatum navim adscendere, nec ante deponere eam, quam Romam pervenisset. Se, quæcumque imperata sint, cum summa religione ac diligentia exsecutum; coronam Romæ in aram Apollinis deposuisse.* Senatus decrevit, ut eæ res divinæ supplicationesque primo quoque tempore

Mago Car-
thagini-
nem a
fratre mis-
sus.

cum cura fierent. Dum hæc Romæ atque in Italia geruntur, nuncius victoriæ ad Cannas Karthaginem venerat Mago Hamilcaris filius: non ex ipsa acie a fratre missus, sed retentus aliquot dies in recipiendis civitatibus Bruttiorum, quæque deficiebant. Is, quum ei senatus datus esset, res gestas in Italia a fratre

Exponit res exponit: *Cum sex imperatoribus eum, quorum quatuor gestas Han-
nibal-
lis. consules, duo dictator ac magister equitum fuerint, cum sex consularibus exercitibus acie conflixisse: occidisse supra ducenta millia hostium: supra quinquaginta millia cepisse. Ex quatuor consulibus duos occidisse;*

ex duobus saucium alterum, alterum toto exercitu amis- U. C. 536.
so, vix cum quinquaginta hominibus effugisse. Magis- A. C. 216.
trum equitum, quæ consularis potestas sit, fusum fuga-
tumque: dictatorem, quia se in aciem nunquam com-
miserit, unicum haberi imperatorem. Bruttios Apulos-
que, partim Samnitium ac Lucanorum defecisse ad Pæ-
nos. Capuam, quod caput, non Campaniæ modo, sed,
post afflictam rem Romanam Cannensi pugna, Italiæ
sit, Hannibali se tradidisse. Pro his tantis totque victo-
riis, verum esse, grates Deis inmortalibus agi haberique.

XII. Ad fidem deinde tam lætarum rerum, effun- Annuli au-
di in vestibulo curiæ jussit annulos aureos, qui tan- rei ad modii
tus acervus fuit, ut, metientibus dimidium super tres
modios explesse, sint quidam auctores. Fama tenuit,
quæ propior vero est, haud plus fuisse modio. Ad-
jecit deinde verbis, quo majoris cladis indicium esset,
neminem, nisi equitem, atque eorum ipsorum pri-
mores, id gerere insigne. Summa fuit orationis, *Quo*
propius spem belli perficiendi sit, eo magis omni ope
juvandum Hannibalem esse: procul enim ab domo mi-
litiam esse, in media hostium terra: magnam vim fru-
menti, pecuniæ, absumi: et tot acies, ut hostium exer-
citus delesse, ita victoris etiam copias parte aliqua mi-
nuisse. Mittendum igitur supplementum esse, mitten-
dam in stipendium pecuniam frumentumque tam bene
meritis de nomine Punico militibus. Secundum hæc Hanno-
dicta Magonis lætis omnibus, Himilco, vir factionis ^{nem in-}
Barcinæ, locum Hannonis increpandi esse ratus, Quid ^{crepat Hi-}
milco.
est, Hanno? inquit: etiam nunc pænitet belli suscepti
adversus Romanos? Jube dedi Hannibalem: veta in
tam prosperis rebus grates Diis inmortalibus agi: au-
diamus Romanum senatorem in Karthaginiensium curia.
Tum Hanno: Tacuissem hodie, Patres conscripti, ne

U. C. 536. *quid in communi omnium gaudio, minus letum quod*
 A. C. 216. *esset vobis, loquerer : nunc interroganti senatori, pænitere*
 Oratio
 Hanno-
 nis de
 Hanni-
 bale.
 Discepta-
 tio cum
 Magone.
 teatne me adhuc suscepti adversus Romanos belli, si re-
 ticeam, aut superbus, aut obnoxius videar : quorum al-
 terum est hominis alienæ libertatis oblii ; alterum suæ.
 Respondeam igitur Himilconi, non desisse pænitere me
 belli, neque desitum ante invictum vestrum impera-
 torem incusare, quam finitum aliqua tolerabili condi-
 tione bellum video : nec mihi pacis antiquæ desiderium
 ulla alia res, quam pax nova finiet. Itaque ista, quæ
 modo Mago jactavit, Himilconi ceterisque Hannibalis
 satellitibus jam læta sunt : mihi possunt læta esse, quia
 res bello bene gestæ, si volumus fortuna uti, pacem no-
 bis æquiorem dabunt : nam si prætermittimus hoc tem-
 pus, quo magis dare, quam accipere, possumus videri
 pacem, vereor, ne hæc quoque lætitia luxuriet nobis, ac
 rana eradat. Quæ tamen nunc quoque qualis est ? Oc-
 cidi exercitus hostium : mittite milites mihi : quid aliud
 rogares, si esses victus ? Hostium cepi bina castra,
 prædæ videlicet plena et commeatum ; frumentum et
 pecuniam date : quid aliud, si spoliatus, si exutus cas-
 tris esses, peteres ? Et, ne omnia ipse mirer, (mihi quo-
 que enim, quoniam respondi Himilconi, interrogare jus
 fasque est) velim seu Himilco, seu Mago respondeat ;
 quum ad internacionem Romani imperii pugnatum ad
 Cannas sit, constetque in defectione totam Italiam esse ;
 primum ecquis Latini nominis populus defecerit ad nos ?
 deinde ecquis homo, ex quinque et triginta tribubus, ad
 Hannibalem transfugerit ? Quum utrumque Mago ne-
 gasset : Hostium quidem ergo, inquit, adhuc nimis
 multum superest : sed, multitudo ea quid animorum,
 quidve speci habeat, scire velim.

XIII. Quum, id nescire, Mago diceret ; Nihil fa-

cilius scitu est, inquit. *Ecquos legatos ad Hannibalem* U. C. 536.
Romani miserunt de pace? ecquam denique mentionem
pacis Romæ factam esse, adlatum ad vos est? Quum
id quoque negasset, Bellum igitur, inquit, *tam integrum habemus, quam habuimus, qua die Hannibal in*
Italiā est transgressus. Quam varia victoria priore
Punico bello fuerit, plerique, qui meminerimus, super-
sumus: numquam terra marique magis prosperæ res
nostræ visæ sunt, quam ante consules C. Lutatium et
A. Postumium fuerunt. *Lutatio et Postumio consuli-*
bis, devicti ad Aegates insulas sumus. Quod si (*id*
quod Dii omen avertant) nunc quoque fortuna aliquid
variaverit; tum pacem speratis, quum vincemur, quam
nunc, quum vincimus, dat nemo? Ego, si quis de pace
consulet, seu deferenda hostibus, seu accipienda, habeo,
quid sententiæ dicam: si de iis, quæ Mago postulat,
refertis, nec victoribus mitti adtinere puto, et frus-
trantibus nos falsa atque inani spe multo minus censeo
mittenda esse. Haud multos movit Hannonis oratio:
nam et simultas cum familia Barcina leviorem aue-
torem faciebat, et occupati animi præsenti lætitia
nihil, quo vanius fieret gaudium suum, auribus ad-
mittebant: debellatumque mox fore, si adniti paul-
lulum voluisserent, rebantur. Itaque ingenti consen-
su fit senatusconsultum, ut Hannibali quatuor Nu-
midarum millia in supplementum mitterentur, et qua-
draginta elephanti, et argenti multa talenta. Dicta-
torque cum Magone in Hispaniam præmissus est, ad
conducenda viginti millia peditum, quatuor equitum,
quibus exercitus, qui in Italia, quique in Hispania
erant, supplerentur.

XIV. Ceterum hæc, ut in secundis rebus, segni-
ter otioseque gesta. Romanos, præter insitan*in-*

A. C. 216.

U. C. 536. dustriam animis, fortuna etiam cunctari prohibebat :

A. C. 216. nam nec consul ulli rei, quæ per eum agenda esset, deerat : et dictator M. Junius Pera, rebus divinis perfectis, latoque, ut solet, ad populum, ut equum escendere liceret, præter duas urbanas legiones, quæ principio anni a consulibus conscriptæ fuerant, et servorum delectum, cohortesque ex agro Piceno et Gallico conlectas, ad ultimum prope desperatæ reipublicæ auxilium, quum honesta utilibus cedunt, descendit, edixitque : *Qui capitalem fraudem ausi, quique pecuniæ judicati in vinculis essent, qui eorum apud se milites fierent, eos noxa pecuniaque sese exsolvi jussurum.* Ea sex millia hominum Gallicis spoliis, quæ triumpho C. Flaminii translata erant, armavit : itaque cum viginti quinque millibus armatorum ab urbe proficiscitur. Hannibal, Capua recepta, quum iterum Neapolitanorum animos, partim spe, partim metu, nequidquam tentasset, in agrum Nolanum exercitum traducit : et ut non hostiliter statim, quia non desperabat voluntariam deditioñem ; ita, si morarentur spem, nihil eorum, quæ pati aut timere

Nolæ dis- possent, prætermissurus. Senatus, ac maxime pri-
•ordia. mores ejus, in societate Romana cum fide perstare ; plebs novarum, ut solet, rerum atque Hannibalis tota esse ; metumque agrorum populationis, et patientia in obsidione multa gravia indignaque proponere animo : neque auctores defectionis deerant. Itaque ubi senatum metus cepit, si propalam tenderent, resisti multitudini concitatæ non posse ; clam simulando dilationem mali inveniunt : placere enim sibi defectionen̄ ad Hannibalem simulant : quibus autem conditionibus in fœdus amicitiamque novam transcant, parum constare. Ita spatio sumto, legatos pro-

pere ad prætorem Romanum Marcellum Claudium, U.C. 536.
 qui Casilini cum exercitu erat, mittunt, docentque, A.C. 216.
 quanto in discrimine sit Nolana res, agrum Hannibal
 Senatus
 Nolani
 subveniatur: concedendo plebei senatum, ubi velint,
 cellum.
 defecturos se, ne deficere præfestinarent, effecisse.
 Marcellus, conlaudatis Nolanis, eadem simulatione
 extrabi rem in suum adventum jussit: interim celari,
 quæ secum acta essent, spemque omuem auxilii Ro-
 mani. Ipse a Casilino Calatiam petit: atque inde,
 Vulturno amni trajecto, perque agrum Saticulanum
 Trebulanumque super Suessulam per montes Nolani
 pervenit.

XV. Sub adventum prætoris Romani Pœnus agro
 Nolano excessit, et ad mare proxime Neapolim de-
 scendit, cupidus maritimi oppidi potiundi, quo cur-
 sus navibus tutus ex Africa esset. Ceterum, post-
 quam Neapolim a præfecto Romano teneri accepit,
 (M. Junius Silanus erat, ab ipsis Neapolitanis adci-
 tus) Neapoli quoque, sicut Nola, omissa, petit Nu-
 ceriam: eam quum aliquamdiu circumsedisset, sæpe Hannibal
 Nuceriam
 capit. vi, sæpe sollicitandis nequidquam nunc plebe nunc
 principibus, fame demum in ditionem accepit,
 pactus, ut inerraes cum singulis abirent vestimentis:
 deinde, ut qui a principio mitis omnibus Italicis,
 præter Romanos, videri vellet, præmia atque hono-
 res, qui remanerent, ac militare secuti voluissent,
 proposuit. Nec ea spe quenquam tenuit: dilapsi
 omnes, quocumque hospitia aut fortuitus animi in-
 petus tulit, per Campaniæ urbes, maximè Nolam
 Neapolimque. Quum ferme triginta senatores, ac
 forte primus quisque, Capuam petissent, exclusi
 inde, quod portas Hannibali clausissent, Cumas se

U. C. 536. contulerunt. Nuceriae præda militi data est, urbs
 A. C. 216. direpta atque incensa. Nolam Marcellus non sui
 magis fiducia præsidii, quam voluntate principum,
 Bantum Marcellus Romanis conciliat. habebat: plebes timebatur, et ante omnes L. Banti-
 tius, quem consensus adtentatæ defectionis, ac metus
 a prætore Romano, nunc ad proditionem patriæ,
 nunc, si ad id fortuna defuisset, ad transfugiendum
 stimulabat. Erat juvenis acer, et sociorum ea tem-
 pestate prope nobilissimus eques, seminecem eum
 ad Cannas in acervo cæsorum corporum inventum,
 curatumque benigne, etiam cum donis Hannibal do-
 dum remiserat: ob ejus gratiam meriti rem Nola-
 nam in jus ditionemque dare voluerat Pœno: anxi-
 umque eum et sollicitum cura novandi res prætor
 cernebat. Ceterum, quum aut pœna cohibendus es-
 set, aut beneficio conciliandus, sibi adsumsisse, quam
 hosti ademisse, fortem ac strenuum maluit socium,
 adeitumque ad se benigne adpellat: *Multos eum in-
 vidios inter populares habere, inde existimatu facile esse,
 quod nemo civis Nolanus sibi indicaverit, quam multa
 ejus egregia facinora militaria essent. Sed, qui in Ro-
 manis militarerit castris, non posse obscuram ejus vir-
 tutem esse: multos sibi, qui cum eo stipendia fecerint,
 referre, qui vir esset ille, quæque et quoties pericula
 pro salute ac dignitate populi Romani adisset: utique
 Cannensi prælio non prius pugna abstiterit, quam prope
 exsanguis ruina superincidentium virorum, equorum,
 armorumque sit obpressus.* Itaque macte virtute esto,
 inquit: *apud me tibi omnis honos atque omne præmium
 erit: et, quo frequentior tecum fueris, senties eam
 rem tibi dignitati atque emolumento esse: lætoque ju-
 veni promissis equum eximium dono dat, bigatos-
 que quingentos questorem numerare jubet: licto-*

ribus imperat, ut eum se adire, quoties velit, pa- U. C. 536.
tiantur. A. C. 216.

XVI. Hac comitate Marcelli ferocis juvenis animus adeo est mollitus, ut nemo inde sociorum rem Romanam fortius ac fidelius juverit. Quum Hannibal ad portas esset, (Nolam enim rursus a Nuceria moverat castra) plebesque Nolana de integro ad defectionem spectaret, Marcellus sub adventum hostium intra muros se recepit; non eastris metuens, sed ne prodendae urbis occasionem nimis multis in eam inminentibus daret. Instrui deinde utrumque acies cœptæ, Romanorum pro mœnibus Nolæ, Pœnorum ante castra sua: prælia hinc parva inter urbem castraque, et vario eventu fiebant: quia duces nec prohibere paucos temere provocantes, nec dare signum universæ pugnæ volebant. In hac cotidiana duorum exercituum statione principes Nolanorum nunciant Marcello, *Nocturna conloquia inter plebem ac Pœnos fieri*; statutumque esse, ut, quum Romana acies egressa portis iret, impedimenta eorum ac sarcinas diriperent, clauderent deinde portas, murosque occuparent, ut, potentes rerum suarum atque urbis, Pœnum inde pro Romano acciperent. Hæc ubi nunciata sunt Marcello, conlaudatis senatoribus Nolanis, prius quam aliquis motus intus oriretur, fortunam pugnæ experiri statuit. Ad tres portas in hostes versas tripartito exercitum instruxit: impedimenta subsequi jussit; calones lixasque et invalidos milites vallum ferre: media porta robora legionum et Romanos equites, duabus circa portis novos milites levemque armaturam ac sociorum equites statuit. Nolani muros portasque adire vetiti; subsidiaque destinata impedimentis data, ne, occupatis prælio legionibus, in

U.C. 536. ea inpetus fieret : ita instructi intra portas stabant.

▲ C. 216. Hannibali, sub signis (id quod per aliquot dies fecerat) ad multum diei in acie stanti, primo miraculo esse, quod nec exercitus Romanus porta egrederetur, nec armatus quisquam in muris esset : ratus deinde prodita conloquia esse, metuque resides factos, partem militum in castra remittit, jussos propere adparatum omnem obpugnandæ urbis in primam aciem adferre ; satis fidens, si cunctantibus instaret, tumultum aliquem in urbe plebem moturam. Dum in sua quisque ministeria discursu trepidat ad prima signa, succeditque ad muros acies, patefacta repente porta, Marcellus signa canere, clamoremque tolli, ac pedites primum, deinde equites, quanto maximo possent inpetu, in hostem erumpere jubet. Satis terroris tumultusque in aciem medium intulerant, quum duabus circa portis P. Valerius Flaccus et C. Aurelius legati in cornua hostium erupere. Addidere clamorem lixae calonesque, et alia turba custodiæ impedimentorum adposita, ut paucitatem maxime spernentibus Poenis ingentis repente exercitus speciem fecerint. Vix equidem ausim adfirmare, quod quidam auctores sunt, duo millia et octingentos hostium cæsos ; non plus quingentos Romanum amisisse. Sive tanta, sive minor victoria fuit, ingens eo die res, ac nescio, an maxima illo bello gesta sit : non vinei enim ab Hannibale vincentibus difficilius fuit, quam postea vincere.

XVII. Hannibal, spe potiundæ Nolæ admota, quum Acerras recessisset, Marcellus extemplo, clausis portis custodibusque dispositis, ne quis egredetur, quæstionem in foro de iis, qui clam in conloquiis hostium fuerant, habuit : supra septuaginta

damatos prodigionis securi percussit, bonaque eo- U. C. 536.
 rum jussit publica populi Romani esse: et, summa A. C. 216.
 rerum senatui tradita, cum exercitu omni profectus,
 supra Suessulam castris positis consedit. Pœnus,
 Acerras primum ad voluntariam dditionem conatus Acerras ca-
 perlicere, postquam obstinatos vidit, obsidere inde pit Pœnus.
 atque obpugnare parat: ceterum Acerranis plus
 animi, quam virium, erat: itaque, desperata tutela
 urbis, ut circumvallari mœnia viderunt, priusquam
 continuarentur hostium opera, per intermissa muni-
 menta neglectasque custodias silentio noctis dilapsi,
 per vias inviaque, qua quemque aut consilium aut
 error tulit, in urbes Campaniæ, quas satis certum
 erat non mutasse fidem, perfugerunt. Hannibal,
 Acerris direptis atque incensis, quum a Casilino dicta-
 torem Romanum legionesque novas adciri nuncias-
 sent, ne quis tam propinquus hostium castris Capuam
 quoque recurrat, exercitum ad Casilinum ducit. Casi-
 linum eo tempore quingenti Prænestini habebant, cum
 paucis Romanis Latinique nominis, quos eodem au-
 dita Cannensis clades contulerat: hi, non confecto
 Præneste ad diem delectu, serius profecti domo,
 quum Casilinum ante adversæ pugnæ famam venis-
 sent, et aliis adgregarent sese Romanis sociisque,
 profecti a Casilino cum satis magno agmine irent;
 avertit eos retro Casilinum nuncius Cannensis pug-
 næ: ibi quum dies aliquot, suspecti Campanis ti-
 mentesque, cavendis ac struendis in vicem insidiis
 traduxissent, jamque de Capuæ defectione agi, acci-
 pique Hannibalem satis pro certo habuere, interfec-
 tis nocte oppidanis, partem urbis, quæ cis Vultur-
 num est, (eo enim dividitur anni) occupavere:
 idque præsidium Casilini habebant Romani. Addi-

U. C. 536. tur et Perusina cohors, homines quadringenti sex-
A. C. 216. aginta, eodem nuncio, quo Prænestini paucos ante

dies, Casilinum compulsi : et satis ferme armatorum ad tam exigua mœnia, et flumine altera parte cincta, tuenda erat : penuria frumenti, nimium etiam ut videretur hominum, efficiebat.

Casilinum
Hannibal
obpugnat.

XVIII. Hannibal quum jam inde haud procul esset, Gætulos cum præfecto, nomine Isalca, præmittit : ac primo, si fiat conloquii copia, verbis benignis ad portas aperiendas præsidiumque accipendum perlicere jubet : si in pertinacia perstent, rem gerere ac tentare, si qua parte invadere urbem possit. Ubi ad mœnia accessere, quia silentium erat, solitudo visa ; metuque concessum barbarus ratus, moliri portas et claustra refringere parat : quum, patefactis repente portis, cohortes duæ, ad id ipsum instructæ intus, ingenti cum tumultu erumpunt, stragemque hostium faciunt. Ita primis repulsis, Maharbal, cum majore robore virorum missus, nec ipse eruptionem cohortium sustinuit : postremo Hannibal, castris ante ipsa mœnia obpositis, parvam urbem parvumque præsidium summa vi atque omnibus copiis obpugnare parat : ac, dum instat laccessitque, corona undique circumdatis mœnibus, aliquot milites et promtissimum quemque, e muro turribusque ictos, amisit. Semel ultiro erumpentes agmine elephantorum obposito prope interclusit, trepidosque compulit in urbem, satis multis, ut extanta paucitate, interfectis : plures cecidissent, ni nox prælio intervenisset. Postero die omnium animi ad obpugnandum accenduntur; utique postquam corona aurea muralis proposita est, atque ipse dux castelli, plano loco positi, segnem obpugnationem

Sagunti expugnatoribus exprobrabat, Cannarum Tra- U. C. 536.
 simenique et Trebiæ singulos admonens universos- A. C. 216.
 que. Inde vineæ quoque cœptæ agi cuniculique : nec
 ad varios conatus hostium aut vis illa, aut ars deerat.
 Socii Romanorum propugnacula adversus vineas sta-
 tuere, transversis cuniculis hostium cuniculos ex-
 cipere, et palam et clam cœptis obviam ire ; donec
 pudor etiam Hannibalem ab incepto avertit : cas- Hannibal
 trisque eommunitis, ac præsidio modico inposito, ne it Capuam
 omissa res videretur, in hiberna Capuam concessit. in hiberna.
 Ibi partem majorem hiemis exercitum in tectis
 habuit, adversus omnia humana mala sæpe ac diu
 duratum, bonis inexpertum atque insuetum : itaque,
 quos nulla mali vicerat vis, perdidere nimia bona Conrum-
 ac voluptates inmodicæ ; et eo impensis, quo avi- pitur illic
 dius ex insolentia in eas se merserant. Somnus ejus exerci-
 citus. enim, et vinum, et epulæ, et scorta, balineaque, et
 otium, consuetudine in dies blandius, ita enervave-
 runt corpora animosque, ut magis deinde præteritæ
 victoriæ eos, quam præsentes tutarentur vires ; ma-
 jusque id peccatum ducis apud peritos artium milita-
 rium haberetur, quam quod non ex Cannensi acie
 protinus ad urbem Romanam duxisset : illa enim
 cunctatio distulisse modo victoram videri potuit ;
 hic error vires ademisse ad vincendum. Itaque,
 Hercule, velut si cum alio exercitu a Capua exiret,
 nihil usquam pristinæ disciplinæ tenuit : nam et re-
 dierunt plerique scortis impliciti : et, ubi primum
 sub pellibus haberi cœpti sunt, viaque et alias mili-
 taris labor exceperit, tironum modo corporibus ani-
 misque deficiebant : et deinde per omne aestivorum
 tempus magna pars sine commeatibus ab signis dilata-

U.C. 536. bebantur : neque aliæ latebræ, quam Capua, deser-
A.C. 216. toribus erant.

XIX. Ceterum, mitescente jam hieme, educto ex hibernis milite, Casilinum redit: ubi, quamquam ab obpugnatione cessatum erat, obsidio tamen continuata oppidanos præsidiumque ad ultimum inopiæ adduxerat. Castris Romanis Ti. Sempronius præerat, dictatore auspiciorum repetendorum caussa profecto Romam. Marcellum, et ipsum cupientem ferre auxiliuni obsessis, et Vulturnus amnis inflatus aquis, et preces Nolanorum atque Acerranorum, tenebant, Campanos timentium, si præsidium Romanum abscessisset. Gracchus, adsidens tantum Casilino, quia prædictum erat dictatoris, ne quid absente eo rei gereret, nihil movebat: quamquam, quæ facile omnem patientiam vincerent, nunciabantur a Casilino: nam et, præcipitasse se quosdam non tolerantes famem, constabat; et stare incrmes in muris, nuda corpora ad missilium telorum ictus præbentes. Ea ægre patiens Gracchus, quum neque pugnam conserere dictatoris injussu auderet, (pugnandum autem esse, si palam frumentum importaret, videbat) neque clam importandi spes esset, farre, ex agris circa undique convecto, quum complura dolia complesset, nuncium ad magistratum Casilinum misit, ut exciperent dolia, quæ amnis deferret. Insequenti nocte, intentis omnibus in flumen ac spem ab nuncio Romano factam, dolia medio missa amni defluxerunt: æqualiter inter omnes frumentum divisum. Id postero quoque die ac tertio factum est; nocte et mittebantur et perveniebant: eo custodias hostium fallebant. Imbribus deinde continuis citatior solito amnis, transverso

Casilinum
in dolii per
amnem
frumen-
tum mit-
titur.

vortice dolia inpullit ad ripam, quam hostes servabant: ibi hærentia inter obnata ripis salicta conspiciuntur: nunciatumque Hannibali est, et deinde intentiore custodia cautum, ne quid falleret Vulturno ad urbem missum. Nuces tamen fusæ ab Romanis castris, quum medio amni ad Casilinum defluerent, eratibus excipiebantur. Postremo ad id ventum inopiae est, ut lora detractasque scutis pelles, ubi fervida mollassent aqua, mandere conarentur: nec muribus aliove animali abstinerent, et omne herbarum radicumque genus aggeribus infimis muri eruerent; et, quum hostes obarassent, quidquid herbidi terreni extra murum erat, raporum semen injecerunt, ut Hannibal, *Eone usque, dum ea nascantur, ad Casilinum sessurus sum?* exclamaret: et, qui nullam antea pactionem auribus admiserat, tum demum agi secum est passus de redemptione liberorum capitum. Septunces auri in singulos pretium convenit. Fide accepta, sese tradiderunt: donec omne aurum personatum est, in vinculis habiti: tum remissi Cumas cum fide. Id verius est, quam ab equite in abeentes inmissos interfectos. Prænestini maxima pars fuere: ex quingentis septuaginta, qui in præsidio fuerunt, minus dimidium ferrum famesque absunxit: ceteri incolumes Prænesti cum prætore suo Manicio (scriba is antea fuerat) redierunt. Statua ejus indicio fuit, Prænesti in foro statuta, loricata, anieta toga, velato capite; et tria signa cum titulo lamenæ æneæ inscripto, *Manicum pro militibus, qui Casilini in præsidio fuerint, votum voruisse.* Idem titulus tribus signis in æde Fortunæ positis fuit subjectus.

XX. Casilinum oppidum redditum Campanis est, firmatum septingentorum militum de exercitu Han-

U.C. 536. nibalis præsidio; ne, ubi Pœnus inde abscessisset,
A.C. 216. Romani oppugnarent. Prænestinis militibus senatus Romanus duplex stipendium et quinquennii militiae vacationem decrevit: civitate quam donarentur ob virtutem, non mutaverunt. Perusinorum casus obscurior fama est; quia nec ipsorum monumento

Petelini
Romanis
fidi.

ullo est inlustratus, nec decreto Romanorum. Eodem tempore Petelinos, qui uni ex Bruttis manserant in amicitia Romana, non Karthaginienses modo, qui regionem obtinebant, sed Bruttii quoque ceteri, ob separata ab se consilia, oppugnabant. Quibus quam obsistere malis nequirent Petelini, legatos Romam ad præsidium petendum miserunt: quorum preces lacrimæque (in questus enim flebiles, quam sibimet ipsi consulere jussi sunt, sese in vestibulo curiæ profuderunt) ingentem misericordiam Patribus ac populo moverunt: consultique iterum a M'. Pomponio prætore Patres, circumspectis omnibus imperii viribus, fateri coacti, nihil jam longinquis sociis in se præsidii esse, redire domum, fideque ad ultimum expleta, consulere sibimet ipsos in reliquum præsenti fortuna jusserunt. Hæc postquam renunciata legatio Petelinis est, tantus repente mœror pavorque senatum eorum cepit, ut pars profugiendi, qua quisque posset, ac deserendæ urbis auctores essent; pars, quando deserti a veteribus sociis essent, adjungendi se ceteris Bruttis, ac per eos dedendi Hannibali. Vicit tamen ea pars, quæ nihil raptim nec temere agendum, consulendumque de integro censuit. Re laxata postero die per minorem trepidationem tenuerunt optimates, ut, convectis omnibus ex agris, urbem ac niuros firmarent.

XXI. Per idem fere tempus literæ ex Sicilia Sar-

diniaque Romam adlatæ. Priors ex Sicilia T. Ota- U. C. 536.
 cilii proprætoris in senatu recitatæ sunt: *L. Furium* A. C. 216.
prætorem cum classe ex Africa Lilybæum venisse: ipsum Status re-
graviter saucium in discrimine ultimo vitæ esse: cilia.
militi et navalibus sociis neque stipendium, neque frumentum ad diem dari; neque, unde detur, esse. Magnopere suadere, ut quam primum ea mittantur; sibi-que, si ita videatur, ex novis prætoribus successorem mittant. Eademque ferme de stipendio frumentoque ab A. Cornelio Mammula proprætore ex Sardinia scripta. Responsum utrisque, non esse, unde mitteretur: jussique ipsi classibus atque exercitibus suis consulere. T. Otacilius, ad unicum subsidium populi Romani Hieronem legatos quum misisset, in Hiero adju-stipendium, quanti argenti opus fuit, et sex mensium frumentum accepit. Cornelio in Sardinia civitates sociæ benigne contulerunt. Et Romæ quoque propter penuriam argenti triumviri mensarii, rogatione Triumviri M. Minucii tribuni plebis, facti, L. Æmilius Papus, qui consul censorque fuerat, et M. Atilius Regulus, qui bis consul fuerat, et L. Scribonius Libo, qui tum tribunus plebis erat. Et duumviri creati, M. et C. Atilii, ædem Concordiæ, quam L. Manlius prætor voverat, dedicaverunt. Et tres pontifices creati, Q. Cæcilius Metellus, et Q. Fabius Maximus, et Q. Fulvius Flaccus, in locum P. Scantinii demortui, et L. Æmilius Paulli consulis, et Q. Ælii Pæti, qui ceciderant pugna Cannensi.

XXII. Quum cetera, quæ continuis cladibus fortuna minuerat, quantum consiliis humanis adsequi poterant, Patres explessent; tandem se quoque et solitudinem curiæ, paucitatemque convenientium ad publicum consilium respexerunt: neque enim post

U. C. 536. L. Æmilius et C. Flaminium censores senatus lectus

A. C. 216. fuerat, quum tantum senatorum adversæ pugnæ, ad

hoc sui quemque casus per quinquennium absumsissent. Quum de ea re M'. Pomponius prætor, dictatore post Casilinum amissum profecto jam ad exercitum,

Delibera- Deliberatur de ex- plendo se- natu. paucitatem etiam civium, e quibus in Patres legerentur, conquestus esset, explendi senatus caussa, et jungendi artius Latini nominis, pro magna re se suadere dixit, ut ex singulis populis Latinorum, binis senatoribus, si Patres Romani censuissent, civitas daretur, atque in demortuorum locum in senatum legerentur.

Eam sententiam haud æquioribus animis, quam ipsorum quondam postulatum Latinorum, Patres audierunt: et, quum fremitus indignantium tota curia esset, et præcipue Manlius, esse etiam nunc stirpis ejus virum, diceret, ex qua quondam in Capitolio consul minatus esset, quem Latinum in curia vidiisset, eum sua manu se interfecturum; Q. Fabius Maximus, Numquam rei ullius alieniore tempore mentionem factam in senatu, dixit, quam inter tam suspensos sociorum animos incertamque fidem id tactum, quod insuper sollicitaret eos: eam unius hominis temerariam vocem silentio omnium extinguendam esse; et, si quid umquam arcani sanctive ad silendum in curia fuerit, id omnium maxime tegendum, oculendum, obliviscendum, pro non dicto habendum esse: ita ejus rei obpressa mentio est. Dictatorem, qui censor ante fuisset, vetustissimusque ex eis, qui viverent, censorii esset, creari placuit, qui senatum legeret: ad cirique C. Terentium consulem ad dictatorem dicendum jussérunt: qui, quum ex Apulia, relicto ibi

Fabius
Buteo
dictator
legendi
senatus
caussa.

præsidio, magnis itineribus Romam redisset, nocte U.C. 536.
proxima, ut mos erat, M. Fabium Buteonem ex se- A.C. 216.
natus consulo sine magistro equitum dictatorem in
sex menses dixit.

XXIII. Is ubi cum lictoribus in Rostra escendit, Dictatoris
neque duos dictatores tempore uno, quod numquam ^{moderatio.}
antea factum esset, probare se, dixit: neque dictato-
rem se sine magistro equitum: nec censoriam vim uni
permissam, et eidem iterum: nec dictatori, nisi rei ge-
rrendæ caussa creato, in sex menses datum imperium.
Quæ inmoderata fors, tempus ac necessitas fecerint, iis
se modum inpositurum: nam neque senatu quemquam
moturum ex iis, quos C. Flaminivs, L. Æmilius censore-
res in senatum legissent: transcribi tantum recitarique
eos jussurum; ne penes unum hominem judicium arbi-
triumque de fama ac moribus senatoris fuerit; et ita
in demortuorum locum sublecturum, ut ordo ordini,
non homo homini prælatus videretur. Recitato vetere
senatu, inde primos in demortuorum locum legit,
qui post L. Æmilium et C. Flaminium censores cu-
rulem magistratum cepissent, nequam in senatum
lecti essent; ut quisque eorum primus creatus erat:
tum legit, qui ædiles, tribuni plebei, questoresve fu-
erant: tum ex iis, qui magistratus non cepissent,
qui spolia ex hoste fixa domi haberent, aut civicam
coronam accepissent. Ita, centum septuaginta sep-
tem cum ingenti adprobatione hominum in senatum
lectis, extemplo se magistratu abdicavit, privatus-
que de Rostris descendit, lictoribus abire jussis: tur-
bæque se immiscuit privatas agentium res, tempus
hoc sedulo terens, ne deducendi sui caussa populam
de foro abduceret: neque tamen elanguit cura ho-
minum ea mora, frequentesque eum domum deduxer-

U. C. 536. runt. Consul nocte insequenti ad exercitum rediit,
A. C. 216. non facto certiore senatu, ne comitiorum caussa in
 urbe retineretur.

XXIV. Postero die consultus a M'. Pomponio prætore senatus decrevit, dictatori scribendum, uti, si e republica censeret esse, ad consules subrogandos veniret cum magistro equitum et prætore M. Marcello, ut ex iis præsentibus noscere Patres possent, quo statu respublica esset, consiliaque ex rebus caperent. Qui ad citi erant, omnes venerunt, relictis legatis, qui legionibus præessent. Dictator, de se pauca ac modice locutus, in magistrum equitum, Ti. Sempronium Gracchum, magnam partem gloriæ vertit; co-
Comitia. mitiaque edixit, quibus L. Postumius tertium absens, qui tum Galliam provinciam obtinebat, et Ti. Sempronius Gracchus, qui tum magister equitum et ædilis curulis erat, consules crearentur. Prætores inde creati, M. Valerius Lævinus, Ap. Claudius Pulcher, Q. Fulvius Flaccus, Q. Mucius Scævola. Dictator, creatis magistratibus, Teanum in liberna ad exercitum rediit, relieto magistro equitum Romæ: qui, quum post paucos dies magistratum initurus esset, de exercitibus scribendis comparandisque in annum Patres consuleret. Quum eæ res maxime agerentur, nova clades nunciata, aliam super aliam cumulante
L. Postu- in eum annum fortuna; L. Postumium, consulem
mius cos- designatum, in Gallia ipsum atque exercitum dele-
des. in Galla-
cum ex- exercitum traducturus erat: ejus silvæ dextra lœva-
erctus. que circa viam Galli arbores ita inciderant, ut in-
 motæ starent, momento levi impulsæ occiderent. Legiones duas Romanas habebat Postumius, socium-
 que ab supero mari tantum conscripserat, ut viginti

quinque millia armatorum in agros hostium induxe- U. C. 536.
rit. Galli oram extremæ silvæ quum circumsedis- A. C. 216.
sent, ubi intravit agmen saltum, tum extremas ar-
borum succisarum inpellunt: quæ, alia in aliam, in-
stabilem per se ac male hærentem, incidentes, anci-
piti strage arma, viros, equos obruerunt, ut vix de-
cem homines effugerent. Nam quum exanimati ple-
riique essent arborum truncis fragmentisque ramo-
rum, ceteram quoque multitudinem, inopinato malo
trepidam, Galli, saltum omnem armati circumseden-
tes, interfecerunt; paucis e tanto numero captis,
qui, fluminis pontem petentes, obsesso ante ab hos-
tibus ponte interclusi sunt. Ibi Postumius omni vi,
ne caperetur, dimicans, obcubuit: spolia corporis
caputque ducis præcisum Boii ovantes templo, quod
sanctissimum est apud eos, intulere: purgato inde
capite, ut mos iis est, calvam auro cælavere: idque
sacrum vas iis erat, quo sollemnibus libarent: po-
culumque idem sacerdoti esse, ac templi autistitibus.
Præda quoque haud minor Gallis, quam victoria,
fuit: nam etsi magna pars animalium strage silvæ
obpressa erat, tamen ceteræ res, quia nihil dissipat-
um fuga est, stratæ per omnem jacentis agminis
ordinem inventæ sunt.

XXV. Hac nunciata clade, quum per dies multos
in tanto pavore fuisset civitas, ut, tabernis clausis,
velut nocturna solitudine per urbem acta, senatus
ædilibus negotium daret, ut urbem circumirent, ape-
ririque tabernas, et mœstitiae publicæ speciem urbi
demi juberent; tum Ti. Sempronius senatum habuit,
consolatusque Patres est, et adhortatus, *ne, qui Can-*
nensi ruinæ non subcubuisserent, ad minores calamitates
animos submitterent: quod ad Karthaginenses hostes

U.C. 536. *Hannibalemque adtinet, prospera modo essent, sicut A. C. 216.* speraret futura, Gallicum bellum et omitti tuto et differri posse: ultionemque eam fraudis in Deorum ac populi Romani potestate fore. *De hoste Pæno exercitibusque, per quos id bellum gereretur, consultandum atque agitandum.* Ipse primum, quid peditum equitumque, quid civium, quid sociorum in exercitu es- set dictatoris, disseruit. Tum Marcellus suarum copiarum summam exposuit. Quid in Apulia cum C. Terentio consule esset, a peritis quæsitum est: nec, unde consulares exercitus satis firmi ad tantum bellum efficerentur, inibatur ratio: itaque Galliam, quamquam stimulabat justa ira, omitti eo anno placuit. Exercitus dictatoris consuli decretus est. *De exercitu Marcelli, qui eorum ex fuga Cannensi es- sent, in Siciliam eos traduci, atque ibi militare, donec in Italia bellum esset, placuit: eodem ex dicta- toris legionibus rejici militem minimi quemque robo- ris, nullo præstituto militiæ tempore, nisi qui stipen- diorum legitimorum esset.* Duæ legiones urbanæ al- teri consuli, qui in locum L. Postumii subfectus es- set, decretæ sunt: eumque, quum primum salvis auspiciis posset, creari placuit: legiones præterea duas primo quoque tempore ex Sicilia adciri: atque inde consul, cui legiones urbanæ evenissent, militum sumeret quantum opus esset. C. Terentio consuli propagari in annum imperium: neque de eo exer- citu, quem ad præsidium Apuliæ haberet, quidquam minui.

*Res gestæ
in Hispania.*

XXVI. Dum hæc in Italia geruntur adparantur- que, nihil segnius in Hispania bellum erat: sed ad eam diem magis prosperum Romanis. P. et Cn. Scipionibus inter se partitis copias, ut Cnæus terra,

Publius navibus rem gereret; Hasdrubal Pœnorum U. C. 536.
imperator, neutri parti virium satis fidens, procul ab A. C. 216.
hoste, intervallo ac locis tutus, tenebat se: quoad
multum ac diu obtstanti quatuor millia peditum, et
quingenti equites in supplementum missi ex Africa
sunt. Tum, refecta tandem spe, castra propius hos-
tem movit: classemque et ipse instrui paraque ju-
bet, ad insulas maritimamque oram tutandam. In
ipso inpetu movendarum de integro rerum, perculit
eum præfectorum navium transitio: qui, post clas-
sem ad Iberum per pavorem desertam graviter in-
crepiti, numquam deinde satis fidi aut duci, aut Kar-
thaginiensium rebus fuerant. Fecerant hi trans-
fugæ motum in Carpesiorum gente, desciverantque
iis auctoribus urbes aliquot: una etiam ab ipsis vi
capta fuerat. In cam gentem versum ab Romanis
bellum est: infestoque exercitu Hasdrubal ingressus
agrum hostium, pro captæ ante dies paucos urbis
mœnibus, Galbum, nobilem Carpesiorum ducem,
cum valido exercitu castris sese tenentem, adgredi
statuit. Præmissa igitur levi armatura, quæ eliceret
hostes ad certamen, peditum partem ad depopulan-
dum per agros passim dimisit, ut palantes excipe-
rent. Simul et ad castra tumultus erat, et per agros
fugaque et cædes; deinde undique diversis itineribus
quum in castra se recepissent, adeo repente decessit
animis pavor, ut non ad munimenta modo defenden-
da satis animorum esset, sed etiam ad lacesendum
hostem prœlio. Erumpunt igitur agmine e castris,
tripudiantes more suo; repentinaque eorum audacia
terrorem hosti, paullo autem ultro lacescenti, incus-
sit: itaque et ipse Hasdrubal in collem satis arduum,
tutum flumine etiam objecto, tum copias subducit,

U. C. 536. et præmissam levem armaturam equitesque palatos
 A. C. 216. eodem recipit: nec aut colli aut flumini satis fidens,
 vallo castra permunit. In hoc alterno pavore cer-
 tamiua aliquot sunt contracta: nec Numida Hispano
 eques par fuit; nec jaculator Maurus cætrato,
 velocitate pari, robore animi viriumque aliquantum
 præstanti.

XXVII. Postquam neque elicere Pœnum ad cer-
 tamen obversati castris poterant, neque castrorum
 obpugnatio facilis erat; urbem Ascuam, quo fines
 hostium ingrediens, Hasdrubal frumentum commea-
 tusque alios convexerat, vi capiunt, omnique circa
 agro potiuntur: nec jam, atq[ue] in agmine, aut in cas-
 tris, ullo imperio contineri. Quam ubi negligentiam
 ex re (ut fit) bene gesta oriri senserat Hasdrubal,
 cohortatus milites, ut palatos sine signis hostes ad-
 gredierentur, degressus colle, pergit ire acie instructa
 ad castra: quem ut adesse tumultuose nunciavere
 fugientes ex speculis stationibusque, ad arma con-
 clamatum est. Ut quisque arma ceperat, sine impe-
 rio, sine signo, incompositi, inordinati in prælium
 ruunt. Jam primi conseruerant manus, quum alii
 catervatim currerent, alii nondum e castris exissent:
 tamen primo ipsa audacia terruere hostem: deinde,
 rari in confertos inlati, quum paucitas parum tuta
 esset, respicere alii alios, et undique pulsi coire in
 orbem; et dum corporibus adplicantur, armaque ar-
 mis jungunt, in artum compulsi, quum vix movendis
 armis satis spatii esset, corona hostium cincti, ad
 multum diei cæduntur. Exigua pars, eruptione facta,
 silvas ac montes petit: parique terrore et castra
 sunt deserta, et universa gens postero die in dedi-
 tionem venit. Nec diu in pacato mansit: nam sub-

inde ab Karthagine adlatum est, ut Hasdrubal primo quoque tempore in Italiam exercitum duceret : quæ vulgata res per Hispaniam omnium ferme animos ad Romanos avertit. Itaque Hasdrubal exemplo literas Karthaginem mittit, indicans, quanto U. C. 536.
A. C. 216.
Hasdrubal
jubetur du-
cere exerci-
tum in Ita-
liam.

ma profectionis suæ damno fuisse. *Si vero inde pergeret, priusquam Iberum transiret, Romanorum Hispaniam fore. Nam, præterquam quod nec præsidium, nec ducem haberet, quem relinqueret pro se; eos imperatores esse Romanos, quibus vix æquis viribus resisti possit. Itaque si ulla Hispaniæ cura esset, successorem sibi cum valido exercitu mitterent: cui, ut omnia prospere evenirent, non tamen otiosam provinciam fore.*

XXVIII. Hæ literæ quamquam primo admodum moverunt senatum; tamen, quia Italiæ cura prior potiorque erat, nihil de Hasdrubale, neque de copiis ejus mutatum est. Himilco, cum exercitu justo et aucta classe, ad retinendam terra marique ac tuendam Hispaniam, est missus; qui, ut pedestres navalesque copias trajecit, castris communitis, navibusque subductis et vallo circumdati, cum equitibus delectis ipse, quantum maxime adcelerare poterat, per dubios infestosque populos juxta intentus ad Hasdrubalem pervenit. Quum decreta senatus mandataque exposuisset, atque edidicisset ipse in vicem, quemadmodum tractandum bellum in Hispania foret, retro in sua castra rediit; nulla re, quam celeritate, tutior, quod undique abierat, antequam consentirent. Hasdrubal, priusquam moveret Himilco
mittitur in
Hispaniam. castra, pecunias imperat populis omnibus suæ ditionis, satis gnarus, Hannibalem transitus quosdam Hasdrubal
in Italiam
ire parat. pretio mercatum: nec auxilia Gallica aliter, quam

U. C. 536. conducta, habuisse; inopem, tantum iter ingressum,
 A. C. 216. vix penetraturum ad Alpes fuisse: pecuniis igitur
 raptim exactis, ad Iberum descendit. Decreta Kar-
 thaginiensium et Hasdrubalis iter ubi ad Romanos
 sunt perlata, omnibus omissis rebus, ambo duces,
 junctis copiis, ire obviam cœptis atque obsistere pa-
 Scipiones
 ei obviam
 eunt.
 rant; rati si Hannibali, vix per se ipsi tolerando
 Italiæ hosti, Hasdrubal dux atque Hispaniensis ex-
 eritus esset junctus, illum Romani finem imperii
 fore. His anxii curis ad Iberum contrahunt copias;
 et, transito amne, quum diu consultassent, utrum
 castra castris conferrent, an satis haberent, sociis
 Karthaginiensium obpingnandis, morari ab itinere
 proposito hostem, urbem a propinquo flumine Ibe-
 ram adpellatam, opulentissimam ea tempestate re-
 gionis ejus, obpugnare parant: quod ubi sensit
 Hasdrubal, pro ope ferenda sociis, pergit ipse ire ad
 urbem, deditam nuper in fidem Romanorum, obpug-
 nandam: ita jam cœpta obsidio omissa ab Romanis
 est, et in ipsum Hasdrubalem versum bellum.

XXIX. Quinque millium intervallo castra distan-
 tia habuere paucos dies: nec sine levibus prœliis,
 Pugna in- nec ut in aciem exirent: tandem uno eodemque die
 ter Scipio- velut ex composito utrimque signum pugnæ propo-
 nes et situm est, atque omnibus copiis in campum descen-
 Hasdru- sum. Triplex stetit Romana acies: velitum pars
 balem. inter antesignanos locata, pars post signa accepta,
 equites cornua cinxere. Hasdrubal medium aciem
 Hispanis firmat: in cornibus, dextro Pœnos locat,
 laevo Afros mercenariorumque auxilia: equitum Nu-
 midas Pœnorū peditibus, ceteros Afris pro corni-
 bus obponit: nec omnes Numidæ in dextro locati
 cornu, sed quibus, desultorum in modum, binos tra-

hentibus equos inter acerrimam s^epe pugnam in re- U.C. 536.
 centem equum ex fesso armatis transsultare mos A.C. 216.
 erat: tanta velocitas ipsis, tamque docile equorum
 genus est. Quuni hoc modo instructi starent, im-
 peratorum utriusque partis haud ferme dispare spes
 erant: nam ne multum quidem, aut numero, aut
 genere militum, hi aut illi pr^æstabant. Militibus
 longe dispar animus erat. Romanis enim, quam-
 quam procul a patria pugnarent, facile persuaserant
 duces, pro Italia atque urbe Romana eos pugnare:
 itaque, velut quibus reditus in patriam eo discrimine
 pugnæ verteretur, obstinaverant animis, vincere aut
 mori. Minus pertinaces viros habebat altera acies:
 nam maxima pars Hispani erant: qui vinci in His-
 pania, quam victores in Italiā trahi, malebant.
 Primo igitur concursu, quum vix pila conjecta es-
 sent, retulit pedem media acies, inferentibusque sese
 magno inpetu Romanis terga vertit. Nihilo segnius
 in cornibus prœlium fuit: hinc Pœnus, hinc Afer
 urget: et velut in circumventos prœlio ancipiti pug-
 nant. Sed quum in medium tota jam coisset Ro-
 manā acies, satis virium ad dimovenda hostium cor-
 nua habuit: itaque duo diversa prœlia erant: utro- Vincunt
 que Romani, ut qui, pulsis tandem mediis, et numero Romani.
 et robore virorum pr^æstarent, haud dubie supera-
 runt. Magna vis hominum ibi occisa: et, nisi His-
 panī vixdum conserto prœlio tam effuse fugissent,
 perpauci ex tota superfuissent acie. Equestris pug-
 na nulla adnodum fuit: quia, simul inclinatam me-
 diam aciem Mauri Numidæque viderunt, extenplo
 fuga effusa nuda cornua, elephantis quoque pr^æ se
 actis, deseruere. Et Hasdrubal, usque ad ultimum
 eventum pugnæ moratus, e media cæde cum paucis.

U. C. 536. effugit. Castra Romani cepere, atque diripuere. Ea
 A. C. 216. pugna, si qua dubia in Hispania erant, Romanis ad-
 junxit: Hasdrubalique non modo in Italiam traducendi exercitus, sed ne manendi quidem satis tuto
 in Hispania, spem reliquit. Quæ postquam literis
 Scipionum Romæ vulgata sunt, non tam victoria,
 quam prohibito Hasdrubalis in Italiam transitu, læ-
 tabantur.

Petelia in XXX. Dum hæc in Hispania geruntur, Petelia
 Bruttiis ab in Bruttiis, aliquot post mensibus, quam cœpta ob-
 Himilcone pugnari erat, ab Himilcone, præfecto Hannibal, expugnata est. Multo sanguine ac vulneribus ea
 Pœnis victoria stetit: nec ulla magis vis obsessos, quam fames, expugnavit: absumtis enim frugum alimentis, carnisque omnis generis quadrupedum; sutrinæ postremo coriis, herbisque et radicibus, et corticibus teneris, strictisque rubis vixere; nec, antequam vires ad standum in muris ferendaque arma deerant, expugnati sunt. Recepta Petelia, Pœnus ad Consentiam copias traducit: quam, minus pertinaciter defensam, intra paucos dies in ditionem accepit. Iisdem ferme diebus et Bruttiorum exercitus Crotonem, Græcam urbem, circumsedit, opulentam quondam armis virisque, tum jam adeo multis magnisque cladibus afflictam, ut omnis ætatis minus viginti millia civium superessent: itaque urbe a defensoribus vasta facile potiti sunt hostes: arx tantum retenta, in quam inter tumultum captæ urbis e media cæde quidam effugere. Et Locrenses descivere ad Bruttios Pœnosque, prorita multitudine a principibus. Rhegini tantummodo regionis ejus, et in fide erga Romanos, et potestatis suæ ad ultimum manserunt. In Siciliam quoque eadem in-

Croto ca-
 pitur a
 Bruttiis.

clinatio animorum pervenit: et ne domus quidem U. C. 536.
 Hieronis tota ab defectione abstinuit: namque Gelo A. C. 216.
 maximus stirpis, contemta simul senectute patris, Gelo filius
 simul post Cannensem cladem Romana societate, Hieronis deficit ad
 ad Pœnos defecit: movissetque in Sicilia res, nisi Pœnos.
 mors adeo opportuna, ut patrem quoque suspicione
 adaspergeret, armantem eum multitudinem, sollici-
 tantemque socios absumsisset. Hæc eo anno in Ita-
 lia, in Africa, in Sicilia, in Hispania vario eventu
 acta. Exitu anni Q. Fabius Maximus a senatu pos-
 tulavit, ut ædem Veneris Erycinæ, quam dictator
 vovisset, dedicare liceret. Senatus decrevit, ut Ti.
 Sempronius consul designatus, quum primum hono-
 rem inisset, ad populum ferret, ut Q. Fabium duum-
 virum esse juberent ædis dedicandæ caussa. Et M.
 Æmilio Lepido, qui bis consul augurque fuerat, filii
 tres, Lucius, Marcus, Quintus, ludos funebres per
 triduum, et gladiatorum paria duo et viginti per tri-
 dum in foro dederunt. Ædiles curules C. Lætorius, M. Æmilii
 et Ti. Sempronius Gracchus, consul designatus, qui ludi fune-
 bres.
 in ædilitate magister equitum fuerat, ludos Romanos
 fecerunt, qui per triduum instaurati sunt. Plebeii
 ludi ædilium M. Aurelii Cottæ et M. Claudii Mar-
 celli ter instaurati. Circumacto tertio anno Punici U. C. 537.
 belli, Ti. Sempronius consul Idibus Martiis magis-
 tratum iniit. Prætores Q. Fulvius Flaccus, qui antea
 consul censorque fuerat, urbanam; M. Valerius Læ-
 vinus peregrinam sortem in jurisdictione habuit. Ap.
 Claudius Pulcher Siciliam, Q. Mucius Scævola Sar-
 diniam sortiti sunt. M. Marcello pro consule impe-
 rium esse populus jussit, quod post Cannensem clad-
 em unus Romanorum imperatorum in Italia pros-
 pere rem gessisset.

U. C. 537. XXXI. Senatus, quo die primum est in Capitolio
 A. C. 215. consultus, decrevit, ut, quo eo anno duplex tributum
 Duplex tributum imperaretur, simplex confestim exigeretur, ex quo
 impera- stipendum præsens omnibus militibus daretur, præ-
 tum. terquam qui milites ad Cannas fuissent. De exerci-
 tibus ita decreverunt, ut duabus legionibus urbanis
 Ti. Sempronius consul Cales ad conveniendum diem
 ediceret: inde sex legiones in castra Claudiana su-
 pra Suessulam deducerentur: quæ ibi legiones essent,
 Decreta de exerci- (erant autem Cannensis maxime exercitus) eas Ap.
 tibus. Claudius Pulcher prætor in Siciliam trajiceret; quæ-
 que in Sicilia essent, Romani deportarentur. Ad
 exercitum, cui ad conveniendum Cales edicta dies
 erat, M. Claudius Marcellus missus: isque jussus
 in castra Claudiana deducere urbanas legiones. Ad
 veterem exercitum accipiendum deducendumque inde
 in Siciliam, T. Metilius Croto legatus ab Ap. Clau-
 dio est missus. Taciti primo exspectaverant homi-
 nes, uti consul comitia collegæ creando haberet:
 deinde, ubi ablegatum, velut de industria, M. Mar-
 cellum viderunt, quem maxime consulem in eum an-
 num ob egregie in prætura res gestas creari vole-
 bant, fremitus in curia est ortus. Quod ubi sensit
 consul, *Utrumque, inquit, c republica fuit, Patres*
conscripti, et M. Claudium ad permutandos exercitus
in Campaniam proficisci, et comitia non prius edici,
quam is inde, confecto, quod mandatum est, negotio,
revertisset; ut vos consulem, quem tempus reipublicæ
postularet, quem maxime vultis, haberetis. Ita de
 comitiis, donec rediit Marcellus, silentium fuit. In-
 terea duumviri creati sunt Q. Fabius Maximus et T.
 Otacilius Crassus, ædibus dedicandis, Menti Otaci-
 lius, Fabius Veneri Erycinæ. Utraque in Capitolio

est, canali uno discretæ. Et de trecentis equitibus U. C. 537.
 Campanis, qui, in Sicilia cum fide stipendiis emeritis, A. C. 215.
 Romam venerant, dein latum ad populum, ut cives
 Romani essent: item, uti municipes Cumani essent,
 pridie quam populus Campanus a populo Romano
 defecisset. Maxime, ut hoc ferretur, moverat, quod,
 quorum hominum essent, scire se ipsi negabant;
 vetere patria reicta, in eam, in quam redierant,
 nondum adsciti. Postquam Marcellus ab exercitu
 rediit, comitia uni consuli rogando in locum L.
 Postumii edicuntur. Creatur ingenti consensu Marcellus
 cellus, qui extemplo magistratum occiperet: cui in locum
 ineunti consulatum quum tonuisse, vocati augures cos. crea-
 vitio creatum videri pronunciaverunt; vulgoque Pa-
 tres ita fama fercabant, quod tum primum duo plebeii Se abdicat.
 consules facti essent, id Deis cordi non esse. In lo-
 cum Marcelli, ubi is se magistratu abdicavit, sub-
 fectus Fabius Maximus tertium. Mare arsit eo an-
 no: ad Sinuessam bos equuleum peperit: signa La-
 nuvii ad Junonis Sospitæ crux manavere, lapidi-
 busque circa id templum pluit: ob quem imbre
 novemdiale, ut adsolet, sacrum fuit: ceteraque pro-
 digia cum cura expiata.

XXXII. Consules exercitus inter sese diviserunt.
 Fabio exercitus, cui M. Junius dictator præfuerat,
 evenit; Sempronio volones, qui fierent, et sociorum
 viginti quinque millia; M. Valerio prætori legiones,
 quæ ex Sicilia redissent, decretæ; M. Claudius pro-
 consul ad eum exercitum, qui supra Suessulam No-
 læ præsideret, missus. Prætores in Siciliam ac Sar-
 diniam profecti. Consules edixerunt, quoties in se-
 natum vocassent, uti senatores, quibusque in senatu
 dicere sententiam liceret, ad portam Capenam con-

U. C. 537. venirent. Prætores, quorum jurisdictio erat, tribu-
A. C. 215. nalia ad Piscinam publicam posuerunt: eo vadimo-
nia fieri jusserunt: ibique eo anno jus dictum est.
Interim Karthaginem, unde Mago frater Hanni-
balis duodecim millia peditum, et mille quingentos
equites, viginti elephantes, mille argenti talenta in
Italiam transmissurus erat, cum præsidio sexaginta
navium longarum, nuncius adfertur, in Hispania rem
male gestam, omnesque ferme ejus provinciæ popu-
los ad Romanos defecisse. Erant, qui Magonem
Poeni in Sardiniam cum classe ea copiisque, omissa Italia, in Hispaniam
ab Hampsicora averterent; quum Sardiniae recipiendæ repentina spes
sicora. adfulsit. *Parvum ibi exercitum Romanum esse: veterem prætorem inde A. Cornelium provinciæ peritum*
decedere, norum exspectari. Ad hoc, fessos jam animos Sardorum esse diuturnitate imperii: et proximo
iis anno acerbe atque arare imperatum. Gravi tributo
et coniatione iniqua frumenti pressos: nihil deesse aliud,
quam auctorem, ad quem deficerent. Hæc clandestina
legatio per principes missa erat; maxime eam rem
moliente Hampsicora, qui tum auctoritate atque
opibus longe primus erat. His nunciis prope uno
tempore turbati, erectique, Magonem cum classe sua
copiisque in Hispaniam mittunt: in Sardiniam Has-
drubalem diligunt ducem: et tantum ferme copia-
rum, quantum Magoni, decernunt. Et Romæ con-
sules, transactis rebus, quæ in urbe agendæ erant,
movebant jam sese ad bellum. Ti. Sempronius mili-
tibus Sinuessam diem ad conveniendum edixit; et
Q. Fabius, consulto prius senatu, ut frumenta omnes
ex agris, ante Kalendas Junias primas, in urbes mu-
nitas conveherent. Qui non invexisset, ejus se agrum
populaturum, seruos sub hasta venditum, villas in-

censurum. Ne prætoribus quidem, qui ad jus dicendum creati erant, vacatio ab belli administratione data est. Valerium prætorem in Apuliam ire placuit, ad exercitum a Terentio accipiendum: quum ex Sicilia legiones venissent, iis potissimum uti ad regionis ejus præsidium: Terentianum mitti cum aliquo legatorum. Et viginti quinque naves M. Valerio datæ sunt, quibus oram maritimam inter Brundisium ac Tarentum tutari posset. Par navium numerus Q. Fulvio prætori urbano decretus ad suburbana litora tutanda. C. Terentio proconsuli negotium datum, ut in Piceno agro conquisitionem militum haberet, locisque iis præsidio esset. Et T. Otacilius Crassus, postquam ædem Mentis in Capitolio dedicavit, in Siciliam cum imperio, qui classi præcesset, missus.

XXXIII. In hanc dimicationem duorum opulentissimorum in terris populorum omnes reges gentesque animos intenderant: inter quos Philippus Macedonum rex, eo magis, quod propior Italiae, ac mari tantum Ionio discretus erat. Is ubi primum fama accepit, Hannibalem Alpes transgressum, ut bello inter Romanos Pœnumque orto lætatus erat, ita, utrius populi mallet victoriam esse, incertis adhuc viribus, fluctuatus animo fuerat. Postquam ^{Philippus rex Maced.} tertia jam pugna, ^{legatos mitit ad Han-} ^{nibalem.} ^{tertia} victoria cum Pœnis erat, ad fortunam inclinavit, legatosque ad Hannibalem misit: qui, vitantes portus Brundisini Tarentinumque, quia custodiis navium Romanarum tenebantur, ad Laciniæ Junonis templum in terram egressi sunt. Inde per Apuliam petentes Capuam, media in præsidia Romana inlati sunt: deductique ad M. Valerium Lævinum prætorem, circa Nuceriam castra ha-

U. C. 537. bentem. Ibi intrepide Xenophanes legationis principes, a Philippo rege se missum, ait, ad amicitiam societatemque jungendam cum populo Romano; mandata habere ad consules ac senatum populumque Romanum. Inter defectiones veterum sociorum, Valerius, nova societate tam clari regis laetus admodum, hostes pro hospitibus comiter accepit: dat, qui prosequantur, itinera cum cura demonstrent, quæ loca, quosque saltus, aut Romanus, aut hostes teneant. Xenophanes per præsidia Romana in Campaniam, inde, qua proximum fuit, in castra Hannibalis pervenit, fœdusque cum eo atque amicitiam

Fœdus in-junxit legibus his: *ut Philippus rex quam maxima ter Phili- classe (ducentas autem nares videbatur effecturus) in Hanniba- Italiam trajiceret, et vastaret maritimam oram: bel-*

lum pro parte sua terra marique gereret: ubi debellatum esset. Italia omnis cum ipsa urbe Roma Karthaginiensium atque Hannibalis esset, prædaque omnis Hannibali cederet. Perdomita Italia, navigarent in Græciam, bellumque, cum quibus regibus placeret, gererent: quæ civitates continentis, quæ insulæ ad Macedoniam vergunt, eæ Philippi regnique ejus es-sent.

Legati
Pœno-
rum ad
Philip-
pum.

Capiuntur
a Roma-
nis.

XXXIV. In has ferme leges inter Pœnum ducem legatosque Macedonum ictum fœdus, missique cum iis ad regis ipsius firmandam fidem legati, Gisgo, et Bostar, et Mago, eodem ad Junonis Laciniæ, ubi navis occulta in statione erat, pervenient: inde profecti, quum jam altum tenerent, conspecti a classe Romana sunt, quæ prædio erat Calabriæ litoribus.

P. Valerius Flaccus cercuros ad persecundam retrahendamque navem quum misisset, primo fugere regii conati: deinde, ubi celeritate vinci senserunt,

tradunt se Romanis, et ad præfectum classis ad-^{U.C. 537.}
 ducti: quum quæreret, *qui, et unde, et quo tende-*
rent cursum? Xenophanes primo, satis jam semel
 felix, mendacium struere, *a Philippo se ad Romanos*
missum, ad M. Valerium, ad quem unum iter tutum
fuerit, pervenisse. *Campaniam superare nequissime, sep-*
tam hostium præsidiis. Deinde, ut Punicus cultus
 habitusque suspectos legatos fecit Hannibal, in-
 terrogatosque sermo prodidit: tum comitibus eorum
 seductis, ac metu territis, literæ quoque ab Hanni-
 bale ad Philippum inventæ, et pacta inter regem
 Macedonum Pœnumque ducem. Quibus satis cog-
 nitis, optimum visum est, captivos comitesque eo-
 rum Romam ad senatum, aut ad consules, ubicum-
 que essent, quam primum deportare: ad id celerri-
 mæ quinque naves delectæ, ac L. Valerius Antias,
 qui præcesset, missus: eique mandatum, ut in om-
 nes naves legatos separatim custodiendos divideret,
 daretque operam, ne quod iis conloquium inter se,
 neve quæ communicatio consilii esset. Per idem
 tempus Romæ quum A. Cornelius Mammula, ex Sardinia
 Sardinia provincia decedens, retulisset, qui status
 rerum in insula esset, bellum ac defectionem omnes
 spectare; Q. Mucium, qui successisset sibi, gravitate
 cœli aquarumque advenientem exceptum, non tam
 in periculosum, quam longum, morbum implicitum,
 diu ad belli vim sustinendam inutilem fore, exerci-
 tumque ibi ut satis firmum pacatæ provinciæ præsi-
 dio esse, ita parum bello, quod motum iri videretur:
 decreverunt Patres, ut Q. Fulvius Flaccus quinque
 millia peditum, quadringentos equites scriberet, eam-
 que legionem primo quoque tempore in Sardiniam
 trajiciendam curaret, mitteretque cum imperio, quem

A. C. 215.

Sardinia

status.

U. C. 537. ipsi videretur, qui rem gereret, quoad Mucius con-
A. C. 215. valuisse. Ad eam rem missus est T. Manlius Tor-
quatus, qui bis consul censorque fuerat, subegearat-
que in consulatu Sardos. Sub idem fere tempus et
a Karthagine in Sardiniam classis missa, duce Has-
drubale, cui Calvo cognomen erat, fœda tempestate
vexata, ad Baliares insulas dejicitur : ibique (adeo
non armamenta modo, sed etiam alvei navium quas-
sati erant) subductæ naves dum reficiuntur, ali-
quantum temporis triverunt.

XXXV. In Italia quum post Cannensem pug-
nani, fractis partis alterius viribus, alterius mollitis
animis, segnius bellum esset : Campani per se adorti
sunt rem Cumani suæ ditionis facere ; primo sol-
licitantes, ut ab Romanis deficerent : ubi id parum
processit, dolum ad capiendos eos comparant. Cam-
panis omnibus statim sacrificium ad Hanas : eo se-
natum Campanum venturum certiores Cumanos fe-
cerunt : petieruntque, ut et Cumamus eo senatus ve-
niret ad consultandum communiter, ut eosdem ute-
que populus socios hostesque haberet : præsidium
ibi armatum sese habituros, ne quid ab Romano
Pœnove periculi esset. Cumani (quamquam suspecta
fraus erat) nihil abnuere ; ita tegi fallax consilium
posse rati. Interim Ti. Sempronius consul Ro-
manus Sinuessæ, quo ad convenientiū diem edix-
erat, ex exercitu lustrato, transgressus Vulturnum flu-
men, circa Liternum castra posuit. Ibi, quia otiosa
stativa erant, crebro decurrere milites cogebat, ut
tirones (ea maxima pars volonum erat) adsuescerent
signa sequi, et in acie agnoscere ordines suos : inter
quæ maxima inerat cura duci, itaque legatis tribu-
nisque præcepserat, ne qua exprobratio cuiquam veteris

Campa-
norum
molti-
ones in
Cuma-
nos.

*fortunæ discordiam inter ordines sereret: vetus miles U. C. 537.
tironi, liber voloni sese exæquari sineret: omnes satis A. C. 215.
honestos generososque ducerent, quibus arma sua signa-
que populus Romanus commisisset: quæ fortuna coegis-
set ita fieri, eamdem cogere tueri factum.* Ea non ma-
jore cura præcepta ab ducibus sunt, quam a militi-
bus observata; brevique tanta concordia coaluerant
omnium animi, ut prope in oblivionem veniret, qua
ex conditione quisque esset miles factus. Hæc agenti
Graccho legati Cumani nunciarunt, quæ a Campani-
nis legatio paucos ante dies venisset, et quid iis ipsi
respondissent. Triduum post eum diem festum esse:
non senatum solum omnem ibi futurum, sed castra
etiam et exercitum Campanum. Gracchus, jussis
Cumanis omnia ex agris in urbem convehere, et ma-
nere intra muros, ipse pridie, quam statum sacri-
ficium Campanis esset, Cumas movet castra. Hamæ
inde tria millia passuum absunt. Jam Campani eo
frequentes ex composito convenerant, nec procul
inde in occulto Marius Alfius Medixtuticus (sum-
mus magistratus erat Campanis) cum quatuordecim
millibus armatorum habebat castra; sacrificio ad-
parando, et inter id instruendæ fraudi aliquanto in-
tentior, quam muniendis castris, aut ulli militari
operi. Triduum sacrificatum ad Hamas. Nocturnum
erat sacrum, ita ut ante medium noctem com-
pleretur. Huic Gracchus insidiandum tempori ra-
tus, custodibus ad portas positis, ne quis enunciare
posset cœpta, et ab decima diei hora coactis militi-
bus corpora curare, somnoque operam dare, ut pri-
mis tenebris convenire ad signum possent, vigilia
ferme prima tolli jussit signa; silentique profectus
agmine, quum ad Hamas media nocte pervenisset,

U. C. 537. castra Campana, ut in pervigilio neglecta, simul
 A. C. 215. omnibus portis invadit: alios somno stratos, alios
 Castra Campana perpetrato sacro inermes redeentes obtruncat: ho-
 invadit minum eo tumultu nocturno cæsa plus duo millia,
 Grac- cum ipso duce Mario Alfio: capta sunt signa mili-
 chus. taria quatuor et triginta.

XXXVI. Gracchus, minus centum militum jactu-
 ra castris hostium potitus, Cumas se propere rece-
 pit, ab Hannibale metuens, qui super Capuam in
 Tifatis habebat castra. Nec eum provida futuri fe-
 fellit opinio: nam simul Capuam ea clades est nun-
 ciata, ratus Hannibal, ab re bene gesta insolenter
 lætum exercitum tironum, magna ex parte, servorumque,
 spoliantem victos, prædasque agentem, ad
 Hamas se inventurum; citatum agmen præter Ca-
 puam rapit, obviosque ex fuga Campanorum dato
 præsidio Capuam duci, saucios vehiculis portari ju-
 bet: ipse Hamis vacua ab hostibus castra, nec quid-
 quam præter recentis vestigia cædis, strataque pas-
 sim corpora sociorum invenit. Auctores erant qui-
 dam, ut protinus inde Cumas duceret, urbemque ob-
 pugnaret. Id quamquam haud modice Hannibal
 cupiebat, ut, quia Neapolim non potuerat, Cumas
 saltem, maritimam urbem, haberet; tamen, quia
 præter arma nihil secum miles, raptim acto agmine,
 extulerat, retro in castra supra Tifata se recepit:
 inde, fatigatus Campanorum precibus, sequenti die
 cum omni adparatu obpugnandæ urbis Cumas rediit:
 perpopulatoque agro Cumano, mille passus ab urbe
 castra locat; quum Gracchus magis verecundia in-
 tali necessitate deserendi socios, inplorantes fidem
 suam populique Romani, substitisset, quam satis
 fidens exercitui. Nec alter consul Fabius, qui ad-

Cales castra habebat, Vulturnum flumen traducere U. C. 537.
 audebat exercitum; occupatus primo auspiciis repe- A. C. 215.
 tendis, dein prodigiis, quæ alia super alia nuncia- Defendit
 bantur, expiantique ea haud facile litari aruspices Cumas
 respondebant. Gracchus.

XXXVII. Hæ caussæ quum Fabium tenerent, Sempronius in obsidione erat; et jam operibus ob-pugnabatur: adversus ligneam ingentem admotam urbi, aliam turrem ex ipso muro excitavit consul Romanus, aliquanto altiorem: quia muro satis per se alto subjectis validis sublicis pro solo usus erat: inde primum saxis, sudibusque, et ceteris missilibus propugnatores mœnia atque urbem tuebantur: post-remo, ubi promovendo adjunctam muro viderunt turrem, facibus ardentibus plurimum simul ignem conjecterunt: quo incendio trepida armatorum multitudo quum de turre sese præcipitaret, eruptio ex oppido simul duabus portis stationes hostium fudit, fugavitque in castra; ut eo die obsesso, quam obsidenti, similior esset Pœnus. Ad mille trecenti Karthaginiensium cæsi, et undesexaginta vivi capti; qui, circa muros et in stationibus solute ac negligerter agentes, quum nihil minus, quam eruptionem, timuissent, ex improviso obpressi fuerant. Gracchus, priusquam se hostes ab repentina pavore conlige-rent, receptui signum dedit ac suos intra muros re-cepit. Postero die Hannibal, lætum secunda re consulem justo prælio ratus certaturum, aciem inter castra atque urbem instruxit: ceterum postquam neminem moveri ab solita custodia urbis vidi-t, nec committi quidquam temerariae spei, ad Tifata redit infecta re. Quibus diebus Cumæ liberatæ sunt ob-sidione, iisdem diebus et in Lucanis ad Grumentum Recedit a Cumis Hannibal.

U. C. 537. Ti. Sempronius, cui Longo cognomen erat, cum
 A. C. 215. Hannone Pœno prospere pugnat. Supra duo mil-
 lia hostium occidit, et ducentos octoginta milites
 amisit: signa militaria ad quadraginta unum cepit.
 Pulsus finibus Lucanis Hanno retro in Bruttios sese
 recepit. Et ex Hirpinis oppida tria, quæ a populo
 Romano defecerant, vi recepta per M. Valerium præ-
 torem. Vercellius Siciliusque, auctores defectionis,
 securi percussi: supra mille captivorum sub hasta
 venierunt: præda alia militi concessa, exercitus Lu-
 ceriam reductus.

XXXVIII. Dumi hæc in Lucanis atque in Hir-
 pinis geruntur, quinque naves, quæ Macedonum at-
 que Pœnorum captos legatos Romam portabant, ab
 supero mari ad inferum circumvectæ prope omnem
 Italæ oram, quum præter Cumas velis ferrentur, ne-
 que, hostium an sociorum essent, satis sciretur,
 Gracchus obviam ex classe sua naves misit. Quum
 percunctando in vicem cognitum esset, consulem
 Cumis esse; naves Cumas adpulsæ, captivique ad
 consulem deducti, et literæ datæ. Consul, literis
 Philippi atque Hannibal's perfectis, consignata om-
 nia ad senatum itinere terrestri misit: navibus de-
 vehi legatos jussit. Quum eodem fere die literæ le-
 gatique Romanæ venissent, et, percunctione facta,
 dicta cum scriptis congruerent, primo gravis cura
 Patres incessit, cernentes, quanta vix tolerantibus
 Punicum bellum Macedonici belli moles instaret:
 cui tamen adeo non subcubuerunt, ut exemplo agi-
 taretur, quemadmodum ultro inferendo bello aver-
 terent ab Italia hostem. Captivis in vincula condi-
 jussis, comitibusque eorum sub hasta venditis, ad
 naves viginti quinque, quibus P. Valerius Flaccus

Legati
 Philippi
 et Han-
 nibalis
 Romam
 ducuntur.

præfectus præerat, viginti paratas alias decernunt. U. C. 537.
 His comparatis deductisque, et additis quinque na- A. C. 215.
 vibus, quæ advexerant captivos legatos, triginta
 naves ab Ostia Tarentum profectæ: jussusque P.
 Valerius, militibus Varronianis, quibus L. Apustius
 legatus Tarenti præerat, in naves inpositis, quinquaginta navium classe non tueri modo Italæ oram, sed
 explorare de Macedonico bello: si congruentia li-
 teris legatorumque indiciis Philippi consilia essent,
 ut M. Valerium prætorem literis certiorem faceret:
 isque, L. Apustio legato exercitui præposito, Taren-
 tum ad classem profectus, primo quoque tempore in
 Macedoniam transmittenet: daretque operam, ut
 Philippum in regno contineret. Pecunia ad clas-
 sem tuendam bellumque Macedonicum ea decreta
 est, quæ Ap. Claudio in Siciliam missa erat, ut red-
 deretur Hieroni regi: ea per L. Apustum legatum
 Tarentum est devecta: simul ab Hierone missa du-
 centa millia modiūm tritici, et hordei centum.

XXXIX. Dum hæc Romani parant aguntque, ad Alteram le-
 Philippum captiva navis, una ex iis, quæ Romam gationem
 missæ erant, ex cursu refugit: inde scitum, legatos mittit Phi-
 cum literis captos. Itaque ignarus de iis, quæ cum lippus ad
 Hannibale legatis suis convenient, quæque legati Hanni-
 ejus ad se adlaturi fuissent, legationem aliam cum balem.
 eisdem mandatis mittit. Legati ad Hannibalem
 missi, Heraclitus, cui Scotino cognomen erat, et
 Crito Berœæus, et Sositheus Magnes. Hi prospere
 tulerunt ac retulerunt mandata: sed prius se æstas
 circumegit, quam movere ac moliri quidquam rex
 posset: tantum navi una capta cuni legatis mo-
 menti fecit, ad dilationem inminentis Romanis bel-
 li. Et circa Capuam, transgresso Vulturnu Fabio

U. C. 537. post expiata tandem prodigia, ambo consules rem
 A. C. 215. gerebant. Compulteriam, et Trebulam, et Saticulam, urbes, quæ ad Pœnum defecerant, Fabius vicecepit; præsidiaque in iis Hannibal, Campanique permulti capti. Et Nolæ, sicut priore anno, senatus Romanorum, plebs Hannibal erat: consiliaque occulta de cæde principum et proditione urbis inibantur. Quibus ne incepta procederent, inter Capuam castraque Hannibal, quæ in Tifatis erant, traducto exercitu, Fabius super Vesuvium in castris Claudianis consedit; inde M. Marcellum proconsulem cum iis copiis, quas habebat, Nolam in præsidium misit.

Res in
Sardinia
gestæ.

XL. Et in Sardinia res per T. Manlium prætorrem administrari cœptæ, quæ omissæ erant, postquam Q. Mucius prætor gravi morbo est implicitus. Manlius, navibus longis ad Carales subductis, nava-libusque sociis armatis, ut terra rem gereret, et a prætore exercitu accepto, duo et viginti millia peditum, mille et ducentos equites confecit. Cum his equitum peditumque copiis profectus in agrum hostium, haud procul ab Hampsicoræ castris castra posuit. Hampsicora tum forte profectus erat in Pellitos Sardos, ad juventutem armandam, qua copias augeret. Filius ejus, nomine Hiostus, castris præerat: is, adolescentia ferox, temere prælio inito fusus fugatusque: ad tria millia Sardorum eo prælio cæsa, octingenti ferme vivi capti. Alius exercitus primo per agros silvasque fuga palatus; dein, quo ducem fugisse fama erat, ad urbem nomine Cornum, caput ejus regionis, confugit: debellatumque eo prælio in Sardinia esset, ni classis Punica cum duce Hasdrubale, quæ tempestate dejecta ad Balia-

res erat, in tempore ad spem rebellandi advenisset. U. C. 537.
 Manlius post famam adpulse Punicæ classis, Cara-
 les se recepit: ea occasio Hampsicoræ data Pœno
 se jungendi. Hasdrubal, copiis in terram expositis,
 et classe remissa Karthaginem, duce Hampsicora ad
 sociorum populi Romani agrum populaudum pro-
 fectus, Carales perventurus erat, ni Manlius obvio
 exercitu ab effusa eum populatione continuisset.
 Primo castra castris modico intervallo sunt objecta,
 deinde procursationes leviaque certamina vario even-
 tu inita: postremo descensum in aciem, signisque
 conlatis, justo prælio per quatuor horas pugnatum.
 Diu pugnam ancipitem Pœni, Sardis facile vinci ad- Proelium
 suetis, fecerunt: postremo et ipsi, quum omnia cir- quo supe-
 ca strage ac fuga Sardorum repleta essent, fusi: ce- riores Ro-
 mani.
 terum terga dantes, circumducto cornu, quo pepu-
 lerat Sardos, inclusit Romanus: cædes inde magis,
 quam pugna, fuit. Duodecim millia hostium cæsa
 Sardorum simul Pœnorumque, ferme tria millia et
 septingenti capti, et signa militaria septem et vi-
 ginti.

XLI. Ante omnia claram et memorabilem pug-
 nam fecit Hasdrubal imperator captus, et Hanno, et
 Mago, nobiles Karthaginienses. Mago ex gente
 Barcina, propinqua cognatione Hannibali junctus:
 Hanno auctor rebellionis Sardis; bellique ejus haud
 dubie concitor. Nec Sardorum duces minus nobi-
 lem eam pugnam cladibus suis fecerunt: nam et
 filius Hampsicoræ Hiostus in acie cecidit: et Hamp-
 sicora, cum paucis equitibus fugiens, ut super ad-
 flictas res necem quoque filii audivit, nocte, ne cu-
 jus interventus cœpta impediret, mortem sibi con-
 scivit. Ceteris urbs Cornus eadem, quæ ante, fugè

U. C. 537 receptaculum fuit: quam Manlius, victore exercitu
 A. C. 215. adgressus, intra paucos dies recepit. Deinde aliæ
 quoque civitates, quæ ad Hampsicoram Pœnosque
 defecerant, obsidibus datis, dediderunt sese: quibus
 stipendio frumentoque imperato, pro cujusque aut
 viribus aut delicto, Carales exercitum reduxit. Ibi
 Perdomita navibus longis deductis, inpositoque, quem secum
 Sardinia. advexerat, milite, Romam navigat, Sardiniamque
 perdomitam nunciat Patribus: et stipendum quæ-
 storibus, frumentum ædilibus, captivosque Fulvio
 prætori tradidit. Per idem tempus T. Otacilius præ-
 tor, quinquaginta navium ab Lilybæo classe in Afri-
 cam transvectus, depopulatusque agrum Karthagi-
 niensem, quum Sardiniam inde peteret, quo fama
 erat Hasdrubalem a Baliliaribus nuper trajecisse, clas-
 si Africam repetenti obcurrit, levique certamine in
 alto commisso, septem inde naves cum sociis nava-
 libus cepit: ceteras metus haud secus, quam tem-
 pestas, passim disjecit. Per eosdem forte dies et
 Bomilcar cum militibus, ad supplementum Kartha-
 gine missis, elephantisque, et comineatu, Locros ac-
 cessit: quem ut incautum obpriimeret Ap. Claudius,
 per simulationem provinciæ circumeundæ Messanam
 raptim exercitu ducto, æstu secundo Locros trajecit.
 Jam inde Bomilcar ad Hannonem in Bruttios pro-
 fectus erat, et Locrenses portas Romanis clauserunt.
 Appius magno conatu nulla re gesta, Messanam re-
 petit. Eadem æstate Marcellus ab Nola, quam
 præsidio obtinebat, crebras excursiones in agrum
 Hirpinum et Samnites Caudinos fecit: adeoque om-
 nia ferro atque igni vastavit, ut antiquarum cladium
 Samnio memoriam renovaret.

XLII. Itaque extemplo legati, ad Hannibalem

missi simul ex utraque gente, ita Pœnum adlocuti U. C. 537.
 sunt: *Hostes populi Romani, Hannibal, fuimus pri-*^{A. C. 215.}
mum per nos ipsi, quoad nostra arma, nostræ vires nos
tutari poterant: postquam iis parum fidebamus, Pyr-^{Oratio}
rho regi nos adjunximus; a quo relictæ pacem necessa-^{Samni-}
rium accepimus, fuimusque in ea per annos prope quin-
quaginta, ad id tempus, quo in Italiam venisti. Tua
nos non magis virtus fortunaque, quam unica comitas
ac benignitas erga cives nostros, quos captos nobis re-
misisti, ita conciliavit tibi, ut, te salvo atque incolumi
amico, non modo populum Romanum, sed ne Deos
quidem iratos (si dici fas est) timeremus. At, Hercule,
non solum incolumi et victore, sed præsente te, (com-
ploratum prope conjugum ac liberorum nostrorum ex-
audire, et flagrantia tecta posses conspicere) ita sumus
aliquoties hac æstate devastati, ut M. Marcellus, non
Hannibal, viciisse ad Cannas videatur; glorienturque
Romani, te, ad unum modo ictum vigentem, velut acu-
leo emissio, torpere. Per centum prope annos cum po-
pulo Romano bellum gessimus, nullo externo adjuti nec
duce, nec exercitu: nisi quod per biennium Pyrrhus
nostro magis milite suas auxit vires, quam suis viribus
nos defendit. Non ego secundis rebus nostris gloria-
bör, duos consules, ac duos consulares exercitus a nobis
sub jugum missos, et si qua alia aut læta aut gloriosa
nobis evenerunt: quæ aspera adversaque tunc accide-
rent, minore indignatione referre possumus, quam quæ
hodie eveniunt. Magni dictatores cum magistris equi-
tum, bini consules cum binis consularibus exercitibus in-
grediebantur fines nostros; ante explorato, et subsidiis
positis, et sub signis ad populandum ducebant: nunc
proprii unius et parvi ad tuendam Nolam præsidii præ-
da sumus. Jam ne manipulatim quidem, sed latronum

U. C. 537. modo, percursant totis finibus nostris negligentius, quam
A. C. 215. si in Romano vagarentur agro. Caussa autem hæc est,
 quod neque tu defendis, et nostra juventus, quæ, si domi e-set, tutaretur, omnis sub signis militat tuis. Nec te, nec exercitum tuum norim, nisi, a quo tot Romanas acies fusas stratasque esse sciām, ei facile esse ducam obprimere populatores nostros vagos, sine signis, palatos, quo quemque trahit, quamvis vana, prædæ spes. Numidarum paucorum illi quidem præda erunt, præsidiumque missum nobis et Nolæ ademerit: si modo, quos, ut socios haberes, dignos duxisti, haud indignos judicas, quos in fidem receptos tuearis.

Respon-
sum Han-
nibalis. XLIII. Ad ea Hannibal respondit: *Omnia simul facere Hirpinos Samnitesque: et indicare clades suas, et petere præsidium, et queri indefensos se neglectosque. Indicandum autem fuisse primum, dein petendum præsidium: postremo, ni impetraretur, tum denique querendum, frustra opem imploratam.* Exercitum sese non in agrum Hirpinum Samnitumre, ne et ipse oneri esset, sed in proxima loca sociorum populi Romani adducturum: iis populandis et militem suum repleturum se, et metu procul ab iis submoturum hostes. Quod ad bellum Romanum adtineret, si Trasimeni quam Trebiæ, si Cannarum quam Trasimeni pugna nobilior esset; Cannarum se quoque memoriam obscuram majore et clariore victoria facturum. Cum hoc responso muneribusque amplis legatos dimisit: ipse, præsidio modico relicto in Tifatis, profectus cetero exercitu ire Nolam pergit. Eodem Hanno ex Bruttiis, cum supplemento Karthagine advecto atque elephantis, venit: castris haud procul positis, longe alia omnia inquirenti comperta sunt, quam quæ a legatis sociorum audierat: nihil enim Marcellus ita gerebat, ut

aut fortunæ, aut temere hosti commissum dici pos- U.C. 537.
 set: explorato, cum firmisque præsidiis, tuto re- A.C. 215.
 ceptu prædatum ierat: omniaque, velut adversus
 præsentem Hannibalem, cauta provisaque fuerunt.
 Tum, ubi sensit hostem adventare, copias intra mœ-
 nia tenuit: per muros inambulare senatores Nola-
 nos jussit, et omnia circa explorare, quæ apud hostes
 fierent. Ex iis Hanno, quum ad murum successis- Animos
 set, Herennium Bassum et Herium Petrium, ad con- Nolanorum
 loquium evocatos, permissuque Marcelli egressos, tentat Han-
 nibal.
 per interpreten adloquitur. Hannibalis virtutem
 fortunamque extollit: populi Romani obterit senes-
 centem cum viribus majestatem. *Quæ si paria es-
 sent, ut quondam fuissent, tamen expertis, quam grave
 Romanum imperium sociis, quanta indulgentia Hanni-
 balis etiam in captivos omnes Italici nominis fuisset,
 Punicam Romanæ societatem atque amicitiam præop-
 tandam esse. Si ambo consules cum suis exercitibus ad
 Nolam essent, tamen non magis pares Hannibali futu-
 ros, quam ad Cannas fuissent: nedum prætor unus, cum
 puucis et novis militibus, Nolam tutari possit: ipsorum,
 quam Hannibalis, interesse, capta an tradita Nola po-
 tiretur: potiturum enim, ut Capua Nuceriaque potitus
 esset: sed, quid inter Capuae Nuceriaeque fortunam in-
 teresset, ipsos prope in medio sitos Nolanos scire. Nol-
 le ominari, quæ captæ urbi cessura forent: sed potius
 spondere, si Marcellum cum præsidio ac Nolam tra-
 didissent, neminem alium, quam ipsos, legem, qua in
 societatem amicitiamque Hannibalis venirent, dictu-
 rum.*

XLIV. Ad ea Herennius Bassus respondit: *Mul-
 tos annos jam inter Romanum Nolanumque populum
 amicitiam esse, cuius neutros ad eam diem pœnitere;*

^{V. C. 537. et sibi si cum fortuna mutanda fides fuerat, sero jam}
^{A. C. 215. esse mutare eam : dedituris se Hannibali non fuisse ar-}
^{cessendum Romanum præsidium : cum iis, qui ad se}

^{tuendos renissent, omnia sibi et esse consociata, et ad}
^{Obpugnat ultimum fore.}

Hoc conloquium abstulit spem Han-

Nolam.

nibali per proditionem recipiendæ Nolæ : itaque op-
 pidum corona circumdedit, ut simul ab omni parte
 mœnia adgredetur. Quem ut successisse muris
 Marcellus vidit, instructa intra portam acie, cum
 magno tumultu erupit : aliquot primo impetu per-
 culsi cæsique sunt ; dein, concursu ad pugnantes
 facto, æquatisque viribus, atrox cœpit esse pugna :
 memorabilisque inter paucas fuisse, ni ingentibus
 procellis effusus imber diremisset pugnantes. Eo
 die commisso modico certamine, atque irritatis ani-
 mis, in urbem Romani, Pœni in castra sese recepe-
 runt : tamen Pœnorum prima eruptione perculsi ce-
 ciderunt hand plus quam triginta, Romanorum nul-
 lus. Imber continens per noctem totam usque ad
 horam tertiam diei insequentis tenuit : itaque, quam-
 quam utraque pars avidi certaminis erant, eo die te-
 nuerunt sese tamen munimentis : tertio die Hannibal
 partem copiarum prædatum in agrum Nolanum
 misit. Quod ubi animadvertis Marcellus, extemplo
 in aciem cōpias educit : neque Hannibal detractavit.
 Mille fere passuum inter urbem erant castraque : eo
 spatio (et sunt omnia campi circa Nolam) concurre-
 runt. Clamor, ex parte utraque sublatus, proximos
^{Prælium ad Nolam.} ex cohortibus iis, quæ in agros præ datum exierant,
 ad prælium jam commissum revocavit. Et Nolani
 aciem Romanam auxerunt : quos conlaudatos Mar-
 cellus in subsidiis stare, et saucios ex acie efferre
 jussit ; pugna abstinere, ni ab se signum accepissent.

XLV. Prælium erat anceps: summa vi et duces U.C. 537.
 hortabantur, et milites pugnabant. Marcellus victis A.C. 215.
 ante diem tertium, fugatis ante paucos dies a Cumis,
 pulsis priore anno ab Nola ab eodem se duce, milite
 alio, instare jubet. *Non omnes esse in acie: prædan-*
tes vagari in agro: sed, qui pugnant, marcere Campana
luxuria, rino et scortis, omnibusque lustris per to-
tam hiemem confectos. Abisse illam vim vigoremque,
dilapsa esse robora corporum animorumque, quibus Py-
renæ Alpiumque superata sint juga: reliquias illorum
virorum, rix arma membraque sustinentes, pugnare.
Capuam Hannibali Cannas fuisse: ibi virtutem bellie-
am, ibi militarem disciplinam, ibi prateriti temporis
famam, ibi spem futuri extinctam. Quum hæc ex-
 probrando hosti Marcellus suorum militum animos
 erigeret, Hannibal multo gravioribus probris incre-
 pabat: *Arma signaque eadem se noscere, quæ ad Tre-*
biam Trasimenumque, postremo ad Cannas viderit ha-
bueritque: militem aliud profecto se in hiberna Ca-
puam duxisse, aliud inde eduxisse. Legatumne Ro-
 manum et legionis unius atque alæ magno certamine
 vix toleratis pugnam, quos binæ acies consulares num-
 quam sustinuerunt? Marcellus, tirone milite ac Nola-
 nis subsidiis, inultus nos jam iterum lacescit? Ubi ille
 meus miles est, qui erepto ex equo C. Flaminio consuli
 caput abstulit? ubi, qui L. Paullum ad Cannas occi-
 dit? Ferrum nunc hebet? an dextræ torpent? an quid
 prodigii est aliud? Qui pauci plures vincere soliti estis,
 nunc paucis plures vix restatis. Romam vos expugna-
 turos, si quis duceret, fortis lingua, jactabatis. En-
 nunc minor est res: hic experiri vim virtutemque volo.
 Expugnate Nolam, campestrem urbem, non flumine,
 non mari septam: hinc vos ex tam opulenta urbe

U. C. 537. *præda spoliisque onustos vel ducam, quo roletis, vel
A. C. 215. sequar.*

XLVI. Nec bene, nec male dicta profuerunt ad confirmandos animos. Quum omni parte pellerentur, Romanisque crescerent animi, non duce solum adhortante, sed Nolanis etiam per clamorem, favoris indicem, accendentibus ardorem pugnae, terga Pœni dederunt, atque in castra compulsi sunt: quæ obpugnare cupientes milites Romanos Marcellus Nolam reduxit, cum magno gaudio et gratulatione etiam plebis, quæ ante inclinatior ad Pœnos fuerat. Hostium plus quinque millia cæsa eo die, vivi capti sexcenti, et signa militaria undeviginti, et duo elephanti: quatuor in acie occisi. Romanorum minus mille interfecti: posterum diem induciis tacitis, sepeliendo utrimque cæsos in acie, consumserunt. Spolia hostium Marcellus, Vulcano votum, cremavit. Tertio post die (ob iram credo aliquam, aut spem liberalioris militiae) mille ducenti septuaginta duo equites, mixti Numidæ Hispanique, ad Marcellum transfugerunt: eorum fortis fidelique opera in eo bello usi sunt sæpe Romani. Ager Hispanis in Hispania, Numidis in Africa post bellum, virtutis causa, latus datus est. Hannibal, ab Nola remisso in Bruttios Hannone, cum quibus venerat copiis, ipse Apuliæ hiberna petit, circaque Arpos consedit. Q.

Q. Fabii ut proiectum in Apuliam Hannibalem aures gestæ. dicit, frumento ab Nola Neapolique in ea castra convecto, quæ super Suessulam erant, munimentisque firmatis, et præsidio, quod per hiberna ad tutandum locum satis esset, relicto, ipse Capuam proprius movit castra, agrumque Campanum ferro ignique est depopulatus: donec coacti sunt Campani,

Pœni in
castra
compel-
luntur.

nihil admodum viribus suis fidentes, egredi portis, et U. C. 537.
 castra ante urbem in aperto communire. Sex mil- A. C. 215.
 lia armatorum habebant, peditem inbellem : equita-
 tu plus poterant : itaque equestribus proeliis laces-
 sebant hostem. Inter multos nobiles equites Cam- Jubellius
 panos Cerrinus Jubellius erat, cognomine Taurea : ^{Taurea.}
 civis indidem erat, longe omnium Campanorum for-
 tissimus eques : adeo ut, quum apud Romanos mi-
 litaret, unus eum Romanus Claudius Asellus gloria ^{Claudius}
 equestri æquaret. Hunc Taurea quum diu perlus- ^{Asellus.}
 trans oculis obequitasset hostium turmis, tandem
 facto silentio, ubi *esset Claudius Asellus?* quæsivit :
et, quoniam verbis secum de virtute ambigere solitus
esset, cur non ferro decerneret; daretque opima spolia
victus, aut victor caperet?

XLVII. Hæc ubi Asello nunciata sunt in castra, id modo moratus, ut consulem percunctaretur, lice-
 retne extra ordinem in provocantem hostem pug-
 nare? permisso ejus arma extemplo cepit : provec-
 tusque ante stationes equo, Tauream nomine com-
 pellavit, congregique, ubi vellet, jussit. Jam Ro-
 mani ad spectaculum pugnæ ejus frequentes exie-
 rant : et Campani, non vallum modo castrorum, sed
 moenia etiam urbis prospectantes repleverant. Quum
 jam ante ferocibus dictis rem nobilitassent, infestis
 hastis concitarunt equos : dein libero spatio inter se
 ludificantes, sine vulnere pugnami extrahebant. Tum
 Campanus Romano, *Equorum*, inquit, *hoc, non equi-*
tum, erit certamen, nisi e campo in cavam hanc viam
demittimus equos: ibi nullo ad evagandum spatio co-
minus conserentur manus. Dicto prope citius equum
 in viam Claudius dejecit. Taurea, verbis ferocior,
 quam re, *Minime sis, inquit, cantherium in fossa:*

U. C. 537. quæ vox in rusticum inde proverbium prodita. Clau-
A. C. 215. dius, quem ex via longe perequitasset, nullo obvio
hoste, in campum rursum evectus, increpans igna-
viam hostis, cum magno gaudio et gratulatione vic-
tor in castra redit. Huic pugnæ equestri rem (quam
satis certam, communis existimatio est) mirabilem
certe, adjiciunt quidam annales: quem refugientem
ad urbem Taurcam Claudius sequeretur, patenti hos-
tium portæ invectum, per alteram, stupentibus mi-
raculo hostibus, intactum evasisse.

XLVIII. Quieta inde stativa fuere, ac retro etiam
consul movit castra, ut, sementem Campani face-
rent: nec ante violavit agrum Campanum, quam
jam altæ in segetibus herbæ pabulum præbere pote-
rant: id convexit in Claudiana castra super Suessu-
lam; ibique hiberna ædificavit. M. Claudio pro-
consuli imperavit, ut, retento Nolæ necessario ad
tuendam urbem præsidio, ceteros milites dimitteret
Romam, ne oneri sociis, et sumtui reipublicæ es-
sent. Et Ti. Gracchus a Cumis Luceriam in Apu-
liam legiones quum duxisset, M. Valerium inde præ-
torem Brundisium, cum eo, quem Luceriae habuerat,
exercitu misit, tuerique oram agri Sallentini, et pro-
videre, quod ad Philippum bellumque Macedonicum
adtineret, jussit. Exitu æstatis ejus, qua hæc gesta

Literæ ex perscripsimus, literæ a P. et Cn. Scipionibus vene-
Hispania. runt, quantas, quamque prosperas in Hispania res
gessissent: sed pecuniam in stipendum, vestimenta-
que, et frumentum exercitui, et sociis navalibus om-
nia deesse. Quod ad stipendum adtineat, si æra-
rium.inops esset, se aliquam rationem inituros, quo
modo ab Hispanis sumant: cetera utique ab Roma
mittenda esse: nec aliter aut exercitum aut provin-

etiam retineri posse. Literis recitatis, nemo omnium erat, quin, et vera scribi, et postulari æqua, fateretur: sed obcurrebat animis, quautos exercitus terrestres navalesque tuerentur, quantaque nova clas-
sis mox paranda esset, si bellum Macedonicum mo-
veretur. Siciliam ac Sardiniam, quæ ante bellum Romano-
vectigales fuissent, vix præsides provinciarum exer-
citus alere: tributo sumitus subpeditari: quum ip-
sum tributum conferentium numerum tantis exer-
cituum stragibus, et ad Trasimenum lacum, et ad
Cannas, innundatum; tum, qui superessent pauci, si
multiplici gravarentur stipendio, alia perituros peste.
Itaque, nisi fide staret respublica, opibus non sta-
turam. Prodeundum in concionem Fulvio prætori
esse, indicandas populo publicas necessitates, cohortsque,
qui redenitulis auxisset patrimonia, ut
reipublicæ, ex qua crevissent, ad tempus commoda-
rent; conducerentque ea lege præbenda, quæ ad ex-
ercitum Hispaniensem opus essent, ut, quum pecu-
nia in ærario esset, iis primis solveretur. Hæc præ-
tor in concione edixit, qua die vestimenta, frumentum,
Hispaniensi exercitui præbenda, quæque alia
opus essent navalibus sociis, esset locaturus.

XLIX. Ubi ea dies venit, ad conducendum tres
societas aderant hominum undeviginti, quorum duo
postulata fuere: unum, ut militia vacarent, dum in
aco publico essent: alterum, ut, quæ in naves impo-
suissent, ab hostiis tempestatisque vi publico peri-
culo essent. Utroque inpetrato, conduixerunt, pri-
vataque pecunia respublica administrata est. Hi
mores, eaque caritas patriæ per omnes ordines velut
tenore uno pertinebat. Quemadmodum conducta
omnia magno animo sunt, sic summa fide præbita,

U. C. 537. nec secus quam si ex opulento ærario, ut quondam,
 A. C. 215. alerentur. Quum hi commeatus venerunt, Illiturgi
 oppidum ab Hasdrubale, ac Magone, et Hamilcare
 Bomilcaris filio, ob defectionem ad Romanos ob-
 Scipiones pugnabatur. Inter hæc trina castra hostium Sci-
 trina Poë-
 norum piones, quum in urbem sociorum magno certamine
 castra ca-
 piunt. ac strage obstantium pervenissent, frumentum, eu-
 jus inopia erat, advexerunt: cohortatique oppida-
 nos, ut eodem animo mœnia tutarentur, quo pro se
 pugnantem Romanum exercitum vidissent, ad cas-
 tra maxima obpugnanda, quibus Hasdrubal præerat,
 ducunt. Eodem et duo duces, et duo exereitus Kar-
 thaginiensium, ibi rem summam agi cernentes, con-
 venerunt. Itaque eruptione e castris pugnatum est:
 sexaginta hostium millia eo die in pugna fuerunt,
 sexdecim circiter Romanis: tamen adeo haud dubia
 victoria fuit, ut plures numero, quam ipsi erant,
 Romani hostium occiderint: ceperint amplius tria
 millia hominum, paullo minus mille equorum, unde-
 sexaginta militaria signa, elephantis quinque in
 prælio occisis: trinisque castris eo die potiti sunt.
 Illiturgi obsidione liberato, ad Intibili obpugnandum
 Punici exercitus traducti, suppletis copiis ex pro-
 vincia, ut quæ maxime omnium belli avida, modo
 præda aut merces esset, et tum juventute abundante.
 Iterum signis conlatis, eadem fortuna utriusque par-
 tis pugnatum: supra tredecim millia hostium cæsa,
 supra duo capta, cum signis duobus et quadraginta,
 et novem elephantis. Tum vero omnes prope His-
 paniæ populi ad Romanos defecerunt: multoque
 majores ea æstate in Hispania, quam in Italia, res
 gestæ.

EPITOME LIBRI XXIV.

HIERONYMUS, Syracusanorum rex, cuius avus Hiero amicus populi Romani fuerat, ad Karthaginienses defecit; et propter crudelitatem superbiamque a suis imperfectus est. Ti. Sempronius Gracchus proconsul prospere adversus Pænos et Hannonem ducem ad Beneventum pugnavit, servorum maxime opera, quos liberos esse jussit. Claudius Marcellus consul, in Sicilia, quæ prope tota ad Pænos defecrat, Syracusas obsessit. Philippo Macedonum regi bellum indictum est; qui, ad Apolloniam nocturno prælio obpressus fugatusque, in Macedoniam cum prope inermi exercitu perfugit: ad id bellum gerendum Valerius prætor missus est. Res præterea in Hispania a P. et Cn. Scipionibus adversus Karthaginienses gestas continet. Syphax, rex Numidarum, in amicitiam adscitus, et a Masinissa, rege Mussylorum, pro Karthaginiensibus pugnante, rictus, in Maurusios cum magna manu transiit contra Gades; ubi angusto freto Africa et Hispania dirimuntur. Celtiberi quoque in amicitiam recepti sunt: quorum auxiliis adscitis, tunc primum mercenarium militem Romana castra habuerunt.

T. LIVII PATAVINI

LIBER XXIV.

U. C. 537.
A. C. 215.

Res a Pœ-
nus apud
Bruttios
gestæ.

Rhegium
frustra
tentatum.

Locrenses
se dedunt
Pœnisi.

UT ex Campania in Bruttios redditum est, Hanno, adjutoribus et ducibus Bruttii, Græcas urbes tentavit, eo facilius in societate manentes Romana, quod Bruttios, quos et oderant, et metuebant, Karthaginiensium partis factos cernebant. Rhegium primum tentatum est, diesque aliquot ibi nequidquam absunti. Interim Locrenses frumentum, lignaque, et cetera necessaria usibus ex agris in urbem rapere, etiam ne quid relictum prædæ hostibus esset: et in dies major omnibus portis multitudo effundi: postremo ii modo relicti in urbe erant, qui reficere muros ac portas, telaque in propugnacula congerere cogebantur. In permixtam omnium ætatum ordinumque multitudinem, et vagantem in agris magna ex parte inermem, Hamilcar Pœnus equites emisit; qui, violare quemquam vetiti, tantum, ut excluderent ab urbe fuga dissipatos, turmas objecere. Dux ipse, loco superiore capto, unde agros urbemque posset conspicere, Bruttiorum cohortem adire muros, atque evocare principes Locrensum ad colloquium jussit, et, pollicentes amicitiam Hannibal, adhortari ad urbem tradendam. Bruttis in colloquio nullius rei primo fides est: deinde ut Pœnus adparuit in collibus, et refugientes pauci aliam om-

nem multitudinem in potestate hostium esse adfere- U. C. 547.
 bant; tum, metu victi, consulturos se populum re- A. C. 215.
 sponderunt: advocataque extemplo concione, quum
 et levissimus quisque novas res novamque societatem
 mallent, et, quorum propinqui extra urbem interclusi
 ab hostibus erant, velut obsidibus datis, pigneratos
 haberent animos, pauci magis taciti probarent con-
 stantem fidem, quam probatam tueri anderent;
 haud dubio in speciem consensu fit ad Pœnos dedi-
 tio: L. Atilio præfecto præsidii, quiue cum eo mi-
 lites Romani erant, clam in portum deductis, atque
 inpositis in naves, ut Rheygium deveherentur, Ha-
 milcarem Pœnosque ea conditione, ut fœdus extem-
 plo æquis legibus fieret, in urbem acceperunt: cujus
 rei prope non servata fides deditis est, quum Pœnus
 dolo dimissum Romanum incusaret; Locrenses pro-
 fugisse ipsum caussarentur. Insecuti etiam equites
 sunt, si quo casu in freto æstus morari, aut deferre
 naves in terram posset: et eos quidem, quos seque-
 bantur, non sunt adepti: alias a Messana trajici-
 entes freto Rheygium naves conspexerunt. Milites
 erant Romani, a Claudio prætore missi ad obtinen-
 dam urbem præsidio: itaque Rheygio extemplo abs-
 cessum est. Locrensisbus jussu Hannibal data
 pax, ut liberi suis legibus viverent: urbs pateret Pœnis,
 portus in potestatem Locrensum esset: societas eo jure
 staret, ut Pœnus Loerensem, Locrensisque Pœnum pace
 ac bello juvaret.

II. Sic a freto Pœni reducti, frementibus Bruttii,
 quod Rheygium ac Locros, quas urbes direpturos se
 destinaverant, intactas reliquissent. Itaque per se Bruttii Cro-
 ipsi, conscriptis armatisque juventutis suæ quinde-
 tonem ca-
 piunt, præ-
 cim millibus, ad Crotonem obpugnandum pergunt ter arcem,

U. C. 537. ire; Græcam et ipsam urbem, et maritimam: plu-
A. C. 215. rimum accessurum opibus, si in ora maris urbein
portu ac mœnibus validam tenuissent, credentes.
Ea cura angebat, quod neque non arcessere ad aux-
ilium Pœnos satis audebant, ne quid non pro sociis
egisse viderentur: et, si Pœnus rursus magis arbiter
pœcis, quam adjutor belli, fuisse, ne in libertatem
Crotonis, sicut ante Locrorum, frustra pugnaretur.
Itaque optimum visum est, ad Hannibalem mitti le-
gatos, caverique ab eo, ut receptus Croto Bruttio-
rum esset. Hannibal quum præsentium eam con-
sultationem esse respondisset, et ad Hannonem eos
rejecisset, ab Hannoni nihil certi ablatum. Nec
enim diripi volebant nobilem atque opulentam ur-
bem: et sperabant, quum Bruttii obpugnaret, Pœ-
nos nec probare, nec juvare eam obpugnationem ad-
pareret, eo maturius ad se defecturos. Crotone nec
consilium unum inter populares, nec voluntas erat:
unus velut morbus invaserat omnes Italiae civitates,
ut plebes ab optimatibus dissidentirent: senatus Ro-
manis faveret, plebs ad Pœnos rem traheret. Eam
dissensionem in urbe perfuga nunciat Bruttii; A-
ristomachum esse principem plebis, tradendæque
auctorem urbis: et in vasta urbe lateque omnibus
disjectis mœnibus raras et stationes custodiasque se-
natorum esse: quacumque custodiant plebis homi-
nes, ea patere aditum. Auctore ac duce perfuga,
Bruttii corona einixerunt urbem: acceptique a plebe
primo inpetu locos omnes, præter arcem, cepere.
Arcem optimates tenebant, præparato jam ante ad
talem easum perfugio. Eodem Aristomachus perfu-
git; tamquam Pœnis, non Bruttii, auctor urbis tra-
dendæ fuisse.

III. Urbs Croto murum in circuitu patentem U. C. 537.
 duodecim millia passuum habuit, ante Pyrrhi in Ita-
 liam adventum: post vastitatem eo bello factam vix
 pars dimidia habitabatur: flumen, quod medio oppi-
 do fluxerat, extra frequentia tectis loca præterflue-
 bat: et arx procul iis, quæ habitabantur. Sex mil-
 lia aberat ab urbe nobili templum (ipsa urbe erat Laciniae
 nobilis) Laciniae Junonis, sanctum omnibus circa Junonis
 populis. Lucus ibi, frequenti silva et proceris abie-
 tis arboribus septus, læta in medio pascua habuit,
 ubi omnis generis sacrum Deæ pascebatur pecus sine
 ullo pastore: separatimque egressi eujusque generis
 greges nocte reineabant ad stabula, numquam insi-
 diis ferarum, non fraude violati hominum. Magni
 igitur fructus ex eo pecore capti, columnaque inde
 aurea solida facta, et sacrata est: inclitumque tem-
 plum, divitiis etiam, non tantum sanctitate, fuit.
 Ac miracula aliqua adfinguntur plerumque tam in-
 signibus locis. Fama est, aram esse in vestibulo
 templi, cuius cinerem nullo umquam moveri vento.
 Sed arx Crotonis, una parte inminens mari, altera Arx Croto-
 vergente in agrum, situ tantum naturali quondam nis deserta,
 munita, postea et muro cineta est, qua per aversas
 rupes ab Dionysio Siciliae tyranno per dolum fuerat
 capta. Eam tum arcem, satis, ut videbatur, tu-
 tam, Crotoniatum optimates tenebant, circumse-
 dente cum Bruttii eos etiam plebe sua. Postremo
 Bruttii, quum suis viribus inexpugnabilem viderent
 areem, coacti necessitate, Hannonis auxilium implo-
 rant. Is conditionibus ad deditiōnēm compellere
 Crotoniatas conatus, ut coloniam Bruttiorum co-
 deduci, antiquamque frequentiam eorum recipere
 vastam ac desertam bellis urbem patrentur, om-

U. C. 537. nium neminem, præter Aristomachum, movit : mo-
A. C. ^{215.} rituros se adfirmabant citius, quam, inmixti Bruttii, in alienos ritus, mores, legesque, ac mox linguam etiam verterentur. Aristomachus unus, quando nec suadendo ad deditio[n]em satis valebat, nec, sicut urbem prodiderat, locum prodendæ arcis inveniebat, transfugit ad Hannonem. Locrenses brevi post legati, quum permissu Hannonis arcem intrassent, persuadent, ut traduci se in Locros paterentur, nec ultima experiri vellent. Jam hoc ut sibi liceret, impetraverant et ab Hannibale, missis ad ipsum legatis : ita Crotone excessum est, deductique Crotoniatae ad mare naves condescendunt. Locros omnis multitudo abeunt. In Apulia ne hiens quidem quieta inter Romanos atque Hannibalem erat. Luce-riæ Senipronius consul, Hannibal haud procul Arpis hibernabat. Inter eos levia prælia ex occasione, aut opportunitate hujus aut illius partis, oriebantur : meliorque eis Romanus, et in dies cautior tutiorque ab insidiis fiebat.

Hieroni succedit Hierony-
mus Syra-
cusis.

IV. In Sicilia Romanis omnia mutaverat mors Hieronis, regnumque ad Hieronymum nepotem ejus translatum : puerum, vixdum libertatem, nedum dominationem, modice laturum. Læte id ingenium tutores atque amici ad præcipitandum in omnia vitia acceperunt : quæ ita futura cernens Hiero, ultima senecta voluisse dicitur liberas Syracusas relinquere, ne sub dominatu puerili, per ludibrium, bonis artibus partum firmatumque interiret regnum. Huic consilio ejus summa ope obstitere filiæ, nomen regium penes puerum futurum ratæ, regimen rerum omnium penes virosque suos, Andranodorum et Zoippum : nam ii tutorum primi relinquerebantur. Non fa-

etile erat nonagesimum jam agenti annum, circum- U.C. 537.
 sesso dies noctesque muliebribus blanditiis, liberare A.C. 215.
 animum, et convertere ad publicam privata euram.
 Itaque tutores modo quindecim puerō reliquit: quos
 precatus est moriens, ut fidem erga populum Roma-
 num, quinquaginta annos ab se cultam, inviolatam
 servarent, juvenemque suis potissimum vestigiis in-
 sistere vellent disciplinæque, in qua edocitus esset.
 Hæc mandata. Quum exspirasset, per tutores testa-
 mento prolati, pueroque in concessionem producto;
 (erat autem quindecim tunc ferme annorum) pau-
 cis, qui per concessionem ad excitandos clamores dis-
 positi erant, adprobantibus testamentum, ceteris
 velut patre amissio in orba civitate omnia timenti-
 bus, funus fit regium, magis amore civium et cari-
 tate, quam cura suorum, celebre. Deinde ceteros
 tutores submovet Andranodorus, juvenem jam esse
 dictitans Hieronymum, ac regni potentem: depo-
 nendoque tutelam ipse, quæ cum pluribus communis
 erat, in se unum omnium vires convertit.

V. Vix quidem ulli bono moderatoque regi facilis
 erat favor apud Syracusanos, succedenti tantæ cari-
 tati Hieronis: verum enim vero Hieronymus, velut Hieronymi
 suis vitiis desiderabilem efficere vellet avum, primo ^{vitia.}
 statim conspectu, omnia quam disparia essent, os-
 tendit: nam qui per tot annos Hieronem filiumque
 ejus Gelonem, nec vestis habitu, nec alio ullo insigni
 differentes a ceteris civibus vidissent, conspexere
 purpuram, ac diadema, ac satellites armatos; qua-
 drigisque etiam alborum equorum interdum ex regia
 procedentem, more Dionysii tyranni. Hunc tam
 superbū adparatuī habitumque convenientes se-
 quebantur contemtus omnium hominum, superbae

U. C. 537. aures, contumeliosa dicta, rari aditus, non alienis
 A. C. 215. modo, sed tutoribus etiam, libidines novæ, inhumana
 crudelitas. Itaque tantus omnes terror invaserat,
 ut quidam ex tutoribus aut morte voluntaria, aut
 fuga præverterent metum suppliciorum. Tres ex iis,
 quibus solis aditus in domum familiarior erat, An-
 dranodorus et Zoippus, generi Hieronis, et Thraso
 quidam, de aliis quidem rebus haud magnopere au-
 diebantur: tendendo autem duo ad Karthaginien-
 ses, Thraso ad societatem Romanam, certamine ac
 studiis interdum in se convertebant animum adoles-
 centis: quum conjuratio, in tyranni caput facta, in-
 dicatur per calonem quemdam, æqualem Hieronymi,
 et jam inde a puero in omnia familiaria jura adsue-
 tum. Index unum ex conjuratis Theodotum, a quo
 ipse adpellatus erat, nominare potuit: qui compre-
 hensus extemplo, traditusque Andranodoro torquen-
 dus, de se ipse haud cunctanter fassus, conscos ce-
 labat. Postremo, quum omaibus intolerandis pati-
 entiæ humanæ cruciatibus laceraretur, victum malis
 se simulans, avertit ab consciis in insontes indicium
 (Thrasonem esse auctorem consilii mentitus, nec,
 nisi tam potenti duce confisos, rem tantam ausuros)
 ab latere tyranni, quorum capita vilissima fingenti
 inter dolores gemitusque obcurrere. Maxime animo
 tyranni credibile indicium Thraso nominatus fecit.
 Ita extemplo traditur ad supplicium: adjectique
 poenæ ceteri juxta insontes. Consciorum nemo,
 quam diu socius consilii torqueretur, aut latuit, aut
 fugit: tantum illis in virtute ac fide Theodoti fidu-
 ciæ fuit: tantumque ipsi Theodoto virium ad arcana
 occultanda.

VI. Ita, quod unum vinculum cum Romanis so-

cietatis erat, Thrasone sublato e medio, extemplo U. C. 537.
 haud dubie ad defectionem res spectabat : legatique A. C. 215.
 ad Hannibalem missi, ac remissi ab eo cum Hanni- Ad Hanni-
 bale nobili adolescente Hippocrates et Epicydes, nati balem in-
 clinat. Karthagine, sed oriundi ab Syracusis exsule avo,
 Pœni ipsi materno genere. Per hos juncta societas
 Hannibali ac Syracusano tyranno : nec invito Han-
 nibale apud tyrannum manserunt. Ap. Claudius
 prætor, cuius Sicilia provincia erat, ubi ea accepit,
 extemplo legatos ad Hieronymum misit : qui, quum Legati Ro-
 sese ad renovandam societatem, quæ cum avo fuis- mani per
 set, venisse dicerent, per ludibrium auditæ dimissique ludibrium
 sunt ab quærente per jocum Hieronymo, quæ fortu- ab eo au-
 na eis pugnæ ad Cannas fuisse? vix credibilia enim
 legatos Hannibalæ narrare. Velle, quid veri sit, scire,
 ut ex eo, utram spem sequatur, consilium capiat. Ro-
 mani, quum serio legationes audire cœpisset, redditu-
 ros se ad eum dicentes esse, monito magis eo, quam
 rogato, ne fidem temere mutaret, proficiscuntur.
 Hieronymus legatos Karthaginem misit ad foedus Fœdus ejus
 ex societate cum Hannibale faciendum. Pacto con- cum Pœnis.
 venit, ut, quum Romanos Sicilia expulissent, (id
 autem brevi fore, si naves atque exercitum misis-
 sent) Himera amnis, qui ferme insulam dividit, finis
 regni Syracusani ac Punici imperii esset. Aliam de-
 inde, inflatus adsentationibus eorum, qui eum non
 Hieronis tantum, sed Pyrrhi etiam regis, materni
 avi, jubebant meminisse, legationem misit, qua æ-
 quum censebat, Sicilia sibi omni cedi : Italiae impe-
 riū propriū quæri Karthaginiensi populo. Hanc
 levitatem ac jactationem animi neque mirabantur in
 juvne furioso, neque arguebant, dummodo averte-
 rent eum ab Romanis.

U. C. 537. VII. Sed omnia in eo præcipitia ad exitium fue-
 A. C. 215. runt: nam quum, præmissis Hippocrate atque Epi-
 cyde cum binis millibus armatorum ad tentandas
 urbes, quæ præsidiis tenebantur Romanis, et ipse in
 Leontinos cum cetero omni exercitu (erant autem
 ad quindecim millia peditum equitumque) profectus
 esset; liberas ædes conjurati (et omnes forte milita-
 bant) inminentes viæ angustæ, qua descendere ad
 forum rex solebat, sumserunt: ibi, quum instructi
 arniatique ceteri transitum exspectantes starent, uni
 ex eis, (Dinomensi fuit nomen) quia custos corporis
 erat, partes datae sunt, ut, quum adpropinquaret ja-
 nuæ rex, per caussam aliquam in angustiis sustineret
 ab tergo agmen. Ita, ut convenerat, factum est:
 tamquam laxaret elatum pedem ab stricto nodo,
 moratus turbam Dinomenes, tantum intervalli fecit,
 ut, quum in prætereuntem sine armatis regem impe-
 tus fieret, confoderetur aliquot prius vulneribus,
 quam subcurri posset. Clamore et tumultu audito,
 in Dinomenem, jam haud dubie obstantem, tela con-
 jiciuntur: inter quæ tamen, duobus acceptis vulne-
 ribus, evasit. Fuga satellitum, ut jacentem videre
 regem, facta est: interfectores pars in forum ad
 multitudinem lætam libertate, pars Syracusas per-
 gunt, ad præoccupanda Andranodori regiorumque
 aliorum consilia. Incerto rerum statu, Ap. Claudius,
 bellum oriens ex propinquo quum cerneret, senatum
 literis certiorem fecit, Siciliam Karthaginiensi po-
 pulo et Hannibali conciliari: ipse adversus Syracu-
 sana consilia, provinciam, regnique fines omnia con-
 vertit præsidia. Exitu anni ejus, Q. Fabius ex auc-
 toritate senatus Puteolos, per bellum cœptum fre-
 quentari emporium, communii, præsidiumque impo-

A conju-
ratis occi-
ditar.

suit: inde Romam comitiorum caussa veniens, in U. C. 537.
 eum, quem primum diem comitialem habuit, comi- A. C. 215.
 tia edixit; atque ex itinere præter urbem in cam- Comitia
 pulm descendit. Eo die quum sors prærogativæ consularia.
 Aniensi juniorum exisset, eaque T. Otacilium, M. Æ-
 milium Regillum consules diceret, tum Q. Fabius,
 silentio facto, tali oratione est usus:

VIII. *Si aut pacem in Italia, aut bellum cum eo Fabii cos-
 hoste haberemus, in quo negligentiae laxior locus esset, oratio de
 qui vestris studiis, quæ in campum ad mandandos, qui magna cura
 bus velitis, honores adfertis, moram ullam obferret, is coss.
 mihi parum meminisse videretur restræ libertatis: sed
 quum in hoc bello, in hoc hoste, numquam ab ullo duce
 sine ingenti nostra clade erratum sit, eadem vos cura,
 qua in aciem armati descenditis, inire suffragium ad
 creandos consules decet, et sibi sic quemque dicere;
 Hannibali imperatori parem consulem nomino. Hoc
 anno ad Capuam Jubellio Taureæ Campano summo
 equiti provocanti summus Romanus eques Asellus Clau-
 dius est obpositus. Adversus Gallum, quondam provoca-
 cantem in ponte Anienis, T. Manlium, fidentem et ani-
 mo et viribus, misere majores nostri. Ob eamdem caus-
 sam haud multis annis post fuisse non negaverim, cur
 M. Valerio non diffideretur, adversus similiter provoca-
 cantem arma capienti Gallum ad certamen. Quemad-
 modum pedites equitesque optamus, ut validiores, si mi-
 nus, ut pares hosti habcamus; ita duci hostium parem
 imperatorem queramus. Quum, qui est summus in ci-
 ritate dux, eum legerimus; tamen repente lectus, in
 annum creatus, adversus veterem ac perpetuum impera-
 torem comparabitur, nullis neque temporis, neque ju-
 ris inclusum angustiis, quo minus ita omnia gerat ad-
 ministretque, ut tempora postulabunt belli: nobis an-*

U. C. 537. tem in adparatu ipso, ac tantum inchoantibus res, an-
 A. C. 215. nus circumagitur. Quoniam, quales viros creare vos
 consules deceat, satis est dictum; restat, ut pauca de
 eis, in quos prærogative favor inclinavit, dicam. M.
 Æmilius Regillus flamen est Quirinalis, quem neque
 mittere ab sacris, neque retinere possumus, ut non De
 ûm aut belli deseramus curam. Otacilius sororis meæ
 filiam uxorem, atque ex ea liberos, habet: ceterum non
 ea vestra in me majoresque meos merita sunt, ut non
 potiorem privatis necessitudinibus rempublicam habeam.
 Quilibet nautarum vectorumque tranquillo mari gubern
 nare potest: ubi sæva orta tempestas est, ac turbato
 mari rapitur vento navis, tum viro et gubernatore opus
 est. Non tranquillo navigamus, sed jam aliquot pro
 cellis submersi pene sumus: itaque, quis ad gubernacula
 sedeat, summa cura providendum ac præcavendum vo
 bis est. In minore te experti, T. Otacili, re sumus:
 haud sane, cur ad majora tibi fidamus, documenti quid
 quam dedisti. Classem hoc anno, cui tu præfuisti, tri
 um rerum caussa paravimus: ut Africæ oram popula
 retur; ut tuta nobis Italiæ litora essent; ante omnia
 ne supplementum cum stipendio commeatuque ab Kar
 thagine Hannibali transportaretur. Create consulem
 T. Otacilium, non dico, si omnia hæc, sed si aliquid
 eorum reipublicæ præstitit. Sin autem, te classem ob
 tinente, etiam, velut pacato mari, quælibet Hannibali
 tuta atque integra ab domo venerunt: si ora Italiæ in
 festior hoc anno, quam Africæ, fuit; quid dicere potes,
 cur te potissimum ducem Hannibali hosti obponant? Si
 consul essem, dictatorem dicendum exemplo majorum
 nostrorum censeremus: nec tu id indignari posses, ali
 quem in civitate Romana meliorem bello haberi, quam
 te: magis nullius interest, quam tua, T. Otacili, non

inponi cervicibus tuis onus, sub quo concidas. Ego U. C. 537.
magnopere suadeo, eodem animo, quo, si stantibus vo-
A. C. 215.
bis in aciem armatis repente diligendi duo imperatores
essent, quorum ductu atque auspicio dimicaretis, hodie
quoque consules cretis: quibus sacramento liberi vestri
dicant, ad quorum edictum convenient, sub quorum tu-
tela atque cura militent. *Lacus Trasimenus et Cannæ*
tristia ad recordationem exempla, sed ad præcavendum
simile utili documento sunt. *Præco, Aniensem junio-*
rum in suffragium revoca.

IX. Quum T. Otacilius ferociter, eum continuare
 consulatum velle, vociferaretur atque obstreperet,
 lictores ad eum accedere consul jussit: et, quia in
 urbem non inierat, protinus in campum ex itinere
 profectus, admonuit, cum securibus sibi fasces præ-
 ferri. Iterum prærogativa suffragium init; creati-
 que in ea consules Q. Fabius Maximus quartum, M. U C 538.
 Marcellus tertium. Aosdemi consules ceteræ centu-
 riæ sine variatione ulla dixerunt. Et prætor unus
 reiectus Q. Fulvius Flaccus: novi alii creati, T. Ota-
 cilius Crassus iterum, Q. Fabius consulis filius, qui
 tum ædilis curulis erat, P. Cornelius Lentulus. Co-
 mitiis prætorum perfectis, senatusconsultum factum
 est, *ut Q. Fulvio extra ordinem urbana provincia*
esset: isque potissimum, consulibus ad bellum pro-
fectoris, urbi præsset. Aquæ magnæ bis eo anno fue-
 runt: Tiberisque agros inundavit cum magna strage
 tectorum, pecorumque et hominum pernicie. Quinto
 anno secundi Punici belli, Q. Fabius Maximus quar-
 tum, M. Claudius Marcellus tertium, consulatum
 ineuntes, plus solito converterant in se civitatis ani-
 mos: multis enim annis tale consulum par non fue-
 rat. Referebant senes, sic Maximum Rullum cum

U. C. 538. P. Decio ad bellum Gallicum, sic postea Papirium
A. C. 214. Carviliūnque adversus Samnites Bruttiosque, et Lu-
canum cum Tarentino populum, consules declara-
tos. Absens Marellus consul creatus, quum ad ex-

Fabio au- ercitum esset; præsenti Fabio, atque ipso comitia
di est con- continuatus habente, consulatus continuatus. Tempus ac ne-
consula- cessitas belli, ac discriminem summæ rerum faciebant,
tus.

ne quis aut in exemplum exquireret, aut suspectum
cupiditatis imperii consulem haberet: quin lauda-
bant potius magnitudinem animi, quod, quum sum-
mo imperatore esse opus reipublicæ sciret, seque-
eum haud dubie esse, minoris invidiam suam, si qua
ex re oriretur, quam utilitatem reipublicæ, fecisset.

X. Quo die magistratum inierunt consules, sena-
tus in Capitolio est habitus: decretumque omnium
primum, ut consules sortirentur, compararentve inter
se, uter censoribus creandis comitia haberet, prius-
quam ad exercitum proficiseretur. Prorogatum de-
inde imperium omnibus, qui ad exercitus erant, jus-
sique in provinciis manere, Ti. Gracchus Luceriae,
ubi cum volonum exercitu erat, C. Terentius Varro
in agro Piceno, M'. Pomponius in Gallico: ex præ-
toribus prioris anni pro prætore Q. Mucius obtineret
Sardiniam, M. Valerius ad Brundisium oræ mariti-
mæ, intentus adversus omnes motus Philippi Mace-
donum regis, præcesset. P. Cornelio Lentulo prætori
Sicilia decreta provincia; T. Otacilio classis eadem,
quam adversus Karthaginienses priore anno habui-
set. Prodigia. Prodigia eo anno multa nunciata sunt: quæ quo
magis credebant simplices ac religiosi homines, eo
plura nunciabantur: Lanuvii in æde intus Sospitæ
Junonis corvos nidum fecisse: in Apulia palmam
viridem arsisse: Mantuae stagnum effusum Mincio

anni cruentum visum : et Calibus creta, et Romæ U. C. 538.
in foro boario sanguine pluisse : et in vico Istrico A. C. 214.
fontem sub terra tanta vi aquarum fluxisse, ut serias
doliaque, quæ in eo loco erant, provoluta velut in-
petus torrentis tulerit : tacta de cœlo atrium publi-
cum in Capitolio, ædem in campo Vulcani, nucem
in Sabinis publicamque viam, murum ac portam Ga-
biis. Jam alia vulgata miracula erant : hastam Mar-
tis Præneste sua sponte promotam : bovem in Sicilia
locutum : infantem in utero matris in Marrucinis,
Io triumphē! clamasse : ex muliere Spoleti virum
factum : Hadriæ aram in coelo, speciesque hominum
circum eam, cum candida veste, visas esse. Quin
Romæ quoque in ipsa urbe, secundum apum examen
in foro visum, adfirmantes quidam, legiones se ar-
matas in Janiculo videre, concitaverunt civitatem
ad arma : qui tum in Janiculo essent, negarunt
quemquam ibi, præter adsuetos collis ejus cultores,
adparuisse. Hæc prodigia hostiis majoribus procu-
rata sunt ex aruspicum responso : et supplicatio
omnibus Deis, quorum pulvinaria Romæ essent, in-
dicta est.

XI. Perpetratis, quæ ad pacem Deūm pertinebant,
de republica belloque gerendo, et quantum copiarum,
et ubi quæque essent, consules ad senatum retulerunt.
Duodeviginti legionibus bellum geri placuit : binas Duodevi-
ginti legio-
consules sibi sumere : binis Galliam, Siciliamque, ac nes.
Sardiniam obtineri; duabusque Q. Fabium prætorem
Apuliæ, duabus volonum Ti. Gracchum circa Luce-
riam præesse: singulas C. Terentio proconsuli ad
Picenum, et M. Valerio ad classem circa Brundisium
relinqui, et duas urbi præsidio esse. Hic ut nume-
rus legionum expleretur, sex novæ legiones erant

U. C. 538. scribendæ: eas primo quoque tempore consules
A. C. 214.

scriberc jussi, et classem parare: ut cum eis navi-
bus, quæ pro Calabriæ litoribus in statione essent,
centum quinquaginta longarum navium classis eo
anno expleretur. Delectu habito, et centum navi-
bus novis deductis, **Q. Fabius** comitia censoribus
creandis habuit: creati **M. Atilius Regulus** et **P.**
Censores **M. Atilius**, **Furius Philus**. Quum increbresceret rumor, bellum
P. Furius. in Sicilia esse, **T. Otacilius** eo cum classe profici-
jussus est. Quum deessent nautæ, consules ex se-
natusconsulto edixerunt, ut, qui, **L. Æmilio**, **C. Fla-**
minio censoribus, **millibus æris** quinquaginta ipse aut
pater ejus census fuisset, usque ad centum millia, aut
cui postea res tanta esset facta, nautam unum cum sex

Nautæ pri-
vatis impe-
rati. mensium stipendio daret: qui supra centum millia,
usque ad trecenta millia, tres nautas cum stipendio
annuo: qui supra trecenta millia, usque ad decies æris,
quinque nautas: qui supra decies, septem: senatores
octo nautas cum annuo stipendio darent. Ex hoc
edicto dati nautæ, armati instructique ab dominis,
cum triginta dierum coctis cibariis naves consecede-
runt. Tum primum est factum, ut classis Romana
sociis navalibus privata impensa paratis compleze-
tur.

Terrentur
Campani.

XII. Hic major solito adparatus præcipue con-
terruit Campanos, ne ab obsidione Capuae bellum
ejus anni Romani inciperent: itaque legatos ad
Hannibalem oratum miserunt, ut Capuam exercitum
admoveret: ad eam obpugnandam novos exercitus scri-
bi Romæ; nec ullius urbis defectioni magis infensos eo-
rum animos esse. Id quia tam trepidi nunciabant,
maturandum Hannibal ratus, ne prævenirent Roma-
ni, profectus Arpis, ad Tifata in veteribus castris

super Capuam consedit: inde, Numidis Hispanisque U. C. 533.
ad præsidium simul castrorum simul Capuæ relictis, A. C. 214.
cum cetero exercitu ad lacum Averni per speciem sa-
crificandi, re ipsa ut tentaret Puteolos, quodque ibi
præsidii erat, descendit. Maximus, postquam Han-
nibalem Arpis profectum, et regredi in Campaniam,
adlatum est, nec die nec nocte intermisso itinere, ad
exercitum redit: et Ti. Gracchum ab Luceria Bene-
ventum copias admovere, Q. Fabium prætorem (is
filius consulis erat) Luceriam Graccho succedere ju-
bet. In Siciliam eodem tempore duo prætores pro-
fecti, P. Cornelius ad exercitum, Otacilius, qui ma-
ritimæ oræ reique navali præcesset; et ceteri in suas
quisque provincias profecti: et, quibus prorogatum
imperium erat, easdem, quas priore anno, regiones
obtinuerunt.

XIII. Ad Hannibalem, quum ad lacum Averni Legati Ta-
asset, quinque nobiles juvenes ab Tarento venerunt, rentini ad
partim ad Trasimenum lacum, partim ad Cannas lem.
Hanniba-
capti, dimissique domos cum eadem conitate, qua
usus adversus omnes Romanorum socios Pœnus fu-
erat. Ii, memores beneficiorum ejus per pulisse magnam
partem se juventutis Tarentinæ, referunt, ut Hanniba-
lis amicitiam ac societatem, quam populi Romani, mal-
lent; legatosque ab suis missos rogare Hannibalem, ut
exercitum proprius Tarentum admoveat. Si signa ejus,
si castra conspecta a Tarento sint, haud ullam inter-
cessuram moram, quin urbs dedatur. In potestate ju-
niorum plebem, in manu plebis rem Tarentinam esse.
Hannibal conlaudatos eos, oneratosque ingentibus
promissis, domum ad cœpta maturanda redire jubet:
se in tempore ad futurum esse. Hac cum spe di-
missi Tarentini. Ipsum ingens cupidio incesserat

U. C. 538. Tarenti potiundi. Urbem esse videbat, quum opu-

A. C. 214. lentam nobilemque, tum maritimam, et in Macedo-
niam opportune versam : regemque Philippum hunc
portum, si transiret in Italianam, quum Brundisium
Romani haberent, petiturum. Sacro inde perpetra-
to, ad quod venerat, et, dum ibi moratur, perva-
stato agro Cumano usque ad Miseni promontorium,

Puteolos frustra tentat. Puteolos repente agmen convertit, ad obprimendum præsidium Romanum. Sex millia hominum erant, et locus munimento quoque, non natura modo, tu-
tus. Triduum ibi moratus Pœnus, ab omni parte tentato præsidio, deinde, ut nihil procedebat, ad popu-
landum agrum Neapolitanum, magis ira quam po-
tiundæ urbis spe, processit. Adventu ejus in pro-
pinquum agrum Nolana mota est plebs, jam diu
aversa ab Romanis et infesta senatui suo : itaque le-
gati ad arcessendum Hannibalem, cum haud dubio
promisso tradendæ urbis, venerunt. Prævenit in-
ceptum eorum Marcellus consul, a primoribus adci-
tus. Die uno Suessulam a Calibus, quum Vultur-
nus amnis trajicientem moratus esset, contenderat :
inde proxima nocte sex millia peditum, equitesque
trecentos, qui præsidio senatui essent, Nolam intro-
misit : et, uti a consule omnia in pigre facta sunt ad
præoccupandam Nolam, ita Hannibal tempus tere-
bat ; bis jam ante nequidquam tentata re, segnior
ad credendum Nolanis factus.

Hannonis et Gracchi exercitus ad Bene-
ventum. XIV. Iisdem diebus et Q. Fabius consul ad Casi-
linum tentandum, quod præsidio Punico tenebatur,
venit; et ad Beneventum, velut ex composito, parte
altera Hanno ex Bruttiis cum magna peditum equi-
tumque manu, altera Ti. Gracchus ab Luceria acces-
sit : qui primo oppidum intravit. Deinde, ut Han-

nonem tria millia ferme ab urbe ad Calorem fluvium U. C. 538.
 castra posuisse, et inde agrum populari audivit, et A. C. 214.
 ipse, egressus moenibus, mille ferme passus ab hoste
 castra locat, ibique concionem militum habuit. Legiones magna ex parte volonum habebat; qui jam
 alterum annum libertatem tacite mereri, quam postulare palam, maluerant. Senserat tamen hibernis Volones,
 egrediens murmur in agmine esse quærentium, *en*
umquam liberi militaturi essent? scripseratque senatus, non tam quid desiderarent, quam quid meruissent: *bona fortique opera eorum se ad eam diem usum:* neque ad exemplum justi militis quidquam eis, *præter libertatem,* deesse. De eo permissum ipsi erat, faceret, quod e republica duceret esse. Itaque prius, quam cum hoste manum consereret, pronunciat;
tempus venisse eis libertatis, quam diu sperassent, po- Gracchus
tiundæ: postero die signis conlatis dimicaturum puro iis libertatem pro-
ac patenti campo, ubi sine ullo insidiarum metu vera mittit, qui
virtute geri res posset. Qui caput hostis retulisset, cum capita hos-
se extemplo liberum jussurum esse: qui loco cessisset, tium retu-
in eum servili suppicio animadversurum. Suam cui- lissent.
que fortunam in manu esse: libertatis auctorem eis
non se fore solum, sed consulem M. Marcellum, sed
universos Patres; quos, consultos ab se de libertate eo-
rum, sibi permisisse. Literas inde consulis ac sena-
tusconsultum recitavit. Ad quæ clamor cum ingenti
adsensu est sublatus: pugnam poscebant, signum-
que ut daret extemplo, ferociter instabant. Grac-
chus, prælio in posterum diem pronunciato, concio-
nem dimisit. Milites læti, præcipue quibus merces
navatae in unum diem operæ libertas futura erat,
armis expediendis quod reliquum consumunt.

XV. Postero die, ubi signa cœperunt canere, pri-

U.C. 538. mi omnium parati instructique ad prætorium conve-
 A.C. 214. niunt. Sole orto, Gracchus in aciem copias educit:
 Acris pu- nec hostes moram dimicandi fecerunt. Decem et
 gna. septem millia peditum erant, maxima ex parte Brut-
 tii ac Lucani: equites mille ducenti; inter quos
 pauci admodum Italici, ceteri Numidæ fere omnes
 Maurique. Pugnatum est et acriter, et diu: quatuor
 horis neutro inclinata est pugna: nec alia magis Ro-
 manum impediebat res, quam capita hostium pretia
 libertati facta. Nam ut quisque hostem impigre oc-
 ciderat, primum capite ægre inter turbam tumultu-
 que abscidendo tempus terebat: deinde, occupata
 dextra tenendo caput, fortissimus quisque pugnator
 esse desierat: segnibus ac timidis tradita pugna e-
 rat. Quod ubi tribuni militum Graccho nunciave-
 runt, neminem stantem jam vulnerari hostem, carnifi-
 cari jacentes, et in dextris militum pro gladiis humana
 capita esse: signum dari propere jussit, projicerent
 capita, invaderentque hostem. Claram satis et insig-
 nem virtutem esse: nec dubiam libertatem futuram
 strenuis viris. Tum redintegrata pugna est, et eques
 etiam in hostem emissus. Quibus quum impigre
 Numidæ concurrisserint, nec segnior equitum, quam
 peditum, pugna esset, iterum in dubium adducta res.
 Quum utrimque duces, Romanus Bruttiū Luca-
 numque, toties a majoribus suis victos subactosque;
 Pœnus mancipia Romana et ex ergastulo militem,
 verbis obtereret; postremo pronunciat Gracchus,
 esse nihil, quod de libertate sperarent, nisi eo die fusi
 fugatiq[ue] hostes essent.

Romani
vincunt.

XVI. Ea demum vox ita animos accendit, atque,
 renovato clamore, velut alii repente facti, tanta vi se
 in hostem intulerunt, ut sustineri ultra non possent.

Primo antesignani Pœnorum, deinde signa perturbata, postremo tota inpulsa acies ; inde haud dubie terga data, ruuntque fugientes in castra, adeo pavidi trepidique, ut ne in portis quidem aut vallo quisquam restiterit, ac prope continent agmine Romani insecuri, novum de integro prælium inclusi hostium vallo ediderint. Ibi sicut pugna impeditior in angustiis, ita cædes atrocior fuit : et adjuvere captivi, qui, rapto inter tumultum ferro, congregati et ab tergo ceciderunt Pœnos, et fugam impedierunt. Itaque minus duo millia hominum ex tanto exercitu, et ea major pars equitum, cum ipso duce effugerunt : alii omnes cæsi aut capti : capta et signa duodequadriginta. Ex victoribus duo millia ferme cecidere : præda omnis (præterquam hominum captorum) militi concessa est : et pecus exceptum est, quod intra dies triginta domini cognovissent. Quum præda onusti in castra redissent, quatuor millia ferme volonum militum, qui pugnaverant segnius, nec in castra intruperant simul, metu pœnæ collem haud procul castris ceperunt : postero die per tribunos militum inde deducti, concione militum advocata a Graccho, superveniunt. Ubi quum proconsul veteres milites primum, prout cujusque virtus atque opera in ea pugna fuerat, militaribus donis donasset, tunc quod ad volones adtineret, *omnes*, ait, *malle laudatos a se, dignos indignosque, quam quemquam eo die castigatum esse.* *Quod bonum, faustum, felicque reipublicæ ipsisque esset, omnes eos liberos esse jubere.* Ad quam vocem quum clamor ingenti alacritate sublatus esset, ac nunc complexi inter se gratulantesque, nunc manus ad cœlum tollentes, bona omnia populo Romano Gracchoque ipsi precarentur ; tum Gracchus :

Volonibus
libertas da-
tur.

U. C. 538. *Priusquam omnes jure libertatis æquassem, inquit, ne-*
A. C. 214. *minem nota strenui aut ignavi militis notasse volui.*

Nunc, exsoluta jam fide publica, ne discriminem omne virtutis ignaviaeque pereat, nomina eorum, qui, detractatæ pugnæ memores, secessionem paullo ante fecerunt, referri ad me jubebo : citatosque singulos jurejurando adigam, nisi queis morbus caussa erit, non aliter, quam stantes, cibum potionemque, quoad stipendia facient, capturos esse. Hanc multam ita æquo animo feretis, si reputabitis, nulla ignaviae nota leviore vos designari potuisse. Signum deinde conligandi vasa dedit : militesque prædam portantes agentesque, per lasciviam ac jocum, ita ludibrii Beneventum rediere, ut ab epulis per celebrem festuunque diem actis, non ex acie, reverti viderentur. Beneventani omnes turba effusa quum obviam ad portas exissent, complecti milites, gratulari, vocare in hospitium. Adparata convivia omnibus in propatulo ædium fuerant : ad ea invitabant, Gracchumque orabant, ut epulari permetteret militibus. Et Gracchus ita permisit, in publico epularentur omnes. Ante suas quibusque fores proleta omnia : pileati, aut lana alba velatis capitibus volones epulati sunt ; alii adcubantes, alii stantes, qui simul ministrabant vescebanturque. Digna res visa, ut simulacrum celebrati ejus diei Gracchus, postquam Romam rediit, pingi juberet in æde Libertatis, quam pater ejus in Aventino ex multaticia pecunia faciendam curavit dedicavitque.

Pugna Mar- XVII. **Ceum inter et Han-** *Dum hæc ad Beneventum geruntur, Han-*
cellum in- *nibal, depopulatus agrum Neapolitanum, ad Nolam*
nibalem. *castra movet : quem ubi adventare consul sensit,*

Pomponio proprætore cum eo exercitu, qui super Suessulam in castris erat, adeito, ire obviam hosti

parat, nec moram dimicandi facere. C. Claudium U.C. 538.
 Neronem cumi robore equitum silentio noctis per A.C. 214.
 aversam maxime ab hoste portam emitte: circum-
 vectumque occulte subsequi sensim agmen hostium
 jubet, et, quum coortum prælium videret, ab tergo
 se objicere. Id errore viarum, an exiguitate tempo-
 ris, Nero exsequi non potuerit, incertum est. Ab-
 sente eo quum prælium commissum esset, superior
 quidem haud dubie Romanus erat: sed, quia equi-
 tes non adfuere in tempore, ratio compositæ rei tur-
 bata est: non ausus insequi cedentes Marcellus, vin-
 centibus suis signum receptui dedit. Plus tamen
 duo millia hostium eo die cæsa traduntur: Romani
 minus quadringentis. Solis fere occasu Nero, diem
 noctemque nequidquam fatigatis equis hominibus-
 que, ne viso quidem hoste rediens, adeo graviter est
 ab consule increpitus, ut per eum stetisse diceret,
 quo minus accepta ad Cannas redderetur hosti clades.
 Postero die Romanus in aciem descendit:
 Pœnus, tacita etiam confessione victus, castris se
 tenuit. Tertio die silentio noctis, omissa spe Nolæ
 potiundæ, rei numquam prospere tentatæ, Tarentum
 ad certiorem spei prodictionis proficiuntur.

XVIII. Nec minore animo res Romana domi, Censura
 quam militiæ, gerebatur. Censores, vacui ab ope-
 rum locandorum cura, propter inopiam ærarii, ad cita-
 mores honiūnum regendos animum adverterunt, cas-
 tigandaque vitia; quæ, velut diutinis morbis ægra
 corpora ex se gignunt, nata bello erant. Primum
 eos citaverunt, qui post Cannensem pugnam rem-
 publicam deseruisse, Italiaque excessisse velle di-
 cebantur: princeps eorum L. Cæcilius Metellus
 quæstor tum forte erat. Jusso deinde eo ceterisque

U. C. 538. ejusdem noxæ reis caussam dicere, quum purgari
 A. C. 214. nequissent, pronunciarunt, verba orationemque eos
 adversus rempublicam habuisse, quo conjuratio de-
 serendæ Italæ caussa fieret. Secundum eos citati
 nimis callidi exsolvendi jurisjurandi interpretes: qui
 captivorum, ex itinere regressi clam in castra Han-
 nibalis, solutum, quod juraverant redituros, reban-
 tur. His superioribusque illis equi ademti, qui pub-
 licum equum habebant: tribuque moti, ærarii om-
 nes facti. Neque senatu modo aut equestri ordine
 regendo cura se censorum tenuit: nomina omnium
 ex juniorum tabulis excerpserunt, qui quadriennio
 non militassent, quibus neque vacatio justa militiæ,
 neque morbus caussa fuisse. Et ea supra duo millia
 nominum in ærarios relata, tribuque omnes moti.
 Additumque inertis censoriæ notæ triste senatuscon-
 sultum: ut ii omnes, quos censores notassent, pedi-
 bus mererent, mitterenturque in Siciliam ad Can-
 nensis exercitus reliquias, cui militum generi non
 prius, quam pulsus Italia hostis esset, finitum sti-
 pendiorum tempus erat. Quum censores, ob ino-
 piām ærarii, se jam locationibus abstinerent ædium
 Benignitas privatorum erga rem-
 publicam. sacrarum tuendarum, curulumque equorum præ-
 bendorum, ac similium his rerum; convenere ad eos
 frequentes, qui hastæ hujus generis adsueverant:
 hortatique censores, ut omnia perinde agerent, loca-
 rent, ac si pecunia in ærario esset. Neminem, nisi
 bello confecto, pecuniam ab ærario petiturum esse.
 Convenere deinde domini eorum, quos Ti. Sempro-
 nius ad Beneventum manu emiserat: arcessitosque
 se ab triumviris mensariis esse dixerunt, ut pretia
 serveruni acciperent: ceterum non ante, quam bello
 confecto, accepturos esse. Quum hæc inclinatio

animorum plebis ad sustinendam inopiam ærarii fieri; pecuniae quoque pupillares primo, deinde vi-
duarum, cœptæ conferri: nusquam eas tutius sanc-
tiusque deponere creditibus, qui deferebant, quam
in publica fide: inde, si quid emitum paratumque
pupillis ac viduis foret, a quæstore perscribebatur.
Manavit ea privatorum benignitas ex urbe etiam in
castra, ut non eques, non centurio stipendum acci-
perent, mercenariumque increpantes vocarent, qui
accepisset.

XIX. Q. Fabius consul ad Casilinum castra ha- Fabius Ca-
silinum ob-
sidet.
bebat, quod duūm millium Campanorum, et septin-
gentorum militum Hannibalis tenebatur præsidio.
Præerat Statius Metius, missus ab Cn. Magio Atel-
lano: qui eo anno Medixtuticus erat, servitiaque et
plebem promiscue armabat, ut castra Romana inva-
deret, intento consule ad Casilinum obpugnandum.
Nihil eorum Fabium fecerunt. Itaque Nolam ad col-
legam mittit, *altero exercitu, dum Casilinum obpug-
natur, opus esse, qui Campanis obponatur. Vel ipse,
relicto Nolæ præsidio modico, veniret: vel, si eum Nola
teneret, et nequum securæ res ab Hannibale essent, se
Ti. Gracchum proconsulem a Benevento adciturum.*
Hoc nuncio Marcellus, duobus militum millibus No- Marcellus
eodem cum
exercitu
venit.
læ in præsidio relictis, cum cetero exercitu Casilinum
venit, adventuque ejus Campani, jam moventes sese, venit.
quiieverunt. Ita a duobus consulibus Casilinum ob-
pugnari cœptum: ubi quum multa, succedentes te-
mere mœnibus, Romani milites acciperent vulnera,
neque satis inceptis succederet, Fabius, omittendam
rem parvam ac juxta magnis difficultem, absceden-
dumque inde censebat, quum res majores instarent.
Marcellus, multa magnis ducibus sicut non adgre-

U.C. 538. dienda, ita semel adgressis non dimittenda esse, di-

A.C. 214. cendo, quia magna famæ momenta in utramque partem fierent, tenuit, ne irrito incepto abiretur. Vineæ inde omniaque alia operum machinationumque genera quum admoverentur, Campanique Fabium orarent, ut abire Capuam tuto liceret; paucis egressis, Marcellus portam, qua egrediebantur, occupavit, cædesque promiscue omnium circa portam primo, deinde, inruptione facta, etiam in urbe fieri cœpta est. Quinquaginta fere primo egressi Campanorum, quum ad Fabium confugissent, præsidio ejus Capuam perver-

Casilinum nerunt. Casilinum, inter conloquia cunetationem-
captum.

que petentium fidem, per occasionem captum est: captivi, quique Campanorum, quique Hannibal's milium erant, Romam missi, atque ibi in carcere inclusi sunt: oppidanorum turba per finitos populos in custodiam divisa.

XX. Quibus diebus a Casilino, re bene gesta, recessum est, eis Gracchus in Lucanis aliquot cohortes, in ea regione conscriptas, cum præfecto sociorum in agros hostium prædatum misit: eos effuse palatos Hanno adortus, haud multo minorem, quam ad Beneventum acceperat, reddidit hosti cladem, atque in Bruttios raptim, ne Gracchus adsequeretur, concessit. Consules, Marcellus retro, unde venerat, Nolam reddit; Fabius in Samnium ad populandos agros recipiendasque armis, quæ defecerant, urbes processit. Caudinus Samnis gravius devastated; perusti late agri, prædæ pecudum hominumque actæ: oppida vi capta, Compulteria, Telesia, Compsa, Melæ, Fulfulæ et Orbitanium: ex Lucanis Blandæ: Apulorum Æcæ obpugnatæ. Millia hostium in his urbibus viginti quinque capta, aut occisa: et recepti perfugæ

trecenti septuaginta; quos quum Romam misisset U. C. 536.
 consul, virgis in comitio cæsi omnes, ac de saxo de- A. C. 214.
 jecti. Hæc a Q. Fabio intra paucos dies gesta. Mar- Perfugæ
 cellum ab gerundis rebus valetudo adversa Nolæ te- virginis cæsi
 nuit. Et a prætore Q. Fabio, cui circa Luceriam et de saxo
 provincia erat, Accua oppidum per eos dies vi cap- dejecti.
 tum: stativaque ad Ardoneas communita. Dum hæc
 aliis locis ab Romanis geruntur, jam Tarentum per- Tarentum
 venerat Hannibal, cum maxima omnium, quacumque tentat frus-
 ierat, clade. In Tarentino demum agro pacatum in- tra Hanni-
 bal.
 cedere agmen cœpit: nihil ibi violatum, neque us-
 quam via excessum est; adparebatque, non id mo-
 destia militum aut ducis, nisi ad conciliandos Taren-
 tinorum animos, fieri. Ceterum quin propemodo
 muris accessisset, nullo ad conspectum primi agminis,
 ut rebatur, motu facto, castra ab urbe ferme passus
 mille locat. Tarenti, triduo ante, quam Hannibal
 ad mœnia accederet, a M. Valerio proprætore, qui
 classi ad Brundisium præerat, missus M. Livius, pri-
 more juventute conscripta, dispositisque ad omnes
 portas, circaque muros, qua res postulabat, stationi-
 bus, die ac nocte plurimum intentus, neque hostibus,
 neque dubiis sociis loci quidquam præbuit ad tentan-
 dum. Quare diebus aliquot frustra ibi absuntis,
 Hannibal, quum eorum nemo, qui ad lacum Averni
 adissent, aut ipsi venirent, aut nuncium literasve
 mitterent, vana promissa se temere secutum cernens,
 castra inde movit. Tum quoque, intacto agro Ta-
 rentino, (quamquam simulata lenitas nihildum pro-
 fuerat, tamen spe labefactandæ fidei haud absistens)
 Salapiam ut venit, frumentum ex agris Metapontino
 atque Heracliensi (jam media æstas exacta erat, et
 hibernis placebat locus) comportat. Prædatum inde

U. C. 538. Numidæ Maurique per Sallentinum agrum proximusque Apuliæ saltus dimissi: unde ceteræ prædæ haud multum, equorum greges maxime abacti: e quibus ad quatuor millia domanda equitibus divisa.

Rerum
status in
Sicilia.

XXI. Romani quum bellum nequaquam contemnendum in Sicilia oriretur, morsque tyranni duces magis in pigros dedisset Syracusanis, quam caussam aut animos mutasset, M. Marcelllo alteri consulum eam provinciam decernunt. Secundum Hieronymi cædem primo tumultuatum in Leontinis apud milites fuerat, vociferatumque ferociter, parentandum regi sanguine conjuratorum esse. Deinde libertatis restitutæ dulce auditu nomen crebro usurpatum, spes facta ex pecunia regia largitionis, militiæque fungendæ potioris ducibus, et relata tyranni fœda scelera fœdioresque libidines, adeo mutavere animos, ut insepultum jacere corpus paullo ante desiderati regis paterentur. Quum ceteri ex conjuratis ad exercitum obtinendum remansissent, Theodotus et Sosis regiis equis, quanto maximo cursu poterant, ut ignaros omnium regios obprimerent, Syracusas contendunt: ceterum prævenerat non fama solum, (qua nihil in talibus rebus est celerius) sed nuncius etiam ex regiis servis. Itaque Andranodus et Insulana, et arcem, et alia, quæ poterat, quæque opportuna erant, præsidii firmarat. Hexapylo Theodotus ac Sosis post solis occasum jam obscura luce invecti, quum cruentam regiam vestem atque insigne capitis ostentarent, travecti per Tychain, simul ad libertatem, simul ad arma vocantes, in Achradinam convenire jubent. Multitudo pars procurrit in vias, pars in vestibulis stat, pars ex tectis fenestrisque prospic-tant, et, quid rei sit, rogitant. Omnia luminibus

Andrano-dorus ar-cem Sy-racusis occu-pat.

conludent, strepituque vario compleuntur: armati U.C. 538.
locis patentibus congregantur: inermes ex Olympii A.C. 214.
Jovis templo spolia Gallorum Illyriorumque, dono
data Hieroni a populo Romano, fixaque ab eo, de-
trahunt, precantes Jovem, ut volens propitius præ-
beat sacra arma, pro patria, pro Deum delubris, pro
libertate sese armantibus. Hæc quoque multitudo,
stationibus per principes regionum urbis dispositis,
adjungitur. In Insula inter cetera Andranodus
præsidiis firmat horrea publica. Locus, saxo qua-
drato septus, atque arcis in modum emunitus, capitur
ab juventute, quæ præsidio ejus loci adtributa erat,
mittuntque nuncios in Achradinam, horrea frumen-
tumque in senatus potestate esse.

XXII. Luce prima populus omnis armatus iner-
misque in Achradinam ad curiam convenit: ibi pro
Concordiæ ara, quæ in eo sita loco erat, ex princi-
pibus unus nomine Polyænus concionem et liberam Polyæni
et moderatam habuit: *Servitudinis indignitatisque ho-* oratio li-
mines expertos, adversus notum malum irritatos esse. moderata.
Discordia civilis quas importet clades, audisse magis a
patribus Syracusanos, quæm ipsos vidisse. Arma quod
inpigre ceperint, laudare: magis laudaturum, si non
utantur, nisi ultima necessitate coacti. In præsentia
legatos ad Andranodorum mitti placere, qui denuncient,
ut in potestate senatus ac populi sit: portæ Insulæ pa-
teant; recedat præsidium. Si tutelam alieni regni
suum regnum velit facere, eundem se censere, multo
acrius ab Andranodoro, quam ab Hieronymo. repeti li-
bertatem. Ab hac concione legati missi sunt. Se- Legati mit-
natus inde haberi cœptus est: quod sicut, regnante tuntur ad
Hierone, manserat publicum consilium, ita post Andrano-
mortem ejus, ante eam diem, nulla de re neque con- dorum.

U.C. 538. vocati, neque consulti fuerant. Ut ventum ad An-
A.C. 214. dranodorum est, ipsum quidem movebat et civium
consensus, et quum aliæ occupatæ urbis partes, tum
pars Insulæ, velut munitissima, prodita atque aliena-
nata. Sed evocatum eum ab legatis Damarata uxori,
filia Hieronis, inflata adhuc regiis animis ac muliebri
spiritu, adnionet sæpe usurpatæ Dionysii tyranii
vocis : qua, *pedibus tractum, non insidentem equo, re-*
linquere tyrannidem, dixerit, debere. *Facile esse mo-*
mento, quo quis velit, cedere possessione magnæ for-
tunæ : facere et parare eam, difficile utque arduum
esse. *Paullum sumeret spatii ad consultandum ab le-*
gatis : eo uteretur ad arcessendos ex Leontinis milites :
quibus si pecuniam regiam pollicitus esset, omnia in po-
testate ejus futura. Hæc muliebria consilia Andranodorus
neque tota adspernatus est, neque extemplo
accepit : tutiorem ad opes adfectandas ratus esse
viam, si in præsentia temporis cessisset. Itaque legatos renunciare jussit, futurum se in senatus ac
populi potestate. Postero die luce prima, patefactis
Insulæ portis, in forum Achradinæ venit : ibi in
aram Concordiæ, ex qua pridie Polyænus conciona-
tus erat, escendit : orationemque eam orsus est, qua
primum cunctationis suæ veniam petivit. *Se enim*
clausus habuisse portas, non separantem suis res a pub-
licis, sed strictis semel gladiis timentem, qui finis cædi-
bus esset futurus : utrum, quod satis libertati foret,
contenti nece tyranni essent, an, quicumque aut pro-
pinquitate, aut adfinitate, aut aliquibus ministeriis re-
giam contigissent, alienæ culpæ rei trucidarentur. Post-
quam animadrexit, eos, qui liberassent patriam, ser-
vare etiam liberatam velle, atque undique consuli in
medium ; non dubitasse, quin et corpus suum, et cetera

*omnia, quæ suæ fidei tutelæque essent, quoniam eum, U.C. 538.
qui mandasset, suus furor absumsisset, patriæ restitue- A.C. 214.
ret. Conversus deinde ad interfectores tyranni, ac
nomine adpellans Theodotum ac Sosim: Facinus,
inquit, memorabile fecistis. Sed, mihi credite, incho-
ata vestra gloria, nondum perfecta, est; periculumque
ingens manet, nisi paci et concordiæ consulitis, ne libera
efferatur respublica.*

XXIII. Post hanc orationem claves portarum pecuniaæque regiæ ante pedes eorum posuit: atque illo quidem die dimissi ex concione læti, circa omnia fana Deûm supplicaverunt cum conjugibus ac liberis: postero die comitia prætoribus creandis habita.

Creatus in primis Andranodus; ceteri magna ex Prætores parte interfectores tyranni: duos etiam absentes, ^{Syracusis} _{creantur.} Sopatrum ac Dinomenem, fecerunt. Qui, auditis, quæ Syracusis acta erant, pecuniam regiam, quæ in Leontinis erat, Syracusas devectam, quæstoribus ad id ipsum creatis tradiderunt: et ea, quæ in Insula erat et Achradina, tradita est; murique ea pars, quæ ab cetera urbe nimis firmo munimento intersepiebat Insulam, consensu omnium dejecta est: secutæ et cæteræ res hanc inclinationem animorum ad libertatem. Hippocrates atque Epicydes, audita morte Hippocratis et Epicydes redelare voluerat, deserti a militibus, quia id tutissimum ex præsentibus videbatur, Syracusas rediere: ubi ne suspecti obversarentur, tamquam novandi res mulant. aliquam occasionem quærentes, prætores primum, dein per eos senatum adeunt. *Ab Hannibale se missos prædicant ad Hieronymum, tamquam amicum ac socium: paruisse imperio ejus, cuius imperator suus voluerit: velle ad Hannibalem redire: ceterum, quuum*

U. C. 538. *iter tutum non sit, vagantibus passim per totam Siciliam Romanis armis, petere, ut præsidii dent aliquid, quo Locros in Italianam perducantur : gratiam magnam eos parva opera apud Haunibalem inituros.* Facile res inpetrata : abire enim duces regios, quum peritos militiæ, tum egentes eosdem atque audaces, cupiebant : sed, quod volebant, non, quam maturato opus erat, naviter expediebant. Interim juvenes militares et adsueti militibus, nunc apud eos ipsos, nunc apud transfugas, quorum maxima pars ex navalibus sociis Romanorum erat, nunc etiam apud infimæ plebis homines, crimina serebant in senatum optimatesque : *id moliri clam eos atque struere, ut Syracusæ per speciem reconciliatæ societatis in ditione Romanorum sint ; dein factio et pauci auctores fæderis renovati dominentur.*

XXIV. His audiendis credendisque opportuna multitudo, major in dies, Syracusas confluens : nec Epicydi solum spem novandarum rerum, sed Andranodoro etiam, præbebat. Qui, fessus tandem uxoris vocibus, monentis, *Nunc illud esse tempus occupandi res, dum turbata omnia nova atque incondita libertate essent, dum regiis stipendiis pastus obrversaretur miles, dum ab Hannibale missi duces adsueti militibus juvare possent incepta*, cum Themisto, cui Gelonis filia nupta, rem consociatam paucos post dies Aristoni cuidam tragico actori, cui et aha arcana committere adsuerat, incaute aperit. Huic et genus et fortuna honesta erant, nec ars, quia nihil tale apud Græcos pudori est, ea deformabat : itaque, fidem potiorem ratus, quam patriæ debebat, indicium ad praetores defert. Qui, ubi rem hand vanam esse certis indiciis compererunt, consultis senioribus, et

auctoritate eorum præsidio ad fores posito, ingressos U. C. 538.
 curiam Themistum atque Andranodorum interfec- A. C. 214.
 runt: et, quum tumultus ab re in speciem atrociore, cum The- Occiditur
 caussam aliis ignorantibus, ortus esset, silentio tan- misto.
 dem facto, indicem in curiam introduxerunt. Qui quum ordine omnia edocuisse^t et principium con-
 junctionis factum ab Harmoniæ Gelonis filiæ nuptiis,
 quibus Themisto juneta esset; Afrorum Hispano-
 rumque auxiliares instructos ad cædem prætorum
 principumque aliorum; bonaque eorum prædæ fu-
 tura interfectoribus pronunciatum; jam mercenari-
 orum manum adsuetam imperiis Andranodori para-
 tam fuisse ad Insulam rursus occupandam; singula
 deinde, quæ per quosque agerentur, totamque viris
 armisque instructam conjunctionem ante oculos po-
 sussent; senatui quidem tam jure cæsi, quam Hiero-
 nymus, videbantur. Ante curiam variæ atque in-
 certæ rerum multitudinis clamor erat: quam, fero-
 citer minitantem in vestibulo curiæ, corpora conju-
 ratorum eo metu compresserunt, ut silentes integrum
 plebem in concionem sequerentur. Sopatro manda-
 tum ab senatu et ab collegis, ut verba faceret.

XXV. Is, tamquam reos ageret, ab anteacta vita
 orsus, quæcumque post Hieronis mortem sceleste at-
 que impie facta essent, Andranodorum ac Themistum
 arguit fecisse. *Quid enim sua sponte fecisse Hierony- Sopatri
 mum puerum, ac vixdum pubescentem facere potuisse?*
Tutores ac magistros ejus sub aliena invidia regnasse: Itaque aut ante Hieronymum, aut certe cum Hieronymo prætoris
perire eos debuisse. At illos, debitos jam morti desti- oratio in
 natosque, alia nova scelera post mortem tyranni moli- tyrannos.
 tos: palam primo, cum clavis Andranodus Insulæ
 portis hæreditatem regni creverit, quæque procurator

U. C. 538. *tenuerat, pro domino possederit; proditus deinde ab A. C. 214. eis, qui in Insula erant, circumcessus ab universa civitate, quæ Achradinam tenuerit, nequidquam palam atque aperte petitum regnum, clam et dolo affectare conatus sit, et ne beneficio quidem atque honore potuerit vinci, quum inter liberatores patriæ insidiator ipse libertatis creatus esset prætor.* Sed animos eis regios conjuges regias fecisse, alteri Hieronis, alteri Gelonis, filias nuptas. Sub hanc vocem ex omnibus partibus concionis clamor oritur, nullam earum vivere debere, nec quemquam superesse tyrannorum stirpis. Hæc natura multitudinis est; aut servit humiliter, aut superbe dominatur: libertatem, quæ media est, nec spernere modice, nec habere sciunt: et non ferme desunt irarum indulgentes ministri, qui avidos atque intemperantes plebeiorum animos ad sanguinem et cædes irritent. Sicut tum extemplo prætores rogationem promulgarunt: acceptaque pene prius, Stirps re- quam promulgata, est, ut omnis regia stirps inter- gia interficietur: missique a prætoribus Damaratani Hieronis, et Harmoniam Gelonis filias, conjuges Audrandoni et Themisti, interfecerunt.

XXVI. Heraclea erat filia Hieronis, uxor Zoippi; qui, legatus ab Hieronymo ad regem Ptolemæum missus, voluntarium conciverat exsilium. Ea quum ad se quoque venire præscisset, in sacrarium ad penates confugit, cum duabus filiabus virginibus, resolutis crinibus, miserabilique alio habitu: et ad ea addidit preces, nunc per memoriam Hieronis patris, Gelonisque fratri, ne se innoxiam invidia Hieronymi conflagrare sinerent. Nihil se ex regno illius, præter exsilium viri, habere; neque fortunam suam eamdem viro Hieronymo fuisse, quam sororis; neque imperfecto

Preces
Heracleæ
Hieronis
filiæ.

eo caussam eamdem esse. Quid? quod, si Andrano- U. C. 535.
doro consilia processissent, illa cum viro fuerit regna- A. C. 214.
tura; sibi cum ceteris serviendum. Si quis Zoippo
nunciet, imperfectum Hieronymum, ac liberatas Syra-
cusas, cui dubium esse, quin extemplo consensurus sit
narim, atque in patriam redditurus? Quantum spes ho-
minum fallit! In liberata patria conjugem ejus ac libe-
ros de vita dimicare; quid obstantes libertati, aut le-
gibus? Quod ab se cuiquam periculum, a sola ac prope
vidua, et puellis in orbitate degentibus, esse? At enim
periculi quidem nihil ab se timeri: invisam tamen re-
giām stirpem esse. Ablegarent ergo procul ab Syra-
cusis Siciliaque, et asportari Alexandriam juberent, ad
virum uxorem, ad patrem filias. Aversis auribus ani-
misque, casse ne tempus tereretur, ferrum quosdam
expedientes cernebat: tum, omissis pro se precibus,
puellis ut saltem parcerent, orare institit: a qua ætate
etiam hostes iratos abstinere: ne, tyrannos ulciscendo,
quæ odissent, scelera ipsi imitarentur. Inter hæc ab-
stractam a penetralibus jugulant: in virgines deinde,
respersas matris cruento, in petum faciunt: quæ, alie-
nata mente simul luctu metuque, velut captæ furore,
eo cursu se ex sacrario proripuerunt, ut, si effugium
patuisset in publicum, inpleturæ urbem tumultu fue-
rint. Tum quoque haud magno ædium spatio, inter
medios tot armatos, aliquoties integro corpore evase-
runt: tenentibusque, quum tot ac tam validæ eluc-
tandæ manus essent, sese eripuerunt: tandem, vul-
neribus confectæ, quum omnia replessent sanguine,
exanimes conruerunt; cædemque per se miserabilem
miserabiliorum casus fecit, quod paullo post nuncius
venit, mutatis repente ad misericordiam animis, ne
interficerentur. Ira deinde ex misericordia orta,

U. C. 538. quod adeo festinatum ad supplicium, neque locus
A. C. 214. pœnitendi, aut regressus ab ira relictus esset: itaque
 fremere multitudo, et in locum Andranodori ac The-
 misti (nam ambo prætores fuerant) comitia poscere:
 quæ nequaquam ex sententia prætorum futura es-
 sent.

**Epicydes
 et Hippo-
 crates
 prætores
 fuit.**

XXVII. Statutus est comitiis dies: quo, neco-
 pinantibus omnibus, unus ex ultima turba Epicydem
 nominavit, tum inde alias Hippocratem: crebriores
 deinde eæ voces, et cum haud dubio adsensu mul-
 titudinis esse. Et erat confusa concio, non popula-
 ri modo, sed militari quoque turba, magna ex parte
 etiam perfugis, qui omnia novare cupiebant, per-
 mixtis. Prætores dissimulare primo, et trahenda re
 esse: postremo victi consensu, et seditionem metu-
 entes, pronunciant eos prætores. Nec illi primo
 statim creati nudare, quid vellent: quamquam ægre
 ferebant, et de induciis dierum decem legatos isse ad
 Ap. Claudium, et, inpetratis eis, alios, qui de fœdere
 antiquo renovando agerent, missos. Ad Murgan-
 tiam tum classem navium centum Romanus habe-
 bat, quonam evaderent motus ex cædibus tyranno-
 rum orti Syracusis, quove eos ageret nova atque in-
 solita libertas, opperiens. Per eosdem dies quum
 ad Marcellum, venientem in Siciliam, legati Syracu-
 sani missi ab Appio essent, auditis conditionibus
 pacis, Marcellus, posse remi convenire ratus, et ipse
 legatos Syracusas, qui coram cum prætoribus de re-
 novando fœdere agerent, misit. Et jam ibi nequa-
 quam eadem quies et tranquillitas erat: postquam
 Punicam classem accessisse Pachynum adlatum est,
 deinde timore Hippocrates et Epicydes, nunc apud
 mercenarios milites, nunc apud transfugas, prodi-

**Turbæ
 Syracusis.**

Romano Syracusas, criminabantur. Ut vero Ap. U.C. 535.
pius naves ad ostium portus, quo aliae partis homi- A. C. 214.
nibus animus accederet, in statione habere cœpit,
ingens in speciem criminibus vanis accesserat fides :
ac primo etiam tumultuose decurrerat multitudo ad
prohibendos, si in terram egrederentur.

XXVIII. In hac turbatione rerum in concionem
vocari placuit : ubi quum alii alio tenderent, nec
procul seditione res esset, Apollonides principum
unus orationem salutarem, ut in tali tempore, ha- Apolloni-
buit ; *nec spem salutis, nec perniciem propiorem um- dæ saluta-*
quam civitati ulli fuisse. *Si enim uno animo omnes*
vel ad Romanos, vel ad Karthaginienses inclinent, nul-
lius civitatis statum fortunatiorem beatiorem fore :
si alii alio trahant res, non inter Pœnos Romanosque
bellum atrocius fore, quam inter ipsos Syracusanos ;
quum intra eosdem muros pars utraque suos exercitus,
sua arma, suos habitura sit duces. Itaque, ut omnes
idem sentiant, summa vi agendum esse : utra societas
sit utilior, eam longe minorem ac levioris momenti con-
sultationem esse : sed tamen Hieronis potius, quam
Hieronymi, auctoritatem sequendum in sociis legendis,
vel quinquaginta annis feliciter expertam amicitiam
nunc incognitæ, quondam infideli, preferendam. Esse
etiam momenti aliquid ad consilium, quod Karthagini-
ensibus ita pax negari possit, ut non utique in præsentia
bellum cum eis geratur : cum Romanis extemplo aut
pacem, aut bellum habendum. Quo minus cupiditatis
ac studii visa est oratio habere, eo plus auctoritatis
habuit. Adjectum est prætoribus ac delectis sena-
torum militare etiam consilium : jussi et duces ordi-
num præfectique auxiliorum simul consulere. Quum Pax cum
sæpe acta res esset magnis certaminibus, postremo, Romanis
decernitur.

U. C. 538. quia belli cum Romanis gerendi ratio nulla adpare-
A. C. 214. bat, pacem fieri placuit, mittique cum eis legatos ad
rem confirmanda.

XXIX. Dies haud ita multi intercesserunt, quum ex Leontinis legati, præsidium finibus suis orantes, venerunt; quæ legatio peropportuna visa ad multitudinem inconditam ac tumultuosam exonerandam, ducesque ejus ablegandos. Hippocrates prætor ducere eo transfugas jussus: secuti multi ex mercenariis auxiliis, quatuor millia armatorum effecerunt. Et mittentibus et missis ea læta expeditio fuit: nam et illis, quod jam diu cupiebant, novandi res occasio data est; et hi, sentinam quamdam urbis rati exhaustam, lætabantur: ceterum levaverunt modo in præsentia velut corpus ægrum, quo mox in gravorem morbum recideret. Hippocrates enim finitima provinciæ Romanae primo furtivis excursi-
nibus vastare cœpit: deinde, quum ad tuendos so-
ciorum agros missum ab Appio præsidium esset, omnibus copiis inpetum in obpositam stationem cum cæde multorum fecit. Quæ quum essent nunciata Marcello, legatos extemplo Syracusas misit, qui pa-
cis fidem ruptam esse dicerent: nec belli defuturam unquam caussam, nisi Hippocrates atque Epicydes non ab Syracusis modo, sed tota procul Sicilia, able-
garentur. Epicydes, ne aut reus criminis absentis fra-
tris præsens esset, aut deesset pro parte sua concitan-
do bello, profectus et ipse in Leontinos, quia satis eos adversus populum Romanum concitatos cerne-
bat, avertere etiam ab Syracusis cœpit. *Nam ita eos pacem pepigisse cum Romanis, ut, quicumque populi sub regibus fuissent, et suæ ditionis essent; nec jam libertate contentos esse, nisi etiam regnent ac dominantur.* Re-

Turbant
rem com-
positam
Hippo-
crates et
Epicydes.

nunciandum igitur eis esse, Leontinos quoque aequum U.C. 53^a. censere liberos esse ; vel quod in solo urbis suæ tyrannus A. C. 21⁴. ceciderit, vel quod ibi primum conclamatum ad libertatem, relictisque regiis ducibus Syracusas sit concursum. Itaque aut eximendum id de fædere esse, aut legem eam fæderis non accipiendam. Facile multitudini persuasum : legatisque Syracusanorum, et de cæde stationis Romanæ querentibus, et Hippocratem atque Epicydem abire seu Locros, seu quo alio malling, dummodo Sicilia cederent, jubentibus, ferociter responsum est : Neque mandasse sese Syracusanis, ut pacem pro se cum Romanis facerent : neque teneri alienis fæderibus. Hæc ad Romanos Syracusani detulerunt, abnuentes Leontinos in sua potestate esse : itaque integro secum fædere bellum Romanos cum iis gesturos : neque sese defuturos ei bello ; ita ut in potestatem redacti suæ rursus ditionis essent, sicut pax convenisset.

XXX. Marcellus cum omni exercitu profectus in Leontino-
Leontinos, Appio quoque adcito, ut altera parte ad-<sup>rum urbs a
Marcello</sup> grederetur, tanto ardore militum est usus ab ira in-
ter conditiones pacis imperfectæ stationis, ut primo in-
petu urbem expugnarent. Hippocrates atque Epicy-
des, postquam capi muros refringique portas videre,
in arcem sese cum paucis recepere : inde clam nocte.
Herbessum perfugiunt. Syracusanis, octo millium
armatorum agmine profectis domo, ad Mylam flu-
men nuncius obcurrit, captam urbem esse ; cetera
falsa mixta veris ferens : cædem promiscuam mili-
tum atque oppidanorum factam, nec quemquam pu-
berem arbitrari superesse : direptam urbem : bona
locupletium donata. Ad nuncium tam atrocem con-
stitit agmen ; concitatisque omnibus, duces, (erant

U. C. 538. autem Sosis ac Dinomenes) quid agerent, consulta-
A. C. 214. bant. Terroris speciem haud vanam mendacio præ-
buerant verberati ac securi percussi transfugæ ad
duo millia hominum : ceterum Leontinorum mili-
tumque aliorum nemo, post captam urbem, violatus
fuerat: suaque omnia eis, nisi quæ primus tumultus
captæ urbis absumserat, restituebantur. Nec ut
Leontinos irent, proditos ad cædem commilitones
querentes, perPELLi potuere, nec ut eodem loco cer-
tiorem nuncium exspectarent. Quum ad defectio-
nem inclinatos animos cernerent prætores, sed eum
motum haud diuturnum fore, si duces amentiæ sub-
lati essent; exercitum ducunt Megaram: ipsi cum
paucis equitibus Herbessum proficiscuntur, spe, ter-
ritis omnibus, per proditionem urbis potiundæ: quod
ubi frustra eis fuit inceptum, vi agendum rati, pos-
tero die Megaris castra movent, ut Herbessum om-
nibus copiis obpugnarent. Hippocrates et Epicy-
des, non tam tutum prima specie, quam unum, spe
undique abscissa, consilium esse rati, ut se militibus
permitterent, et adsuetis magna ex parte sibi, et tuni
fama cædis commilitonum accensis, obviam agmini
procedunt. Prima forte signa sexcentorum Creten-
sium erant, qui apud Hieronymum meruerant sub
eis, et Hannibalis beneficium habebant, capti ad
Trasimenum inter Romanorum auxilia, dimissique:
quos ubi ex signis arnorumque habitu cognovere
Hippocrates atque Epicydes, ramos oleæ ac vela-
menta alia supplicum porrigentes, orare, *ut recipie-
rent sese, receptosque tutarentur, neu proderent Syra-
cusanis, a quibus mox ipsi trucidandi populo Romano
dederentur.*

XXXI. *Enimvero, conclamat, bonum ut animum*

haberent: omnem se cum illis fortunam subituros. In- U. C. 538.
ter hoc conloquium signa constiterant, tenebaturque

A. C. 214.

agmen: neclum, quæ moræ caussa foret, perven-
erat ad duces: postquam Hippocrateim atque Epicy-
dem adesse pervasit rumor, fremitusque toto agmine
erat haud dubie adprobantium adventum eorum;
extemplo prætores citatis equis ad prima signa per-
rexerunt, *Qui mos ille, quæ licentia Cretensium esset,*
rogantes, *conloquia serendi cum hoste, injussuque*
prætorum miscendi eos agmini suo? Comprehendi
injicique catenas jusserunt Hippocrati: ad quam
vocem tantus extemplo primum a Cretibus clamer
est ortus, deinde exceptus ab aliis, ut facile, si ultra
tenderent, adpareret, eis timendum esse. Solliciti
incertique rerum suarum Megaram, unde profecti
erant, referri signa jubent, nunciosque de statu præ-
senti Syracusas mittunt. Fraudem quoque Hippo- Fraus Hip-
ocrates addit, inclinatis ad omnem suspicionem ani- pocratis.
mis, et, Cretensium quibusdam ad itinera insidenda
missis, velut interceptas literas, quas ipse composu-
erat, recitat: *Prætores Syracusani consuli Marcello:*
secundum salutem, ut adsolet, scriptum erat: *Recte*
eum atque ordine fecisse, quod in Leontinis nulli peper-
cisset. Sed omnium mercenariorum militum eamdem
esse caussam, nec umquam Syracusas quieturas, donec
quidquam externorum auxiliorum, aut in urbe, aut in
exercitu suo, esset: itaque daret operam, ut eos, qui
cum suis prætoribus castra ad Megaram haberent, in
suam potestatem redigeret, ac supplicio eorum liberaret
tandem Syracusas. Hæc quum recitata essent, cum
tanto clamore ad arma discursum est, ut prætores
inter tumultum pavidi adequitaverint Syracusas: et
ne fuga quidem eorum seditio compressa est, impe-

U. C. 538. *tusque in Syracusanos milites fiebant : nec ab ullo*
A. C. 214. *temperatum foret, ni Epicydes atque Hippocrates*
iræ multitudinis obviam issent : non a misericordia
aut humano consilio, sed ne spem redditus præcide-
rent sibi, et quum ipsos simul milites fidos haberent,
simul obsides ; tum cognatos quoque eorum atque
amicos tanto merito primum, dein pignore sibi con-
ciliarent : expertique, quam vana aut levi aura mo-
bile vulgus esset, militem nacti ex eo numero, qui in
Leontinis circumcessi erant, subornant, ut Syracusas
perferret nuncium convenientem eis, quæ ad Mylam
falso nunciata erant ; auctoremque se exhibendo, ac
velut visa, quæ dubia erant, narrando, concitaret
iras hominum.

XXXII. *Huic non apud vulgum modo fides fuit,*
sed senatum quoque in curiam introductus movit :
haud vani quidam homines palam ferre, perbene de-
tectam in Leontinis esse avaritiam et crudelitatem Ro-
manorum : eadem, si intrassent Syracusas, aut fædiora
etiam, quo majus ibi avaritiæ præmium esset, facturos
fuisse. Itaque claudendas cuncti portas, et custo-
diendam urbem censere : sed non ab eisdem omnes
timere, nec eosdem odisse : ad militare genus omne
partemque magnam plebis invisum esse nomen Ro-
manum. Prætores optimatiumque pauci, quamquam
inflammati vano nuncio erant, tamen ad propius
præsentiusque malum cautiores esse. Et jam ad
Syracusas Hexapylum erant Hippocrates atque Epicydes : se-
occupant Hippocra-
tes et Epi-
cydes. *rebanturque conloquia per propinquos popularium,*
qui in exercitu erant, ut portas aperirent, sinerent-
que communem patriam defendi ab inpetu Romanorum. *Jam, unis foribus Hexapyli apertis, cœpti*
erant recipi, quum prætores intervenerunt : et primo

imperio minisque, deinde auctoritate; deterrendo, U. C. 536.
 postremo, ut omnia vana erant, obliti majestatis, A. C. 214.
 precibus agebant, ne proderent patriam tyranni ante
 satellitibus, et tum corruptoribus exercitus. Sed
 surdæ ad hæc omnia aures concitatæ multitudinis
 erant, nec minore intus vi, quam foris, portæ effrin-
 gebantur: effractisque omnibus, tuto in Hexapylō
 agmen receptum est. Prætores in Achradinam cum
 juventute popularium confugiunt: mercenarii mili-
 tes perfugæque, et quidquid regiorum militum Syra-
 cusis erat, agmen hostium augent. Ita Achradina
 quoque primo in petu capit, prætorumque (nisi qui
 inter tumultum effugerunt) omnes interficiuntur:
 nox cædibus finem fecit. Postero die servi ad pi-
 leum vocati, et carcere vinci emissi: confusaque
 hæc omnis multitudo Hippocratem atque Epicydem
 creant prætores: Syracusæque, quum breve tempus
 libertas adfulsisset, in antiquam servitutem recide-
 runt.

XXXIII. Hæc nunciata quum essent Romanis, Romani ad
 ex Leontinis mota sunt extemplo castra ad Syracusas
 castra mo-
 sas. Et ab Appio legati per portum missi forte in vent.
 quinqueremi erant: præmissa quadriremis, quum in-
 trasset fauces portus, capit: legati ægre effuge-
 runt. Et jam non modo pacis, sed ne belli quidem
 jura relicta erant: quum Romanus exercitus ad
 Olympium (Jovis id templum est) mille et quingen-
 tis passibus ab urbe castra posuit. Inde quoque le-
 gatos præmitti placuit: quibus ne intrarent urbem,
 extra portam Hippocrates atque Epicydes obviam
 cum suis processerunt. Romanus orator *non bellum*
se Syracusanis, sed opem auxiliumque adferre, ait, et
eis, qui, ex media cæde elapsi, perfugerint ad se, et

U. C. 538. *eis, qui, metu oppressi, fædiorem, non exilio solum, sed*

A. C. 214. *etiam morte, serritatem patientur. Nec cædem nefandam sociorum inultam Romanos passuros. Itaque si eis, qui ad se perfugerunt, tutus in patriam reditus patet, cædis auctores dedantur, et libertas legesque Syracusanis restituantur, nihil armis opus esse : si ea non fiant, quicumque in mora sit, bello persecuturos.* Ad ea Epicydes, *Si qua ad se mandata haberent, responsum eis, ait, se datus fuisse : quum in eorum, ad quos venerint, manu res Syracusana esset, tum reverterentur. Si bello lassent, ipsa re intellecturos, ne quaquam idem esse Syracusas ac Leontinos obpugnare.*

Obpug-
nantur
Syracusæ. *Ita legatis relictis, portas clausit. Inde terra mari- que simul cœptæ obpugnari Syracusæ : terra ab Hex- apylo, mari ab Achradina, cuius murus fluctu adluitur : et, quia, sicut Leontinos terrore ac primo inpetu ceperant, non diffidebant, vastam disjectamque spa- tio urbem parte aliqua se invasuros, omnem adpara- tum obpugnandarum urbium muris admoverunt.*

Archime-
des cona-
tus Ro-
manorum
ludifica-
tur. *XXXIV. Et habuisset tanto inpetu cœpta res for- tunam, nisi unus homo Syracusis ea tempestate fu- isset. Archimedes is erat, unicus spectator cœli si- derumque ; mirabilior tamen inventor ac machina- tor bellicorum tormentorum operumque, quibus ea, quæ hostes ingenti mole agerent, ipse perlevi mo- mento ludificaretur. Murum per inæquales ductum colles, (pleraque alta et difficilia aditu, submissa quædam, et quæ planis vallibus adiri possent) ut cuique aptum visum est loco, ita omni genere tor- mentorum instruxit. Achradinæ murum, qui, ut ante dictum est, mari adluitur, ex quinqueremibus Marcellus obpugnabat. Ex ceteris navibus sagittarii funditoresque, et velites etiam, quorum telum inha-*

bile ad remittendum imperitis est, vix quemquam U. C. 538.
sine vulnere consistere in muro patiebantur. Hi, A. C. 214.
quia spatio missilibus opus est, procul muro tene-
bant naves: junctæ aliæ binæ ad quinqueremes,
demis interioribus remis, ut latus lateri adipicaretur,
quum exteriore ordine remorum velut naves ageren-
tur, turres contabulatas machinamentaque alia qua-
tiendis muris portabant. Adversus hunc navalem
adparatum Archimedes variae magnitudinis tormenta
in muris disposuit: in eas, quæ procul erant, naves
saxa ingenti pondere emittebat: propiores leviori-
bus, eoque magis crebris, petebat telis: postremo,
ut sui vulnere intacti tela in hostem ingererent, mu-
rum ab imo ad summum crebris cubitalibus fere ca-
vis aperuit; per quæ cava pars sagittis, pars scor-
pionibus modicis ex occulto petebant hostem. Quæ
propius quædam subibant naves, quo interiores icti-
bus tormentorum essent, in eas tollenone super mu-
rum eminente ferrea manus firmæ catenæ inligata
quum injecta proræ esset, gravi libramento plumbi
recellente ad solum, suspensa prora, navim in pup-
pim statuebat: dein, remissa subito, velut ex muro
cadentem navim cum ingenti trepidatione nautarum
ita undæ adfligebat, ut, etiamsi recta reciderat, ali-
quantum aquæ acciperet. Ita maritima obpugnatio
est elusa, omnisque vis est eo versa, ut totis viribus
terra adgrederentur. Sed ea quoque pars eodem
omni adparatu tormentorum instructa erat, Hieronis
inpensis curaque per multos annos, Archimedis uni-
ca arte: natura etiam juvabat loci, quod saxum,
cui imposita muri fundamenta sunt, magna ex parte
ita proclive est, ut non solum missa tormento, sed
etiam quæ pondere suo provoluta essent, graviter in

U.C. 538. hostem inciderent: eadē caussa ad subeundūm ar-
A.C. 214. duum aditum instabilemque ingressum præbebat.

Ita, consilio habito, quum omnis conatus ludibrio
esset, absistere obpugnatione, atque obsidendo tan-
tum arcere terra marique conimeatibus hostem pla-
cuit.

Marcellus alias urbes capit. XXXV. Interim Marcellus, cum tertia fere parte
exercitus ad recipiendas urbes profectus, quæ in mo-

tu rerum ad Karthaginienses defecerant, Helorum
atque Herbessum, dedentibus ipsis, recipit. Megara
vi capta diruit ac diripuit ad reliquorum, ac maxime
Syracusorum, terrorem. Per idem fere tempus et

Himilco cum exercitu in Siciliam ve- Himilco, qui ad Pachyni promontorium classem diu
tenuerat, ad Heracleam, quam vocant Minoam, quin-
que et viginti millia peditum, tria equitum, duode-
nit.

cim elephantos exposuit: nequaquam cum quantis
copiis ante tenuerat ad Pachynum classem. Sed,
postquam ab Hippocrate occupatae Syracusæ erant,
profectus Karthaginem, adjutusque ibi et ab legatis
Hippocratis, literisque Hannibal, qui venisse tem-
pus aiebat Siciliæ per summum decus repetendæ, et
ipse haud vanus præsens monitor facile perpulerat,
ut, quantæ maximæ possent, peditum equitumque
copiæ in Siciliam trajicerentur. Adveniens Hera-
cleam, intra paucos dies inde Agrigentum recipit:
aliarumque civitatum, quæ partis Karthaginiensium
erant, adeo accensæ sunt spes ad pellendos Sicilia
Romanos, ut postremo etiam, qui obsidebantur Sy-
racusis, animos sustulerint; et, parte copiarum satis
defendi urbem posse rati, ita inter se munera belli

Hippocra- tes cum exercitu partiti sint, ut Epicydes præsset custodiæ urbis,
Hippocrates, Himilconi conjunctus, bellum adversus
Syracusis consulem Romanum gereret. Cum decem millibus
egreditur.

peditum, quingentis equitibus nocte per intermissa U. C. 538.
custodiis loca profectus, castra circa Acrillas urbein A. C. 214.
ponebat. Munientibus supervenit Marcellus, ab Agrigento jam occupato, quem frustra eo prævenire hostem festinans tetendisset, rediens; nihil minus ratus, quam illo tempore ac loco Syracusanum sibi exercitum obviam fore; sed tamen metu Himilconis Pœnorumque (ut quibus nequaquam eis copiis, quas habebat, par esset) quam poterat maxime intentus, atque agmine ad omnes casus composito ibat.

XXXVI. Forte ea cura, quæ erat adversus Poeninos præparata, adversus Siculos usui fuit. Castris ponendis incompositos ac dispersos nactus eos et plerosque inermes, quod peditum fuit, circumvenit: eques, levi certamine inito, cum Hippocrate Acras perfugit. Ea pugna deficiente ab Romanis quum cohibusset Siculos, Marcellus Syracusas rediit: et post paucos dies Himilco, adjuncto Hippocrate, ad flumen Anapum, octo ferme inde millia, castra posuit. Sub idem fere tempus et naves longæ quinque et quinquaginta Karthaginiensium cum Bomilcare classis præfecto in magnum portum Syracusas ex alto decurrere; et Romana item classis, triginta quinqueremes, legionem primam Panormi exposuere; versumque ab Italia bellum, adeo uterque populus in Siciliam intentus, fuisse videri poterat. Legionem Romanam, quæ exposita Panormi erat, venientem Syracusas, prædæ hand dubie sibi futuram Himilco ratus, via decipitur: mediterraneo namque Pœnus itinere duxit; legio maritimis locis, classe prosequente, ad Ap. Claudium, Pachynum cum parte copiarum obviani progressum, pervenit. Nec diutius Poeni ad Syracusas morati sunt: et Bomilcar,

Vincitur a
Marcello.

U. C. 538. simul parum fidens navibus suis, duplici facile nume-
A. C. 214. ro classem habentibus Romanis, simul inutili mora
cernens nihil aliud ab suis quam inopia adgravari
socios, velis in altum datis, in Africam transmisit.
Et Himilco, secutus nequidquam Marcellum Syra-
cusal, si qua, priusquam majoribus copiis jungere-
tur, occasio pugnandi esset, postquam ea nulla con-
tigerat, tutumque ad Syracusal et munimento et vi-
ribus hostem cernebat, ne frustra adsidendo spectan-
doque obsidionem sociorum tempus tereret, castra
inde movit: ut, quocumque vocasset defectionis ab
Romanis spes, admoveret exercitum, ac præsens
suas res foventibus adderet animos. Murgantiam
primuni, prodi ab ipsis præsidio Romano, recepit:
ubi frumenti magna vis commeatusque omnis generis
convecti erant Romanis.

XXXVII. Ad hanc defectionem erecti sunt et
alias civitatum animi: præsidiaque Romana aut
pellebantur arcibus, aut prodita per fraudem obpri-
mebantur. Henna, excenso loco ac prærupto undi-
que sita, quum loco inexpugnabilis erat, tum præ-
sidium in arce validum, præfectumque præsidii haud
sane opportunum insidianibus habebat. L. Pinarius
erat vir acer, et qui plus in eo, ne posset decipi,
quam in fide Siculorum, reponeret: et tum inten-
derant eum ad cavendi omnia curam tot auditæ pro-
ditiones defectionesque urbium, et clades præsidio-
rum. Itaque nocte dieque juxta parata instructaque
omnia custodiis ac vigiliis erant: nec ab armis aut
loco suo miles abscedebat. Quod ubi Hennensium
principes, jam pacti cum Himilcone de proditione
præsidii, animadverterunt, nulli occasione fraudis
Romanum patere, palani rentur agendum. *Urbera*

Hennen-
sium mo-
litiones.

arcemque suæ potestatis, aiunt, debere esse, si liberi in U.C. 53^a. societatem, non servi in custodiam, traditi essent Romanis: itaque claves portarum reddi sibi æquum censem. Bonis sociis fidem suam maximum vinculum esse: et ita sibi populum Romanum senatumque gratias habitum, si volentes, ac non coacti, mansissent in amicitia. Ad ea Romanus, *Se in præsidio inpositum esse, dicere, ab imperatore suo: clavesque portarum et custodiam arcis ab eo accepisse, quæ nec suo nec Hennensiū arbitrio haberet, sed ejus, qui commisisset: præsidio decidere apud Romanos capital esse: et nece liberorum etiam suorum eam legem parentes sanxisse. Consulem Marcellum haud procul esse: ad eum mittent legatos, cuius juris atque arbitrii esset. Se vero negare illi missuros: testarique, si verbis nihil ageant, vindictam aliquam libertatis suæ quæsitueros.* Tum Pinarius: *at illi, si ad consulem gravarentur mittere, sibi saltem darent populi concilium: ut sciretur, utrum paucorum ea denunciata, an universæ civitatis, essent. Consensu in posterum diem concio edicitur.*

XXXVIII. Postquam ab eo conloquio in arcem sese recepit, convocatis militibus, *Credo ego vos audiisse, milites, inquit, quemadmodum præsidia Romana ab Siculis circumventa et oppressa sint per hos dies. Eam vos fraudem, Deum primo benignitate, dein restra ipsi virtute, dies noctesque perstanto ac perrigilando in armis, ritastis: utinam reliquum tempus nec patiendo infunda, nec faciendo, traduci possit! Hæc occulta in fraude cautio est, qua usi adhuc sumus: cui quoniam parum succedit, aperte ac propalam clares portarum resuscunt: quas simul tradiderimus, Karthaginiensium ex templo Henna erit, fediisque hic trucidabimur, quam*

U.C. 538. *Murgantiae præsidium interfectum est. Noctem unam*
A.C. 214.

ægre ad consultandum sumsi, qua vos certiores periculi instantis facerem. Orta luce concionem habituri sunt, ad criminandum me concitandumque in vos populum: itaque crastino die, aut vestro, aut Hennensium sanguine Henna inundabitur: nec præoccupati spem ullam, nec occupantes periculi quidquam habebitis: qui prior strinxerit ferrum, ejus victoria erit. Intenti ergo omnes armatique signum exspectabis: ego in concione ero: et tempus, quoad omnia instructa sint, loquendo altercandoque traham. Quum toga signum dedero, tum mihi undique clamore sublato turbam invadite, ac sternite omnia ferro: et cavete, quisquam supersit, a quibus aut vis, aut fraus timeri possit. Vos, Ceres mater ac Proserpina, precor, ceteri superi infernique Di, qui hanc urbem, hos sacratos lacus lucosque colitis, ut ita nobis volentes propitiæ adsitis, si vitandæ, non ferendæ, fraudis caussa hoc consilii capimus. Pluribus vos, milites, hortarer, si cum armatis dimicatio futura esset: inermes, incautos ad satietatem trucidabitis. Et consulis castra in propinquuo sunt, ne quid ab Himilcone & Karthaginiensibus timeri possit.

XXXIX. Ab hac alhortatione dimissi corpora curant. Postero die alii aliis locis, ad obsidenda itinera claudendosque oppidanis exitus, pars maxima super theatrum circaque, adsueti et ante spectaculis concionum, consistunt. Productus ad populum a magistratibus præfектus Romanus, quum consulis ea de re jus ac potestate esse, non suam, et pleraque eadem, quæ pridie, dixisset; primo sensim, ac plures, reddere claves, dein jam una voce id omnes

Cæduntur Hennen- juberent, cunctantique ac differenti ferociter minitarentur, nec viderentur ultra vim ultimam dilaturi;

tum præfectus toga signum, ut convenerat, dedit : U.C. 538.
 militesque intenti dudum ac parati, alii superne in
 aversam concionem clamore sublato decurrunt, alii
 ad exitus theatri conferti obsistunt. Cæduntur Hen-
 nenses cavea inclusi, coacervanturque, non cæde so-
 lum, sed etiam fuga ; quum alii super aliorum capita
 ruerent, atque integri sauciis, vivi mortuis inciden-
 tes, cumularentur. Inde passim discurritur, et urbis
 captæ modo fugaque et cædes omnia tenet : nihil
 remissiore militum ira, quod turbam inermem cæde-
 bant, quam si periculum par et ardor certaminis eos
 irritaret. Ita Henna, aut malo, aut necessario fa-
 cinore retenta. Marcellus nec factum improbavit, et
 prædam Hennensium militibus concessit, ratus, ti-
 more deterritos temperaturos proditionibus præsi-
 diorum Siculos. Atque ea clades, ut urbis in media
 Sicilia sitæ, claræque vel ob insignem munimento
 naturali locum, vel ob sacrata omnia vestigiis raptæ
 quondam Proserpinæ, prope uno die omnem Siciliam
 pervasit. Et quia cæde infanda rebantur, non ho-
 minum tantum, sed etiam Deorum sedem violatam
 esse, tum vero, qui etiam ante dubii fuerant, defe-
 cere ad Pœnos. Hippocrates inde Murgantiam, Hi-
 milco Agrigentum sese recepit : quuin adeiti a pro-
 ditoribus nequidquam ad Hennam exercitum admo-
 vissent. Marcellus retro in Leontinos redit : fru-
 mentoque et commieatibus aliis in castra convectis,
 præsidio modico ibi relicto, ad Syracusas obsidendas
 venit : inde Ap. Claudio Romam ad consulatum pe-
 tendum misso, T. Quintium Crispinum in ejus lo-
 cum classi castrisque præficit veteribus : ipse hiber-
 nacula quinque millia passuum Hexapylo (Leonta

U. C. 528. vocant locum) communii, ædificavitque. Hæc in
A. C. 2⁴ Sicilia usque ad principium hienis gesta.

Bellum XL. Eadem æstate et cum Philippo rege, quod
cum Phi- jam ante suspectum fuerat, motum bellum est. Le-
lippi. gati ab Orico ad M. Valerium prætorem venerunt,
præsidentem classi Brundisio Calabriæque circa li-
toribus, nunciantes Philippum primuni Apolloniam
tentasse, lembis biremibus centum viginti flumine
adverso subvectum: deinde, ut ea res tardior spe
Oricum a fuerit, ad Oricum clam nocte exercitum admovisse:
Philippo eamque urbem, sitam in plano, neque mœnibus, ne-
captum. que viris atque armis validam, primo impetu obpres-
sam esse. Hæc nunciantes orabant, ut opem ferret,
hostemque haud dubium Romanis terra aut mariti-
mis viribus arceret; qui ob nullam aliam caussam,
nisi quod inminerent Italiæ, peterentur. M. Vale-
rius, præsidio loci ejus relicto P. Valerio legato, cum
classe instructa parataque, et, quod longæ naves mi-
litum capere non poterant, in onerarias inpositis, al-
tero die Oricum pervenit: urbemque eam, levi te-
nente præsidio, quod recedens inde reliquerat Phi-
Apollonia lippus, haud magno certamine recepit. Legati eo
obsessa a ab Apollonia venerunt, nunciantes, in obsidione
Philippo. sese, quod deficere ab Romanis nollent, esse: ne-
que sustinere ultra vim Macedonum posse, nisi præ-
sidium mittatur Romanum. Facturum se, quæ vel-
lent, pollicitus, duo millia delectorum militum na-
vibus longis mittit ad ostium fluminis, cum præfecto
socium, Q. Nævio Crista, viro inpigro et perito mi-
litiae. Is, expositis in terram militibus, navibusque
Oricum retro, unde venerat, ad ceteram classem re-
missis, milites procul a flumine per viam minime ab

regiis obsessam duxit, et nocte, ita ut nemo hostium U. C. 538.
sentiret, urbem est ingressus. Die insequenti quie- A. C. 214.
vere, dum præfectus juventutem Apolloniatum, ar-
maque et urbis vires inspiceret: ubi ea vita inspec-
taque satis animorum fecere, simulque ab explorato-
ribus comperit, quanta socordia ac negligentia apud
hostes esset; silentio noctis ab urbe sine ullo tu- Castra Ma-
multu egressus, castra hostium adeo neglecta atque cedonum
aperta intravit, ut satis constaret, prius mille homi- invadunt
num vallum intrasse, quam quisquam sentiret: ac, Romani.
si cæde abstinuissent, pervenire ad tabernaculum re-
gium potuisse. Cædes proximorum portæ excitavit
hostes: inde tantus terror pavorque omnes occupa-
vit, ut nou modo alius quisquam arma caperet, aut
castris pellere hostem conaretur; sed etiam ipse
rex, sicut somno excitus erat, prope seminudus fu- Philippi
giens, militi quoque, nedum regi, vix decoro habitu, fuga.
ad flumen navesque perfugerit: eodem et alia turba
effusa est. Paullo minus tria millia militum in
castris aut capta, aut occisa: plus tamen hominum
aliquanto captum, quam cæsum, est. Castris direp-
tis, Apolloniatæ catapultas, ballistas, tormentaque
alia, quæ obpugnandæ urbi comparata erant, ad tu-
enda mœnia, si quando similis fortuna venisset,
Apolloniam devexere: cetera omnis præda castro-
rum Romanis concessa est. Hæc quum Oricum es-
sent nunciata, M. Valerius classem extemplo ad os-
tium fluminis duxit, ne navibus capessere fugam rex
posset. Itaque Philippus, neque terrestri, neque
navali certamine satis fore parem se fidens, subductis
aut incensis navibus, terra Macedoniam petiit, mag-
na ex parte inermi exercitu spoliatoque. Romana
classis cum M. Valerio Orici hibernavit

U.C. 538. XLI. Eodem anno in Hispania varie res gestæ :
 A.C. 214. nam priusquam Romani amnem Iberum transirent,
 Res in Hispania gestæ. ingentes copias Hispanorum Mago et Hasdrubal fu-
 derunt : defecissetque ab Romanis ulterior Hispania,
 ni P. Cornelius, raptim traducto exercitu Iberum,
 dubiis sociorum animis in tempore advenisset. Pri-
 mo ad castrum Altum (locus est insignis cæde mag-
 ni Hamilcaris) castra Romani habuere. Arx erat
 munita, et convexerant ante frumentum : tamen,
 quia omnia circa hostium plena erant, agmenque
 Romanum inpune incursatum ab equitibus hostium
 fuerat, et ad duo millia, aut moratorum aut palan-
 tium per agros, interfecta, cessere inde Romani pro-
 pius pacata loca, et ad montem Victoriae castra com-
 munivere. Eo Cn. Scipio cum omnibus copiis, et
 Hasdrubal Gisgonis filius, tertius Karthaginiensium
 dux, cum exercitu justo advenit : contraque castra
 Romana trans fluvium omnes consedere. P. Scipio,
 cum expeditis clam profectus ad loca circa visenda,
 haud fecellit hostes : obpressissentque eum in paten-
 tibus campis, ni tumulum in propinquo cepisset : ibi
 quoque circumcessus adventu fratris obsidione exi-
 huitur. Castulo urbs Hispaniæ valida ac nobilis, et
 adeo conjuncta societate Pœnis, ut uxor inde Han-
 nibali esset, ad Romanos defecit. Karthaginienses
 Illiturgin obpugnare adorti, quia præsidium ibi Ro-
 manum erat : videbanturque inopia eum locum ma-
 xime expugnaturi. Cn. Scipio, ut sociis præsidioque
 ferret opem, cum legione expedita profectus, inter
 bina castra cum magna cæde hostium urbem est in-
 gressus, et postero die eruptione æque felici pugna-
 vit. Supra duodecim millia hominum cæsa duobus
 præliis : plus mille capti, cum sex et triginta mili-

taribus signis: ita ab Illiturgi recessum est. Bi- U.C. 538.
gerra inde urbs (socia et hæc Romanorum erat) a A.C. 214.
Karthaginiensibus obpugnari cœpta est. Eam ob-
sitionem sine certamine adveniens Cn. Scipio solvit.

XLII. Ad Mundam exinde castra Punica mota: Ter victo-
res Roma-
et Romani eo confestim secuti sunt. Ibi signis con- ni.
latis pugnatum per quatuor ferme horas: egregieque
vincentibus Romanis signum receptui est datum,
quod Cn. Scipionis femur tragula confixum erat:
pavorque circa eum ceperat milites, ne mortiferum
esset vulnus. Ceterum haud dubium fuit, quin, nisi
ea mora intervenisset, castra eo die Punica capi po-
tuerint: jam non milites solum, sed elephanti etiam
usque ad vallum acti erant, superque ipso novem et
triginta elephanti pilis confixi. Hoc quoque prælio
ad duodecim millia hominum dicuntur cæsa, prope
tria capta, cum signis militaribus septem et quin-
quaginta. Ad Auringen inde urbem Pœni recessere;
et, ut territis instaret, secutus Romanus. Ibi iterum
Scipio lecticula in aciem inlatus conflixit: nec dubia
victoria fuit: minus tamen dimidio hostium, quam
antea, quia pauciores superfuerant, qui pugnarent,
occisum. Sed gens nata instaurandis reparandisque
bellis, Magone ad conquisitionem militum fratre
missō, brevi replevit exercitum, animosque ad ten-
tandum de integro certamen fecit. Alii plerique
milites, sicut pro parte toties intra paucos dies victa,
iisdem animis, quibus prius, eodemque eventu pug-
navere: plus octo millia hominum cæsa: haud multo
minus quam mille captum, et signa militaria quiu-
quaginta octo; et spolia plurima Gallica fuere, au-
rei torques, armillæque, magnus numerus: duo etiam
insignes reguli Gallorum (Mœnicapto et Civismaro

U. C. 538. nomina erant) eo prælio ceciderunt: octo elephanti
 A. C. 21⁴ capti, tres occisi. Quum jam res prosperæ in Hispania
 Saguntum nia essent, verecundia Romanos tandem cepit, Sa-
 receptum guntnm oppidum, quæ caussa belli esset, octavum
 a Roma-
 nis. jam annum sub hostium potestate esse. Itaque id
 oppidum, vi pulso præsidio Punico, receperunt, cul-
 toribusque antiquis, quos vis reliquerat belli, resti-
 tuerunt: et Turdetanos, qui contraxerant eis cum
 Karthaginiensibus bellam, in potestatem redactos
 sub corona vendiderunt, urbemque eorum dele-
 vere.

Censori-
 bus dies
 dicta ad
 populum.

XLIII. Hæc in Hispania, Q. Fabio, M. Claudio
 cœsalibus, gesta. Romæ quum tribuni plebis novi
 magistratum inissent, exemplo censoribus, P. Furio
 et M. Atilio, a L. Metello tribuno plebis dies dicta
 ad populum est: quæstorem eum proximo anno, ad-
 emto equo, tribu moverant, atque ærarium fecerant,
 propter conjurationem deserendæ Italæ ad Cannas
 factam: sed novem tribunorum auxilio vetiti causam
 in magistratu dicere, dimissique fuerant. Ne
 lustrum perficerent, mors prohibuit P. Furii. M.
 Atilius magistratu se abdicavit. Consularia comitia
 habita a Q. Fabio Maximo consule: creati consules
 ambo absentes, Q. Fabius Maximus consulis filius, et
 Ti. Sempronius Graecchus iterum. Prætores sunt
 M. Atilius, et, qui tum ædiles curules erant, P. Sem-
 pronius Tuditianus, et Cn. Fulvius Centumalus, et
 M. Æmilius Lepidus. Ludos scenicos per quadri-
 dum eo anno primum factos ab curulibus ædilibus,
 memoriae proditur. Ædilis Tuditianus hic erat, qui
 ad Cannas, pavore aliis in tanta clade torpentibus,
 per medios hostes evasit. Comitiis perfectis, aue-
 tore Q. Fabio consule, designati consules Romani

arcessiti magistratum inierunt: senatumque de belo ac provinciis suis prætorumque, et de exercitibus, quibus quique præessent, consuluerunt.

XLIV. Itaque provinciæ atque exercitus divisi. U. C. 538.
Bellum cum Hannibale consulibus mandatum, et A. C. 213.
exercituum unus, quem ipse Sempronius habuerat; rum divi-
alter, quem Fabius consul: eae binæ erant legiones.
Provincia-
sio.
M. Æmilius prætor, cuius peregrina sors erat, juris-
dictione M. Atilio collegæ prætori urbano maudata,
Luceriam provinciam haberet, legionesque duas,
quibus Q. Fabius, qui tum consul erat, prætor præ-
fuerat. P. Sempronio provincia Ariminum, Cn. Ful-
vio Suessula, cum binis item legionibus, evenerunt:
ut Fulvius urbanas legiones duceret, Tuditanus a
M. Pomponio acciperet. Prorogata imperia pro-
vinciaeque, M. Claudio Sicilia finibus eis, quibus
regnum Hieronis fuisse: Lentulo proprætori pro-
vincia vetus: T. Otacilio classis: exercitus nulli ad-
diti novi. M. Valerio Græcia Macedoniaque cum
legione et classe, quam haberet: Q. Mucio cum ve-
tore exercitu (duæ autem legiones erant) Sardinia:
C. Terentio legio una, cui jam præerat, et Pi-
cenum. Scribi præterea duæ legiones urbanæ jussæ,
et viginti millia sociorum. His ducibus, his copiis,
adversus multa simul, aut mota aut suspecta bel-
la, munierunt Romanum imperium. Consules, dua-
bus urbanis legionibus scriptis, supplementoque
in alias lecto, priusquam ab urbe moverent, prodi- Prodigia.
gia procurarunt, quæ nunciata erant. Murus ac
portæ tactæ, et Ariciæ etiam Jovis ædes de cœlo
tacta fuerat. Et alia ludibria oculorum auriumque
credita pro veris: navium longarum species in flu-
mine Tarracinae, quæ nullæ erant, visæ; et in Jovis

U.C. 539. Vicilini templo, quod in Compsano agro est, arma
 A.C. 213. concrepuisse: et flumen Amiterni cruentum fluxisse.

Fabius pater a filio descendere equo ius-
 sus.

His procuratis ex decreto pontificum, profecti consules, Sempronius in Lucanos, in Apuliam Fabius. Pater filio legatus ad Suessulam in castra venit: quum obviam filius progrederetur, lictoresque verecundia majestatis ejus taciti anteirent; præter undecim fasces equo prævectus senex, ut consul animadvertere proximum lictorem jussit, et is, ut descendederet ex equo, inclamavit; tum demum desiliens, *Experiri, inquit, volui, fili, satin' scires, consulem te esse.*

Altinius Arpinus venit ad eos.

XLV. In ea castra Dasius Altinius Arpinus clam nocte cum tribus servis venit, promittens, si sibi præmio foret, se Arpos proditurum esse. Quum eam rem ad consilium retulisset Fabius, aliis *pro transfuga verberandus necandusque videri, ancipitis animi communis hostis: qui post Cannensem cladem, tamquam cum fortuna fidem stare oporteret, ad Hannibalem discessisset, traxissetque ad defectionem Arpos;* quumque res Romana contra spem votaque ejus velut resurgeret, turpius videatur novam referre proditionem proditis olim: qui aliunde stet semper, aliunde sentiat, infidus socius, vanus hostis; *ad Faleriorum Pyrrhive proditorem tertium transfugis documentum esset.* Contra ea consulis pater Fabius, *temporum oblitos homines, in medio ardore belli, tamquam in pace, libera de quoque arbitria agere, aiebat: Qui, quum illud potius agendum atque eis cogitandum sit, si quo modo fieri possit, ne qui socii a populo Romano desciscunt, id non cogitent; documentum autem dicant statui oportere, si quis resipiscat, et antiquam societatem respiciat.* Quod si abire ab Romanis liveat, redire ad eos non liceat;

*cui dubium esse, quin brevi deserta ab sociis Romana U.C. 539.
res, fæderibus Punicis omnia in Italia juncta visura
sit? Se tamen non eum esse, qui Altinio fidei quidquam
censeat habendum, sed medium consecuturum consili
viam: neque eum pro hoste, neque pro socio in præsen
tia habitum, libera custodia haud procul a castris pla
cere in aliqua fila civitate servari per belli tempus:
perpetrato bello, tum consultandum, utrum defectio
prior plus merita sit pænæ, an hic redditus veniæ. Fa
bio adsensum est: catenisque ligatus, traditur et
ipse et comites: et auri satis magnum pondus, quod
secum tum adtulerat, ei servari jussum. Calibus
eum interdiu solutum custodes sequebantur: nocte
clansum adservabant. Arpis domi primum deside
rari quærique est cœptus: dein fama, per totam ur
bem vulgata, tumultum, ut principe amisso, fecit:
metuque rerum novarum extemplo nuncii ad Hanni
balem missi. Quibus nequaquam obfensus Pœnus,
quia et ipsum, ut ambiguæ fidei virum, suspectum
jam pridem habebat, et caussam nactus erat tam di
litis hominis bona possidendi vendendique; ceterum
ut iræ magis, quam avaritiæ, datum crederent homi
nes, crudelitati quoque gravitatem addidit: conju
gemque ejus ac liberos in castra adcitos, quæstione
prius habita, primum de fuga Altinii, dein quantum
auri argentique domi relictum esset, satis cognitis
omnibus, vivos combussit.*

XLVI. Fabius, ab Suessula profectus, Arpos pri
mum instituit obpugnare: ubi quum a quingentis fere Arpos reci
passibus castra posuisset, contemplatus ex propinquo pit Fabius
situm urbis mœniaque, quæ pars tutissima mœnibus
erat, qua maxime neglectam custodiā vidit, ea po
tissimum adgredi statuit. Comparatis omnibus, quæ

U. C. 539. ad urbes obpugnandas usui sunt, centurionum robora ex toto exercitu delegit, tribunosque viros fortes eis præfecit, et milites sexcentos, quantum satis visum est, adtribuit: cosque, ubi quartæ vigiliae signum cecinisset, ad eum locum scalas jussit ferre. Porta ibi humilis et angusta erat, via infrequenti per desertam partem urbis: eam portam scalis prius transgressos ad murum pergere, et ex interiore parte vi claustra refringere jubet, et tenentes partem urbis cornu signum dare, ut ceteræ copiæ admoverentur: parata omnia atque instructa sese habiturum. Ea in pigre facta: et, quod impedimentum agentibus fore videbatur, id maxime ad fallendum adjuvit: imber, ab nocte media coortus, custodes vigilesque, dilapsos e stationibus, subfugere in tecta coëgit: sonituque primo largioris procellæ strepitum molientium portam exaudiri prohibuit; lentior deinde æqualiorque accidens auribus magnam partem hominum sopivit. Postquam portam tenuerunt, cornicines in via paribus intervallis dispositos canere jubent, ut consulem excirent. Id ubi factum ex compagno est, signa efferri consul jubet, ac paullo ante lucem per effractam portam urbem ingreditur.

XLVII. Tum demum hostes excitati sunt, jam et imbre conquiescente, et propinqua luce. Præsidium in urbe erat Hannibal, quinque millia ferme armatorum: et ipsi Arpini tria millia hominum armabant: eos primos Pœni, ne quid ab tergo fraudis esset, hosti obposuerunt. Pugnatum primo in tenebris angustisque viis est: quum Romani non vias tantum, sed tecta etiam proxima portæ, occupassent, ne peti superne ac vulnerari possent. Cogniti inter se quidam Arpinique et Romani; atque inde conlo-

quia cœpta fieri, percunctantibus Romanis, quid sibi U.C. 539.
 vellent Arpini? quam ob noxam Romanorum, quod A.C. 213.
 aut meritum Pœnorum, pro alienigenis ac barbaris,
 Italici adversus veteres socios Romanos bellum ge-
 rerent, et veerigalem ac stipendiariam Italianam Africæ
 facerent? Arpinis purgantibus, ignaros omnium se
 venum a principibus datos Pœno, captos obpresso-
 que a paucis esse. Initio orto, plures cum pluribus
 conloqui: postremo prætor Arpinus ab suis ad con-
 sulem deductus; fideque data inter signa aciesque,
 Arpini repente pro Romanis adversus Karthaginien-
 sem arma verterunt. Hispani quoque, paullo minus
 mille homines, nihil præterea cum consule pacti,
 quam ut sine fraude Punicum emitteretur præsidium,
 ad consulem transtulerunt signa. Karthaginiensibus
 portæ patefactæ, emissique cum fide incolumes ad
 Hannibalem Salapiam venerunt. Arpi sine clade
 ullius, præterquam unius veteris proditoris, novi
 perfugæ, restituti ad Romanos. Hispanis duplia
 cibaria dari jussa: operaque eorum forti ac fideli
 persæpe respublica usa est. Quum consul alter in
 Apulia, alter in Lucanis esset; equites centum duo-
 decim nobiles Campani, per speciem prædandi ex Campani
 hostium agro, permisso magistratum ab Capua pro-
 fecti, ad castra Romana, quæ super Suessulam erant, equites cen-
 venerunt: stationi militum, qui essent, dixerunt; tū
 conloqui sese cum prætore velle. Cn. Fulvius cas-
 tris præerat: cui ubi nunciatum est, decem ex eo
 numero jussis inermibus deduci ad se, ubi, quæ pos-
 tularent, audivit, (nihil autem aliud petebant, quam
 ut, Capua recepta, bona sibi restituerentur) in fidem
 omnes accepti. Et ab altero prætore Sempronio
 Tuditano oppidum Aternum expugnatum: amplius

U. C. 539. septem millia hominum capta, et æris argentique
 A. C. 213. signati aliquantum. Romæ fœdum incendium per
 Romæ in- cendium. duas noctes ac diem unum tenuit: solo æquata om-
 nia inter Salinas ac portam Carinentalem, cum Æ-
 quimælio Jugarioque vico: in templis Fortunæ ac
 matris Matutæ et Spei extra portam, late vagatus
 ignis sacra profanaque multa absumsit.

Res in
Hispania
gestæ.

Legati ad
Syphacem
missi a
Scipioni-
bus.

XLVIII. Eodem anno P. et Cn. Cornelii, quum
 in Hispania res prosperæ essent, multosque et ve-
 teres reciperen socios, et novos adjicerent, in Afri-
 cam quoque spem extenderunt. Syphax erat rex
 Numidarum, subito Karthaginiensibus hostis fac-
 tus: ad eum centuriones tres legatos miserunt, qui
 cum eo amicitiam societatemque facerent; et polli-
 cerentur, si perseveraret urgere bello Karthaginien-
 ses, gratam eam rem fore senatui populoque Roma-
 no, et adnisuros, ut in tempore, et bene cumulatam
 gratiam referant. Grata ea legatio barbaro fuit:
 conlocutusque cum legatis de ratione belli gerundi,
 ut veterum militum verba audivit, quam multarum
 rerum ipse ignarus esset, ex comparatione tam or-
 dinatæ disciplinæ, animum advertit. Tum, primum
 ut pro bonis ac fidelibus sociis facerent, oravit, ut
duo legationem referrent ad imperatores suos; unus apud sese magister rei militaris remaneret: rudem ad pedestria bella Numidarum gentem esse, equis tantum habilem. Ita jam inde a principiis gentis majores suos bella gessisse, ita se a pueris insuetos. Sed habere hostem pedestri fidentem Marte: cui si æquari robore virium relit, et sibi pedites comparandos esse; et ad id multitudine hominum regnum abundare: sed armandi, ornandique et instruendi eos artem ignorare: omnia, velut forte congregata turba, vasta ac temeraria esse.

Facturos se in præsentia, quod vellet, legati respon- U. C. 539.
derunt: fide accepta, ut remitteret extemplo eum, si A. C. 213.
imperatores sui non comprobassent factum. Q. Sta-
torio nomen fuit, qui ad regem remansit. Cum duo-
bus Romanis reliquis Numida legatos in Hispaniam
misit ad accipiendam fidem ab imperatoribus Roma-
nis: iisdem mandavit, ut protinus Numidas, qui in-
tra præsidia Karthaginiensium auxiliares essent, ad
transitionem perlicerent. Et Statorius ex multa ju-
ventute regi pedites conscripsit: ordinatosque pro-
xime morem Romanum, instruendo et decurrente
signa sequi, et servare ordines docuit: et operi aliis-
que justis militaribus ita adsuefecit, ut brevi rex
non equiti magis fideret, quam pediti; conlatisque
æquo campo signis, justo prælio Karthaginiensem
hostem superaret. Romanis quoque in Hispania
legatorum regis adventus magno emolumento fuit:
namque ad famam eorum transitiones crebræ ab Nu-
midis cœptæ fieri. Ita cum Syphace Romanis juncta
amicitia est. Quod ubi Karthaginienses acceperunt,
extemplo ad Galam, in parte altera Numidiae (Mas-
syli ea gens vocatur) regnantem, legatos mittunt.

XLIX. Filium Gala Masinissam habebat, septem Karthagi-
et decem annos natum, ceterum juvenem ea indole, nienses
ut jam tum adpareret, latius regnum opulentiusque, cum Gala
quam accepisset, facturum. Legati, quoniam *Syphax* ciunt.
se Romanis junxisset, ut potentior societate eorum ad-
versus reges populosque Africæ esset, docent; melius
fore Galæ quoque, Karthaginiensibus jungi quam pri-
*mum, antequam *Syphax* in Hispaniam, aut Römani in*
*Africam transeant; obprimi *Syphacem*, nihil dūm præ-*
ter nomen ex fædere Romano habentem, posse. Facile Masinissa
persuasum Galæ, filio deoscente id bellum, ut exer- Galæ filius
Syphacem
vincit.

U. C. 539. citum mitteret: qui, Karthaginiensium legionibus
 A. C. 213. conjunctis, magno proelio Syphacem devicit. Triginta millia eo proelio hominum caesa dicuntur. Syphax cum paucis equitibus in Maurusios ex acie Numidas (extremi prope oceanum adversus Gades colunt) refugit: adfluentibusque ad famam ejus undique barbaris, ingentes brevi copias armavit: cum quibus antequam in Hispaniam angusto diremtam freto trajiceret, Masinissa cum victore exercitu advenit: isque ibi cum Syphace ingenti gloria per se, sine ullis Karthaginiensium opibus, gessit bellum. In Hispania nihil memorabile gestum, preterquam quod Celtiberum juventutem eadem mercede, qua pacta cum Karthaginiensibus erat, imperatores Romani ad se perduxerunt: et nobilissimos Hispanos supra trecentos in Italiam ad sollicitandos populares, qui inter auxilia Hannibal erant, miserunt. Id modo ejus anni in Hispania ad memoriam insigne est, quod mercenarium militem in castris neminem ante, quam tum Celtiberos, Romani habuerunt.

Celtiberi
 primi
 mercede
 militant
 apud Ro-
 manos.

EPITOME LIBRI XXV.

P. CORNELIUS SCIPIO, postea Africanus, ante annos ædilis factus est. Hannibal urbem Tarentum, præter arcem, in quam præsidium Romanorum fugerat, per Tarentinos juvenes, qui se noctu renatum ire simulaverant, cepit. Ludi Apollinares ex Marcii carminibus, quibus Cannensis clades prædicta fuerat, instituti sunt. A Q. Fulvio et Ap. Claudio consulibus adversus Hannonem Pænorum ducem prospere pugnatum est. T. Sempronius Gracchus proconsul, ab hospite suo Lucano in insidias deductus, a Magone imperfectus est. Centenius Penula, qui centurio militaverat, quum petisset a senatu, ut sibi exercitus daretur, pollicitusque esset, si hoc inpetrasset, de Hannibale victoriam, octo millibus acceptis, militum dux factus, confixit acie cum Hannibale, et cum exercitu cæsus est. Cn. Fulvius prætor male adversus Hannibalem pugnavit: in quo prælio hominum sexdecim millia ceciderunt: ipse cum equitibus ducentis effugit. Capua obsessa est a Q. Fulvio et Ap. Claudio consulibus. Claudius Marcellus Syracusas expugnavit anno tertio, et ingentem se virum gessit: in eo tumultu urbis captæ Archimedes, intentus formis, quas in pulvere descripscerat, imperfectus est. P. et Cn. Scipiones in Hispania tot tantarumque rerum feliciter gestarum tristem exitum tulerunt: prope cum totis exercilibus cæsi anno octavo, quam in

Hispaniam iverant: amissaque ejus provinciæ possessio foret, nisi L. Marci equitis Romani virtute et industria, contractis exercituum reliquiis, ejusdem hortatu, bina castra hostium expugnata essent. Ad triginta septem millia cæsa, ad mille octingentos triginta capti, præda ingens parta. Dux Marcius adpellatus est.

T. LIVII PATAVINI

LIBER XXV.

DUM hæc in Africa atque in Hispania geruntur, U. C. 539.
Hannibal in agro Tarentino æstatem consum- A. C. 213.
sit, spe per proditionem urbis Tarentinorum potiun- Hannibal
dæ: ipsorum interim Sallentinorum ignobiles urbes ad Taren-
ad eum defecerunt. Eodem tempore in Bruttii ex tum-
duodecim populis, qui anno priore ad Pœnos descive-
rant, Consentini et Thurini in fidem populi Romani
redierunt. Et plures rediissent, ni T. Pomponius Vei-
entanus præfектus sociūm, prosperis aliquot popula-
tionibus in agro Bruttio justi ducis speciem nactus,
tumultuario exercitu coacto, cum Hannone conflixis-
set. Magna ibi vis hominum, sed inconditæ turbæ
agrestium servorumque, cæsa aut capta est: mini-
mumque jacturæ fuit, quod præfектus inter ceteros
est captus, et tum temerariæ pugnæ auctor, et ante
publicanus, omnibus malis artibus et reipublicæ et
societatibus infidus damnosusque. Sempronius con-
sul in Lucanis multa prœlia parva, haud ullum dig-
num memoratu, fecit: et ignobilia oppida Lucano-
rum aliquot expugnavit. Quo diutius trahebatur Supersticio-
bellum, et variabant secundæ adversæque res non fortunam magis, quam animos, hominum; tanta re-
ligio, et ca magna ex parte externa, civitatem in-
cessit, ut aut homines, aut Dii repente alii videren-
tes Romæ exortæ.

U. C. 539. tur facti: nec jam in secreto modo atque intra pa-
A. C. 213. rietes abolebantur Romani ritus; sed in publico etiam ac foro Capitolioque mulierum turba erat, nec sacrificantium, nec precantium Deos patrio more. Sacrificuli ac vates ceperant hominum mentes: quorum numerum auxit rustica plebs, ex incultis diutino bello infestisque agris egestate et metu in urbem compulsa; et quæstus ex alieno errore facilis, quem velut ex concessæ artis usu exercebant. Primo secretæ bonorum indignationes exaudiebantur, deinde ad Patres etiam et ad publicam querimoniam excessit res. Incusati graviter ab senatu ædiles triumvirique capitales, quod non prohiberent, quum emovere eam multitudinem e foro, ac disjicere adparatus sacrorum conati essent, haud procul afuit, quin violarentur. Ubi potentius jam esse id malum adparuit, quam ut minores per magistratus sedaretur, M. Atilio prætori urbis negotium ab senatu datum est, ut his religionibus populum liberaret. Is et in con-
Coërcitæ
a senatu. cione senatusconsultum recitavit, et edixit, *Ut, qui-
cumque libros vaticinos precationesve, aut artem sacri-
fandi conscriptam haberet, eos libros omnes literasque
ad se ante Kalendas Apriles deferret: neu quis, in
publico sacrore loco, novo aut externo ritu sacri-
caret.*

II. Et aliquot publici sacerdotes mortui eo anno sunt: L. Cornelius Lentulus pontifex maximus, et C. Papirius C. F. Maso pontifex, et P. Furius Philus augur, et C. Papirius L. F. Maso decemvir sacrorum. In Lentuli locum M. Cornelius Cethegus, in Papirii Cn. Servilius Cæpio, pontifices subfecti sunt: augur creatus L. Quintius Flamininus, decemvir sacrorum L. Cornelius Lentulus. Comitiorum consularium

jam adpetebat tempus; sed, quia consules a bello U. C. 530.
 intentos avocare non placebat, Ti. Sempronius con- A. C. 213.
 sul comitiorum caussa dictatorem dixit C. Claudium
 Centhonem: ab eo magister equitum est dictus Q.
 Fulvius Flaccus. Dictator primo comitiali die crea-
 vit consules Q. Fulvium Flaceum, magistrum equi-
 tum, et Ap. Claudium Pulchrum, cui Sicilia pro-
 vincia in prætura fuerat. Tum prætores creati Cn:
 Fulvius Flaccus, C. Claudius Nero, M. Junius Sila-
 nus, P. Cornelius Sulla. Comitiis perfectis, dictator
 magistratu abiit. Ædilis curulis fuit eo anno cum
 M. Cornelio Cethego P. Cornelius Scipio, cui post P. Cornelii-
 Africano fuit cognomen: huic petenti ædilitatem us Scipio
 quum obsisterent tribuni plebis, negantes rationem
 ejus habendam esse, quod nondum ad petendum le-
 gitima ætas esset: *Si me, inquit, omnes Quirites ædi-
 lem facere volunt, satis annorum habeo.* Tanto iude
 favore ad suffragium ferendum in tribus discursum
 est, ut tribuni repente incepto destiterint. Ædi-
 litia largitio hæc fuit. Ludi Romani pro temporis
 illius copiis magnifice facti, et diem unum instaurati,
 et congii olei in vicos singulos dati. L. Villius Tap-
 pulus et M. Fundanius Fundulus, ædiles plebeii, ali-
 quot matronas apud populum probri accusarunt:
 quasdam ex eis damnatas in exsiliū egerunt. Lu-
 di plebeii per biduum instaurati; et Jovis epulum
 fuit ludorum caussa.

III. Q. Fulvius Flaccus tertium, Ap. Claudius U. C. 540.
 consulatum ineunt. Et prætores provincias sortiti A. C. 212.
 sunt; P. Cornelius Sulla urbanam et peregrinam,
 quæ duorum ante sors fuerat, Cn. Fulvius Flaccus
 Apuliam, C. Claudius Nero Suessulam, M. Junius
 Silanus Tuscos. Consulibus bellum cum Hannibale

U. C. 540. et binæ legiones decretæ: alter a Q. Fabio superiore
 A. C. 21². anni consule, alter a Fulvio Centumalo acciperet.

Prætorum, Fulvii Flacci, quæ Luceriacæ sub Æmilio prætore; Neronis Claudii, quæ in Piceno sub C. Terentio fuissent, legiones essent: supplementum in eas quisque scribebat sibi. M. Junio in Tuscos legiones urbanæ prioris anni datae. Ti. Sempronio Graccho et P. Sempronio Tuditano imperium provinciæque Lucani et Galliæ cum suis exercitibus prorogatae: item P. Lentulo, qua vetus provincia in Sicilia esset; M. Marcello Syracusæ, et qua Hieronis regnum fuisset: T. Otacilio classis: Græcia M. Valerio: Sardinia Q. Mucio Scævolæ: Hispaniæ P. et Cn. Corneliis. Ad veteres exercitus duæ urbanæ legiones a consulibus scriptæ, summaque trium et viginti legionum eo anno effecta est. Delectum consulum M. Postumii Pyrgensis cum magno prope motu rerum factum impediit. Publicanus erat Postumius, qui multis annis parem fraudem avaritiaque neminem in civitate habuerat, præter T. Pomponium Veientanum, quem, populantem temere agros in Lucanis, ductu Hannonis priore anno ceperant Karthaginienses. Hi, quia publicum periculum erat a vi tempestatis in iis, quæ portarentur ad exercitus, et ementiti erant falsa naufragia, et ea ipsa, quæ vera renunciaverant, fraude ipsorum facta erant, non casu: in veteres quassasque naves paucis et parvi pretii rebus inpositis, quum mersissent eas in alto, exceptis in præparatas scaphas nautis, multiplices fuisse merces ementiebantur. Ea fraus indicata M. Atilio prætori priore anno fuerat, ac per eum ad senatum delata, nec tamen ullo senatusconsulto notata: quia Patres ordinem publicanorum in

Postumii
publicani
fraus.

tali tempore obfensum nolebant. Populus severior U.C. 540.
 vindex fraudis erat; excitatique tandem duo tribuni A.C. 212.
 plebis Sp. et L. Carvillii, quum rem invisam infamemque cernerent, ducentūm millium æris multam
 M. Postumio dixerunt: cui certandæ quum dies advenisset, conciliumque tam frequens plebis adesset,
 ut multitudinem area Capitolii vix caperet; perorata caussa, spes una videbatur esse, si C. Servilius
 Casca tribunus plebis, qui propinquus cognatusque Postumio erat, prius, quam ad suffragium tribus vocarentur, intercessisset. Testibus datis, tribuni populum submoverunt; sitellaque adlata est, ut sortientur, ubi Latini suffragium ferrent. Interim publicani Cascæ instare, ut concilio diem eximeret:
 populus reclamare: et forte in cornu primus sedebat Casca, cui simul metus pudorque animum versabat. Quum in eo parum præsidii esset, turbandæ Publicano-
 rei caussa publicani per vacuum in submoto locum cuneo intruperunt, jurgantes simul cum populo tribunisque. Nec procul dimicatione res erat, quum Fulvius consul tribunis, *Nonne videtis, inquit, vos in ordinem coactos esse, et rem ad seditionem spectare, ni propere dimittitis plebis concilium?*

IV. Plebe dimissa, senatus vocatur, et consules referunt de concilio plebis turbato vi atque audacia publicanorum. *M. Furium Camillum, cuius exsiliū ruina urbis secuta fuerit, damnari se ab iratis civibus passum esse.* *Decemviros ante eum, quorum legibus ad eam diem viverent, multos postea principes civitatis, iudicium de se populi passos.* *Postumium Pyrgensem suffragium populo Romano extorsisse, concilium plebis sustulisse, tribunos in ordinem coegisse, contra populum Romanum aciem instruxisse, locum occupasse, ut tribu-*

U. C. 540. *nos a plebe intercluderet, tribus in suffragium vocari*
 A. C. 21². *prohiberet. Nihil aliud a cæde ac dimicazione continuisse*
homines, nisi patientiam magistratum, quod cesserint
in præsentia furori atque audaciæ paucorum, vincique
se ac populum Rōmanum passi sint: et comitia, quæ
reus vi atque armis prohibiturus erat, ne caussa quæ-
rentibus dimicacionem daretur, voluntate ipsius sustule-
rint. Hæc quum ab optimo quoque pro atrocitate
rei acta essent, vimque eam contra rempublicam et
perniciose exemplo factam, senatus decesset; con-
festim Carvilius tribuni plebis, omissa multæ certa-

Rei capitalis dies Postumio dicitur a tribunis plebis.

Postumio dixerunt: ac, ni vades daret, prehendi a viatore, atque in carcerem duci jussent. Postumius, vadibus datis, non adfuit. Tribuni plebem rogaverunt, plebesque ita scivit: *Si M. Postumius ante Kalendas Maias non prodisset, citatusque eo die non respondisset, neque excusatius esset, rideri eum in exsilio esse: bonaque ejus venire, ipsi aqua et igni placere interdici.* Singulis deinde eorum, qui turbæ ac tumultus concitatores fuerant, rei capitalis diem dicere, ac vades poscere cœperunt.

In exsilium ipse et alii aliquot abscent. Primo non dantes, deinde etiam eos, qui dare possent, in carcerem conjiciebant: cuius rei periculum vitantes plerique in exsilium abierunt.

V. Hunc fraus publicanorum, deinde fraudem audacia protegens, exitum habuit. Comitia inde pontifici maximo creando sunt habita. Ea comitia novus pontifex M. Cornelius Cethegus habuit. Tres ingenti certamine petierunt: Q. Fulvius Flaccus consul, qui et ante bis consul et censor fuerat: et T. Manlius Torquatus, et ipse duobus consulatibus et censura insignis: et P. Licinius Crassus, qui et aedilitatem curulem petiturus erat: hic senes honoratos-

P. Lici-
nius
Pontifex

que juvenis in eo certamine vicit. Ante hunc, intra U.C. 540.
 centum annos et viginti, nemo præter P. Cornelium A.C. 212.
 Calussam, pontifex maximus creatus fuerat, qui sel- Maximus
 la curuli non sedisset. Consules quum ægre delec- ante ædili-
 tum conficerent, quod inopia juniorum non facile in tatem.
 utrumque, ut et novæ urbanæ legiones, et supple- Delectuum
 mentum veteribus scriberetur, subfaciebat; senatus difficultas.
absistere eos incepto vetuit, et triumviro bino creari
jussit: alteros, qui citra, alteros, qui ultra quinquage-
simum lapidem in pagis, forisque, et conciliabulis om-
nem copiam ingenuorum inspicerent: et, si qui roboris
satis ad ferenda arma habere viderentur, etiamsi non-
dum militari ætate essent, milites facerent. Tribuni
plebis, si iis videretur, ad populum ferrent, ut, qui mi-
nores septem et decem annis sacramento dixissent, iis
perinde stipendia procederent, ac si septem et decem an-
norum, aut majores, milites facti essent. Ex hoc se-
natusconsulto creati triumviri bini conquisitionem
ingenuorum per agros habuerunt. Eodem tempore Legati Can-
ex Sicilia literæ M. Marcelli de postulatis militum, nensis ex-
qui cum P. Lentulo militabant, in senatu recitatæ Marcell-
sunt. Cannensis reliquæ cladis hic exercitus erat, lum.
relegatus in Siciliam, sicut ante dictum est, ne ante
Punici bellii finem in Italiam reportaretur.

VI. Hi permissu Lentuli primores equitum centu-
 rionumque, et robora ex legionibus peditum, legatos
 in hiberna ad M. Marcellum miserunt, e quibus unus,
 potestate dicendi facta, *Consulem, inquit, te, M. Mar-* Eorum ora-
celle, in Italiam adissemus, quum primum de nobis, etsi ^{tio.}
non iniquum, certe triste senatusconsultum factum est;
nisi hoc sperassemus, in provinciam nos morte regum
turbatam ad grave bellum adversus Siculos simul Pœ-
nosque mitti: et sanguine nostro vulneribusque nos se-

U.C. 540. *natui satisfacturos esse: sicut patrum memoria, qui*
A.C. 212. *capti a Pyrrho ad Heracleam erant, adversus Pyrrhum ipsum pugnantes satisfecerunt. Quamquam quod ob meritum nostrum succensuistis, Patres conscripti, nobis, aut succensetis? Ambo mihi consules et universum senatum intueri videor, quum te, M. Marcelle, intueor: quem si ad Cannas consulem habuissemus, melior et reipublicæ et nostra fortuna esset. Sine, quæso, priusquam de conditione nostra queror, noxam, cuius arguimus, nos purgare. Si non Deûm ira, nec fato, cuius lege immobilis rerum humanarum ordo seritur, sed culpa periiimus ad Cannas, cuius tandem ea culpa fuit? militum, an imperatorum? Evidem miles nihil umquam dicam de imperatore meo, cui præsertim gratias sciam ab senatu actas, quod non desperaverit de republica; cui post fugam ab Cannis per omnes annos prorogatum imperium. Ceteros item ex reliquis clades ejus, quos tribunos militum habuimus, honores petere et gerere, et provinciis obtainere audivimus. An vobis restisque liberis ignoscitis facile, Patres conscripti, in hæc vilia capita sævi? et consuli primoribusque aliis civitatis fugere, quum spes alia nulla esset, turpe non fuit; milites utique morituros in aciem misistis? Ad Alliam prope omnis exercitus fugit: ad Furculas Caudinas, ne expertus quidem certamen, arma tradidit hosti, ut alias pudendas clades exercituum taceam: tamen tantum afuit ab eo, ut ulla ignominia iis exercitibus quæreretur, ut et urbs Roma per eum exercitum, qui ab Allia Veios transfugerat, reciperaretur; et Caudinæ legiones, quæ sine armis redierant Romam, armatæ remissæ in Samnium, eundem illum hostem sub jugum miserint, qui hac sua ignominia lætatus fuerat. Cannensem vero quisquam exercitum fugæ aut pavoris insimulare potest,*

ubi plus quinquaginta millia hominum ceciderunt? unde U. C. 540.
 consul cum equitibus septuaginta fugit? unde nemo su- A. C. 212.
 perest, nisi quem hostis cædendo fessus reliquit? Quum
 captivis redemptio negabatur, nos vulgo homines lauda-
 bant, quod reipublicæ nos reservassemus: quod ad con-
 sulem Venusiam redissemus, et speciem justi exercitus
 fecissemus. Nunc deteriore conditione sumus, quam
 apud patres nostros fuerant captivi: quippe illis arma
 tantum atque ordo militandi, locusque, in quo tenderent
 in castris, est mutatus: quæ tamen, semel navata rei-
 publicæ opera, et uno felici prælio, recuperarunt. Ne-
 mo eorum relegatus in exsilium est: nemini spes eme-
 rendi stipendia ademta: hostis denique est datus, cum
 quo dimicantes, aut vitam semel, aut ignominiam fini-
 rent. Nos, quibus (nisi quod commisimus, ut quisquam
 ex Cannensi acie miles Romanus superasset) nihil objici
 potest, non solum a patria procul Italiaque, sed ab hoste
 etiam, relegati sunus: ubi senescamus in exsilio, ne qua
 spes, ne qua occasio abolendæ ignominiæ, ne qua pla-
 candæ civium iræ, ne qua denique bene moriendi sit.
 Neque ignominiae finem, nec virtutis præmium petimus;
 modo experiri animum, et virtutem exercere liceat: la-
 borem et periculum petimus, ut virorum, ut militum of-
 ficio fungamur. Bellum in Sicilia jam alterum annum
 ingenti dimicazione geritur: urbes alias Pœnus, alias
 Romanus expugnat: peditum, equitum acies concur-
 runt: ad Syracusas terra marique res geritur: clamo-
 rem pugnantium crepitumque armorum exaudimus re-
 sides ipsi ac segnes, tamquam nec manus, nec arma ha-
 beamus. Servorum legionibus T. Sempronius consul
 toties jam cum hoste signis conlatis pugnarit. Operæ
 pretium habent, libertatem civitatemque. Pro servis
 saltem ad hoc bellum emitis vobis simus: congregdi cum

U. C. 540. *hoste liceat, et pugnando querere libertatem. Vis tu-*
A. C. 212. *mari, vis terra, vis acie, vis urbibus obpugnandis experiri virtutem? asperrima quæque ad laborem periculumque deposcimus, ut, quod ad Cannas faciendum fuit, quamprimum fiat; quoniam, quidquid postea viximus, id omne destinatum ignominiæ est.*

Ad senatum rejeciuntur.

Senatus severitas.

VII. Sub hæc dicta ad genua Marcelli procubuerunt. Marcellus id nec juris, nec potestatis suæ esse dixit: senatui scripturum se, omniaque de sententia Patrum facturum esse. Hæ literæ ad novos consules addatæ, ac per eos in senatu recitatæ sunt: consultusque de his literis ita decretivit senatus: *Militibus, qui ad Cannas commilitones suos pugnantes deseruissent, senatum nihil videre, cur res publica committenda sit. Si M. Claudio proconsuli aliter videretur, faceret, quod e res publica fideque sua duceret: dum ne quis eorum munere vacaret, neu dono militari virtutis ergo donaretur, neu in Italiam reportaretur, donec hostis in terra Italia esset.* Comitia deinde a prætore urbano de senatus sententia plebisque scitu sunt habita: quibus creati sunt quinqueviri muris turribusque reficiendis: et triumviri bini; uni sacris conquirendis, donisque persignandis; alteri reficiendis ædibus Fortunæ et matris Matutinæ intra portam Carmentalem, sed et Spei extra portam, quæ priore anno incendio consunitæ fuerant. Tempestates foedæ fuere. In Albano monte biduum continenter lapidibus pluit: tacta de cœlo multa: duæ in Capitolio ædes; vallum in castris multis locis supra Suessulam, et duo vigiles examinati: murus turresque quædam Cunis non ictæ modo fulminibus, sed etiam decussæ. Reate saxum ingens visum volitare: sol rubore solito magis, sanguineoque similis. Horum

prodigiorum caussa diem unum supplicatio fuit, et U. C. 540.
per aliquot dies consules rebus divinis operam dede- A. C. 212.
runt: et per eosdem dies saerum novemdiale fuit.

Quum Tarentinorum defectio jam diu et in spe Han- Obsides Ta-
nibali, et in suspicione Romanis esset, caussa forte rentini Ro-
extrinsecus maturandæ ejus intervenit. Phileas ma fugiunt.
Tarentinus, diu jam per speciem legationis Romæ quum
esset, vir inquieti animi, et minime otium, quo tum
diutino senescere videbatur, patientis, aditum sibi ad
obsides Tarentinos invenit. Custodiebantur in atrio
Libertatis minore eura, quia nec ipsis, nec civitati
eorum fallere Romanos expediebat. Hos, crebris
conloquiis sollicitatos, corruptis ædituis duobus,
quum primis tenebris custodia eduxisset, ipse comes
occulti itineris factus profugit. Luce prima vulgata
per urbem fuga est; missique, qui sequerentur, ab
Tarracina comprehensos omnes retraxerunt: deducti
in comitio, virgisque, adprobante populo, cæsi de
saxo dejiciuntur.

VIII. Hujus atrocitas pœnæ duarum nobilissima-
rum in Italia Græcarum civitatium animos irritavit,
quum publice, tum etiam singulos privatum, ut quis-
que tam fœde interemitos aut propinquitate, aut ami- Tarentum
citia contingebat. Ex iis tredecim fere nobiles ju- Hannibali
venes Tarentini conjuraverunt, quorum princeps proditum.
Nico et Philemenus erant. Hi, prius, quam aliquid
moverent, conloquendum cum Hannibale rati, nocte
per speciem venandi urbem egressi, ad eum profici-
cuntur: et, quum haud procul castris abessent, ce-
teri silva prope viam sese oculuerunt: Nico et Phi-
lemenus, progressi ad stationes comprehensique, ul-
tro id petentes, ad Hannibalem deducti sunt. Qui
quum et caussas consilii sui, et quid pararent, expo-

U. C. 540. suissent; conlaudati, oneratique promissis, jubentur,
A. C. 212. ut fidem popularibus facerent, prædandi caussa se
 urbe egressos, pecora Karthaginiensium, quæ pas-
 tum propulsa essent, ad urbem agere: tuto ac sine
 certamine id facturos, promissum est. Conspecta
 ea præda juvenum est: minusque, iterum ac sæpius
 id eos audere, miraculo fuit. Congressi cum Han-
 nibale rursus, fide sanxerunt, liberos Tarentinos le-
 ges suaque omnia habituros, neque ullum vectigal
 Pœno pensuros, præsidiumve invitatos recepturos:
 prodita præsidia Karthaginiensium fore. Hæc ubi
 convenerunt, tunc vero Philemenus consuetudinem
 nocte egrediundi redeundique in urbem frequentio-
 rem facere: (et erat venandi studio insignis) canes-
 que et alius adparatus sequebatur; captumque ferme
 aliquid, aut ab hoste ex præparato ablatum repor-
 tando, donabat aut præfecto, aut custodibus porta-
 rum: nocte maxime commeare propter metum hos-
 tium, credebant. Ubi jam eo consuetudinis adducta
 res est, ut, quocumque noctis tempore sibilo dedis-
 set signum, porta aperiretur, tempus agendæ rei
 Hannibali visum est. Tridui viam aberat: ubi,
 quo minus mirum esset, uno eodemque loco stativa
 eum tamdiu habere, ægrum simulabat. Romanis
 quoque, qui in præsidio Tarenti erant, suspecta esse
 jam segnis mora ejus desierat.

IX. Ceterum postquam Tarentum ire constituit,
 decem millibus peditum atque equitum, quos in ex-
 peditione velocitate corporum ac levitate armorum
 aptissimos esse ratus est, electis, quarta vigilia noc-
 tis signa movit: præmissisque octoginta fere Numi-
 dis equitibus præcepit, ut discurrerent circa vias,
 perlustrarentque omnia oculis, ne quis agrestium

procul spectator agminis falleret; prægressos retraherent, obvios occiderent, ut prædonum magis, ^{U. C. 540.} A. C. 212. quam exercitus, adcolis species esset: ipse, raptim agmine acto, quindecim fernie nullum spatio castra ab Tarento posuit: et, ne ibi quidem nunciato, quo pergerent, tantum convocatos milites monuit, via omnes irent; nec diverti quemquam, aut excedere ordinem agminis paterentur, et in primis intenti ad imperia accipienda essent; neu quid nisi ducum iussu facerent: se in tempore editurum, quæ vellet agi. Eadem ferme hora Tarentum fama pervenerat, Numidas equites paucos populari agros, terroremque late agrestibus injecisse. Ad quem nuncium nihil ultra motus præfectus Romanus, quam ut partem equitum postero die luce prima juberet exire ad arcendum populationibus hostem: in cetera adeo nihil ob id intenta cura est, ut contra pro argumento fuerit illa procursatio Numidarum, Hannibalem exercitumque castris non movisse. Hannibal concubia nocte movit: dux Philemenus erat, cum solito captæ venationis onere: ceteri proditores ea, quæ composta erant, exspectabant. Convenerat autem, ut Philemenus, portula adsueta venationem inferens, armatos induceret: parte alia portam Temenida adiret Hannibal. Ea mediterranea regione orientem spectabat: aliquantum intra mœnia includuntur. Quum portæ adpropinquaret, editus ex composito ignis ab Hannibale est, refulsitque: idem redditum ab Nicode signum: extinctæ deinde utrimque flammæ sunt. Hannibal silentio ducebat ad portam. Nico ^{Tarentum} ex improviso adortus sopitos vigiles in cubilibus suis ^{ingreditur} Hannibal. obtruncat, portamque aperit. Hannibal cum pedi- tui agmine ingreditur, equites subsistere jubet: ut,

U.C. 540. quo res postulet, obeurrere libero campo possent.

A.C. 212. Et Philemenus portulæ parte alia, qua commeare adsuerat, adpropinquabat: nota vox ejus et familiare jam signum quum excitasset vigilem, dicentis, vix sustinere grandis bestiæ onus, portula aperitur: inferentes aprum duos juvenes secutus ipse cum expedito venatore, vigilem, incautius miraculo magnitudinis in eos, qui ferebant, versum, venabulo trajicit: ingressi deinde triginta fere armati, ceteros vigiles obtruncant, refringuntque portam proximam: et agmen sub signis confestim inrupit: inde cum silentio in forum ducti, Hannibali sese conjunxerunt. Cum duobus millibus Gallorum Pœnus, in tres divisis partes, per urbem dimittit Tarentinos, et itinera quam maxime frequentia occupare jubet: tumultu orto, Romanos, passim cædi, oppidanis parci: sed, ut fieri id posset, præcipit juvenibus Tarentinis, ut, ubi quem suorum procul vidissent, quiescere et silere, ac bono animo esse juberent.

X. Jam tumultus erat clamorque, qualis esse in capta urbe solet: sed, quid rei esset, nemo satis pro certo scire. Tarentini Romanos ad diripiendam urbem credere coortos: Romanis seditio aliqua cum fraude videri ab oppidanis mota. Præfectus primo excitatus tumultu, in portum effugit: inde, acceptus scapha, in arcem circumvehitur. Terrorem et tuba audita ex theatro faciebat: nam et Romana erat, a proditoribus ad hoc ipsum præparata: et inscienter a Græco inflata, quis, aut quibus signum daret, incertum efficiebat. Ubi inluxit, et Romanis Punica et Gallica arma cognita, tum dubitationem exemerunt: et Græci, Romanos passim cæde stratos cernentes, ab Hannibale captam urbem senserunt. Post-

quam lux certior erat, et Romani, qui cædibus su- U. C. 540.
 perfuerant, in arcem confugerant, conticescebatque A. C. 212.
 paullatim tumultus, tum Hannibal Tarentinos sine Romani in
 armis convocare jubet. Convenere omnes, præter- arcem con-
 quam qui, cedentes in arcem, Romanos ad omnem fugiunt.
 adeundam simul fortunam prosecuti fuerant. Ibi Hannibal, benigne allocutus Tarentinos, testatus-
 que, quæ præstisset civibus eorum, quos ad Trasi-
 menum aut ad Cannas cepisset, simul in dominatio-
 nem superbam Romanorum invictus, recipere se in
 domos suas quemque jussit, et foribus nomen suum
 inscribere: se domos eas, quæ inscriptæ non essent,
 signo extemplo dato, diripi jussurum. Si quis in
 hospitio civis Romani (vacuas autem tenebant do-
 mos) nomen inscripsisset, eum se pro hoste habitu-
 rum. Concione dimissa, quum titulis notatæ fore
 discrimen pacatæ ab hostili domo fecissent, signo
 dato, ad diripienda hospitia Romana passim discur-
 sum est: et fuit prædæ aliquantum.

XI. Postero die ad obpugnandam arcem ducit: quam quum et mari, quo in peninsulæ modum pars major circumluitur, præaltis rupibus, et ab ipsa urbe muro et fossa ingenti septam videret, eoque nec vi, nec operibus expugnabilem esse; ne aut se ipsum cura tuendi Tarentinos a majoribus rebus moraretur; aut in relictos sine valido præsidio Tarentinos inpetum ex arce, quum velleut, Romani facerent, vallo urbem ab arce intersepire statuit: non sine illa etiam spe, cum prohibentibus opus Romanis manum posse conseri; et, si ferocius procucurrissent, magna cæde ita adtenuari præsidii vires, ut facile per se ipsi Tarentini urbem ab iis tueri possent. Ubi cœptum opus est, patefacta repente porta,

U. C. 540. in munientes inpetum fecerunt Romani: pellique se
A. C. 212. statio passa est, quæ pro opere erat, ut successu
cresceret audacia, pluresque et longius pulsos per-
sequerentur. Tum signo dato coorti undique Pœni
sunt, quos instructos ad hoc Hannibal tenuerat;
nec sustinere inpetum Romani, sed ab effusa fuga
loci angustiæ eos, impeditaque alia opere jam cœpto,
alia adparatu operis, morabantur: plurimi in fossam
præcipitavere, occisque sunt plures in fuga, quam in
pugna. Inde et opus nullo prohibente fieri cœptum.
Fossa ingens ducta, et vallum intra eam erigitur:
modicoque post intervallo murum etiam eadem re-
gione addere parat, ut vel sine præsidio tueri se ad-
versus Romanos possent. Reliquit tamen modicum
præsidium, ut simul in faciendo muro adjuvaret:
ipse, profectus cum ceteris copiis, ad Galæsum flu-
men (quinque millia ab urbe abest) posuit castra.
Ex iis stativis regressus ad inspiciendum opus (quod
aliquantum opinione ejus celerius creverat) spem
cepit, etiam arcem expugnari posse. Et est non al-
titudine, ut cetera, tuta, sed loco plano posita, et ab
urbe muro tantum ac fossa divisa. Quum jam ma-
chinationum omni genere et operibus obpugnaretur,
missum a Metaponto præsidium Romanis fecit ani-
mum, ut nocte ex improviso opera hostium invade-
rent. Alia disjecerunt, alia igni conruperunt: isque
finis Hannibali fuit ea parte arcem obpugnandi. Re-
liqua erat in obsidione spes, nec ea satis efficax,
quia arcem tenentes, quæ in peninsula posita inmi-
net faucibus portus, mare liberum habebant: urbs
contra exclusa maritimis commeatibus, propiusque
.inopiam erant obsidentes, quam obsessi. Hannibal,
convocatis principibus Tarentinorum, omnes præ-

sentes difficultates exposuit: neque arcis tam munitæ U. C. 540.
 expugnandæ viam cernere, neque in obsidione quidquam A. C. 212.
 habere spei, donec mari potiantur hostes. Quod si
 naves sint, quibus comeatus invehi prohibeant, extem-
 plo aut abscessuros, aut dedituros se hostes. Adsentie-
 bantur Tarentini; ceterum ei, qui consilium adfer-
 ret, opem quoque in eam rem adferendam esse, cen-
 sebant. Punicas enim naves ex Sicilia aditas id posse Plaustris
 facere: suas, quæ sinu exiguo intus inclusæ essent, quum ^{naves} transfe-
 claustra portus hostis haberet, ecquem ad modum inde runtur in
 in apertum mare evasuras? Evident, inquit Hanni- ^{mare.}
 bal. Multa, quæ impedita natura sunt, consilio expe-
 diuntur. Urbem in campo sitam habetis: planæ et sa-
 tiæ latæ viæ patent in omnes partes. Via, quæ in por-
 tum per medianam urbem ad mare transmissa est, plau-
 stris transveham naves haud magna mole: et mare
 nostrum erit, quo nunc hostes potiuntur: et illinc mari,
 hinc terra circumsidebimus arcem: immo brevi, aut re-
 lictam ab hostibus, aut cum ipsis hostibus capiemus.
 Hæc oratio non spem modo effectus, sed ingentem
 etiam ducis admirationem fecit. Contracta extem-
 plo undique plastra, junctaque inter se: et ma-
 chinæ ad subducendas naves admotæ, munitumque
 iter, quo faciliora plastra minorque moles in trans-
 itu esset. Jumenta inde et homines contracti, et
 opus in pigre cœptum: paucosque post dies classis
 instructa ac parata circumvehitur arcem, et ante os
 ipsum portus anchoras jacit. Hunc statum rerum
 Hannibal Tarenti reliquit, regressus ipse in hiberna.
 Ceterum, defectio Tarentinorum utrum priore anno,
 an hoc, facta sit, in diversum auctores trahunt:
 plures propioresque ætate memoriae rerum hoc anno
 tradunt factum.

U.C. 540. XII. Romæ consules prætoresque usque ante
 A.C. 212. diem quintum Kalendas Maias Latinae tenuerunt :
 eo die perpetrato sacro in monte, in suas quisque
 provincias profiscuntur. Religio deinde nova ob-
 Marcius
 vates, et
 ejus duo
 carmina.
 jecta est ex carminibus Marcianis. Vates hic Mar-
 cius inlustris fuerat, et quum conquisitio priore an-
 no ex senatusconsulto talium librorum fieret, in M.
 Atilii prætoris urbani, qui eam rem agebat, manus
 venerant : is protinus novo prætori Sullæ tradiderat.
 Ex hujus Marci duobus carminibus, alterius post
 rem actam editi cum rato auctoritas eventu, alteri
 quoque, cuius nondum tempus venerat, adferebat
 fidem. Priore carmine Cannensis prædicta clades
 in hæc ferme verba erat : *Amnem Trojugena Cannam*
Romane fuge : ne te alienigenæ cogant in campo Dio-
medis conserere manus. Sed neque credes tu mihi, do-
nec compleris sanguine campum ; multaque millia oc-
cisa tua deferat amnis in pontum magnum ex terra
frugifera ; piscibus atque avibus ferisque, quæ incolunt
terrás, iis fuat esca caro tua : nam mihi ita Jupiter
fatus est. Et Diomedis Argivi campos et Cannam
 flumen, qui militaverant in iis locis, juxta atque ip-
 sam cladem agnoscebant. Tum alterum carmen re-
 citatum, non eo tantum obscurius, quia incertiora
 futura præteritis sunt, sed perplexius etiam scrip-
 turæ genere. *Hostem, Romani, si expellere vultis,*
vomicamque, quæ gentium venit longe, Apollini voven-
dos censeo ludos, qui quotannis comiter Apollini fiant :
quum populus dederit ex publico partem, privati uti
conferant pro se suisque. Iis ludis faciendis præcerit
prætor is, qui jus populo plebeique dabit summum.
Decemviri Græco ritu hostiis sacra faciant. Hæc si
recte faritis, gaudchitis semper, fietque res vestra me-

*lior: nam is Divus extinguet perduelles vestros, qui U.C. 510.
vestros campos pascunt placide.* Ad id carmen ex- A.C. 212.
planandum diem unum sumserunt: postero die se-
natusconsultum factum est, ut deceniviri libros, de
ludis Apollini reque divina facienda, inspicerent.
Ea quum inspecta relataque ad senatum essent,
censuerunt Patres: *Apollini ludos rovendos faciun-
dosque: et, quando ludi facti essent, duodecim millia
œris prætori ad rem divinam et duas hostias majores
dandas.* Alterum senatusconsultum factum est, *Ut
decemviri sacra Græco ritu facerent, iisque hostiis.
Apollini bove aurato et capris duabus albis auratis,
Latonæ bove femina aurata.* Ludos prætor in cireo
maximo quum facturus esset, edixit, ut populus per
eos ludos stipem Apollini, quantam commodum es-
set, conferret. Hæc est origo ludorum Apollina- Origo Apol-
rium, vicioræ, non valetudinis, ergo, ut plerique linarium
rentur, votorum factorumque: populus coronatus ludorum.
spectavit: matronæ supplicavere: vulgo apertis ja-
nuis in propatulis epulati sunt, celeberque dies omni
ceremoniarum genere fuit.

XIII. Quum Hannibal circa Tarentum, consules Capuae in-
ambo in Samnio essent, sed circumcessuri Capuam ^{opia.}
viderentur; quod malum diuturnæ obsidionis esse
solet, jam famem Campani sentiebant; quia semen-
tem facere prohibuerant eos Romani exercitus. Ita-
que legatos ad Hannibalem miserunt, orantes, ut
prius, quam consules in agros suos educerent legio-
nes, viæque omnes hostium præsidiis insiderentur,
frumentum ex propinquis locis convehi juberet Ca-
puam. Hannibal, Hannonem ex Bruttii cum ex-
ercitu in Campaniam transire, et dare operam, ut
frumenti copia fieret Campanis, jussit. Hanno, ex

U. C. 540. Bruttii profectus cum exercitu, vitabundus castra
 A. C. 212. hostium consulesque, qui in Samnio erant, quum
 Hanno in Benevento jam adpropinquaret, tria passuum millia
 niam cum ab ipsa urbe loco edito castra posuit: inde ex sociis
 exercitu venit. circa populis, quo æstate comportatum erat, devehiri
 frumentum in castra jussit; præsidiis datis, quæ
 commeatus eos prosequerentur. Capuam inde nun-
 cium misit, qua die in castris ad accipiendum fru-
 mentum præsto essent, omni undique genere vehi-
 culorum jumentorumque ex agris contracto. Id pro-
 cetera socordia negligentiaque a Campanis actum:
 paullo plus quadringenta vehicula missa, et pauca
 præterea jumenta: ob id castigatis ab Hannone,
 quod ne fames quidem, quæ mutas accenderet bes-
 tias, curam eorum stimulare posset, alia prorita dies
 ad frumentum majore adparatu petendum. Ea om-
 nia, sicut acta erant, quum enunciata Beneventanis
 essent, legatos decem extemplo ad consules (circa
 Bovianum castra Romanorum erant) miserunt. Qui
 quum, auditis, quæ ad Capuam agerentur, inter se
 comparassent, ut alter in Campaniam exercitum du-
 ceret; Fulvius, cui ea provincia obvenerat, profec-
 tus, nocte Beneventi mœnia est ingressus. Ex pro-
 pinquo cognoscit, Hannonem cum exercitus parte
 profectum frumentatum: per quæstorem Campanis
 datum frumentum: duo millia plaustrorum, incon-
 ditam inermemque aliam turbam, advenisse: per tu-
 multum ac trepidationem omnia agi: castrorumque
 formam et militarem ordinem, inmixtis agrestibus
 iis ex terris, sublatum. His satis compertis, consul
 militibus edicit, signa tantum armaque in proximam
 noctem expedirent: castra Punica obpugnanda esse.
 Quarta vigilia profecti, sarcinis omnibus inpedimen-

tisque Beneventi relictis, paullo ante lucem quum ad U. C. 540. castra pervenissent, tantum pavoris injecerunt, ut, A. C. 212. si in plano castra posita essent, haud dubie primo inpetu capi potuerint: altitudo loci et munita defenserunt, quæ nulla ex parte adiri, nisi arduo ac difficiili adscensu, poterant. Luce prima prælium ingens accensum est: nec vallum modo tutantur Pœni, sed, ut quibus locus æquior esset, deturbant nitentes per ardua hostes.

XIV. Vicit tamen omnia pertinax virtus, et ali- Hannonis
quot simul partibus ad vallum ac fossas perventum castra ca-
est; sed cum multis vulneribus ac militum pernicie. Romanis.
piuntur a
Itaque convocatis tribunis militum consul, *absistendum temerario incepto*, ait: *tutius sibi videri, reduci eo die exercitum Beneventum: dein postero castris se hostium jungi, ne exire inde Campani, neve Hanno regredi posset.* Id quo facilius obtineatur, collegam quoque et exercitum ejus se ad citurum, totumque eo versuros bellum: hæc consilia ducis, quum jam receptui caneret, clamor militum adspernantium tam segne imperium disjecit. Proxima portæ hostium erat cohors Peligna: cuius præfектus Vibius Accuæus adreptum vexillum trans vallum hostium trajecit. Exsecratus inde seque et cohortem, si ejus vexilli hostes potiti essent, princeps ipse per fossam vallumque in castra intrumpit. Jamque intra vallum Peligni pugnabant, quum altera parte, Valerio Flacco tribuno militum tertiae legionis exprobrante Romanis ignaviam, qui sociis captorum castrorum concederent decus, T. Pedanius, princeps primus centurio, quum signifero signum ademisset, *Jam hoc signum, et hic centurio, inquit, intra vallum hostium erit. Sequantur, qui capi signum ab hoste prohibituri sunt.*

U. C. 540. Manipulares sui primum transcendentem fossam,
A. C. 212. dein legio tota secuta est. Jam et consul, ad conspectum transgredientium vallum mutato consilio, ab revocando ad incitandos hortandosque versus milites, ostendere, in quanto discriminé ac periculo fortissima cohors sociorum et civium legio esset. Itaque pro se quisque omnes per æqua atque iniqua loca, quum undique tela conjicerentur, armaque et corpora hostes objicerent, pervadunt, intrumpuntque: multi vulnerati, etiam quos vires sanguisque desereret, ut intra vallum hostium caderent, nitebantur. Capta itaque momento temporis, velut in plano sita, nec permunita castra. Cædes inde, non jam pugna erat, omnibus intra vallum permixtis: supra sex millia hostium occisa, supra septem millia capitum, cum frumentatoribus Campanis omnique plaustrorum et jumentorum adparatu, capta: et alia ingens præda fuit, quam Hanno, populabundus passim quum isset, ex sociorum populi Romani agris traxerat. Inde, dejectis hostium castris, Beneventum redditum est, prædamque ibi ambo consules (nam et Ap. Claudius eo post paucos dies venit) vendiderunt, divisoruntque: et donati, quorum opera castra hostium capta erant: ante alias Accuæus Pellignus, et T. Pedanius princeps tertiae legionis. Hanno ab Cominio Cerito, quo nunciata castrorum clades est, cum paucis frumentatoribus, quos forte secum habuerat, fugæ magis, quam itineris, modo in Bruttios rediit.

Campani
Hanniba-
lem vo-
cant.

XV. Et Campani, audita sua pariter sociorumque clade, legatos ad Hannibalem miserunt, qui nunciarent, *duos consules ad Beneventum esse, diei iter a Capua; tantum non ad portas et muros bellum esse:*

ni propere subveniat, celerius Capuam, quam Arpos, in U. C. 540 potestatem hostium venturam. Ne Tarentum quidem, A. C. 212. non modo arcem, tanti debere esse, ut Capuam, quam Karthagini æquare sit solitus, desertam indefensamque populo Romano tradat. Hannibal, curæ sibi fore rem Campanam pollicitus, in præsentia duo millia equitum cum legatis mittit, quo præsidio agros populationibus possent prohibere. Romanis interim, sicut aliarum rerum, arcis Tarentinæ, præsidiique, quod ibi obsideretur, cura esse. C. Servilius legatus, ex auctoritate Patrum a P. Cornelio prætore in Etruriam ad frumentum coëmendum missus, cum aliquot navibus onustis in portum Tarentinum inter hostium custodias pervenit. Cujus adventu, qui ante, in exigua spe, vocati sæpe ad transitionem ab hostibus per conloquia erant, ulti ad transeundum hostes vocabant sollicitabantque: et erat satis validum præsidium, traductis ad arcem Tarenti tuerandam, qui Metaponti erant, militibus. Itaque Metapontini extemplo, metu, quo tenebantur, liberati, ad Hannibalem defecere. Hoc idem eadem ora maris et Thurini fecerunt: movit eos non Tarentinorum magis defectio Metapontinorumque, quibus, indidem ex Achaia oriundi, etiam cognatione juncti erant, quam ira in Romanos propter obsides nuper imperfectos. Eorum amici cognati que literas ac nuncios ad Hannonem Magone inque, qui in propinquuo in Bruttii erant, miserunt, si exercitum ad mœnia admovissent, se in potestatem eorum urbem tradituros esse. M. Atinius Thuriis cum modico præsidio præerat: quem facile elici ad certamen tenere ineundum rebantur posse; non militum, quos per paucos habebat, fiducia, quam juventutis Thurinæ: eam ex in-

*tini Thuri-
nique ad
Hanniba-
lem defi-
ciunt.*

U.C. 540. dustria centuriaverat armaveratque ad tales casus.
A.C. 212. Divisis copiis inter se, duces Pœni quum agrum Thurinum ingressi essent, Hanno cum peditum agmine infestis signis ire ad urbem pergit. Mago cum equitatu, tectus collibus, ad tegendas insidias obpositis, subsistit. Atinius, peditum tantum agmine per exploratores comperto, in aciem copias educit, et fraudis intestinæ, et hostium insidiarum ignarus. Pedestre prælrium fuit persegne, paucis in prima acie pugnantibus Romanis; Thurinis exspectantibus magis, quam adjuvantibus, eventum: et Karthaginensium acies de industria pedem referebat, ut ad terga collis ab equite suo insessi hostem incautum pertraheret. Quo ubi ventum est, coorti cum clamore equites, propere inconditam Thurinorum turbam, nec satis fido animo, unde pugnabat, stantem, extemplo in fugam averterunt. Romani, quamquam circumventos hinc pedes, hinc eques urgebat, tamen aliquamdiu pugnam traxere: postremo et ipsi terga vertunt, atque ad urbem fugiunt. Ibi proditores congregati, quum popularium agmen patentibus portis accepissent, ubi Romanos fusos ad urbem ferri viderunt, conclamat, *instare Pœnum, permixtosque et hostes urbem invasuros, ni propere portas claudant.* Ita exclusos Romanos præbuere hosti ad cædem. Atinius tamen cum paucis receptus. Sedatio inde paullisper tenuit; quum alii urbem tuendam, inde alii cedendum fortunæ, et tradendam urbem victoribus censerent: ceterum, ut plerumque, fortuna et consilia mala vicerunt: Atinio cum suis ad mare ac naves deducto, magis quia ipsi, ob imperium in se mite ac justum, consultum volebant, quam respectu Romanorum, Karthaginenses in ur-

bon accipiunt. Consules a Benevento in Campa- U.C. 546.
 num agrum legiones ducunt, non ad frumenta modo, A.C. 212.
 quæ jam in hibernis erant, conrumpenda, sed ad Ca- Coss. in
 puam obpugnandam; nobilem se consulatum tam Campa-
 opulentæ urbis excidio rati facturos, simul et ingens num
 flagitium imperio demituros, quod urbi tam propin- agrum le-
 quæ tertium annum inpunita defectio esset. Cete- giones du-
 rum, ne Beneventum sine præsidio esset, et ut ad
 subita belli, si Hannibal (quod facturum haud du-
 bitabant) ad open ferendam sociis Capuam venisset,
 equites vim sustinere possent, Ti. Gracchum ex Lu-
 canis cum equitatu ac levi armatura Beneventum
 venire jubent: legionibus stativisque ad obtainendas
 res in Lucanis aliquem præficeret.

XVI. Graccho, priusquam ex Lucanis moveret, Prodigium
 sacrificanti triste prodigium factum est: ad exta, Graccho
 sacrificio perpetrato, angues duo ex occulto adlapsi, factum.
 edere jecur, conspectique repeute ex oculis abierunt:
 id quum aruspicum monitu sacrificium instauraretur,
 atque intentius exta reserata servarentur: iterum ac
 tertium venisse tradunt, libatoque jecinore intactos
 angues abiisse. Quum aruspices, ad imperatorem
 id pertinere prodigium, præmonuissent, et ab occul-
 tis cavendum hominibus consultisque; nulla tamen
 providentia fatum imminens moveri potuit. Flavius Flavius Lu-
 Lucanus fuit, caput partis ejus Lucanoruim, quum canus pro-
 pars ad Hannibalem defecisset, quæ cum Romanis
 stabat: et jam anno in magistratu erat; ab eisdem
 illis creatus prætor. Is, mutata repente voluntate,
 locum gratiæ apud Poenum quærens, neque transire
 ipse, neque trahere ad defectionem Lucanos satis
 habuit, nisi imperatoris et ejusdem hospitis proditi
 capite ac sanguine fœdus cum hostibus sanxisset:

U. C. 540. ad Magonem, qui in Bruttiiis præerat, clam in con-
 A. C. 21². loquium venit: fideque ab eo accepta, si Romanum
 iis imperatorem tradidisset, liberos cum suis legibus
 venturos in amicitiam Lucanos; dederat Pœnum,
 in locum pacis Gracchum adducturus. Magonem
 ibi pedites equitesque armare, et capere eas latebras,
 ubi ingentem numerum occuleret, jubet. Loco sa-
 tis inspecto atque undique explorato, dies composita
 gerendæ rei est. Flavius ad Romanum imperatorem
 venit: *Rem se, ait, magnam inchoasse, ad quam per-*
ficiendam ipsius Gracchi opera opus esse: omnium po-
pulorum prætoribus, qui ad Pœnum in illo communi
Italiæ motu descissent, persuasisse, ut redirent in ami-
citiam Romanorum: quando res quoque Romana, quæ
prope exitium clade Cannensi venisset, in dies melior
atque auctior fieret; Hannibalis vis senesceret, ac prope
ad nihilum venisset. Veteri delicto haud implacabiles
fore Romanos: nullam umquam gentem magis exora-
bilem, promtioremque veniæ dandæ fuisse: quoties re-
bellioni etiam majorum suorum ignotum? Hæc ab se,
ait, dicta: ceterum ab ipso Graccho eadem hæc audire
malle eos, præsentisque contingere dextram: id pignus
fidei secum ferre. Locum se consciis dixisse a con-
spectu amotum, haud procul a castris Romanis. Ibi
paucis verbis transigi rem posse, ut omne nomen Lu-
canum in fide ac societate Romana sit. Gracchus,
fraudem et sermoni et rei abesse ratus, ac similitu-
dine veri captus, cum lictoribus ac turma equitum e
castris profectus, duce hospite in insidias præcipita-
tur. Hostes subito exorti: et, ne dubia proditio
esset, Flavius his se adjungit: tela undique in Grac-
Gracchus
proditione
circum-
ventus.
chum atque equites conjiciuntur. Gracchus ex equo
desilit: idem ceteros facere jubet, hortaturque, Ut,

quod unum reliquum fortuna fecerit, id co honestent vir- U. C. 540.
tute. Reliquum autem quid esse paucis, a multitudine A. C. 212.
in valle silva ac montibus septa circumventis, præter
mortem? id referre, utrum præbentes corpora pecorum
modo inulti trucidantur, an, toto animo a patiendo ex-
spectandoque eventu in inpetum atque iram verso,
agentes audientesque, perfusi hostium cruento, inter ex-
spirantium inimicorum cumulata armaque et corpora
cadant. Lucanum proditorem ac transfugam omnes
peterent: qui eam victimam præ se ad inferos misisset,
eum decus eximium egregiumque solatum suæ morti
inventurum. Inter hæc dicta, paludamento circum
lævum brachium intorto, (nam ne scuta quidem se-
cum extulerant) in hostes inpetui fecit. Major,
quam pro numero hominum, editur pugna: jaculis
maxime aperta corpora Romanorum, et quum un-
dique ex altioribus locis in cavam vallem conjectus
esset, transfiguntur. Gracchum, jam nudatum præ-
sidio, vivum capere Pœni nituntur: ceterum ille,
conspicatus Lucanum hospitem inter hostes, adeo
infestus confertos invasit, ut parci ei sine multorum
pernicie non posset. Exanimem eum Mago extem-
pto ad Hannibalem misit, ponique cum captis simul
fascibus ante tribunal imperatoris jussit. Hæc vera
fama est. Gracchus in Lucanis ad campos, qui
Veteres vocantur, periiit.

XVII. Sunt, qui in agro Beneventano, prope Calorem fluvium, ostendant a castris cum lictoribus ac tribus servis lavandi causa progressum, quum forte inter salicta innata ripis laterent hostes, nudum atque inerniem, saxisque, quæ volvit amnis, propugnantem, imperfectum. Sunt, qui aruspicum monitu quingentos passus a castris progressum, uti loco

U. C. 540. puro ea, quæ ante dicta prodigia sunt, procuraret,
 A. C. 212. ab insidentibus forte locum duabus turmis Numidarum circumventum scribant: adeo nec locus, nec ratio mortis in viro tam claro et insigni constat. Funeris quoque Gracchi varia est fama. Alii in castris Romanis sepultum ab suis, alii ab Hannibale (et ea vulgatior fama est) tradunt in vestibulo Punicorum castrorum rogum exstructum esse: armatum exercitum decucurrisse cum tripudiis Hispanorum, motibusque armorum et corporum suæ cuique genti adsuetis, ipso Hannibale omni rerum verborumque honore exsequias celebrante. Hæc tradunt, qui in Lucanis rei gestæ auctores sunt. Si illis, qui ad Calorem fluvium imperfectum memorant, credere velis, capitis tantum Gracchi hostes potiti sunt: eo delato ad Hannibalem, missus ab eo confestim Karthalo, qui in castra Romana ad Cn. Cornelium quæstorem deferret: is funus imperatoris in castris, celebrantibus cum exercitu Beneventanis, fecit.

Cos. ad
Capuam
fusi.

XVIII. Consules, agrum Campanum ingressi, quum passim popularentur, eruptione oppidanorum et Magonis cum equitatu territi et trepidi, ad signa milites palatos passim revocarunt: et, vixdum instructa acie fusi, supra mille et quingentos milites amiserunt. Inde ingens ferocia superbæ suopte ingenio genti crevit, multisque prælijs lacesebant Romanos: sed intentiores ad cavendum consules una pugna fecerat, incaute atque inconsulte inita. Restituit tamen his animos, et illis minuit audaciam, parva una res: sed in bello nihil tam leve est, quod non magnæ interdum rei momentum faciat. T. Quintio Crispino Badius Campanus hospes erat, perfamiliari hospitio junctus: creverat consuetudo,

Crispinus
Rom.

Badius
Camp.

quod æger Romæ apud Crispinum Badius ante de- U. C. 540.
 fectionem Campanam liberaliter comiterque curatus A. C. 212.
 fuerat. Tum Badius, progressus ante stationes, quæ
 pro porta stabant, vocari Crispinum jussit: quod
 ubi est Crispino nunciatum, ratus conloquium ami-
 cum ac familiare quæri, manente memoria, etiam in
 discidio publicorum fœderum, privati juris, paullum
 a ceteris processit. Postquam in conspectum venere,
Provoco te, inquit, ad pugnam, Crispine, Badius:
conscendamus equos, submotisque aliis, uter bello me-
lior sit, decernamus. Ad ea Crispinus, nec sibi, nec
 illi, ait, *hostes deesse, in quibus virtutem ostendant: se,*
etiamsi in acie obcurrat, declinaturum, ne hospitali
cæde dextram violet: conversusque abibat. Enim-
 vero ferocius tum Campanus increpare mollitem ig-
 naviamque, et se digna probra in insontem jacere,
hospitalem hostem adpellans, simulantemque parcere,
cui sciat parem se non esse: si parum publicis fœderi-
bus ruptis directa simul et privata jura esse putet, Ba-
dium Campanum T. Quintio Crispino Romano palam,
duobus exercitibus audientibus, renunciare hospitium.
Nihil sibi cum eo consociatum, nihil fœderatum hosti-
cum hoste, cuius patriam ac penates publicos privatos-
que obpugnatum venisset. Si vir esset, congrederetur.
 Diu cunctantem Crispinum perpulere turmales, ne
 impune insultare Campanum pateretur: itaque tan-
 tum moratus, dum imperatores consuleret, permit-
 terentne sibi extra ordinem in provocantem hostem
 pugnare, permisso eorum arma cepit, equumque
 concendit, et Badium, nomine compellans, ad pug-
 nam evocavit. Nulla mora a Campano facta est: Singulare
 infestis equis concurrerunt. Crispinus supra scutum
 sinistrum humerum Badio hasta transfixit, superque
 eorum certamen.

U. C. 540. delapsum cum vulnere ex equo desiluit, ut pedes ja-
 A. C. 212. centem conficeret. Badius, priusquam obprimere-
 tur, parma atque equo relicto, ad suos aufugit. Cris-
 pinus, equum, armaque capta, et cruentam cuspidem
 insignis spoliis ostentans, cum magna laude et gra-
 tulatione militum, ad consules est deductus, lauda-
 tusque ibi magnifice, et donis donatus.

*Coss. pug-
 nant cum
 Hanniba-
 le, æquo
 Marte.*

XIX. Hannibal ex agro Beneventano castra ad Capuam quum movisset, tertio post die, quam venit, copias in aciem eduxit: haudquaquam dubius, quod Campanis, absente se, paucos ante dies secunda fuisset pugna, quin multo minus se suumque toties victorem exercitum sustinere Romani possent. Ce- terum, postquam pugnari cœptum est, equitum maxime incursu, quum jaculis obrueretur, laborabat Romana acies: donec signum equitibus datum est, ut in hostem admitterent equos: ita equestre prœlium erat; quum procul visus Sempronianus exer- citus, cui Cn. Cornelius quæstor præerat, utriusque parti parem metum præbuit, ne hostes novi adven- tarent. Velut ex composito utrumque signum re- ceptui datum: reductique in castra prope æquo Marte discesserunt: plures tamen ab Romanis primo incursu equitum ceciderunt. Inde consules, ut averterent Capua Hannibalem, nocte, quæ secuta est, diversi, Fulvius in agrum Cumanum, Claudius in Lucanos abiit. Postero die, quum vacua castra esse Romanorum nunciatum Hannibali esset, et duobus agminibus diversos abiisse; incertus primo, utrum sequeretur, Appium institut sequi. Ille, cir- cumento hoste, qua voluit, alio itinere ad Capuam rediit. Hannibali alia in his locis bene gerendæ rei

*M. Cente-
 fortuna oblata est. M. Centenius fuit cognomine
 nius.*

Penula, insignis inter primipili centuriones et mag- U. C. 540.
 nitudine corporis et animo : is, perfunctus militia, A. C. 212.
 per P. Cornelium Sullam prætorem in senatum in-
 tractus, petit a Patribus, uti sibi quinque millia
 militum darentur. *Se, peritum et hostis et regionum,*
brevi operæ pretium facturum ; et, quibus artibus ad id
locorum nostri et duces et exercitus capti forent, iis ad-
versus inventorem usurum. Id non promissum magis
 stolidē quam stolidē creditum : tamquam eadem mili-
 tares et imperatoriae artes essent : data, pro quinque,
 octo millia militum ; pars dimidia cives, pars socii : et
 ipse aliquantum voluntariorum itinere in agris con-
 civit, ac, prope duplicito exercitu, in Lucanos per-
 venit ; ubi Hannibal, nequidquam secutus Clodium,
 substiterat. Haud dubia res est, quippe inter Han-
 nibalem ducem et centurionem, exercitusque, alte-
 rum vincendo veteranum, alterum novum totum,
 magna ex parte etiam tumultuarium ac semiermem.
 Ut conspecta inter se agmina sunt, et neutra pars
 detractavit pugnari, exemplo instructæ acies : pug-
 natum tamen, ut in nulla pari re, duas amplius ho-
 ras, concitata et, donec dux stetisset, Romana acie.
 Postquam is, non pro vetere fama solum, sed etiam
 metu futuri dedecoris, si sua temeritate contractæ
 cladi superesset, objectans se hostium telis, cecidit,
 fusa exemplo est Romana acies : sed adeo ne fugæ
 quidem iter patuit, omnibus viis ab equite insessis,
 ut ex tanta multitudine vix mille evaserint ; ceteri
 passim, alii alia peste, absunti sint.

XX. Capua a consulibus iterum sunima vi obsi- Capua ob-
 deri cœpta est : quæque in eam rem opus erant,
 comportabantur parabanturque. Casilinum frumen-
 tum convectum : ad Vulturni ostium, ubi nunc urbs

U. C. 540. est, castellum communitum: (ante Fabius Maxi-
A. C. 212. mus munierat) præsidium inpositum, ut mare prox-
imum et flumen in potestate essent. In ea duo ma-
ritima castella frumentum, quod ex Sardinia nuper
missum erat, quodque M. Junius prætor ex Etruria
coëmerat, ab Ostia convectum est, ut exercitu per
hiemem copia esset. Ceterum super eam cladem,
quæ in Lucanis accepta erat, volonum quoque ex-
ercitus, qui, vivo Graccho, summa fide stipendia fe-
cerat, velut exauktoratus morte ducis, ab signis dis-
cessit. Hannibal non Capuam neglectam, neque,
ut tanto discrimine, desertos volebat socios: sed,
prospero ex temeritate unius Romani ducis succes-
su, in alterius ducis exercitusque obprimendi occa-

Cn. Fulvi- sionem imminebat. Cn. Fulvium prætorem Apuli le-
us in Apu- gati nunciabant, primo, dum urbes quasdam Apulo-
rum, quæ ad Hannibalem descivissent, obpugnaret,
intentius rem egisse: postea nimio successu et ip-
sum et milites, præda inpletos, in tantam licentiam
socordiamque effusos, ut nulla disciplina militiæ es-
set. Quum sæpe alias, tum paucis diebus ante ex-
pertus, qualis sub inscio duce exercitus esset, in-
Apuliam castra movit.

XXI. Circa Herdoneam Romanæ legiones et præ-
tor Fulvius erant: quo ubi adlatum est, hostes ad-
ventare, prope est factum, ut injussu prætoris signis
convulsis in aciem exirent: nec res ulla magis te-
nuit, quam spes haud dubia, suo id arbitrio, ubi vel-
lent, acturos. Nocte insequenti Hannibal, quum-
tumtuatum in castris, et plerosque ferociter, sig-
num ut daret, institisse duci ad arma vocantes sciret,
haud dubius prosperæ pugnæ occasionem dari, tria
millia expeditorum militum in villis circa, veribus-

que, et silvis disponit; qui, signo dato, simul omnes U.C. 540.
 e latebris exsisterent: et Magonem ac duo ferme A.C. 212.
 millia equitum, qua fugam inclinaturam credebat,
 omnia itinera insidere jubet: his nocte præparatis,
 prima luce in aciem copias educit. Nec Fulvius est Ab Hanni-
 cunctatus, non tam sua ulla spe, quam militum in-
 petu fortuito tractus: itaque eadem temeritate, qua
 processum in aciem est, instruitur ipsa acies ad libi-
 dinem militum forte procurrentium consistentium-
 que, quo loco ipsorum tulisset animus, deinde per
 libidinem aut metum deserentium locum: prima le-
 gio et sinistra ala in primo instructæ, et in longitu-
 dinem porrecta acies: clamantibus tribunis, *nihil
 introrsus roboris ac virium esse, et, quacumque inpe-
 tum fecisset hostes, perrupturos*: nihil, quod salutare
 esset, non modo ad animum, sed ne ad aures quidem
 admittebant. Et Hannibal, haudquaquam similis
 dux, neque simili exercitu, neque ita instructo ade-
 grat: ergo ne clamorem quidem atque inpetum pri-
 mum eorum Romani sustinuere. Dux, stultitia et
 temeritate Centenio par, animo nequaquam compa-
 randus, ubi rem inclinatam ac trepidantes suos vidit,
 equo adrepto cum ducentis ferme equitibus effugit:
 cetera a fronte pulsa, a tergo atque alis circumventa
 acies, eo usque est cæsa, ut ex duodeviginti millibus
 hominum, duo millia haud amplius evaserint: cas-
 tris hostes potiti sunt.

XXII. Hæ clades, super aliam alia, Romam quum
 essent nunciatae, ingens quidem et luctus et pavor
 civitatem cepit: sed tamen, quia consules, ubi sum-
 ma rerum esset, ad id locorum prospere rem gere-
 rent, minus his cladibus commovebantur. Legatos
 ad consules mittunt C. Lætorium, M. Metilium, qui

U.C. 540. nunciarent, ut reliquias duorum exercituum cum
 A.C. 21². cura conligerent: darentque operam, ne per metum
 ac desperationem hosti se dederent, (id quod post
 Cannensem accidisset cladem) et ut desertores de
 exercitu volonum conquerirerent. Idem negotii P.
 Cornelio datum, cui et delectus mandatus erat: is-
 que per fora conciliabulaque edixit, ut conquisitio
 volonum fieret, iique ad signa reducerentur. Hæc
 omnia intentissima cura acta. Ap. Claudius consul,
 D. Junio ad ostium Vultureni, M. Aurelio Cotta Pu-
 teolis præposito, qui, ut quæque naves ex Etruria
 ac Sardinia accessissent, extemplo in castra mitte-
 rent frumentum; ipse ad Capuam regressus, Q. Ful-
 vium collegam invenit Casilini, omnia inde portan-
 tem molientemque ad obpugnandam Capuam. Tum
 ambo circumsederunt urbem, et Claudiom Neronem
 prætorem ab Suessula ex Cladianis castris excive-
 runt. Is quoque, modico ibi præsidio ad tenendum
 locum relicto, ceteris omnibus copiis ad Capuam
 descendit: ita tria præatoria circa Capuam erecta,
 tres et exercitus diversis partibus opus adgressi, fos-
 sa valloque circumdare urbem parant, et castella ex-
 citant modicis intervallis: multisque simul locis cum
 prohibentibus opera Campanis eo eventu pugnant,
 ut postremo portis muroque se contineret Campanus.
 Prius tamen, quam hæc continuarentur opera,
 legati ad Hannibalem missi, qui quererentur, deser-
 tam ab eo Capuam, ac prope redditam Romanis:
 obtestarenturque, ut tunc saltem opem non circum-
 sessis modo, sed etiam circumvallatis, ferret. Con-
 sulibus literæ a P. Cornelio prætore missæ, *Ut pri-
 usquam clauderent Capuam operibus, potestatem Cam-
 panis facerent, ut, qui eorum vellent, exirent ab Capua;*
Capua
operibus
eingitur.

suasque res secum auferrent. Liberos fore suaque om- U. C. 540.
nia habituros, qui ante Idus Martias exissent: post A. C. 212.
eam diem quique exissent, quique ibi mansissent, hos-
tium futuros numero: ea pronunciata Campanis, at-
que ita spreta, ut ultro dicerent contumelias, mina-
renturque. Hannibal ab Herdonea Tarentum dux-
erat legiones: spe, aut vi, aut dolo, arcis Tarentinæ
potiundæ. Quod ubi parum processit, ad Brundi-
sium flexit iter, prodi id oppidum ratus: ibi quoque
quum frustra tereret tempus, legati Campani ad eum
venerunt, querentes simul, orantesque: quibus Han- Hannibal
nibal magnifice respondit, et antea solvisse obsidio- auxilium
nem, et nunc adventum suum consules non laturos. promittit
Cum hac spe dimissi legati, vix regredi Capuam, Campanis.
jam duplii fossa valloque cinctam, potuerunt.

XXIII. Quum maxime Capua circumvallaretur, Syracusarum obpugnatio ad finem venit, præterquam vi ac virtute ducis exercitusque, intestina etiam proditione adjuta. Namque Marcellus initio veris incertus, utrum Agrigentum ad Himilconem et Hippocratem verteret bellum, an obsidione Syracusas premeret, quamquam nec vi capi videbat posse inexpugnabilem terrestri ac maritimo situ urbem, nec fame, quam prope liberi ab Karthagine commeatus alerent, tamen, ne quid inexpertum relinqueret, transfugas Syracusanos (erant autem apud Romanos aliqui nobilissimi viri, inter defectionem ab Romanis, quia ab novis consiliis abhorrebat, pulsi) conloquiis suæ partis tentare hominum animos jus- Conloquia
 sit, et fidem dare, si traditæ forent Syracusæ, liberos de proden-
 eos ac suis legibus victuros esse. Non erat coulo- dis Marcel-
 lo Syracu-
 qui copia, quia multorum animi suspecti omnium sis.
 curam oculosque converterant, ne quid falleret tale

U. C. 540. admissum. Servus unus exsulum, pro transfuga in-

A. C. 212. trumissus in urbem, conventis paucis, initium con-
loquendi de tali re fecit: deinde in piscatoria qui-
dam navi, retibus operti, circumvectique ita ad cas-
tra Romana, conlocutique cum transfugis: et idem
sæpius eodem modo alii atque alii: postremo ad
octoginta facti. Et, quum jam composita omnia ad

Res de cor- tur ad Epi- cydein. proditionem essent, indicio delato ad Epicydem per

Attalum quemdam, indignantem sibi rem creditam
non esse, necati omnes cum cruciatu sunt. Alia
subinde spes, postquam hæc vana evaserat, exceperit.
Damippus quidam Lacedæmonius, missus ab Syra-
cusis ad Philippum regem, captus ab Romanis na-
vibus erat: hujus utique redimendi et Epicydæ cu-
ra erat ingens; nec abnuit Marcellus, jam tum Æto-
lorum, cuius gentis socii Lacedæmonii erant, amici-
tiam affectantibus Romanis. Ad conloquium de re-
demptione ejus missis, medius maxime atque utris-
que opportunus locus, ad portum Trogiliorum, prop-
ter turrim, quam vocant Galeagram, est visus: quo
quum sæpius commearent, unus ex Romanis, ex
propinquo murum contemplatus, numerando lapides,
æstimandoque ipse secum, quid in frônte paterent
singuli, altitudinem muri, quantum proxime conjec-
tura poterat, permensus, huimilioremque aliquanto
pristica opinione sua et ceterorum omnium ratus
esse, et vel mediocribus scalis superabilem, ad Mar-
cellum rem defert. Haud spernenda visa: sed, quum
adiri locus, qui ob id ipsum iacentius custodiebatur,
non posset, occasio quærebatur: quam obtulit trans-
fuga, nuncians, diem festum Diana per triduum agi-
et, quia alia in obsidione desint, vino largius epulas
celebrari, et ab Epicyde præbito universæ plebei, et

per tribus a principibus diviso. Id ubi accepit Mar- U. C. 540.
 cellus, cum paucis tribunorum militum conlocutus, A. C. 212.
 electisque per eos ad rem tantam agendam audi-
 damque idoneis centurionibus militibusque, et scalis
 in occulto comparatis, ceteris signum dari jubet, ut
 mature corpora curarent, quietique darent: nocte
 in expeditionem eundum esse. Inde ubi id tempo-
 ris visum, quo de die epulatis jam vini satias princi-
 piisque somni esset, signi unius milites ferre scalas
 jussit; et ad mille fere armati tenui agmine per si-
 lentium eo deducti. Ubi sine strepitu ac tumultu Murum
 primi evaserunt in murum, secuti ordine alii; quum
 priorum audacia dubiis etiam animum faceret.

Murum
urbis su-
perant
scalas Ro-
mani.

XXIV. Jam mille armatorum ceperant partem,
 quum ceterae admotae, pluribusque scalis in murum
 evadebant, signo ab Hexapylo dato; quo per ingen-
 tem solitudinem erat perventum, quia magna pars,
 in turribus epulati, aut sopiti vino erant, aut semi-
 graves potabant: paucos tamen eorum obpressos in-
 cubilibus interfecerunt. Prope Hexapylon est por-
 tula magna vi refringi copta; et e muro ex com-
 posito tuba datum signum erat. Et jam undique,
 non furtim, sed vi aperta, gerebatur res: quippe ad
 Epipolas, frequentem custodiis locum, perventum
 erat, terrendique magis hostes erant, quam fallendi;
 sicut territi sunt: nam simul ac tubarum est auditus
 cantus, clamorque tenentium muros partemque ur-
 bis; omnia teneri custodes rati, alii per murum fu-
 gere, alii salire de muro, præcipitarique turba pa-
 ventium. Magna pars tamen ignara tanti mali erat,
 et gravatis omnibus vino somnoque, et, in vastæ
 magnitudinis urbe, partium sensu non satis perti-
 nente in omnia. Sub luce, Hexapylo effracto, Mar-

U. C. 540. cellus, omnibus copiis urbem ingressus, excitavit.
 A. C. 212. convertitque omnes ad arma capienda, opemque, si

quam possent, jam captæ prope urbi ferendam. Epi-
 cydes, ab Insula, quam ipsi Nason vocant, citato
 profectus agmine, haud dubius, quin paucos, per
 negligentiam custodum transgressos murum, expul-
 surus foret, obcurrentibus pavidis, tumultum augere
 eos, dictitans, et majora ac terribilia vero adferre,
 postquani conspexit omnia circa Epipolas armis com-
 pleta, laccessito tantum hoste paucis missilibus, retro
 in Achradinam agmen convertit, non tam vim mul-
 titudinemque hostium metuens, quam ne qua intestina
 fraus per occasionem oriretur, clausasque inter
 tumultum Achradinæ atque Insulæ inveniret portas.

Marcelli
 lacrimæ. Marcellus, ut, mœnia ingressus, ex superioribus locis
 urbem, omnium ferme illa tempestate pulcherrimam,
 subjectam oculis vidit, inlacrimasse dicitur, partim
 gaudio tantæ perpetratae rei, partim vetusta gloria
 urbis. Atheniensium classes demersæ, et duo in-
 gentes exercitus cum duobus clarissimis ducibus de-
 leti, obcurrerant, et tot bella cum Karthaginiensi-
 bus tanto cum discrimine gesta; tot tam opulentii
 tyranni regesque; præter ceteros Hiero, quum re-
 centissimæ memoriæ rex, tum ante omnia, quæ vir-
 tus ei fortunaque sua dederat, beneficiis in populum
 Romanum insignis: ea quum universa obcurrerent
 animo, subiretque cogitatio, jam illa momento horæ
 arsura omnia, et ad cineres redditura: priusquam
 signa Achradinam admoveret, præinmittit Syracusa-
 nos, qui intra præsidia Romana, ut ante dictum est,
 fuerant, ut adloquio leni perlicerent hostes ad de-
 dendam urbem.

XXV. Tenebant Achradinæ portas murosque

maxime transfugæ, quibus nulla erat per conditiones U. C. 540.
 A. C. 212.
 veniæ spes : ii nec adire muros, nec adloqui quemquam passi : itaque Marcellus, postquam id incep-
 tum irritum fuit, ad Euryalum signa referri jussit :
 tumulus est in extrema parte urbis versus a mari,
 viæque imminens ferenti in agros mediterraneaque
 insulæ, percommode situs ad commeatus excipien-
 dos. Præerat huic arci Philodemus Argivus, ab
 Epicyde inpositus, ad quem missus a Marcello Sosis,
 unus ex interfectoribus tyranni, quum, longo ser-
 mone habito, dilatus per frustrationem esset, retulit
 Marcello, tempus eum ad deliberandum sumsisse.
 Quum is diem de die differret, dum Hippocrates at-
 que Himilco admoverent castra legionesque, haud
 dubius, si in arcem accepisset eos, deleri Romanum
 exercitum inclusum muris posse ; Marcellus, ut Eu-
 ryalum neque tradi, neque capi vidi posse, inter
 Neapolim et Tycham (nomina partium urbis, et in-
 star urbium sunt) posuit castra, timens, ne, si fre-
 quentia intrasset loca, contineri ab discursu miles
 avidus prædæ non posset. Legati eo ab Tycha et Neapolis et
 Neapoli cum infulis et velamentis venerunt, precan-
 tes, ut a cædibus et ab incendiis parceretur. De
 quorum precibus, quam postulatis, magis consilio
 habito, Marcellus ex omnium sententia edixit mili-
 tibus, *ne quis liberum corpus violaret* : *cetera prædæ*
futura : castraque tectis parietum pro muro septa :
 portis regione platearum patentibus stationes præ-
 sidiaque dispositi, ne quis in discursu militum impe-
 tus in castra fieri posset. Inde, signo dato, milites
 discurrerunt : refractisque foribus, quum omnia ter-
 rore ac tumultu streperent, a cædibus tamen tempe-
 ratum est : rapinis nullus ante modus fuit; quam

Tycha de-
duntur.

U.C. 540. omnia diuturna felicitate cumulata bona egessere.
A.C. 212. Inter hæc et Philodemus, quum spes auxilii nulla

esset, fide accepta, ut inviolatus ad Epicydem rediret, deducto præsidio, tradidit tumulum Romanis. Aversis omnibus ad tumultum ex parte captæ urbis, Bomilcar, noctem eam nactus, qua propter vim tempestatis stare ad anchoram in salo Romana classis non posset, cum triginta quinque navibus ex portu Syracusano profectus, libero mari vela in altum dedidit, quinque et quinquaginta navibus Epicydæ et Syracusanis relictis : edoctisque Karthaginiensibus in quanto res Syracusana discrimine esset, cum centum navibus post paucos dies redit, multis (ut fama est) donis ex Hieronis gaza ab Epicyde donatus.

XXVI. Marcellus, Euryalo recepto præsidioque addito, una cura erat liber, ne qua ab tergo vis hostium in arcem accepta inclusos impeditosque mœni Marcellus bus suos turbaret. Achradinam inde, trinis castris Achradinam obserdet. per idonea dispositis loca, spe ad inopiam omnium rerum inclusos redacturum, circumsedit. Quum per aliquot dies quietæ stationes utrumque fuissent, re Hippocrates et Himilconis venient Syracusas. pente adventus Hippocratis et Himilconis, ut ultro undique obpugnarentur Romani, fecit : nam et Hippocrates, castris ad magnum portum coniunctis, signoque iis dato, qui Achradinam tenebant, castra vetera Romanorum adortus est, quibus Crispinus præerat ; et Epicydes eruptionem in stationes Marcelli fecit : et classis Punica litori, quod inter urbem et castra Romana erat, adpulsa est ; ne quid præsidii Crispino submitti a Marcelllo posset. Tumultum tamen majorem hostes præbuerunt, quam certamen : nam et Crispinus Hippocratem non repulit tantum munimentis, sed insecurus etiam est trepide

fugientem : et Epicydem Marcellus in urbem com- U. C. 540.
pulit : satisque jam etiam in posterum videbatur pro- A. C. 212.
visum, ne quid ab repentinis eorum excursionibus
periculi foret. Accessit et pestilentia, commune ma- Pestilentia.
lum, quod facile utrorumque animos averteret a belli
consiliis : nam tempore autumni, et locis natura gra-
vibus, multo tamen magis extra urbem, quam in
urbe, intoleranda vis æstus per utraque castra om-
nium ferme corpora movit. Et primo temporis ac
loci vitio et ægri erant, et moriebantur : postea cu-
ratio ipsa et contactus ægrorum vulgabat morbos :
ut aut neglecti desertique, qui incidissent, moreren-
tur, aut adsidentes curantesque eadem vi morbi re-
pletos secum traherent : quotidianaque funera et
mors ob oculos esset, et undique dies noctesque plo-
ratus audirentur. Postremo ita adsuetudine mali
efferaverant animos, ut non modo lacrimis justoque
comploratu prosequerentur mortuos, sed ne efferrent
quidem, aut sepelirent, jacerentque strata exanima
corpora in conspectu similem mortem exspectan-
tium ; mortuique ægros, ægri validos, cum metu,
tum tabe ac pestifero odore corporum, conficerent :
et, ut ferro potius morerentur, quidam invadebant
soli hostium stationes. Multo tamen vis major pes-
tis Pœnorum castra, quam Romana, (diu circumse-
dendo Syracusas, cœlo aquisque adsuerant magis)
adfecerat. Ex hostium exercitu Siculi, ut primum
videre ex gravitate loci vulgari morbos, in suas quis-
que propinquas urbes dilapsi sunt : at Karthaginien-
ses, quibus nusquam receptus erat, cum ipsis duci-
bus Hippocrate atque Himilcone, ad internectionem
omnes perierunt. Marcellus, ut tanta vis ingruebat
mali, traduxerat in urbem suos : infirmaque corpora

U. C. 540. tecta et umbræ recreaverant. Multi tamen ex Ro-
A. C. 212. mano exercitu eadem peste absunti sunt.

Classis
Punica.

XXVII. Deleto terrestri Punico exercitu, Siculi, qui Hippocratis milites fuerant, in haud magna opida, ceterum et situ et munimentis tuta, (tria millia alterum ab Syracusis, alterum quindecim abest) eo et commicatus e civitatibus suis comportabant, et auxilia arcescebant. Interea Bomilcar, iterum cum classe profectus Karthaginem, ita exposita fortuna sociorum, ut spem faceret, non ipsis modo salutarem openi ferri posse, sed Romanos quoque in capti quodammodo urbe capi, perpulit, ut onerarias naves quam plurimas omni copia rerum onustas secum mitterent, classemque suam angerent: igitur, centum triginta navibus longis et septingentis onerariis profectus a Karthagine, satis prosperos ventos ad trajiciendum in Siciliam habuit: sed iidem venti superare eum Pachynum prohibebant. Bomilcaris adventus, fama primo, dein præter spem mora, quum gaudium et metum in vicem Romanis Syracusanisque præbuisset; Epicydes metuens, ne, si pergerent iidem, qui tum tenebant, ab ortu solis flare per dies plures venti, classis Punica Africam repeteret, tradita Achradina mercenariorum militum ducibus, ad Bomilcarem navigat: classem in statione versa in Africam habentem, atque timienti navale prælium, non tam quod inpar viribus aut numero navium esset, (quippe etiam plures habebat) quam quod venti aptiores Romanae, quam suæ, classi flarent, perpulit tandem, ut fortunam navalis certaminis experiri vellet. Et Marellus, quum et Siculum exercitum ex tota insula conciri videret, et cum ingenti conimeatu classem Punicam adventare, ne simul terra marique

inclusus urbe hostium urgeretur, quamquam inpar U. C. 540.
 numero navium erat, prohibere aditu Syracusarum A. C. 212:
 Bomilearem constituit. Duæ classes infestæ circa
 promontorium Pachynum stabant, ubi prima tran-
 quillitas maris in altum evexisset, concursuræ. Ita-
 que, cadente jam Euro, qui per dies aliquot sœvi-
 erat, prior Bomilear movit: cuius prima classis pe-
 tere altum visa est, quo facilius superaret promon-
 torium: ceterum, postquam tendere ad se Romanas
 naves vidi, incertum qua subita territus re, Bomil- Proelium
 car vela in altum dedit, missisque nunciis Heraebleam, navale de-
 qui onerarias retro in Africam repetere juberent,
 ipse, Siciliam prætervectus, Tarentum petit. Epi-
 cydes, a tanta repente destitutus spe, ne in obsidio-
 nem magna ex parte captæ urbis rediret, Agrigen-
 tum navigat, exspectaturus magis eventum, quam
 inde quidquam moturus.

XXVIII. Quæ ubi in castra Siculorum sunt nunciata, Epicydem Syracusis excessisse, a Karthagini-
 ensibus relictam insulam, et prope iterum Romanis Legati ex-
 traditam; legatos de conditionibus dedendæ urbis, ercitus Si-
 culorum explorata prius per conloquia voluntate eorum, qui ad Marcel-
 obsidebantur, ad Marcellum mittunt. Quum haud lum.
 ferme dispareret, quin, quæ ubique regum fuissent,
 Romanorum essent; Siculis cetera cum libertate ac
 legibus suis servarentur; evocatis ad conloquium
 his, quibus ab Epicyde creditæ res erant, missos se
 simul ad Marcellum, simul ad eos ab exercitu Siculo-
 rum, aiunt, ut una omnium, qui obsiderentur, quique
 extra obsidionem essent, fortuna esset; neve alteri pro-
 prie sibi paciscerentur quidquam. Recepti deinde ab
 iis, ut necessarios hospitesque adloquerentur, expo-
 sitis, quæ pacta janı cum Marcello haberent, oblata

U. C. 540. spe salutis perpulere eos, ut secum præfectos Epicydis, Polyclitum, et Philistionem, et Epicydem, cui Sindon cognomen erat, adgrederentur: interfectis iis, et multitudine ad concionem vocata, et inopiam, qua ipsi inter se fremere occulte soliti erant, conquesti, *quamquam tot mala urgerent, negarunt, fortunam accusandam esse, quod in ipsorum esset potestate, quamdiu ea paterentur.* Romanis caussam obpugnandi Syracusas fuisse caritatem Syracusanorum, non odium: nam, ut occupatas res ab satellitibus Hannibal, deinde Hieronymi, Hippocrate atque Epicyde audierint, tum bellum morisse, et obsidere urbem cœpisse, ut crudeles tyrannos ejus, non ut ipsam urbem, expugnarent. Hippocrate vero interemto, Epicyde intercluso ab Syracusis, et præfectis ejus occisis, Karthaginiensibus omni possessione Sicilæ terra marique pulsis, quam superesse caussam Romanis, cur non, perinde ac si Hiero ipse vivet, unicus Romanæ amicitiae cultor, incolumes Syracusas esse relint? Itaque nec urbi nec hominibus aliud periculum, quam ab semet ipsis, esse, si occasio nem reconciliandi se Romanis prætermisissent: eam autem, qualis illo momento horæ sit, nullam deinde fore, simul liberatos ab inpotentibus tyrannis adparuisset.

XXIX. Omnium ingenti adsensu audita ea oratio est. Prætores tamen prius creari, quam legatos nominari, placuit: ex ipsorum deinde prætorum numero missi oratores ad Marcellum: quorum princeps, Neque primo, inquit, Syracusani a robis defecimus, sed Hieronymus, nequaquam tam in vos inpius, quam in nos: nec postea pacem, tyranni cœde compositam, Syracusanus quisquam, sed satellites regii Hippocrates atque Epicydes, obpressis nobis hinc metu, hinc fraude, turbarerunt: nec quisquam dicere potest, ali-

Legato-
rum Sy-
racusano-
rum ad
Marcel-
lum ora-
tio.

quando nobis libertatis tempus fuisse, quod pacis vobis- U. C. 540.
cum non fuerit. Nunc certe cœde eorum, qui obpressas A. C. 212.
tenebant Syracusas, quum primum nostri arbitrii esse
cœpimus, extemplo venimus ad tradenda arma; deden-
dos nos, urbem, mania: nullam recusandam fortunam,
quæ inposita a vobis fuerit. Gloriam captæ nobilissimæ
pulcherrimæque urbis Græcarum Dei tibi dederunt,
Marcelle: quidquid umquam terra marique memoran-
dum gessimus, id tui triumphi titulo accedit. Famæne
credi velis, quanta urbs a te capta sit, quam posteris
quoque eam spectaculo esse, (quo quisque terra, quisque
mari venerit, nunc nostra de Atheniensibus Karthagini-
ensibusque tropæa, nunc tua de nobis ostendat) incolu-
mesque Syracusas familiæ vestræ sub clientela nominis
Marcellorum tutelaque habendas tradas? Ne plus apud
ros Hieronymi, quam Hieronis, memoria momenti fa-
ciat: diutius ille multo amicus fuit, quam hic hostis:
et illius etiam benefacta persensistis; hujus amentia ad
perniciem tantum ipsius valuit. Omnia et inpetra-
bilia et tuta erant apud Romanos: inter ipsos plus
belli ac periculi erat. Namque transfugæ, tradi se Transfuga-
Romanis rati, mercenariorum quoque militum auxi- rum et
lia in eundem compulere metuunt: adreptisque ar- mercena-
mis prætores primum obtruncant, inde ad cædem riorum tu-
Syracusorum discurrunt: quosque fors obtulit, multus Sy-
irati interfecere, atque omnia, quæ in promtu erant,
diripuerunt: tum, ne sine ducibus essent, sex præ-
fectos creavere, ut terni Achradinæ ac Naso præes-
sent. Sedato tandem tumultu, exsequentibus scis-
citando mercenariis, quæ acta cum Romanis essent,
dilucere, id quod erat, cœpit; aliam suam ac per-
fugarum caussam esse.

XXX. In tempore legati a Marcello redierunt,

U. C. 540. falsa eos suspicione incitatos memorantes, nec caus-
 A. C. 212. sam expetendæ pœnæ eorum ullam Romanis esse.
 Recipit Romanos in urbem Mericus Hispanus.
 Erat ex tribus Achradinæ præfectis Hispanus, Mericus nomine: ad eum inter comites legatorum de industria unus ex Hispanorum auxiliaribus est missus: qui, sine arbitris Mericum nactus, primum, quo in statu reliquisset Hispaniam, (et nuper inde venerat) exponit. *Omnia Romanis ibi obtineri armis: posse eum, si operæ pretium faciat, principem popularium esse: seu militare cum Romanis, seu in patriam reverti libeat.* Contra, si malle obsideri perget, quam spem esse terra marique clauso? Motus his Mericus, quum legatos ad Marcellum mitti placuisse, fratrem inter eos mittit: qui, per eundem illum Hispanum secretus ab aliis ad Marcellum deductus, quum fidem accepisset, composuisseque agendæ rei ordinem, Achradinam redit. Tum Mericus, ut ab suspicione prodigionis averteret omnium animos, negat *sibi placere, legatos commeare ultro citroque, neque recipiendum quemquam, neque mittendum: et, quo intentius custodiæ serventur, opportuna loca dividenda præfectis esse, ut suæ quisque partis tutandæ reus sit.* Omnes ad sensi sunt partibus dividendis: ipsi regio evenit ab Arethusa fonte usque ad ostium magni portus: id ut scirent Romani, fecit. Itaque Marcellus nocte navem onerariam cum armatis remulco quadriremis trahi ad Achradinam jussit, exponique milites regione portæ, quæ prope fontem Arethusam est. Hoc quum quarta vigilia factum esset, expositosque milites porta, ut convenerat, receperisset Mericus; luce prima Marcellus omnibus copiis mœnia Achradinæ adgreditur: ita ut nou eos solum, qui Achradinam tenebant, in se converteret, sed ab Naso etiam ag-

mina armatorum concurrerent, relictis stationibus U. C. 549.
 suis ad vim et inpetum Romanorum arcendum. In A. C. 212.
 hoc tumultu actuariae naves, instructae jam ante cir-
 cumvectaque, ad Nasum armatos exponunt, qui, in-
 proviso aborti semiplenas stationes et adapertas fores
 portae, qua paullo ante excurrerant armati, haud
 magno certamine Nasum cepere, desertam trepidatione
 et fuga custodum: neque ullis minus praesidii
 aut pertinaciæ ad manendum, quam transfugis, fuit:
 quia, ne suis quidem satis credentes se, medio cer-
 tamine effugerunt. Marcellus ut captam esse Na-
 sum didicit, et Achradinæ regionem unam teneri,
 Mericumque cum praesidio suis adjunctum, receptui
 cecinit: ne regiae opes, quarum fama major, quam
 res, erat, diriperentur.

XXXI. Subpresso inpetu militum, et iis, qui in Achradina erant, transfugis spatum locusque fugæ datus est; et Syracusani, tandem liberi metu, portis Syracusani Achradinæ apertis, oratores ad Marcellum mittunt, ^{permittunt} se Marcel- nihil petentes aliud, quam incolumitatem sibi libe- to. risque suis. Marcellus, consilio advocate, et adhibitis etiam Syracusanis, qui per seditiones pulsi ab domo intra praesidia Romana erant, respondit: *non plura per annos quinquaginta benefacta Hieronis, quam paucis his annis maleficia eorum, qui Syracusas tenuerint, erga populum Romanum esse: sed pleraque eorum, quo debuerint, recidisse; fæderumque ruptorum ipsos ab se graviores multo, quam populus Romanus voluerit, pœnas exegisse.* Se quidem tertium annum circumsedere Syracusas: non ut populus Romanus servam civitatem haberet, sed ne transfugarum duces captam et oppressam tenerent. Quid potuerint Syracusani facere, exemplo vel eos Syracusanorum esse, qui intra praesidia Romana

U.C. 540. fuerint, vel Hispanum ducem Mericum, qui præsidium
A.C. 212. tradiderit, vel ipsorum Syracusanorum postremo, serum
quidem, sed forte consilium. Omnium sibi laborum peri-
culorumque, circa mænia Syracusana terra marique
tam diu exhaustorum, nequaquam tantum fructum esse,
quam capere Syracusas potuisse. Inde quæstor cum
præsidio ad Nasum ad accipiendam pecuniam regiam

Urbs diri-
pienda
militi da-
tur. custodiendamque missus : urbs diripienda militi data
est, custodibus divisis per domos eorum, qui intra
præsidia Romana fuerant. Quum multa iræ, multa

Archime-
dis mors. avaritiæ, fœda exempla cederentur, Archimedem, me-
moriæ proditum est, in tanto tumultu, quantum capta
urbs in discursu diripientium militum ciere poterat,
intentum formis, quas in pulvere descripserat, ab igno-
naro milite, quis esset, imperfectum : ægre id Mar-
cellum tulisse, sepulturæque curam habitam : et pro-
pinquis etiam inquisitis honori præsidioque nomen
ac memoriam ejus fuisse. Hoc maxime modo Sy-
racusæ captæ : in quibus prædæ tantum fuit, quan-
tum vix capta Karthagine tunc fuisset, cum qua vi-
ribus æquis certabatur. Paucis ante diebus, quam
Syracusæ caperentur, T. Otacilius cum quinqueremi-
bus octoginta Uticam ab Lilybæo transmisit : et,
quum ante lucem portum intrasset, onerarias fru-
mento onustas cepit : egressusque in terram, depo-
pulatus est aliquantum agri circa Uticam, prædam-
que omnis generis retro ad naves egit. Lilybæum
tertio die, quam inde profectus erat, cum centum
triginta onerariis navibus frumento prædaque onus-
tis rediit : idque frumentum extemplo Syracusas mi-
sit : quod ni tam in tempore subvenisset, victoribus
victisque pariter perniciosa fames instabat.

XXXII. Eadem æstate in Hispania, cum biennio

ferme nihil admodum memorabile factum esset, con- U. C. 540.
 siliisque magis, quam armis, bellum gereretur, Ro- A. C. 212.
 mani imperatores egressi hibernis copias conjuux- Res in
 runt: ibi consilium advocatum, omniumque in unum Hispania
 gestæ.
 congruerunt sententiæ; quando ad id locorum id
 modo actum esset, ut Hasdrubalem tendentem in
 Italiam retinerent; tempus esse id jam agi, ut bel-
 lum in Hispania finiretur: et satis ad id virium cre-
 debant accessisse, viginti millia Celtiberorum ea
 hieme ad arma excitata. Tres exercitus erant. Has-
 drubal Gisgonis filius et Mago, conjunctis castris,
 quinque ferme dierum iter ab Romanis aberant.
 Propior erat Hamilcaris filius Hasdrubal, vetus in
 Hispania imperator: ad urbem nomine Anitorgin
 exercitum habebat. Eum volebant prius obpriumi
 duces Romani: et spes erat satis superque ad id vi-
 rium esse: illa restabat cura, ne, fuso eo perculsi,
 alter Hasdrubal et Mago, in avios saltus montesque
 recipientes sese, bellum extraherent. Optimum igitur
 rati, divisis bifariam copiis, totius simul Hispaniæ amplecti bellum, ita inter se divisorunt, ut P.
 Cornelius duas partes exercitus Romanorum socio-
 rumque adversus Magonem duceret atque Hasdru- Scipiones
 balem; Cn. Cornelius cum tertia parte veteris ex- exercitum
 ercitus, Celtiberis adjunctis, cum Hasdrubale Bar- partiuntur.
 cino bellum gereret. Una profecti ambo duces ex-
 ercitusque, Celtiberis prægredientibus, ad urbem Anitorgin in conspectu hostium, dirimente amni,
 ponunt castra. Ibi Cn. Scipio, cum quibus ante
 dictum est copiis, substitit, et P. Scipio profectus ad
 destinatam belli partem.

XXXIII. Hasdrubal postquam animadvertisit, exi-
 guum Romanum exercitum in castris, et spem om-

U. C. 540. nem in Celtiberorum auxiliis esse; peritus omnis
 A. C. 21². barbaricæ, et præcipue omnium earum gentium, in
 Celtiberi deserunt quibus per tot annos militabat, perfidiæ, facili linguæ
 Cn. Scipionem. commercio, quum utraque castra plena Hispanorum
 essent, per occulta conloquia paciscitur magna mer-
 cede cum Celtiberorum principibus, ut copias inde
 abducant. Nec atrox visum facinus: non enim, ut
 in Romanos verterent arma, agebatur: et merces,
 quanta vel pro bello satis esset, dabatur, ne bellum
 gererent: et quum quies ipsa, tum redditus domum
 fructusque videndi suos suaque, grata vulgo erant.
 Itaque non ducibus facilius, quam multitudini, per-
 suasum est: simul ne metus quidem ab Romanis
 erat, quippe tam paucis, si vi retinerent. Id quidem
 cavendum semper Romanis ducibus erit, exemplaque
 hæc vere pro documentis habenda, ne ita externis
 credant auxiliis, ut non plus sui roboris suarumque
 proprie virium in castris habeant. Signis repente
 sublatis, Celtiberi abeunt, nihil aliud quærentibus
 caussam obtestantibusque, ut manerent, Romanis
 respondentes, quam domestico se avocari bello. Sci-
 pio, postquam socii nec precibus, nec vi retineri pot-
 erant, nec se aut parem sine illis hosti esse, aut
 fratri rursus conjungi vidi posse, nec ullum aliud
 salutare consilium in promtu esse, retro, quantum
 posset, cedere statuit; in id omni cura intentus,
 necubi hosti æquo se committeret loco; qui, trans-
 gressus flumen, prope vestigiis abeuntium insistebat.

XXXIV. Per eosdem dies P. Scipionem par ter-
 rор, periculum majus ab novo hoste,urgebat. Ma-
 sinissa erat juvenis, eo tempore socius Karthaginien-
 sium, quem deinde clarum potentemque Romana fe-
 cit amicitia: is tum cum equitatu Numidarum et ad-

venienti P. Scipioni obcurrit, et deinde adsidue dies U. C. 540.
 noctesque infestus aderat, ut non vagos tantum, A. C. 212.
 procul a castris lignatum pabulatumque progressos,
 exciperet, sed ipsis obequitaret castris, invectusque
 in medias sæpe stationes, omnia ingenti tumultu
 turbaret: noctibus quoque sæpe incursu repentino
 in portis valloque trepidatum est: nec aut locus, aut
 tempus ullum vacuum a metu ac sollicitudine erat
 Romanis: compulsisque intra vallum, ademto rerum
 omnium usu, quum prope justa obsidio esset, futu-
 ramque artiorem eam adpareret, si se Indibilis, quem
 cum septem millibus et quingentis Suessetanorum
 adventare fama erat, Pœnis coniunxisset; dux cau- P. Scipionis
 tus et providens Scipio, vietus necessitatibus, teme- temera-
 rarium capit consilium, ut nocte Indibili obviani- rium con-
 siliuim. iret: et, quocumque obcurrisset loco, prælium con-
 sereret. Relicto igitur modico præsidio in castris,
 præpositoque T. Fonteio legato, media nocte pro-
 fectus, cum obviis hostibus manus conseruit. Ag-
 mina magis, quam acies, pugnabant: superior ta-
 men, ut in tumultuaria pugna, Romanus erat: cete-
 rum et equites Numidæ repente, quos fefellisse se
 dux ratus erat, ab lateribus circumfusi, magnum ter-
 rorem intulere. Contracto adversus Numidas cer-
 tamine novo, tertius insuper advenit hostis, duces
 Pœni adsecuti ab tergo jam pugnantes: ancepsque
 prælium Romanos circumsteterat, incertos in quem
 potissimum hostem, quamve in partem conferti erup-
 tionem facerent. Pugnanti hortantique imperatori
 et obferenti se, ubi plurimus labor erat, latus dex-
 trum lancea trajicitur: cuneusque is hostium, qui
 in confertos circa ducem inpetum fecerat, ut exani-
 mem labentem ex equo Scipionem vidi, alacres gau-

U. C. 540. dio cum clamore per totam aciem nunciantes discur-
 A. C. 212. runt, imperatorem Romanum cecidisse. Hæc per-
 P. Scipio occisus, et vagata passim vox, ut et hostes haud dubie pro vic-
 exercitus toribus, et Romani pro victis essent, fecit. Fuga
 cæsus.

confestim ex acie, duce amisso, fieri cœpta est: ce-
 terum ut ad erumpendum inter Numidas leviumque
 armorum alia auxilia haud difficilis res erat; ita ef-
 fugere tantum equitum, æquantiumque equos velo-
 citate peditum, vix poterant: cæsique prope plures
 in fuga, quam in pugna, sunt: nec superfuisset quis-
 quam, ni præcipiti jam ad vesperum die nox inter-
 venisset.

XXXV. Haud segniter inde duces Pœni fortuna
 usi, confestim e prœlio, vix necessaria quiete data
 militibus, ad Hasdrubalem Hamilcaris citatum ag-
 men rapiunt, non dubia spe, quum juncti essent, de-

Tres Pœni bellari posse. Quo ubi est ventum, inter exercitus
 duces con- ducesque, victoria recenti lætos, gratulatio ingens
 jungunt se aduersus facta, imperatore tanto cum omni exercitu deleto, et
 Cn. Sci- alteram pro haud dubia parem victoriam exspectan-
 pionem. tes. Ad Romanos nondum quidem fama tantæ cladi
 pervenerat, sed mœstum quoddam silentium erat,
 et tacita divinatio; qualis jam præsagientibus ani-
 mis inminentis mali esse solet. Imperator ipse, præ-
 terquani quod ab sociis se desertum, hostium tantum
 auctas copias sentiebat, conjectura etiam et ratione
 ad suspicionem acceptæ cladis, quam ad ullam bo-
 nam spem, pronior erat.

*Quonam modo enim Has-
 drubalem ac Magonem, nisi defunctos suo bello, sine
 certamine adducere exercitum potuisse? Quomodo au-
 tem non obstitisse, aut ab tergo secutum fratrem? ut,
 si prohibere, quo minus in unum coirent et duces et ex-
 exercitus hostium, non posset, ipse certe cum fratre con-*

jungeret copias. His anxius curis id modo esse salu- U. C. 540.
 tare in præsens credebat, cedere inde, quantum pos- A. C. 212.
 set: et inde una nocte, ignaris hostibus, et ob id
 quietis, aliquantum emensus est iter. Luce, ut sen-
 serunt profectos hostes, præmissis Numidis, quam
 poterant maxime citato agmine sequi cœperunt: ante
 noctem adsecuti Numidæ, nunc ab tergo, nunc in la-
 tera incurstantes. Consistere cœperunt, ac tutari
 agmen, quantum possent; tamen, tuto ut simul pug-
 narent procederentque, Scipio hortabatur, priusquam
 pedestres copiæ adsequerentur.

XXXVI. Ceteruni nunc agendo, nunc sustinendo
 agmen, quum aliquamdiu haud multum procedere-
 tur, et nox jam instaret, revocat e prælio suos Sci-
 pio: et conlectos in tumulum quemdam, non qui-
 dem satis tutum, (præsertim agmini perculso) editio-
 rem tamen, quam cetera circa erant, subducit. Ibi
 primo, inpedimentis et equitatu in medium receptis,
 circumdati pedites haud difficulter inpetus incursan-
 tium Numidarum arcebant: dein, postquam toto ag-
 mine tres imperatores cum tribus justis exerciti-
 bus aderant, adparebatque, parum armis ad tuendum
 locum sine munimento valituros esse; circumspec-
 tare atque agitare dux cœpit, si quo modo posset
 vallum circuminjicere: sed erat adeo nudus tumulus
 et asperi soli, ut nec virgulta vallo cœdendo, nec ter-
 ra cespiti faciendo, aut ducendæ fossæ, aliive ulli
 operi apta inveniri posset: nec natura quidquam sa-
 tis arduum aut abscisum erat, quod hosti aditum ad-
 scensumve difficilem præberet; omnia fastigio leni
 subvexa. Ut tamen aliquam imaginem valli objice-
 rent, clitellas inligatas oneribus, velut struentes ad
 altitudinem solitam, circumdabant; cumulo sarcin-

U. C. 540. narum omnis generis objecto, ubi ad moliendum cli-
 A. C. 212. tellæ defuerant. Punici exercitus postquam adve-
 nere, in tumulum quidem perfacile agmen erexere,
 munitionis vero facies nova primo eos velut miraculo
 quodam tenuit, quum duces undique vociferarentur,
Quid starent? et non ludibrium illud, vix feminis pue-
risve morandis satis validum, distraherent diriperent-
que? Captum hostem teneri, latentem post sarcinas.
 Hæc contemtim duces increpabant: ceterum, neque
 transilire, neque moliri onera objecta, nec cædere
 stipatas clitellas, ipsisque obrutas sarcinis, facile
 erat. Tardatis diu quum amolita objecta onera ar-
 matis dedissent viam, pluribusque idem partibus fie-
 ret, capta jam undique castra erant: pauci ab mul-
 tis, percusisque a victoribus passim cædebantur.
 Magna pars tamen militum, quum in propinquas re-

Cn. Scipio fugisset silvas, in castra P. Scipionis, quibus T. Fon-
 occisus, teius legatus præerat, perfugerunt. Cn. Scipionem
 exercitus. que cæ- ali in tumulo primo in petu hostium cæsum tradunt:
 sus. alii cum paucis in propinquam castris turrim perfu-
 gisse: hanc igni circumdatam, atque ita exustis fo-
 ribus, quas nulla moliri potuerunt vi, captam; om-
 nesque intus cum ipso imperatore occisos. Anno
 octavo, postquam in Hispaniam venerat, Cn. Scipio,
 undetrigesimo die post fratris mortem, est interfec-
 tus. Luctus ex morte eorum non Romæ major,
 quam per totam Hispaniam, fuit. Quin apud cives
 partem doloris et exercitus amissi, et alienata pro-
 vincia, et publica trahebat clades. Hispaniæ ipsos
 lugebant desiderabantque duces: Cnæum tamen ma-
 gis, quo diutius præfuerat iis, priorque et favorem
 occupaverat, et specimen justitiæ temperantiæque
 Romanæ primus dederat.

XXXVII. Quum deletus exercitus amissæque U. C. 540.
 Hispaniæ viderentur, vir unus res perditas restituit. A. C. 212.
 Erat in exercitu L. Marcius Septimi filius, eques Romanus, in piger juvenis, animique et ingenii ali-
 quanto, quam pro fortuna, in qua erat natus, majo-
 ris: ad summam indolem accesserat Cn. Scipionis
 disciplina: sub qua per tot annos omnes nilitiæ
 artes edoctus fuerat. Hic, et ex fuga conlectis mi-
 litibus, et quibusdam de præsidiis deductis, haud
 contemnendum exercitum fecerat, junxeratque cum
 T. Fonteio P. Scipionis legato. Sed tantum præstitit
 eques Romanus auctoritate inter milites atque ho-
 nore, ut, castris citra Iberum communitis, quum du-
 cem exercituum comitiis militaribus creari placuisset,
 subeuntes alii aliis in custodiam valli stationesque,
 donec per omnes suffragium iret, ad L. Marcum
 cuncti summam imperii detulerint. Omne inde tem-
 pus (exiguum id fuit) muniendis castris convehen-
 disque commeatis consumitum: et omnia imperia
 milites, quum in pigræ, tum haudquam abjecto
 animo, exsequebantur. Ceterum postquam Hasdrubalem
 Gisgonis, venientem ad reliquias belli delen-
 das, transisse Iberum, et adpropinquare adlatum est,
 signumque pugnæ propositum ab novo duce milites
 viderunt; recordati, quos paullo ante imperatores
 habuissent, quibusque et ducibus et copiis freti pro-
 dire ad pugnam soliti essent, flere omnes repente et
 obfensare capita: et alii manus ad cœlum tendere,
 Deos incusantes; alii, strati humi, suum quisque
 nominatim ducem implorare: neque sedari lamentatio
 poterat, excitantibus centurionibus manipulares, et
 ipso mulcente et increpante Marcio, *quid in mulie-
 bres et inutiles se projecissent fletus potius, quam ad*

U. C. 540. *tutandos semet ipsos et rempublicam secum acuerent*
 A. C. 212. *animos, et ne insultos imperatores suos jacere sinerent?*

Quum subito clamor tubarumque sonus (jam enim prope vallum hostes erant) exauditur: inde, verso repente in iram luctu, discurrere ad arma: ac, velut accensi rabie, discurrunt ad portas, et in hostem, negligenter atque incomposite venientem, incurront. Extemplo improvisa res pavorem incutit Pœnis; mirabundique unde tot hostes tam subito exorti prope deleto exercitu forent, unde tanta audacia, tanta fiducia sui victis ac fugatis, quis imperator duobus Scipionibus cæsis extitisset, quis castris præesset, quis signum dedisset pugnæ, ad hæc tot tam necopinata, primo omnium incerti stupentesque referunt pedem: dein, valida impressione pulsi, terga vertunt. Et aut fugientium cædes fœda fuisset, aut temerarius periculosusque sequentium impetus, ni Marcus propere receptui dedisset signum, obsistensque ad prima signa, quosdam et ipse retinens, concitatam repressisset aciem: inde in castra avidos adhuc cædisque et sanguinis reduxit. Karthaginienses, trepide primo ab hostium vallo acti, postquam neminem insequi viderunt, metu substitisse rati, contemtim rurus et sedato gradu in castra abeunt. Par negligencia in castris custodiendis fuit: nam, etsi propinquus hostis erat, tamen reliquias eum esse duorum exercituum ante paucos dies deletorum subcurrebat.

Ob hoc quum omnia neglecta apud hostes essent, exploratis iis, Marcus ad consilium, prima specie temerarium magis, quam audax, animum adjecit, ut ultro castra hostium obpugnaret; facilius esse ratus, unius Hasdrubalis expugnari castra, quam, si se rurus tres exercitus ac tres duces juxxissent, sua de-

Marcus
statuit ob-
pugnare
castra
hostium.

fendi: simul aut, si successisset cœptis, recepturum U. C. 540.
se adflictas res; aut, si pulsus esset, tamen ultiro in- A. C. 212.
ferendo arma, contemtum sui demturum.

XXXVIII. Ne tamen subita res et nocturnus ter-
ror etiam non suæ fortunæ consilium perturbaret,
adloquendos adhortandosque sibi milites ratus, con-
cione advocata ita disseruit: *Vel mea erga impe- Ejus oratio
ratores nostros viros mortuosque pietas, vel præsens ad milites.
omnium nostrum, milites, fortuna fidem cuivis facere
potest, mihi hoc imperium, ut amplum judicio vestro,
ita re ipsa grave ac sollicitum esse. Quo enim tempore,
nisi metus mærorem obstupefaceret, vix ita compos mei
essem, ut aliqua solatia invenire ægro animo possem;*
*cogor vestram omnium vicem (quod difficillimum in
luctu est) unus consulcre: et ne tum quidem, ubi, quo-
nam modo has reliquias duorum exercituum patriæ con-
serrare possim, cogitandum est, avertere animum ab
adsiduo mærore libet. Prasto est enim acerba memoria,
et Scipiones me amba dies noctesque curis insomniisque
agitant, et excitant sape somno; neu se, neu invictos
per octo annos in his terris milites suos, commilitones
vestros, neu rempublicam patiar inultam, et suam dis-
ciplinam suaque instituta sequi jubent: et, ut imperiis
vivorum nemo obedientior me uno fuerit, ita post mor-
tem suam, quod quaque in re facturos illos fuisse ma-
xime censem, id optimum ducere. Vos quoque velim,
milites, non lamentis lacrimisque tamquam extinctos
prosequi, (virunt vigentque fama rerum gestarum) sed
quotiescumque obcurret memoria illorum, velut si ad-
hortantes signumque dantes rideatis eos, ita prælia inire.
Nec alia profecto species, hesterno die oculis animisque
vestris oblata, memorabile illud edidit prælium: quo
documentum dedistis hostibus, non cum Scipionibus ex-*

U. C. 540. *stinctum esse nomen Romanum: et, cuius populi vis*
 A. C. 212. *atque virtus non obruta sit Cannensi clade, ex omni*
projecto sævitia fortunæ emersuram esse. Nunc, quia
tantum ausi estis sponte vestra, experiri libet, quantum
audeatis duce vestro auctore: non enim hesterno die,
quum signum receptui dedi sequentibus effuse vobis tur-
batum hostem, frangere audaciam vestram, sed differre
in majorem gloriam atque opportunitatem, volui: ut
postmodo præparati incautos, armati inermes, atque
etiam sopitos, per occasionem adgredi possetis. Nec
hujus occasionis spem, milites, forte temere, sed ex re
ipsa conceptam habeo. A vobis quoque projecto si quis
querat, quonam modo pauci a multis, victi a victori-
bus castra tutati sitis; nihil aliud respondeatis, quam
id ipsum timentes vos omnia et operibus firmata habuisse,
et ipsos paratos instructosque fuisse. Et ita se res ha-
bet: ad id, quod, ne timeatur, fortuna facit, minime
tuti sunt homines: quia, quod neglexeris, incautum at-
que apertum habeas. Nihil omnium nunc minus me-
tuunt hostes, quam ne obsessi modo ipsi atque obpug-
nati castra sua ultro obpugnemus. Audeamus, quod
*credi non potest ausuros nos: eo ipso, quod difficilim-
 um videtur, facillimum erit. Tertia vigilia noctis si-
 lenti agmine ducam vos: exploratum habeo, non vi-
 giliarum ordinem, non stationes justas esse. Clamor in*
portis auditus et primus impetus castra ceperit: tum
inter torpidos somno, paventesque ad necopinatum tu-
mulum, et inermes in cubilibus suis obpressos, illa cæ-
*des edatur, a qua vos hesterno die revocatos ægre fere-
 batis. Scio, audax videri consilium: sed in rebus as-*
peris et tenui spe fortissima quæque consilia tutissima
sunt: quia, si in occasionis momento, cuius prætervolat
opportunitas, cunctatus paullum fueris, nequidquam

*mox omissam quæras. Unus exercitus in propinquuo est : U. C. 540.
duo haud procul absunt : nunc adgradientibus spes ali- A. C. 212.
qua est : et jam tentastis vestras atque illorum vires.
Si diem proferimus, et hesternæ eruptionis fama con-
temni desierimus, periculum est, ne omnes duces, omnes
copiæ conveniant. Tres deinde duces, tres exercitus
sustinebimus hostium, quos Cn. Scipio incolumi exercitu
non sustinuit ? Ut dividendo copias periere duces nostri,
ita separati ac divisi obprimi possunt hostes : alia belli
gerendi via nulla est : proinde nihil, præter noctis pro-
ximæ opportunitatem, exspectemus. Ite, Deis bene ju-
vantibus, corpora curate, ut integri vigentesque eodem
animo in castra hostium intrumpatis, quo vestra tutati
estis. Læti et audiere ab novo duce novum con-
silium, et, quo audacius erat, magis placebat : reli-
quum diei expediendis armis et curatione corporum
consumtum : et major pars noctis quieti data est :
quarta vigilia movere.*

XXXIX. Erant ultra proxima castra sex millium Castra Has-
intervallo distantes aliæ copiæ Pœnorum. Vallis drubalis ca-
cava intererat, condensa arboribus : in hujus silvæ
medio ferme spatio cohors Romana arte Punica ab-
ditur, et equites. Ita medio itinere intercepto, ce-
teræ copiæ silenti agmine ad proximos hostes ductæ :
et, quum statio nulla pro portis, neque in vallo cus-
todiæ essent, velut in sua castra, nullo usquam ob-
sistente, penetravere. Inde signa canunt, et tollitur
clamor. Pars semisomnos hostes cœdunt : pars ignes
casis, stramento arido tectis, injiciunt : pars
portas occupant, ut fugam intercludant. Hostes si-
mul ignis, clamor, cœdes, velut alienatos sensibus,
nec audire, nec providere quidquam sinunt : inci-
dunt inermes inter catervas armatorum ; alii ruunt

U. C. 540. ad portas, alii obseptis itineribus super vallum sa-

A. C. 212. liunt: et, ut quisque evaserat, protinus ad castra altera fugiunt: ubi ab cohorte et equitibus ex occulto procurrentibus circumventi, cæsique ad unum omnes sunt: quamquam, etiam si quis ex ea cæde effugisset, adeo raptim captis proprioribus castris in altera transcursum castra ab Romanis est, ut prævenire nuncius cladis non posset. Ibi vero, quo longius ab hoste aberant, et quia sub lucem pabulatum, lignatum, et prædatum quidam dilapsi fuerant, neglecta magis omnia ac soluta invenere: arma tantum in stationibus posita: milites inermes, aut humi sedentes adcubantesque, aut obambulantes ante vallum

Altera etiam castra capta. portasque. Cum his tam securis solutisque Romani, calentes adhuc ab recenti pugna, feroceisque victoria, prælrium ineunt. Itaque nequaquam resisti in portis potuit: intra portas, concursu ex totis castris ad primum clamorem et tumultum facto, atrox prælrium oritur: dinque tenuisset, ni cruenta scuta Romanorum visa, indicium alterius cladis Pœnis, atque inde pavorem injecissent. Hic terror in fugam avertit omnes: effusique, qua iter est, nisi quos cædes obpressit, exiuntur castris. Ita nocte ac die bina castra hostium expugnata ductu L. Marcii. Ad triginta septem millia hostium cæsa, auctor est Claudius, qui annales Acilianos ex Graeco in Latinum sermonem vertit: captos ad mille octingentos triginta: prædam ingentem partam: in ea fuisse clipeum argenteum pondo centum triginta octo, cum imagine Barcini Hasdrubalis. Valerius Antias una castra Magonis capta tradit, septem millia cæsa hostium: altero prælio, eruptione pugnatum cum Hasdrubale: decem millia occisa, quatuor millia trecentos triginta

captos. Piso quinque millia hominum, quum Mago U. C. 540. cedentes nostros effuse sequeretur, cæsa ex insidiis A. C. 212. scribit. Apud omnes magnum nomen Marcii ducis est: et veræ gloriæ ejus etiam miracula addunt: flamمام ei concessionati fusam e capite, sine ipsius sensu, cum magno pavore circumstantium militum: monumentumque victoriarum ejus de Pœnis, usque ad incensum Capitolium, fuisse in templo clipeum, Marciū adpellatum, cum imagine Hasdrubalis. Quietæ deinde aliquamdiu in Hispania res fuere, utrisque, post tantas acceptas in vicem inlatasque clades, cunctantibus periculum summæ rerum facere.

XL. Dum hæc in Hispania geruntur, Marcellus, Spolia Sy-captis Syracusis, quum cetera in Sicilia tanta fide racusis Ro-mam de- atque integritate composuisset, ut non modo suam vecta. gloriam, sed etiam maje-tatem populi Romani, au- geret; ornamenta urbis, signa, tabulasque, quibus abundabant Syracusæ, Roniam devexit. Hostium quidem illa spolia, et parta belli jure: ceterum inde primum initium mirandi Græcarum artium opera, licentiæque huic sacra profanaque omnia vulgo spo-liandi factum est: quæ postremo in Romanos Deos, templum id ipsum primum, quod a Marcello eximie ornatum est, vertit. Visebantur enim ab externis ad portam Capenam dedicata a Marcello templa, propter excellentia ejus generis ornamenta, quorum perexigua pars comparet. Legationes omnium ferme civitatum Siciliæ ad eum conveniebant. Dispar ut caussa earum, ita conditio erat: qui ante captas Syracusas aut non desciverant, aut redierant in amicitiam, ut socii fideles accepti cultique: quos metus post captas Syracusas dediderat, ut victi a victore leges acceperint. Erant tamen haud parvæ reli-

U.C. 540. quiæ belli circa Agrigentum Romanis . Epicydes et A.C. 212. Hanno duces reliqui prioris belli, et tertius novus Mutines novus Pœ. ab Hannibale in locum Hippocratis missus, Liby-
norum in phœnicum generis Hipponiates, (Mutinem popula-
res vocabant) vir inpiger, et sub Hannibale ma-
gistro omnes belli artes edoctus. Huic ab Epicyde
et Hannone Numidæ dati auxiliares : cum quibus
ita pervagatus est hostium agros, ita socios ad reti-
nendos in fide animos eorum, ferendoque in tempore
cuique auxilium, adiit, ut brevi tempore totam Sici-
liam inpleret nominis sui, nec spes alia major apud
faventes rebus Karthaginiensium esset. Itaque in-
clusi ad tempus mœnibus Agrigenti dux Pœnus Sy-
racusanusque, non consilio Mutinis, quam fiducia,
magis ausi egredi extra muros, ad Himeram amnem
posuerunt castra. Quod ubi perlatum ad Marcellum
est, extemplo copias movit ; et ab hoste quatuor
ferme millium intervallo consedit, quid agerent pa-

Terret Ro- rarentve exspectaturus. Sed nullum neque locum,
manos. neque tempus cunctationi consiliove dedit Mutines,
transgressus amnein, ac stationibus hostium cum
ingenti terrore ac tumultu invectus. Postero die
prope justo prælio compulit hostem intra munimenta : inde revocatus seditione Numidarum in castris
facta, quum trecenti ferme eorum Heracleam Mino-
am concessissent, ad mitigandos revocandosque eos
profectus, magnopere monuisse duces dicitur, ne ab-
sente se cum hoste manus consererent. Id ambo
ægre passi duces, magis Hanno, jam ante anxius
gloria ejus : *Mutinem sibi modum facere, degenerem*
Afrum imperatori Karthaginiensi, misso ab senatu po-
puloque. Is perpulit cunctantem Epicydem, ut,
transgressi flumen, in aciem exirent : nam si Muti-

uem opperirentur, et secunda pugnæ fortuna evenis- U.C. 540.
set, haud dubie Mutinis gloriā fore. A.C. 212.

XLI. *Enimvero indignum ratus Marcellus se, qui Hannibalem subnisum victoria Cannensi ab Nola repulisset, his terra marique victis ab se hostibusmittitur. Eo absente, proli-*

cedere, arma propere capere milites, et efferri signa jubet. Instruenti exercitum decem effusis equis advolant ex hostium acie Numidæ, nunciantes, populares suos, primum ea seditione motos, qua trecenti ex numero suo concesserint Heracleam, dein quod præfectum suum ab obtractantibus ducibus gloriæ ejus, sub ipsam certaminis diem, ablegatum videant, quieturos in pugna. Gens fallax promissi fidem Vincuntur præsttit: itaque et Romanis crevit animus, nuncio Pœni. celeri per ordines misso, destitutum ab equite hostem esse, quem maxime timuerant: et territi hostes, præterquam quod maxima parte virium suarum non juvabantur, timore etiam incusso, ne ab suo et ipsi equite oppugnarentur. Itaque haud magni certaminis fuit: primus clamor atque impetus rem decrevit. Numidæ, quum in concursu quieti stetissent in cornibus, ut terga dantes suos viderunt, fugæ tantum parumper comites facti, postquam omnes Agrigentum trepido agmine petentes viderunt, ipsi metu obsidionis passim in civitates proximas dilapsi. Multa millia hominum cæsa captaque, et octo elephanti. Hæc ultima in Sicilia Marcelli pugna fuit: victor inde Syracusas rediit. Jani ferme in exitu annus erat: itaque senatus Romæ decrevit, ut P. Cornelius prætor literas Capuam ad consules mitteret; dum Hannibal procul abesset, nec ulla magni discriminis res ad Capuam gereretur, alter eorum, si ita videretur, ad magistratus subrogandos Romanam veni-

U. C. 540. ret. Literis acceptis, inter se consules compararunt,
A. C. 212. ut Claudius comitia perficeret, Fulvius ad Capuam
maneret. Consules Claudius creavit Cn. Fulvium
Centumalum et P. Sulpicium Servii filium Galbam,
qui nullum antea curulem magistratum gessisset.
Prætores deinde creati, L. Cornelius Lentulus, M.
Cornelius Cethagus, C. Sulpicius, C. Calpurnius
Piso. Pisoni jurisdictio urbana, Sulpicio Sicilia,
Cethego Apulia, Lentulo Sardinia evenit. Consuli-
bus prorogatum in annum imperium est.

EPITOME LIBRI XXVI.

HANNIBAL ad tertium ab urbe Roma lapidem super Anienem castra posuit: ipse vero cum duobus millibus equitum usque ad ipsam Capenam portam, ut urbis situm exploraret, obequitavit: et quum per triduum in aciem utrimque exercitus omnis descendisset, certamen tempestas diremit: nam quum in castra rediissent, statim serenitas erat. Capua capta est a Q. Fulvio et Ap. Claudio consulibus. Principes Campanorum veneno sibi consiverunt mortem. Quum senatus Campanorum delegatus esset ad palos, ut securi feriretur; literas a senatu missas Q. Fulvius consul, quibus jubebatur parcere, antequam legeret, in sinu posuit, et lege agi jussit, et supplicium peregit. Quum in comitiis apud populum quereretur, cui mandaretur Hispaniarum imperium; nullo id volente suscipere, P. Scipio, P. filius, qui in Hispania ceciderat, professus est se iturum: et, suffragio populi consensuque omnium missus, Novam Karthaginem uno die expugnavit, quum ageret vigesimum quartum annum, videreturque divina stirpe creatus: quoniam et ipse, postquam togam accepérat, quotidie in Capitolio erat; et in cubiculo matris ejus anguis sæpenumero ridebatur. Res præterea in Sicilia gestas continet, et amicitiam cum Aetolis junctam, bellumque gestum adversus Acarnanas et Philippum Macedoniæ regem.

T. LIVII PATAVINI

LIBER XXVI.

U. C. 541. A. C. 211. **C**N. Fulvius Centumalus, P. Sulpicius Galba consules, quum idibus Martiis magistratum insissent, senatu in Capitolium vocato, de republica, de administratione belli, de provinciis exercitibusque Patres consuluerunt. Q. Fulvio, Ap. Claudio, prioris anni consulibus, prorogatum imperium est; atque exercitus, quos habebant, decreti: adjectumque, ne a Capua, quam obsidebant, abscederent, priusquam expugnassent. Ea tum cura maxime intentos habebat Romanos: non ab ira tantum, quæ in nullam unquam civitatem justior fuit, quam quod urbs tam nobilis ac potens, sicut defectione sua traxerat aliquot populos, ita recepta inclinatura rursus animos videbatur ad veteris imperii respectum. Et prætoribus prioris anni, M. Junio in Etruria, P. Sempronio in Gallia, cum binis legionibus, quas habuerant, prorogatum est imperium: prorogatum et M. Marcello, ut pro consule in Sicilia reliqua belli perficeret eo exercitu, quem haberet: si supplemento opus esset, suppleret de legionibus, quibus P. Cornelius proprætor in Sicilia præasset: dum ne quem militem legeret ex eo numero, quibus senatus missio nem redditumque in patriam negasset ante belli finem. C. Sulpicio, cui Sicilia evenerat, due legiones, quas

P. Cornelius habuisset, decretæ : et supplementum U. C. 541,
 de exercitu Cn. Fulvii, qui priore anno in Apulia A. C. 211.
 fœde cæsus fugatusque erat. Huic generi militum
 senatus eundem, quem Cannensibus, finem statue-
 rat militiae : additum etiam utrorumque ignominiae
 est, ne in oppidis hibernarent, neve hiberna propius
 ullam urbem decem millibus passuum ædificarent.
L. Cornelio in Sardinia duæ legiones datae, quibus
Q. Mucius præfuerat : supplementum, si opus esset,
 consules scribere jussi. T. Otacilio et M. Valerio
 Siciliæ Græciæque ora cum legionibus classibusque,
 quibus præerant, decretæ. Quinquaginta Græci cum
 legione una, centum Siculi cum duabus legionibus
 habebant naves. Tribus et viginti legionibus Ro-
 manis eo anno bellum terra marique est gestum.

II. Principio ejus anni quum de literis L. Marcii Literæ
 referretur, res gestæ magnificæ senatui visæ : titu-
 lus honoris (quod, imperio non populi jussu, non ex
 auctoritate Patrum dato, *Proprætor senatui*, scripse-
 rat) magnam partem hominum obfendebat. Rem
 mali exempli esse, imperatores legi ab exercitibus :
 et sollempne auspicatorum comitiorum in castra et
 provincias, procul ab legibus magistratibusque, ad
 militarem temeritatem transferri : et, quum quidam
 referendum ad senatum censerent, melius visum dif-
 ferri eam consultationem, donec proficiscerentur
 equites, qui ab Marcio literas adtulerant. Rescribi
 de frumento et vestimentis exercitus placuit : *eam*
utramque rem curæ fore senatui : adscribi autem,
Proprætori L. Marcio, non placuit : ne id ipsum,
 quod consultationi reliquerant, pro præjudicato fer-
 ret. Dimissis equitibus, de nulla re prius consules
 retulerunt, omniumque in unum sententiæ congru-

U. C. 541. ebant, agendum cum tribunis plebis esse, primoe
 A. C. 211. quoque tempore ad plebem ferrent, quem cum imperio mitti placeret in Hispaniam ad eum exercitum, cui Cn. Scipio imperator præfuisset. Ea res cum tribunis acta promulgataque est. Sed aliud certamen occupaverat animos. C. Sempronius Blæ-

Cn. Fulvius accu-
 satur. sus die dicta Cn. Fulvium, ob exercitum in Apulia amissum, in concionibus vexabat : *multos imperatores temeritate atque inscientia exercitum in locum præcipitem perduxisse dictitans : neminem, præter Cn. Fulvium, ante conrupisse omnibus vitiis legiones suas, quam proderet : itaque vere dici posse, prius eos perisse, quam viderent hostem ; nec ab Hannibale, sed ab imperatore suo, victos esse. Neminem, quum suffragium ineat, satis cernere, cui imperium, cui exercitum permittat.* Quid interfuisse inter Ti. Sempronium ? Quum ei servorum exercitus datus esset, brevi effecisse disciplina atque imperio, ut nemo eorum generis ac sanguinis sui memor in acie esset, præsidio sociis, hostibus terrori essent : Cumas, Beneventum, aliasque urbes eos velut e faucibus Hannibalis ereptas populo Romano restituisse. Cn. Fulvium Quiritium Romanorum exercitum, honeste genitos, liberaliter educatos, servilibus vitiis inbuisse : ergo effecisse, ut feroce et inquieti inter socios, ignavi et inbelles inter hostes essent, nec impetum modo Pænorum, sed ne clamorem quidem sustinere possent. Nec, Hercule, mirum esse, milites in acie non stetisse, quum primus omnium imperator fugeret : magis mirari se, aliquos stantes cecidisse, et non omnes comites Cn. Fulvii fuisse pavoris ac fugæ. C. Flaminium, L. Paullum, L. Postumium, Cn. ac P. Scipiones cadere in acie maluisse, quam deserere circumventos exercitus. Cn. Fulvium prope unum nuncium deleti

exercitus Romam redisse. Facinus indignum esse, Can- U. C. 541.
nensem exercitum, quod ex acie fugerit, in Siciliam de- A. C. 211.
portatum, ne prius inde dimittatur, quam hostis ex
Italia decesserit, et hoc idem in Cn. Fulvii legionibus
nuper decretum: Cn. Fulvio fugam ex prælio, ipsius
temeritate commisso, inpunitam esse: et eum in ganea
lustrisque, ubi juventam egerit, senectutem acturum:
milites, qui nihil aliud peccaverint, quam quod impe-
ratoris similes fuerint, relegatos prope in exsilium, ig-
nominiosam pati militiam: adeo inparem libertatem
Romæ diti ac pauperi, honorato atque inhonorato esse.

III. Reus ab se culpam in milites transferebat: Se defendit.
Eos ferociter pugnam poscentes productos in aciem,
non eo, quo voluerint, (quia serum diei fuerit) sed
postero die, et tempore et loco æquo instructos, seu fa-
mam, seu vim hostium non sustinuisse. Quum effuse
omnes fugerent, se quoque turba ablatum; ut Farro-
nen Cannensi pugna, ut multos alios imperatores. Qui
autem solum se restantem prodesse reipublicæ, nisi si
mors sua remedio publicis cladibus futura esset, potu-
isse? Non se inopia commicatus, non in loca iniqua
incaute deductum, non agmine inexplorato euntem in-
sidiis circumventum: ri aperta, armis, acie victum:
nec suorum animos, nec hostium, in potestate habuisse:
suum cuique ingenium audaciam aut pavorem facere.
Bis est accusatus, pecuniaque anquisitum: tertio,
testibus datis, quum, præterquam quod omnibus
probris onerabatur, jurati permulti dicerent, fugæ
pavorisque initium a prætore ortum; ab eo desertos
milites, quum haud vanum timorem ducis crederent,
terga dedisse; tanta ira accensa est, ut capite an-
quirendum concio subclamaret. De eo quoque no-
vum certamen ortum: nam, quum tribunus bis pe-

U. C. 541. **cunia anquisisset, tertio capit is se anquirere diceret;**
 A. C. 211. **tribuni plebis adpellati, collegæ, negarunt, se in mora
 esse, quo minus, quod ei more majorum permissum
 esset, seu legibus, seu moribus mallet, anquireret, quoad
 vel capit is, vel pecuniae judicasset privato.** Tum Sem-
 pronius, perduellionis se judicare **Cn. Fulvio**, dixit,
 diemque comitiis ab C. Calpurnio prætore urbis pe-
 tit. Inde alia spes ab reo tentata est: si adesse in
 iudicio **Q. Fulvius** frater posset, florens tum et fama
 rerum gestarum, et propinqua spe Capuae potiundæ.

It in exsi- Id quum per literas miserabiliter pro fratribus capite
 lum. scriptas petisset Fulvius, negassentque Patres e re-
 publica esse, abscedi a Capua; postquam dies co-
 mitiorum aderat, **Cn. Fulvius** exsulatum Tarquinios
 abiit: id ei justum exsilium esse, scivit plebs.

Capuae
 arctior ob-
 sidio.

IV. Inter hæc vis omnis belli versa in Capuam
 erat: obsidebatur tamen acrius, quam obpugnaba-
 tur: nec aut famiem tolerare servitia ac plebs pote-
 rant, aut mittere nuncios ad Hannibalem per custo-
 dias tanæ artas. Inventus est Numida, qui, acceptis
 literis, evasurum se professus, ut promissum præsta-
 ret, per media Romana castra nocte egressus, spem
 accedit Campanis, dum aliquid virium superesset,
 ab omni parte eruptionem tentandi. Ceterum in
 multis certaminibus equestria proelia ferme prospera
 faciebant: pedites superabantur: sed nequaquam
 tam lætum vincere, quam triste vinci ulla parte erat
 ab obsesso et prope expugnato hoste. Initæ tandem
 ratio est, ut, quod viribus deerat, arte æquaretur:
 ex omnibus legionibus electi sunt juvenes, maxime
 vigore ac levitate corporum veloces: eis parmæ bre-
 viores, quam equestres, et septena jacula quaternos
 longa pedes data, præfixa ferro, quale hastis velita-

ribus inest: eos singulos in equos suos accipientes U. C. 541.
 Aequites adsuefecerunt, et vehi post sese, et desilire
 perniciter, ubi signum datum esset. Postquam ad-
 suetudine quotidiana satis intrepide visum est fieri,
 in campum, qui medius inter castra murumque erat,
 adversus instructos Campanorum equites processe-
 runt: et, ubi ad conjectum teli ventum est, signo
 dato velites desiliunt: pedestris inde acies ex equi-
 tatu repente in hostium equites incurrit: jaculaque
 cum inpetu alia super alia emittunt. Quibus plurimis
 in equos virosque passim conjectis permultos vulne-
 raverunt: pavoris tamen plus ex re nova atque ino-
 pinata injectum est, et in perculsum hostem equites
 innecti, fugam stragemque eorum usque ad portas
 fecerunt. Inde equitatu quoque superior Romana
 res fuit. Institutum, ut velites in legionibus essent. Velites in
 Auctorem peditum equiti in miscendorum centurio-
 nem Q. Navium ferunt, honorique id ei apud impe-
 ratorem fuisse.

V. Quum in hoc statu ad Capuam res essent,
 Hannibalem diversum Tarentinæ arcis potiundæ Hannibal
 Capuæque retinendæ trahebant curæ: vicit tamen ^{ad Capu-}
 respectus Capuæ, in quam omnium sociorum hosti-
 umque conversos videbat animos; documento futu-
 ræ, qualemcumque eventum defectio ab Romanis
 habuisset. Igitur, magna parte impedimentorum re-
 lectis peditum equitumque, quam poterat aptissimis
 ad maturandum iter, in Campaniam contendit: se-
 cuti tamen tam raptim euntem tres et triginta ele-
 phanti. In valle occulta post Tifata montem inmi-
 nentem Capuæ consedit. Adveniens quum castellum
 Galatiam, præsidio vi pulso, cepisset, in circumse-

U.C. 541. dentes Capuam se vertit: præmissis ante nunciis
A.C. 211. Capuam, quo tempore castra Romana adgressurus
Prœlium. esset, ut eodem et illi, ad eruptionem parati, portis
omnibus sese effunderent, ingentem præbuit terro-
rem: nam alia parte ipse adortus est; alia Campani
omnes, pedites equitesque, et cum iis Punicum præ-
sidium, cui Bostar et Hanno præerant, erupit. Ro-
mani, ut in re trepida, ne ad unam concurrendo
partem aliquid indefensi reclinerent, ita inter se
corias partiti sunt. Ap. Claudius Campanis, Ful-
vius Hannibali est obpositus. C. Nero proprætor
cum equitibus sextæ legionis via, quæ Suessulam
fert; C. Fulvius Flaccus legatus cum sociali equi-
tatu constitutus e regione Vulturni amnis. Prœlium
non solito modo clamore ac tumultu est cœptum,
sed, ad alium virorum, equorum, armorumque so-
num, disposita in muris Campanorum inbellis mul-
titudo tantum cum æris crepitu, qualis in defectu
lunæ silenti nocte cieri solet, edidit clamorem, ut
averteret etiam pugnantium animos. Campanos fa-
cile a vallo Appius arcebat. Major vis ab altera
parte Fulvium, Hannibal et Pœni, urgebant: legio
ibi sexta loco cessit: qua pulsa, cohors Hispano-
rum cum tribus elephantis usque ad vallum pervasit:
ruperatque medianam aciem Romanorum, et in anci-
piti spe ac periculo erat, utrum in castra perrumpe-
ret, an intercluderetur a suis. Quem pavorem legio-
nis periculumque castrorum Fulvius ubi vidit, Q.
Navium primoresque alios centurionum hortatur, *ut*
cokortem hostium sub vallo pugnantem invadant: in
sunmo discrimine rem verti: aut viam dandam iis esse,
et minore conatu, quam condensam aciem inrupissent,
in castra inrupturos: aut conficiendos sub vallo esse.

*Nec magni certaminis rem fore : paucos esse, et ab suis U. C. 541.
interclusos ; et quæ, dum paveat Romanus, interrupta A. C. 211.
acies videatur, eam, si se utrimque in hostem vertat,
ancipi pugna medios circumventuram.* Navius ubi
hæc imperatoris dicta accepit, secundi hastati sig-
num ademtum signifero in hostes infert ; jacturum
in medios eos minitans, ni se propere sequantur mi-
litæ, et partem capessant pugnæ. Ingens corpus
erat, et arma honestabant ; et sublatum alte signum
converterat ad spectaculum cives hostesque : cete-
rum, postquam jam ad signa pervenerat Hispano-
rum, tum undique in eum tragulæ conjectæ, et prope
tota in unum acies versa : sed neque hostium multi-
tudo, neque telorum vis arcere inpetum ejus viri po-
tuerunt.

VI. Et M. Atilius legatus, primi principis ex ea-
dem legione signum inferri in cohortem Hispano-
rum coëgit. Et, qui castris præerant, L. Porcius
Licinus et T. Popillius legati pro vallo acriter pro-
pugnant, elephantosque transgredientes in ipso vallo
conficiunt : quorum corporibus quum oppleta esset
fossa, velut aggere aut ponte injecto, transitum hos-
tibus dedit. Ibi per stragem jacentium elephanto-
rum atrox edita cædes. Altera in parte castrorum
jam inpulsi erant Campani Punicumque præsidium,
et sub ipsa porta Capuæ, quæ Vulturum fert, pug-
nabatur : neque tam armati inrumpentibus Romanis
resistebant, quam quod porta, ballistik scorponibus-
que instructa, missilibus procul hostes arcebat : et
subpressit inpetum Romanorum vulnus imperatoris
Ap. Claudii : cui, suos ante prima signa adhortanti,
sub lævo humero summum pectus gæso ictum est.
Magna tamen vis hostium ante portam est cæsa :

U. C. 541. ceteri trepidi in urbem compulsi. Et Hannibal,
 A. C. 211. Hannibal postquam cohortis Hispanorum stragem vidit, sum-
 recipit sig- maque vi castra hostium defendi, omissa obpugna-
 na. tione, recipere signa, et convertere agmen peditum,
 objecto a tergo equitatu, ne hostis instaret, cœpit.
 Legionum ardor ingens ad hostem insequendum fuit:
 sed Flaccus receptui cani jussit; satis ad utrumque
 profectum ratus, ut et Campani, quam haud mul-
 tum in Hannibale præsidii esset, et ipse Hannibal
 sentiret. Cæsa eo die, qui hujus pugnæ auctores
 sunt, octo millia hominum de Hannibalis exercitu,
 tria ex Campanis tradunt; signaque Karthaginien-
 sibus quindecim ademta, duodeviginti Campanis.
 Apud alios nequaquam tantam molem pugnæ in-
 veni, plusque pavoris, quam certaminis, fuisse:
 quum inopinato in castra Romana Numidæ Hispa-
 nique cum elephantis intrupissent; elephanti, per
 media castra vadentes, stragem tabernaculorum in-
 genti sonitu ac fugam abrumpentium vincula ju-
 mentorum facerent; fraudem quoque super tumultu-
 um adjectam, inmissis ab Hannibale, qui (habuit
 aliquot) gnari Latinæ linguæ juberent consulum
 verbis, quoniam amissa castra essent, pro se quem-
 que militum in proximos montes fugere: sed eam
 celeriter cognitam fraudem, obpressamque magna
 cæde hostium; elephantos igni e castris exactos.
 Hoc ultimum (utcumque initum finitumque est) ante
 deditio- Seppius Lesius Me-
 nem- dixtuticus
 Capuæ. nus capuæ.
 ditionem Capuæ prælium fuit. Medixtuticus, qui
 summus magistratus apud Campanos est, eo anno
 Seppius Lesius erat, loco obscuero tenuique fortuna
 ortus. Matrem ejus quondam, pro pupillo eo pro-
 curantem familiare ostentum, quum respondisset
 aruspex, summum quod esset imperium Capuæ, per-

venturum ad eum puerum, nihil ad eam spem ag- U.C. 541.
noscentem, dixisse ferunt, *Næ tu perditas res Cam-* A.C. 211.
panorum narras, ubi summus honos ad filium meum
perveniet! Ea ludificatio veri, et ipsa in verum ver-
tit: nam quum fame ferroque urgerentur, nec spes
ulla superesset, iis, qui nati in spem honorum erant,
honores detractantibus; Lesius, querendo desertam
ac proditam a primoribus Capuam, sumnum ma-
gistratum ultimus omnium Campanorum cepit.

VII. Ceterum Hannibal, ut nec hostes elici amplius ad pugnam vidi, nec per castra eorum per-
rumpi ad Capuam posse, ne suos quoque commeat-
tus intercluderent novi consules, abscedere irrito
incepto, et movere a Capua statuit castra. Multa
secum, quoniam inde ire pergeret, volventi subiit
animum inpetus, caput ipsum belli Romam petendi:
cujus rei semper cupidæ prætermissam occasionem
post Cannensem pugnam et alii vulgo fremebant, et
ipse non dissimulabat: *nec opinato pavore ac tumultu,* Hannibal
non esse desperandum, aliquam partem urbis occupari Romam
posse; et, si Roma in discrimine esset, Capuam exten- petere sta-
plo omissuros aut ambo imperatores Romanos, aut al-
terum ex iis: et, si divisissent copias, utrumque infir-
miorem factum aut sibi, aut Campanis, bene gerendæ
rei fortunam daturos esse. Una ea cura angebat, ne,
ubi abscessisset, exemplo dederentur Campani. Nu-
midam promtum ad omnia audenda donis perlicit,
ut, literis acceptis, specie transfugæ castra Roma-
na ingressus, altera parte Capuam clam pervadat.
Literæ autem erant adhortatione plenæ. *Profec-*
tionem suam, quæ salutaris illis foret, abstracturam
ad defendendam Romam ab obpugnanda Capua duces
atque exercitus Romanos. Ne desponderent animos:

U. C. 541. *tolerando paucos dies, totam soluturos obsidionem.* Inde
 A. C. 211. naves in flumine Vulturno comprehensas subigi ad
 id, quod jam ante præsidii caussa fecerat, castellum
 jussit. Quarum ubi tantam copiam esse, ut una
 nocte trajici posset exercitus, adlatum est, cibariis
 decem dierum præparatis, deductas nocte ad flumen
 legiones ante lucem trajecit.

Variae in
 senatu
 sententiae.

VIII. Id priusquam fieret, ita futurum comper-
 tum ex transfugis, Fulvius Flaccus senatui Romam
 quum scripsisset, varie hominum animi pro cuiusque
 ingenio affecti sunt. Ut in re tam trepida, senatu
 extemplo vocato, P. Cornelius, cui Asinæ cognomen
 erat, omnes duces exercitusque ex tota Italia, neque
 Capuæ, neque ullius alterius rei memor, ad urbis
 præsidium revocabat. Fabius Maximus, abscedi a
 Capua, terrerique et circumagi ad nutus commina-
 tionesque Hannibal, flagitosum ducebat. *Qui ad
 Cannas rictor ire tamen ad urbem ausus non esset,
 eum, a Capua repulsum, spem potiundæ urbis Romæ
 cepisse?* Non ad Romam obsidendarum, sed ad Capuæ
 liberandam obsidionem, ire. Romanum cum eo exercitu,
 qui ad urbem esset, Jorem, fæderum ruptorum ab Han-
 nibale testem, Deosque alios defensuros esse. Has di-
 versas sententias media sententia P. Valerii Flacci
 vicit : qui, utriusque rei memor, imperatoribus, qui
 ad Capuam essent, scribendum censuit, *Quid ad ur-
 bem præsidii esset, quantas autem Hannibal copias du-
 ceret, aut quanto exercitu ad Capuam obsidendarum opus
 esset, ipsos scire.* Si et Romam e ducibus alter, et ex-
 ercitus pars mitti posset, ut ab reliquo et duce et exer-
 citu Capua recte obsideretur ; inter se compararent
 Claudius Fulriusque, utri obsidenda Capua, utri, ad
 prohibendarum obsidione patriam, Romanum veniundum es-

set. Hoc senatusconsulto Capuam perlato, Q. Ful- U. C. 541.
 vius proconsul, cui, collega ex vulnere ægro, eun- A. C. 211.
 dum Romain erat, e tribus exercitibus milite elec- Fulvius a
 to, ad quindecim millia peditum, mille equites, Vul- Capua Ro-
 turnum traducit: inde quum Hannibalem Latina via mam revo-
 iturum satis comperisset, ipse per Appiæ municipia,
 quæque propter eam viam sunt, Setiam, Coram, La-
 nuvium præmisit, ut commeatus paratos et in urbi-
 bus haberent, et ex agris deviis in viam proferrent,
 præsidiaque in urbes contraherent, ut sua cuique
 respublica in manu esset.

IX. Hannibal, quo die Vulturnum est transgres-
 sus, haud procul a flumine castra posuit. Postero
 die præter Cales in agrum Sidicinum pervenit: ibi
 diem unum populando moratus, per Suessulam Alli-
 fanumque et Casinatem agrum via Latina dicit:
 sub Casinum biduo stativa habita et passim popula-
 tiones factæ. Inde, præter Interamnam Aquinum-
 que, in Fregellanum agrum ad Lirim fluvium ven-
 tum: ubi intercisum pontem a Fregellanis morandi
 itineris caussa invenit. Et Fulvium Vulturnus tenu-
 erat amnis, navibus ab Hannibale incensis, rates ad
 trajiciendum exercitum, in magna inopia materiæ,
 ægre comparantem. Trajecto ratibus exercitu, reli-
 quum Fulvio expeditum iter, non per urbes modo,
 sed circa viam, expositis benigne commeatibus, erat:
 alacresque milites alius alium, ut adderet gradum,
 memor ad defendendam ire patriam, hortabantur.
 Romam Fregellanus nuncius, dieni noctemque iti-
 nere continuato, ingentem adulitum terrorem: tumul-
 tuosius, quam adlatum erat, cursus hominum, ad-
 fingentium vana auditis, totam urben conciverat:
 ploratus mulierum non ex privatis solum domibus Tumultus
 Romæ.

U.C. 541. exaudiebatur; sed undique matronæ, in publicum
 A.C. 211. effusæ, circa Deūm delubra discurrunt, crinibus passis aras verrentes, nixæ genibus, supinas manus ad cœlum ac Deos tendentes, orantesque, ut urbem Romanam e manibus hostium eriperent; matresque Romanas et liberos parvos inviolatos servarent. Senatus magistratibus in foro præsto est, si quid consulere velint. Alii accipiunt imperia, disceduntque ad suas quisque officiorum partes: alii obferunt se, si quo usus operæ sit: præsidia in arce, in Capitolio, in muris, circa urbem, in monte etiam Albano atque arce Æsulana ponuntur. Inter hunc tumultum, Q. Fulvium proconsulem profectum cum exercitu a Capua adfertur; cui ne minueretur imperium, si in urbem venisset, decernit senatus, ut Q. Fulvio par cum consilibus imperium esset. Hannibal, infestius perpopulato agro Fregellano propter intercisos pontes, per Frusinatem Ferentinatemque et Anagninum agrum in Lavicanum venit: inde Algido Tusculum petiit: nec receptus mœnibus, infra Tusculum dextrorsus Gabios descendit: inde in Pupiniam exercitu demisso, octo millia passuum ab Roma posuit castra. Quo propius hostis accedebat, eo major cædes fiebat fugientium, præcedentibus Numidis: pluresque omnium generum atque ætatum capiebantur.

X. In hoc tumultu Fulvius Flaccus, porta Capena cum exercitu Romam ingressus, media urbe per Carinas Esquilias contendit: inde egressus, inter Esquilinam Collinamque portam posuit castra. Ædiles plebis commeatum eo comportarunt. Consules senatusque in castra venerunt: ibi de summa re-publica consultatum. Placuit, consules circa portas

Collinam Esquilineamque ponere castra : C. Calpur- U. C. 541.
 nium prætorem urbanum Capitolio atque arci præ- A. C. 211.
 esse : et senatum frequentem in foro contineri, si
 quid in tam subitis rebus consulto opus esset. Inter Hannibal
 hæc Hannibal ad Anienem fluvium, tria millia pas- ad Romam.
 suum ab urbe, castra admovit : ibi stativis positis,
 ipse cum duobus millibus equitum a porta Collina
 usque ad Herculis templum est progressus ; atque,
 unde proxime poterat, mœnia situmque urbis obe-
 quitans contemplabatur. Id eum tam licenter atque
 otiose facere, Flacco indignum visum est : itaque
 inmisit equites, submoverique atque in castra redigi
 hostium equitatum jussit. Quum commissum prœ-
 lium esset, consules transfugas Numidarum, qui tum
 in Aventino ad mille et ducentos erant, media urbe
 transire Esquilias jusserunt : nullos aptiores, inter
 convalles tectaque hortorum et sepultra aut cavae
 undique vias, ad pugnandum futuros rati : quos
 quum ex arce Capitolioque clivo publico in equis
 decurrentes quidam vidissent, captum Aventinum
 conclamaverunt. Ea res tantum tumultum ac fugam
 præbuit, ut, nisi castra Punica extra urbem fuissent,
 effusura se omnis pavida multitudo fuerit : tunc in
 domos atque in tecta refugiebant : vagosque in viis
 suos pro hostibus lapidibus telisque incessebant.
 Nec comprimi tumultus aperirique error poterat,
 refertis itineribus agrestium turba pecorumque, quæ
 repentinus pavor in urbem compulerat. Equestre
 prælium secundum fuit, submotique hostes sunt :
 et, quia multis locis comprimenti tumultus erant,
 qui temere oriebantur, placuit, omnes, qui dictato-
 res, consules, censoresve fuissent, cum imperio esse,
 donec recessisset a muris hostis. Et diei quod reli-

U.C. 541. quum fuit, et nocte insequenti, multi temere excitati
A.C. 211. tumultus sunt, compressique.

Instructas XI. Postero die transgressus Anienem Hannibal utrimque in aciem omnes copias eduxit : nec Flaccus consupestas di- lesque certamen detractavere. Instructis utrimque rimit.

exercitibus in ejus pugnæ casum, in qua urbs Roma victori præmium esset, imber ingens grandine mixtus ita utramque aciem turbavit, ut vix armis retentis in castra sese receperint, nullius rei minore, quam hostium, metu. Et postero die eodem loco acies instructas eadem tempestas diremit : ubi recepissent se in castra, mira serenitas cum tranquillitate oriebatur. In religionem ea res apud Pœnos versa est : auditaq; vox Hannibal's fertur, *Potiundæ sibi urbis Romæ modo mentem non dari, modo fortunam.* Minuere etiam spem ejus et aliæ, parva magna, res : magna illa, quod, quum ipse ad mœnia urbis Romæ armatus sederet, milites sub vexillis in supplementum Hispaniæ profectos audivit : parva autem, quod per eos dies eum forte agrum, in quo ipse castra haberet, venisse, nihil ob id deminuto pretio, cognitum ex quodam captivo est. Id vero adeo superbū atque indignū visum, ejus soli, quod ipse bello captum possideret haberetque, inventum Romæ emtorem ; ut, extemplo vocato præcone, tabernas argentarias, quæ circa forum Romanum tunc essent, jusserit venire. His motus ad Tu-

Recedit tiam fluvium castra retulit, sex millia passuum ab Hannibal. urbe : inde ad lucum Feroniæ pergit ire, templum ea

tempestate inclitum divitius. Capenates aliqui ad colæ ejus erant ; primitias frugum eo donaque alia pro copia portantes, multo auro argentoque id exornatum habebant. His omnibus donis tum spolia-

tum templum : æris acervi, quum rudera milites re- U. C. 541.
 ligione inducti jacerent, post profectionem Hanni- A. C. 211.
 balis magni inventi. Hujus populatio templi haud
 dubia inter scriptores est. Cœlius, Romani euntē
 ab Eretō divertisse eo Hannibalem, tradit : iterque
 ejus ab Reate, Cutiliisque, et ab Amiterno orditur :
 ex Campania in Samnium, inde in Pelignos perve-
 nisse ; præterque oppidum Sulmonem in Marrucinos
 transisse ; inde Albensi agro in Marsos, hinc Ami-
 ternum, Forulosque vicum venisse. Neque ibi error
 est, quod tanti exercitus vestigia intra tam brevis
 ævi memoriam potuerint confundi : isse enim ea
 constat. Tantum id interest, veneritne eo itinere
 ad urbem, an ab urbe in Campaniam redierit.

XII. Ceterum non quantum pertinaciæ ad pre- It Regin-
 mendam obsidione Capuam Romanis fuit, tantum ^{um.}
 ad defendendam Hannibali : namque ex Lucanis in
 Bruttiū agrum, ad fretum vero ac Reginum eo
 cursu contendit, ut prope repentina adventu incau-
 tos obpressoerit. Capua etsi nihilo segnius obsessa
 per eos dies fuerat, tamen adventum Flacci sensit :
 et admiratio orta est, non simul regressum Hanni-
 balem. Inde per conloquia intellexerunt, relictos se
 desertosque, et spem Capuae retinendæ deploratam
 apud Poenos esse. Accessit edictum proconsulis ex
 senatusconsulto propositum, vulgatumque apud hos-
 tes : *ut, qui civis Campanus ante certam diem transis-
 set, sine fraude esset.* Nec ulla faeta est transitio, Campano-
 metu magis eos, quam fide, continentē ; quia majora ^{rum de-}
 in defectione deliquerant, quam quibus ignosci pos-
 set. Ceterum quemadmodum nemo privato consilio
 ad hostem transibat, ita nihil salutare in medium
 consulebat. Nobilitas rempublicam deseruerat,

U. C. 541. neque in senatum cogi poterant : in magistratu au-

A. C. 211. tem erat, qui non sibi honorem adjecisset, sed indignitate sua vim ac jus magistratui, quem gerebat, demsisset. Jam ne in foro quidem, aut publico loco, principum quisquam adparebat : domibus inclusi patriæ occasum cum suo exitio in dies exspecta-

Literæ bant : summa curæ omnis in Bostarem Hannonem-
Bostaris et que præfectos præsidii Punici versa erat, suo, non
Hannonis ad Hanni- sociorum, periculo sollicitos. Hi, conscriptis ad
balem.

Hannibalem literis, non libere modo, sed etiam asperè, quibus, non *Capuam solam traditam in manum hostibus, sed se quoque et præsidium in omnes cruciatas proditos,* incusabant : *abiisse eum in Bruttios, velut avertentem sese, ne Capua in oculis ejus cuperetur : at, Hercule, Romanos ne obpugnatione quidem urbis Romanæ abstrahi ab Capua obsidenda potuisse : tanto constantiorem inimicum Romanum, quam amicum Pænum esse.* Si redeat Capuam, bellumque omne eo veritat, et se et Campanos paratos eruptioni fore. Non cum Reginis, neque Tarentinis bellum gesturos transisse Alpes : ubi Romanæ legiones sint, ibi et Karthaginiensium exercitus debere esse. Sic ad Cannas, sic ad Trasimenum rem bene gestam ; coëndo, conferendo cum hoste castra, fortunam tentando. In hanc sententiam literæ conscriptæ Numidis, proposita mercede jam professis operam, dantur. Hi specie transfugarum quin ad Flaccum in castra venissent, ut inde tempore capto abirent ; famesque, quæ tam diu Capuae erat, nulli non probabilem caussam transitionis faceret, mulier repente Campana in castra ve- nit, scortum transfugarum unius ; indicatque imperatori Romano, Numidas fraude composita transisse, literasque ad Hannibalem ferre : id unum ex

iis, qui sibi rem aperuisset, arguere sese paratam U. C. 541.
 esse. Productus primo satis constanter ignorare se A. C. 211.
 mulierem simulabat : paullatim dein convictus veris,
 quum tormenta posci et parari videret, fassus id ita
 esse : literæque prolatæ ; et additum etiam indicio,
 quod celabatur, et alios specie transfugarum Numi-
 das vagari in castris Romanis : hi supra septuaginta
 comprehensi, et cum transfugis novis mulcati virgis,
 manibusque præcisis, Capuam rediguntur. Conspec-
 tum tam triste supplicium fregit animos Campano-
 rum.

XIII. Concursus ad curiam populi factus coëgit Senatus
 Lesium senatum vocare : et primoribus, qui jam diu Campanus
 publicis consiliis aberant, propalam minabantur, nisi convoca-
 venirent in senatum, circa domos eorum ituros se,
 et in publicum omnes vi extracturos esse. Is timor
 frequentem senatum magistratui præbuit. Ibi quum ceteri de legatis mittendis ad imperatores Romanos
 agerent, Vibius Virrius, qui defectionis ab Romanis
 auctor fuerat, interrogatus sententiam, negat, eos, Vibii Virrh
 qui de legatis et de pace ac deditione loquantur, memi- oratio.
 nisse, nec quid facturi fuerint, si Romanos in potestate
 habuissent ; nec quid ipsis patiendum sit. Quid? vos,
 inquit, eam ditionem fore censemus, qua quondam, ut
 adversus Samnites auxilium impetraremus, nos nostra-
 que omnia Romanis dedidimus ? Jam e memoria excess-
 sit, quo tempore, et in qua fortuna a populo Romano
 defecerimus ? jam, quemadmodum in defectione præsi-
 dium, quod poterat emitti, per cruciatum et ad contu-
 meliam necarimus ? quoties in obsidentes, quam inimice
 eruperimus, castra obpugnarimus ? Hannibalem voca-
 verimus ad obprimendos eos ? hoc quod recentissimum
 est, ad obpugnandam Romanam hinc eum miserimus ?

U.C. 541. *Age contra, quæ illi infeste in nos fecerint, repetite: ut*
A. C. 211. *ex eo, quid speretis, habeatis.* Quum hostis alienigena
in Italia esset, et Hannibal hostis, et cuncta bello arde-
rent, omissis omnibus, omisso ipso Hannibale, ambo con-
sules et duo consulares exercitus ad Capuam obpugnan-
dam miserunt. Alterum annum circumvallatos inclu-
sosque nos fame macerant, et ipsi nobiscum ultima peri-
cula ac gravissimos labores perpessi, circa vallum ac
fossas saepe trucidati, et prope ad extremum castris ex-
uti. Sed omitto hæc: vetus atque usitata res est, in
obpugnanda hostium urbe labores ac pericula pati: illud
iræ atque odii execrabilis indicium est. Hannibal in-
gentibus copiis peditum equitumque castra obpugnavit,
et ex parte cepit: tanto periculo nihil moti sunt ab ob-
sidione. Profectus trans Vulturenum, perussit Calenum
agrum: nihil tanta sociorum clade avocati sunt. Ad
ipsam urbem Romam infesta signa ferri jussit: eam
quoque tempestatem imminentem spreverunt. Trans-
gressus Anienem, tria millia passuum ab urbe castra
posuit: postremo ad mænia ipsa et ad portas accessit.
Romam se ademturm eis, nisi omitterent Capuam,
ostendit: non omiserunt. Feras bestias, cæco inpetu ac
rabie concitatas, si ad cubilia et catulos earum ire per-
gas, ad opem suis ferendam avertas. Romanos Roma
circumsessa, conjuges, liberi, quorum ploratus hinc
prope exaudiabantur, aræ, foci, Deum delubra, sepul-
cra majorum temerata ac violata, a Capua non averte-
runt: tanta aviditas supplicii expetendi, tanta sanguini-
nis nostri hauriendi est sitis. Nec injuria forsitan:
nos quoque idem fecissemus. si data fortuna esset. Ita-
que quando aliter Düs immortalibus visum est, quum
mortem ne recusare quidem debeam; cruciatus contu-
vielasque, quas sperat hostis, dum liber, dum mei po-

*tens sum, effugere morte, præterquam honesta, etiam U.C. 541.
leni, possum. Non video Ap. Claudium et Q. Fulvium, A.C. 211.
victoria insolenti subnisos, neque rinctus per urbem Ro-
manam triumphi spectaculum trahar, ut deinde in car-
cere, aut ad palum deligatus, lacerato virgis tergo, cer-
vicem securi Romanæ subjiciam : nec dirui incendique
patriam video : nec rapi ad stuprum matres Campan-
nas, virginesque, et ingenuos pueros. Albam, unde ipsi
oriundi erant, a fundamentis proruerunt, ne stirpis, ne
memoria originum suarum extaret : nedum eos Capuæ
parsuros credam, cui infestiores, quam Karthagini,
sunt. Itaque quibus vestrûm ante fato cedere, quam
hæc tot tam acerba videant, in animo est ; iis apud me
hodie epulæ instructæ paratæque sunt. Satiatis vino
ciboque poculum idem, quod mihi datum fuerit, cir-
cumferetur : ea potio corpus ab cruciatu, animum a
contumeliis, oculos, aures, a videndis audiendisque om-
nibus acerbis indignisque, quæ manent rictos, vindica-
bit : parati erunt, qui magno rogo in propatulo ædium
accenso corpora exanima injicient. Hæc una via et ho-
nesta et libera ad mortem : et ipsi virtutem mirabuntur
hostes, et Hannibal fortis socios sciet ab se desertos ac
proditos esse.*

XIV. Hanc orationem Virrii plures audierunt cum adsensu, quam forti animo id, quod probabant, exsequi potuerunt. Major pars senatus, multis saepe Legati ad bellis expertam populi Romani clementiam haud missi, diffidentes sibi quoque placabilem fore, legatos ad dedendam Romanis Capuam decreverunt, miserun- que. Vibium Virrium septem et viginti fermie sena- Virrius et tores domum secuti sunt, epulatique cum eo ; et, alii senato- res vene- quantum facere potuerant, alienatis mentibus vino ab num su- imminentis sensu mali, venenum omnes sumserunt : munt.

U. C. 541. inde missō convivio, dextris inter se datis, ultimo-
 A. C. 211. que complexu, conlacrimentes suum patriæque ca-
 sum, alii, ut eodem rogo cremarentur, manserunt; alii domos digressi sunt. Inpletæ cibis vinoque ve-
 næ minus efficacem in maturanda morte vim veneni
 fecerunt: itaque noctem totam plerique eorum, et
 diei insequentis partem quum animam egissent; om-
 nes tamen, priusquam aperirentur hostibus portæ,
 exspirarunt. Postero die porta Jovis, quæ adversus
 castra Romana erat, jussu proconsulis aperta est:
 ea intromissa legio una et duæ alæ, cum C. Fulvio
 legato. Is, quum omnium primum arma telaque,

Capuam ingrediuntur Romanæ. quæ Capuæ erant, ad se conferenda curasset, custo-
 diis ad omnes portas dispositis, ne quis exire aut
 emitti posset, præsidium Punicum comprehendit, se-
 natum Campanum ire in castra ad imperatores Ro-
 manos jussit: quo quum venissent, extemplo his
 omnibus catenæ injectæ, jussique ad quæstores de-
 ferre, quod auri argenteque haberent: auri pondo
 septuaginta fuit, argenti tria millia pondo et du-
 centa: senatores quinque et viginti Cales in custo-
 diam, duodetriginta Teanum missi: quorum de sen-
 tentia maxime descitum ab Romanis constabat.

XV. De suppicio Campani senatus haudquaquam
 inter Fulvium Claudiumque conveniebat. Facilis
 inpetrandæ veniæ Claudio, Fulvio durior sententia
 erat. Itaque Appius Romam ad senatum arbitrium
 ejus rei totum rejiciebat: percunctandi etiam æ-
 quum esse potestatem fieri Patribus, num communi-
 cassent consilia cum aliquibus sociorum Latini no-
 minis municipiorum: et num ope eorum in bello fo-
 rent et municipiorum adjuti. *Id vero minime commit-*
tendum esse, Fulvius dicere, ut sollicitarentur criminis-

bus dubiis sociorum fidelium animi: et subjicerentur in- U. C. 541.
dicibus, queis, neque quid facerent, neque quid dicerent, A. C. 211.
quidquam umquam pensi fuisset: itaque se eam quæ-
stionem obpressurum extincturumque. Ab hoc sermo-
ne quum digressi essent, et Appius, quamvis ferociter
loquentem, collegam, non dubitaret, tamen literas
super tanta re ab Roma exspectaturum; Fulvius, ne
id ipsum impedimentum incepto foret, dimittens præ-
torium, tribunis militum ac præfectis socium impe-
ravit, uti duobus millibus equitum delectis denunci-
arent, ut ad tertiam buccinam præsto essent. Cum
hoc equitatu nocte Teanum profectus, prima luce
portam intravit, atque in forum perrexit: concursu-
que ad primum equitum ingressum facto, magistra-
tum Sidicinum citari jussit, imperavitque, ut produ-
ceret Campanos, quos in custodia haberet. Pro- Senatores
ducti omnes, virgisque cæsi, ac securi percussi. Inde Campani
securi per-
citato equo Cales percurrit: ubi quum in tribunali cutiuntur,
consedisset, productique Campani diligarentur ad
palum, eques citus ab Roma venit, literasque a C.
Calpurnio prætore Fulvio et senatusconsultum tra-
didit: murmur ab tribunali totam concessionem perva-
sit, differri rem integrum ad Patres de Campanis: et
Fulvius, id ita esse ratus, acceptas literas, neque re-
solutas, quum in gremio reposuisset, præconi impe-
ravit, ut lictorem lege agere juberet. Ita de iis quo-
que, qui Calibus erant, sumtum supplicium. Tum
literæ lectæ senatusque consultum, serum ad impedi-
endam rem actam; quæ summa ope adproperata
erat, ne impediri posset. Consurgentem jam Fulvi- Jubellii
um Taurea Jubellius Campanus, per medium vadens mors.
urbem turbamque, nomine inclamavit: et, quum,
mirabundus quidnam sese vellet, resedisset Flaccus,

U. C. 541. *Me quoque, inquit, jube occidi, ut gloriari possis, multo*
A. C. 211. fortiorum, quam ipse es, virum abs te occisum esse.

Quum Flaccus negaret, *profecto satis compotem mentis esse*: modo, *prohiberi etiam se, si id vellet, senatus-consulto, diceret*: tum Jubellius, *Quandoquidem, inquit, copta patria, propinquus amicisque amissis, quum ipse manu mea conjugem liberosque interfecerim, ne quid indigni paterentur, mihi ne mortis quidem copia eadem est, quae his civibus meis; petatur a virtute invise hujus vitae vindicta*: atque ita gladio, quem veste texerat, per adversum pectus transfixus, ante pedes imperatoris moribundus procubuit.

XVI. Quia, et quod ad supplicium adtinet Campanorum, et pleraque alia, de Flacci unius sententia acta erant; mortuum Ap. Claudium sub deditioinem Capuæ, quidam tradunt: hunc quoque ipsum Tauream neque sua sponte venisse Cales, neque sua manu interfectum: sed, dum inter ceteros ad palum deligatur, quia parum inter strepitus exandiri possent, quæ vociferabantur, silentium fieri Flaccum jusssisse: tum Tauream illa, quæ ante memorata sunt, dixisse, *virum se fortissimum ab nequaquam pari ad virtutem occidi*. Sub hæc dicta, jussu proconsulis præconem ita pronunciasse: *Lictor, viro forti adde virgas, et in eum primum lege age*. Lectum quoque senatusconsultum, priusquam securi feriret, quidam auctores sunt: sed, quia adscriptum in senatusconsulto fuerit, *si ei videretur, integrum rem ad senatum rejiceret*, interpretatum esse, quid magis e republica duceret, aestimationem sibi permissam. Capuam a Calibus redditum est, Atellaque et Calatia in ditionem acceptæ: ibi quoque in eos, qui capita rerum erant, animadversum. Ita ad septuaginta principes

senatus interficti ; trecenti ferme nobiles Campani U. C. 541.
 in carcerem conditi : alii, per sociorum Latini no- A. C. 211.
 minis urbes in custodias dati, variis casibus inter-
 erunt : multitudo alia civium Campanorum venum-
 data. De urbe agroque reliqua consultatio fuit, qui- Res ad Ca-
 busdam delendani censemibus urbem prævalidam,
 propinquam, inimicam. Ceterum præsens utilitas
 vicit : nam propter agrum, quem omni fertilitate
 terræ satis constabat primum in Italia esse, urbs
 servata est, ut esset aliqua aratorum sedes : urbi
 frequentandæ multitudo incolarum libertinorumque
 et institorum opificumque retenta : ager omnis et
 tecta publica populi Romani facta. Ceterum habi-
 tari tantum, tamquam urbem, Capuam, frequentari-
 que placuit : corpus nullum civitatis, nec senatus,
 nec plebis concilium, nec magistratus esse : sine
 consilio publico, sine imperio multitudinem, nullius
 rei inter se sociam, ad consensum inhabilem fore :
 præfectum ad jura reddenda ab Roma quotannis
 missuros. Ita ad Capuam res compositæ, consilio
 ab omni parte laudabili : severe et celeriter in max-
 ime noxios animadversum : multitudo civium dissi-
 pata in nullam spem reditus : non sævitum incendiis
 ruinisque in tecta innoxia murosque : et cum emo-
 lumento quæsita etiam apud socios lenitatis species,
 incolumitate urbis nobilissimæ opulentissimæque,
 cuius ruinis omnis Campania, omnes, qui Campani-
 am circa adecolunt, populi ingemuissent : confessio
 expressa hosti, quanta vis in Romanis ad expetendas
 pœnas ab infidelibus sociis, et quam nihil in Hanni-
 bale auxiliu ad receptos in fidem tuendos esset.

XVII. Romani Patres, perfuncti, quod ad Capu-
 am adtinebat, cura, C. Neroni ex iis duabus legioni-

U. C. 541. bus, quas ad Capuam habuerat, sex millia peditum,
 A. C. 211. et trecentos equites, quos ipse legisset, et sociūm
 Latini nominis peditum numerum parem, et octin-
 gentos equites decernunt: eum exercitum Puteolis

Nero it in naves inpositum Nero in Hispaniam transporta-
 Hispani-
 am. vit. Quum Tarragonem navibus venisset, expositis-
 que ibi copiis, et navibus subductis, socios quoque
 navales multitudinis augendæ caussa armasset; pro-
 fectus ad Iberum flumen, exercitum ab T. Fonteio
 et L. Marcio accepit: inde pergit ad hostes ire.
 Hasdrubal Hamilcaris ad Lapides atros castra habe-
 bat in Ausetanis: is locus est inter oppida Illitur-
 gin et Mentissam. Hujus saltus fauces Nero occu-
 pavit. Hasdrubal, ne in arto res esset, caduceato-
 rem misit, qui promitteret, si inde missus foret, se
 omnem exercitum ex Hispania deportaturum. Quam
 rem quum læto animo Romanus accepisset, diem
 posterum Hasdrubal conloquio petivit, ut Romani
 leges conscriberent de tradendis arcibus urbium,
 dieque statuenda, ad quam præsidia deducerentur,
 suaque omnia sine fraude Pœni deportarent. Quod
 ubi inpetravit, extemplo primis tenebris, atque inde

Hasdrubal tota nocte, quod gravissimum exercitus erat, Has-
 circum-
 ventus
 fraude
 elabitur. drubal, quacumque posset, evadere e saltu jussit:
 data sedulo opera est, ne multi ea nocte exirent, ut
 ipsa paucitas, quum ad hostem silentio fallendum
 aptior, tum ad evadendum per artas semitas ac diffi-
 ciles esset. Ventum insequenti die ad conloquium
 est: sed loquendo plura scribendoque, dedita opera,
 quæ in rem non essent, die consumto, in posterum
 dilatum est. Addita insequens nox spatium dedit et
 alios emittendi: nec postero die res finem invenit:
 ita aliquot dies disceptando palam de legibus, noctes-

que emittendis clam e castris Karthaginiensibus, ab U. C. 541.
 sumtæ: et, postquam major pars emissa exercitus A. C. 211.
 erat, jam ne iis quidem, quæ ultro dicta erant, sta-
 batur: minusque ac minus (cum timore simul fide
 decrescente) conveniebat. Jam ferme pedestres om-
 nes copiæ evaserant e saltu: quum prima luce densa
 nebula saltum omnem camposque circa intexit: quod
 ubi sensit Hasdrubal, mittit ad Neronem, qui in pos-
 terum diem conloquium differret: illum diem religio-
 sum Karthaginiensibus ad agendum quidquam rei
 seriæ esse. Ne tum quidem suspecta fraus: quum
 data esset venia ejus diei, extemplo Hasdrubal, cum
 equitatū elephantisque castris egressus, sine ullo tu-
 multu in tutum evasit. Hora ferme quarta dispulsa
 sole nebula aperuit diem, vacuaque hostium castra
 conspexerunt Romani. Tum demum Claudius, Pu-
 nicam fraudem agnoscens, ut se dolo captum sensit,
 proficiscentem institit sequi, paratus configere acie:
 sed hostis detractabat pugnam, levia tamen prælia
 inter extremum Punicum agmen præcursoresque Ro-
 manorum fiebant.

XVIII. Inter hæc Hispaniæ populi, nec qui post
 cladem acceptam defecerant, redibant ad Romanos,
 nec ulli novi deficiebant. Et Romæ senatui populo-
 que, post receptam Capuam, non Italiæ jam major,
 quam Hispaniæ, cura erat: et exercitum augeri, et
 imperatorem mitti placebat: nec tamen, quem mit-
 terent, satis constabat; quam illud, ubi duo summi
 imperatores intra dies triginta cecidissent, qui in lo-
 cum duorum succederet, extraordinaria cura deligen-
 dum esse. Quum alii alium nominarent, postremum Comitia
 eo decursum est, ut populus proconsuli creando in procon-
 Hispaniam comitia haberet: diemque comitiis suli crean-
 do in His-paniam.

U. C. 541. sules edixerunt. Primo exspectaverant, ut, qui se
 A. C. 211. tanto imperio dignos crederent, nomina profiteren-
 tur: quæ ut destituta exspectatio est, redintegratus
 luctus acceptæ cladis, desideriumque imperatorum
 amissorum. Mœsta itaque civitas, prope inops con-
 sili, comitiorum die tamen in Campum descendit:
 atque in magistratus versi circumspectant ora prin-
 cipum, aliorum alias intuentum, fremuntque, adeo
 perditas res desperatumque de republica esse, ut ne-
 mo andeat in Hispaniam imperium accipere. Quum
 subito P. Cornelius, Publili, qui Hispania ceciderat,
 filius, quatuor et viginti ferme annos natus, profes-
 sus se petere, in superiore, unde conspici posset, lo-
 co constitit. In quem postquam omnium ora con-
 versa sunt, clamore ac favore ominati extemplo sunt
 felix faustumque imperium: jussi deinde inire suf-
 fragium, ad unum omnes non centuriæ modo, sed
 Deligitur
 P. Scipio. etiam homines, P. Scipioni imperium esse in His-
 pania jusserunt. Ceterum post rem actam, ut jam
 resederat impetus animorum ardorque, silentium su-
 bito ortum et tacita cogitatio, quidnam egissent,
 num favor plus valuisse, quam ratio? ætatis max-
 imæ pœnitiebat: quidam fortunam etiam domus hor-
 rebant nomenque, ex funestis duabus familiis, in eas
 provincias, ubi inter sepulera patris patruique res
 gerendæ essent, proficiscentis.

XIX. Quam ubi ab re tanto impetu acta solitu-
 dinem euramque hominum animadvertisit, advocata
 concione, ita de ætate sua imperioque mandato, et
 bello, quod gerundum esset, magno elatoque animo
 disseruit, ut ardorem eum, qui resederat, excitaret
 rursus novaretque: et impleret homines certioris
 spei, quam quantam fides promissi humani, aut ratio-

ex fiducia rerum subjicere solet. Fuit enim Scipio U.C. 541.
non veris tantum virtutibus mirabilis, sed arte quo- A. C. 211.
que quadam ab juventa in ostentationem earum com- Scipionis
positus: pleraque apud multitudinem, aut per noc- artes apud
turnas visa species, aut velut divinitus mente monita,
agens: sive et ipse capti quadam superstitione ani- multitudi-
mi, sive ut imperia consiliaque, velut sorte oraculi
missa, sine cunctatione exsequerentur. Ad hoc jam
inde ab initio præparans animos, ex quo togam vi- nem.
rilem sumsit, nullo die prius ullam publicam priva-
tamque rem egit, quam in Capitolium iret, ingressus-
que ædem consideret: et plerumque solus in secreto
ibi tempus tereret. Hic mos, qui per omnem vitam
servabatur, seu consulto, seu temere, vulgatæ opi-
nioni fidem apud quosdam fecit, stirpis eum divinæ
virum esse; retulitque famam, in Alexandro Magno
prius vulgatam, et vanitate et fabula parem, anguis
inmanis concubitu conceptum, et in cubiculo matris
ejus persæpe visam prodigii ejus speciem, interven-
tuque hominum evolutam repente, atque ex oculis
elapsam. His miraculis numquam ab ipso clusa fides
est: quin potius aucta arte quadam, nec abnuendi
tale quidquam, nec palam adfirmandi. Multa alia
ejusdem generis, alia vera, alia adsimulata, admira-
tionis humanæ in eo juvene excesserant modum:
quibus freta tunc civitas, ætati haudquaquam ma-
turæ tantam molem rerum, tantumque imperium per-
misit. Ad eas copias, quas ex vetere exercitu His-
pania habebat, quæque a Puteolis cum C. Nerone
trajectæ erant, decein millia militum et mille equites
adduntur: et M. Junius Silanus proprætor adjutor
ad res gerendas datus est. Ita cum triginta navium
classe (omnes autem quinqueremes erant) ostiis Ti-

U. C. 541. berinis profectus præter oram Tusci maris, Alpes at-
 A. C. 211. que Gallicum sinum, et deinde Pyrenei circumvectus
 Venit in promontorium, Emporiis urbe Græca (oriundi et
 Hispa- ipsi a Phocæa sunt) copias exposuit: inde sequi na-
 niam. vibus jussis, Tarraconem pedibus proiectus, conven-
 tum omnium sociorum (etenim legationes ad famam
 adventus ejus ex omni se provincia effuderant) ha-
 buit: naves ibi subduci jussit, remissis quatuor tri-
 tremibus Massiliensium, quæ officii caussa ab domo
 prosecutæ fuerant. Responsa inde legationibus sus-
 pensis varietate tot casuum dare cœpit, ita elato ab
 ingenti virtutum suarum fiducia animo, ut nullum
 ferox verbum excideret; ingensque omnibus, quæ
 diceret, quum majestas inesset, tum fides.

XX. Proiectus ab Tarracone, et civitates socio-
 rum et hiberna exercitus adiit: conlaudavitque mi-
 lites, quod, duabus tantis cladibus deinceps icti, pro-
 vinciam obtinuissent: nec fructum secundarum re-
 rum sentire hostes passi, omni cis Iberum agro eos
 arcuissent, sociosque cum fide tutati essent. Mar-
 cium secum habebat cum tanto honore, ut facile ad-
 pareret, nihil minus, quam vereri, ne quis obstaret
 gloriæ suæ. Successit inde Neroni Silanus, et in
 hiberna novi milites deducti. Scipio, omnibus, quæ
 adeunda agendaque erant, mature aditis peractisque,
 Tarraconem concessit. Nihilo minor fama apud
 hostes Scipionis erat, quam apud cives sociosque, et
 divinatio quædam futuri; quo minus ratio timoris
 reddi poterat oborti temere, majorem inferens metu-
 tum. In hiberna diversi concesserant: Hasdrubal
 Gisgonis usque ad oceanum et Gades: Mago in
 mediterranea, maxime supra Castulonensem saltum:
 Hasdrubal Hamilcaris filius proximus Ibero circa Sa-

guntum hibernavit. Æstatis ejus extremo, quo capta U. C. 541.
est Capua, et Scipio in Hispaniam venit, Punica clas- A. C. 211.
sis, ex Sicilia Tarentum adcita ad arcenos commea-
tus præsidii Romani, quod in arce Tarentina erat,
clauserat quidem omnes ad arcem a mari aditus; sed
adsidendo diutius artiorem annonam sociis, quam
hosti, faciebat: non enim tantum subvehi oppidanis
per pacata litora apertosque portus præsidio navium
Punicarum poterat, quantum frumenti classis ipsa
turba navalii mixta ex omni genere hominum absu-
mebat: ut arcis præsidium etiam sine invecto (quia
pauci erant) ex ante præparato sustentari posset;
Tarentinis classique ne invectum quidem subficeret.
Tandem majore gratia, quam venerat, classis dimis-
sa est: annona haud multum laxaverat: quia, re-
moto maritimo præsidio, subvehi frumentum non
poterat.

XXI. Ejusdem æstatis exitu, M. Marcellus ex Si- Marcellus
cilia provincia quum ad urbem venisset, a C. Cal- ovans ur-
purnio prætore senatus ei ad ædem Bellonæ datus
est: ibi quum de rebus a se gestis disseruisse, que-
stus leniter non suam magis, quam militum, vicem,
quod provincia confecta exercitum deportare non li-
cuisset, postulavit, ut triumphanti urbem inire lice-
ret: id non inpetravit. Quum multis verbis actum
esset, utrum minus conveniret, cuius nomine absen-
tis, ob res prospere ductu ejus gestas, supplicatio
decreta foret, et Diis inmortalibus habitus honos, ei
præsenti negare triumphum: an, quem tradere ex-
ercitum successori jussissent, (quod, nisi mauente in
provincia bello, non decerneretur) eum quasi debel-
lato triumphare, quum exercitus, testis meriti atque
inmeriti triumphi, abesset; medium visum, ut ovans

U.C. 541. urbem iniret. Tribuni plebis ex auctoritate senatus
A.C. 211. ad populum tulerunt, ut M. Marcello, quo die urbem
ovans iniret, imperium esset. Pridie, quam urbem
iniret, in monte Albano triumphavit: inde ovans
multam præ se prædam in urbem intulit. Cum si-
mulacro captarum Syracusarum, catapultæ ballistæ-
que, et alia omnia instrumenta belli lata, et pacis
diuturnæ regiæque opulentia ornamenta, argenti
ærisque fabrefacti vis, alia supeilex, pretiosaque
vestis, et multa nobilia signa, quibus inter primas
Græciæ urbes Syracusæ ornatæ fuerant. Punicae
quoque victoriae signum, octo ducti elephanti. Et
non minimum fuit spectaculum cum coronis aureis
præcedentes Sosis Syracusanus, et Mericus Hispanus:
quorum altero duce nocturno Syracusas introi-
tum erat; alter Nasum, quodque ibi præsidii erat,
prodiderat. His ambobus civitas data, et quingena
jugera agri. Sosidi in agro Syracusano, qui aut re-
gius, aut hostium populi Romani fuisset, et ædes
Syracusis cuius vellet eorum, in quos belli jure anim-
adversum esset: Merico Hispanisque, qui cum eo
transierant, urbs agerque in Sicilia ex iis, qui a po-
pulo Romano defecissent, jussa dari. Id M. Cor-
nelio mandatum, ut, ubi ei videretur, urbem agrum-
que eis adsignaret. In eodem agro Belligeni, per
quem inlectus ad transitionem Mericus erat, qua-
dringenta jugera agri decreta. Post profectionem ex
Sicilia Marcelli, Punica classis octo millia peditum,
tria Numidarum equitum exposuit. Ad eos Mur-
gantinæ desciverunt terræ: secutæ defectionem ea-
rum Hybla et Macella sunt, et ignobiliores quædam
aliæ. Et Numidæ, præfecto Mutine, vagi per totam
Siciliam, sociorum populi Romani agros urebant.

Super hæc exercitus Romanus iratus, partim quod U.C. 541.
 cum imperatore non devectus ex provincia esset, A.C. 211.
 partim quod in oppidis hibernare vetiti erant, segni
 fungebantur militia: magisque eis auctor ad seditio-
 nem, quam animus, deerat. Inter has difficultates
 M. Cornelius prætor et militum animos, nunc con-
 solando, nunc castigando, sedavit, et civitates om-
 nes, quæ defecerant, in ditionem redegit: atque ex
 his Murgantium Hispanis, quibus urbs agerque de-
 bebat, ex senatusconsulto attribuit.

XXII. Consules, quum ambo Apuliam provinciam
 haberent, minusque jam terroris a Pœnis et Hanni-
 bale esset, sortiri jussi Apuliam Macedoniamque pro-
 vincias. Sulpicio Macedonia evenit, isque Lævino
 successit. Fulvius, Romam comitiorum caussa ar-
 cessitus, quum comitia consulibus rogandis haberet,
 prærogativa Veturia juniorum declaravit T. Manlium
 Torquatum et T. Otacilium. Manlius, qui præsens Manlius
 erat, gratulandi caussa quum turba coiret, nec du-
 bius esset consensus populi, magna circumfusus turba ^{consula-}
^{tum re-} cusat.
 ad tribunal consulis venit; petitque, ut pauca sua
 verba audiret, centuriamque, quæ tulisset suffragium,
 revocari juberet. Erectis omnibus exspectatione,
 quidnam postulaturus esset, oculorum valetudinem
 excusavit. *Inpudentem et gubernatorem et imperato-*
rem esse, qui, quum alienis oculis ei omnia agenda sint,
postulet sibi aliorum capita ac fortunas committi: pro-
inde, si videretur, et redire in suffragium Veturiam ju-
niorum juberet, et meminisset in consulibus creandis bel-
li, quod in Italia sit, temporumque reipublicæ. Vix-
dum requiesce aures a strepitu et tumultu hostili, quo
paucos ante menses adsederint prope mænia Romana.
Post hæc quum centuria frequens subclamasset, ni-

U.C. 541. *hil se mutare sententiæ, eosdemque consules dicturos esse*; tum Torquatus, *Neque ego vestros, inquit, mores consul ferre potero, neque vos imperium meum. Redite in suffragium, et cogitate bellum Punicum in Italia, et hostium ducem Hannibalem esse.* Tum centuria, et auctoritate mota viri, et admirantium circa fremitu, petit a consule, ut Veturiam seniorum citaret: *Velle se cum majoribus natu conloqui, et ex auctoritate eorum consules dicere.* Citatis Veturiæ senioribus, datum secreto in Ovili cum his conloquendi tempus. Seniores de tribus consulendum dixerunt esse, duobus jam plenis honorum, Q. Fabio et M. Marcello; et, si utique novum aliquem adversus Poenos consulem creari vellent, M. Valerium Lævinum egregie adversus Philip[on] regem terra marique res gessisse. Ita de tribus consultatione data, senioribus dimissis, juniores suffragium ineunt. M. Claudium Marcellum, fulgentem tum Sicilia domita, et M. Valerium absentes consules dixerunt: auctoritatem prærogativæ omnes centuriæ secutæ sunt. Eludant nunc antiqua mirantes: non equidem, si qua sit sapientium civitas, quam docti fingunt magis, quam norunt, aut principes graviores temperantioresque a cupidine imperii, aut multitudinem melius moratam censem fieri posse. Centuriam vero juniorum seniores consulere voluisse, quibus imperium suffragio mandaret, vix ut verisimile sit, parentum quoque hoc seculo vilis levisque apud liberos auctoritas fecit.

XXIII. Prætoria inde comitia habita. P. Manlius Vulso, et L. Manlius Acidinus, et C. Lætorius, et L. Cincius Alimentus creati sunt. Forte ita incidit, ut comitiis perfectis nunciaretur, T. Otacilium, quem T. Manlio, nisi interpellatus ordo comitiorum

esset, collegam absentem daturus fuisse videbatur U. C. 541.
 populus, mortuum in Sicilia esse. Ludi Apollinares A. C. 211.
 et priore anno fuerant, et, eo anno ut fierent, refe-
 rente Calpurnio prætore, senatus decrevit, ut in per-
 petuum voverentur. Eodem anno prodigia aliquot
 visa nunciataque sunt. In æde Concordiæ Victoria,
 quæ in culmine erat, fulmine icta decussaque, ad
 Victorias, quæ in antefixis erant, hæsit, neque inde
 procidit. Et Anagnia et Fregellis nunciatum est,
 murum portasque de cœlo tactas: et in foro Suder-
 tano sanguinis rivos per diem totum fluxisse, et
 Ereti lapidibus pluisse, et Reate mulam peperisse.
 Ea prodigia hostiis majoribus sunt procurata, et ob-
 secratio in unum diem populo indicta, et novemdiale
 sacrum. Sacerdotes publici aliquot eo anno demor-
 tui sunt, novique subfecti: in locum M'. Æmilius
 Numidæ decemviri sacrorum M. Æmilius Lepidus:
 in locum M'. Pomponii Mathonis pontificis C. Li-
 vius: in locum Sp. Carvili Maximi auguris M. Ser-
 vilius. T. Otacilius Crassus pontifex quia exacto
 anno mortuus erat, ideo nominatio in locum ejus
 non est facta. C. Claudius flamen Dialis, quod exta
 perperam dederat, flaminio abiit.

XXIV. Per idem tempus M. Valerius Lævinus,
 tentatis prius per secreta conloquia principum ani-
 mis, ad indictum ante ad id ipsum concilium Ætolorū
 classe expedita venit. Ubi quum Syracusas
 Capuamque captam, in fidem in Sicilia Italiaque re-
 rum secundarum, ostentasset, adjecissetque, *jam inde* Valerii ora-
a majoribus traditum morem Romanis colendi socios, tio apud
 Ætolos.
ex quibus alios in civitatem atque æquum secum jus ac-
cepissent, alios in ea fortuna haberent, ut socii esse,
quam cives, malling. Ætolos eo in majore futuros ho-

U. C. 541. *nore, quod gentium transmarinarum in amicitiam primi
A. C. 211. venissent. Philippum eis et Macedonas graves adcolas
esse; quorum se vim ac spiritus et jam fregisse, et eo
redacturum esse, ut non his modo urbibus, quas per vim
ademisset \mathcal{A} tolis, excedant, sed ipsam Macedoniam
infestam habeant. Et Acarnanas, quos \mathcal{A} gre ferrent
 \mathcal{A} toli a corpore suo diremto, restituturum se in anti-
quam formulam jurisque ac ditionis eorum.* Hæc,
dicta promissaque ab Romano imperatore, Scopas,
qui tum prætor gentis erat, et Dorymachus, princeps
 \mathcal{A} tolorum, adfirmaverunt auctoritate sua, minore
cum verecundia et majore cum fide vim majestatemque
populi Romani extollentes: maxime tamen spes po-
tiundæ movebat Acarnaniæ. Igitur conscriptæ con-
ditiones, quibus in amicitiam societatemque populi
Romani venirent: additumque, *ut, si placeret vellent-
que, eodem jure amicitiae Elei, Lacedæmoniique, et At-
talus, et Pleuratus, et Scerdilædus essent.* (Asiæ At-
talus, hi Thracum et Illyriorum reges.) *Bellum ut
extempo \mathcal{A} toli cum Philippo terra gererent. Navibus
ne minus viginti quinqueremibus adjuvaret Romanus.*
*Urbium Coreyræ tenus ab \mathcal{A} tolia incipienti solum tec-
taque, et muri cum agris, \mathcal{A} tolorum; alia omnis præda
populi Romani esset. Darentque operam Romani, ut
Acarnaniam \mathcal{A} toli haberent. Si \mathcal{A} toli pacem cum
Philippo facerent, fæderi adscriberent, ita ratam eorum
pacem, si Philippus arma ab Romanis sociisque, quique
eorum ditionis essent, abstinuisset. Item, si populus
Romanus fædere jungeretur regi, ut caveret, ne jus ei
belli inferendi \mathcal{A} tolis sociisque eorum esset. Hæc con-
venierunt, conscriptaque biennio post Olympiæ ab
 \mathcal{A} tolis, in Capitolio ab Romanis, ut testata sacratis
monumentis essent, sunt posita. Moræ caussa fue-*

Fœdus
cum \mathcal{A} -
tolis.

rant retenti Romæ diutius legati Ætolorum. Nec U.C. 541.
 tamen impedimento id rebus gerendis fuit : et Ætolii A.C. 211.
 extemps moverunt aduersus Philippum bellum, et Res gestæ
Lævinus **Zacynthum** (parva insula est propinqua ab Ætolis et a Va-
 Ætoliae : urbem unam eodem, quo ipsa est, nomine
 habet ; eam præter arcem vi cepit) et **Œniadas** Na-
 sumque Acarnanum captas Ætolis contribuit. Phi-
 lippum quoque satis implicatum bello finitimo ratus,
 ne Italianam Pœnosque et pacta cum Hannibale posset
 respicere, **Coryram** ipse se recepit.

XXV. Philippo Ætolorum defectio Pellæ hibernanti adlata est : itaque, quia primo vere moturus exercitum in Græciam erat, Illyrios finitimasque eis urbes alterno metu quietas ut Macedonia haberet, expeditionem subitam in Oricinorum atque Apolloniatum fines fecit : egressosque Apolloniatas, cum magno terrore atque pavore, compulit intra muros. Vastatis proximis Illyrici, in Pelagoniam eadem celeritate vertit iter : inde Dardanorum urbem, sitam in Macedonia, transitum Dardanis facturam, cepit. His raptim actis, memor Ætolici junctique cum eo Romani belli, per Pelagoniam, et Lyneum, Bottiaem, in Thessaliam descendit. Ad bellum secum aduersus Ætolos capessendum incitari posse homines credebat : et, relieto ad fauces Thessaliæ Perseo cum quatuor millibus armatorum ad arcenos aditu Ætolos, ipse, priusquam majoribus occuparetur rebus, in Macedoniam, atque inde in Thraciam exercitum ac Mædos duxit. Incurrere ea gens in Macedonia solita erat ; ubi regem occupatum externo bello, ac sine præsidio esse regnum sensisset. Ad Phragandas igitur vastare agros, et urbem Jamphorinam, caput arcemque Mædicæ, obpugnare cœpit. Scopas,

U.C. 541. ubi profectum in Thraciam regem, occupatumque
 A.C. 211. ibi bello audivit, armata omni juventute *Ætolorum*,
 Acarna- bellum inferre Acarnaniae parat. Adversus quod
 niæ bel- Acarnanum gens et viribus inpar, et jam *Œniadas*
 lum infe- Nasumque amissa cernens, Romainaque insuper arma
 runt *Æ-* ingruere, ira magis instruit, quam consilio, bellum.
 toli. Conjugibus liberisque et senioribus supra sexaginta
 Acarna- annos in propinquam Epirum missis, ab quindecim
 num con- ad sexaginta annos conjurant, nisi victores, se non
 juratio. redituros. Qui victus acie excessisset, eum ne quis
 ubi, tecto, mensa, lare reciperet, diram exsecrationem
 in populares, obtestationem quam sanctissimam
 potuerunt adversus hospites, composuerunt: precatique
 simul Epirotas sunt, ut, qui suorum in acie ce-
 cidiissent, eos uno tumulo contegerent, adhiberent-
 que humatis titulum: **HIC SITI SUNT ACARNANES,**
QUI, ADVERSUS VIM ATQUE INJURIAM *ÆTOLORUM*
PRO PATRIA PUGNANTES, MORTEM OBCUBUERUNT.
 Per hæc incitatis animis, castra in extremis finibus
 Eos libe- suis obvia hosti posuerunt: nunciis ad Philippum
 rat peri- missis, quanto res in discrimine esset, omittere Phi-
 culo Phi- lippum, id quod in manibus erat, coegerunt bellum,
 lippus. Jamphorina per ditionem recepta, et prospero alio
 successu rerum. *Ætolorum* inpetum tardaverat pri-
 mo conurationis fama Acarnanicæ: deinde auditus
 Philippi adventus, regredi etiam in intimos coegerit
 fines. Nec Philippus, quamquam, ne obprimerentur
 Acarnanes, itineribus magnis ierat, ultra Dium est
 progressus: inde, quum audisset redditum *Ætolorum*
 ex Acarnania, et ipse Pellam rediit.

XXVI. Lævinus, veris principio a Corcyra pro-
 fectus navibus, superato Leucata promontorio, quum
 venisset Naupactum, Anticyram inde se petiturum

edixit, ut præsto ibi Scopas Aetolique essent. Sita U. C. 542.
 Anticyra est in Locride lœva parte sinum Corinthia-
 cum intrantibus : breve terra iter eo, brevis naviga-
 tio ab Naupacto est. Tertio ferme post die utriusque
 obpugnari cœpta est. Gravior a mari obpugna-
 tio erat ; quia et tormenta machinæque omnis gene-
 ris in navibus erant, et Romani inde obpugnabant.
 Itaque intra paucos dies recepta urbs per ditionem
 Aetolis traditur, præda ex pacto Romanis cessit.
 Literæ Lævino redditæ, consulem eum absentem de-
 claratum, et successorem venire P. Sulpicium : ce-
 terum, diuturno ibi morbo implicitus, serius spe om-
 nium Romain venit. M. Marcellus, quum Idibus
 Martiis consulatum inisset, senatum eo die, moris
 modo caussa, habuit : professus, nihil se, absente collega,
neque de republica, neque de provinciis, acturum.
Scire se, frequentes Siculos prope urbem in villis ob-
tractatorum suorum esse : quibus, tantum abesse, ut
per se non liceat palam Romæ crimina edita factaque
ab inimicis vulgare, ut, ni simularent, aliquem sibi ti-
morem, absente collega, dicendi de consule esse, ipse
eis extemplo datus senatum fuerit. Ubi quidem col-
 lega venisset, non passurum quidquam prius agi, quam
 ut Siculi in senatum introducantur. Delectum prope
 a M. Cornelio per totam Siciliam habitum, ut quam-
 plurimi questum de se Romam venirent : eumdem li-
 teris falsis urbem in plesse, bellum in Sicilia esse, ut
 suam laudem minuat. Moderati animi gloriam eo
 die adeptus consul, senatum dimisit ; ac prope jus-
 titium omnium rerum futurum videbatur, donec al-
 ter consul ad urbem venisset. Otium, ut solet, ex-
 citavit plebis rumores : belli diuturnitate, et vastatos
agros circa urbem, qua infesto agmine isset Hannibal,

A. C. 210.

*U. C. 542. et exhaustam delectibus Italiam, et prope quotannis
A. C. 210. exercitus cæsos querebantur; et consules bellicosos am-
bo, viros acres nimis et feroce, creatos, qui vel in pace
tranquilla bellum excitare possent, nedum in bello re-
spirare civitatem forent passuri.*

XXVII. Interruptus hos sermones nocte, quæ pri-
die Quinquatrus fuit, pluribus simul locis circa fo-
rum incendium ortum: eodem tempore septem ta-
bernæ, quæ postea quinque, et argentariæ, quæ nunc
novæ adpellantur, arsere. Comprehensa postea pri-
vata ædificia: neque enim tum basilicæ erant: com-
prehensæ lautumiæ, forumque piscatorium, et atrium
regium. Ædes Vestæ vix defensa est tredecim ma-
xime servorum opera, qui in publicum redemti ac
manumissi sunt: nocte ac die continuatum incen-
dium fuit. Nec ulli dubium erat, huinana id fraude
factum esse, quod pluribus simul locis, et iis diver-
sis, ignes coorti essent. Itaque consul ex auctoriti-
tate senatus pro concione edixit, qui, quorum opera
id conflatum incendium, profiteretur, præmium fore,
libero pecuniam, servo libertatem. Eo præmio in-
ductus Campanorum Calaviorum servus (Mannus ei
nomen erat) indicavit, *dominos et quinque præterea
juvenes nobiles Campanos, quorum parentes a Q. Fulvio
securi percussi erant, id incendium fecisse; vulgoque
facturos alia, ni comprehendantur.* Comprehensi ipsi
familiaeque eorum: et primo elevabatur index indi-
ciumque: *pridie eum verberibus castigatum ab domi-
nis discessisse, per iram ac levitatem ex re fortuita cri-
men commentum:* ceterum ut coram coarguebantur,
et quæstio ex ministris facinoris foro medio haberi
cœpta est, fassi omnes, atque in dominos servosque
conscios animadversum est: indici libertas data, et

viginti millia æris. Consuli Lævino Capuam præ- U.C. 542.
 tereunti circumfusa multitudo Campanorum est, ob- A.C. 210.
 secrantium cum lacrimis, ut sibi Romam ad sena-
 tum ire liceret, oratum, si qua niisericordia tandem
 flecti possent, ne se ad ultimum perditum irent, no-
 menque Campanorum a Q. Flacco deleri sinerent.
 Flaccus, *sibi privatam simultatem cum Campanis, ne-*
gare, nullam esse: publicas inimicitias et hostiles esse,
et futuras, quoad eo animo esse erga populum Romanum sciret: nullam enim in terris gentem esse, nullum infestorem populum nomini Romano. Ideo se mæni-
 bus inclusos tenere eos: quia, si qui erasissent aliqua,
velut feras bestias per agros vagari, et laniare, et truci-
dare, quodcumque obvium detur. Alios ad Hanniba-
 lem transfugisse, alios ad Romam incendendam pro-
 fectos: inventurum in semiusto foro consulem vestigia
sceleris Campanorum. Vestæ ædem petitam, et æternos
ignes, et conditum in penetrali fatale pignus imperii Romani. Se minime censere tutum esse, Campanis po-
 testatem intrandi Romana mania fieri. Lævinus Cam-
 panos, jurejurando a Flacco adactos, quinto die,
 quam ab senatu responsum accepissent, Capuam re-
 dituros, sequi se Romam jussit. Hac circumfusus
 multitudine, simul Siculis obviam egressis Ætolis-
 que Romam præivit, clarissimarum urbium excidio
 celeberrimis viris victos bello accusatores in urbem
 adducens. De republica tamen primum ac de pro-
 vinciis ambo consules ad senatum retulere.

XXVIII. Ibi Lævinus, quo statu Macedonia et
 Graecia, Ætoli, Acarnanes Locrique essent, quasque
 ibi res ipse egisset terra marique, exposuit. Philip-
 pum, inferentem bellum Ætolis, in Macedoniam retro
 ab se compulsum, ad intima penitus regni abisse, legio-

U.C. 542. nemque inde deduci posse : classem satis esse ad arcen-
A.C. 210. dum Italia regem. Hæc de se deque provincia, cui
præfuerat. Consulum de provinciis communis rela-
tio fuit : decrevere Patres, Ut alteri consulum Italia
bellumque cum Hannibale provincia esset : alter clas-
sem, cui T. Otacilius præfuisset, Sicilianque provinci-
am cum L. Cincio prætore obtineret. Exercitus eis
duo decreti, qui in Etruria Galliaque essent: eæ qua-
tuor erant legiones : urbanæ duæ superioris anni in
Etruriam ; duæ, quibus Sulpicius consul præfuisset,
in Galliam mitterentur. Galliae et legionibus præ-
esasset, quem consul, cujus Italia provincia esset, præ-
fecisset. In Etruriam C. Calpurnius, post prætu-
ram prorogato in annum imperio, missus ; et Q.
Fulvio Capua provincia decreta, prorogatumque in
annum imperium. Exercitus civium sociorumque
minui jussus, ut ex duabus legionibus una legio,
quinque millia peditum et trecenti equites essent ;
dimissis, qui plurima stipendia haberent : et socio-
rum septem millia peditum et trecenti equites relin-
quorentur, eadem ratione stipendiiorum habita in ve-
teribus militibus dimittebantur. Cn. Fulvio consuli
superioris anni, nec de provincia Apulia, nec de ex-
ereitu, quem habuerat, quidquam mutatum : tantum
in annum prorogatum imperium est. P. Sulpicius
collega ejus omnem exercitum, præter socios nava-
les, jussus dimittere est. Item ex Sicilia exercitus,
eui M. Cornelius præasset, ubi consilii in provinciam
venisset, dimitti jussus. L. Cincio prætori ad obti-
nendam Siciliam Cannenses milites dati, duarum in-
star legionum. Totidem legiones in Sardiniam P.
Manlio Vulsoni prætori decretæ, quibus L. Corne-
lius in eadem provincia priore anno præfuerat. Ur-

banas legiones ita scribere consules jussi, ne quem U.C. 542.
militem facerent, qui in exercitu M. Clandii, M. Va- A.C. 210.
lerii, Q. Fulvii, fuissent; neve eo anno plures, quam
una et viginti, Romanæ legiones essent.

XXIX. His senatusconsultis perfectis, sortiti pro-
vincias consules. Sicilia et classis Marcello, Italia Marcello
cum bello adversus Hannibalem Lævino evenit. obvenit
Quæ sors, velut iterum captis Syracusis, ita exani-
mavit Siculos, exspectatione sortis in consulum con-
spectu stantes, ut comploratio eorum flebilesque
voces et extemplo oculos hominum converterent, et
postmodo sermones præbuerint. Circumibant enim
senatum cum veste sordida, adfirmantes, *se non modo*
suam quisque patriam, sed totum Siciliam, relicturos,
si eo Marcellus iterum cum imperio redisset. Nullo
suo merito eum ante in placabilem in se fuisse: quid
iratum, quod Romam de se questum venisse Siculos
sciat, facturum? Obrui Ætnæ ignibus, aut mergi freto,
satius illi insulæ esse, quam velut dedi noxæ inimico.
Hæ Siculorum querelæ, domos primum nobilium
circumlatæ, celebratæque sermonibus, quos partim
misericordia Siculorum, partim invidia Marcelli ex-
citabat, in senatum etiam pervenerunt. Postulatum
a consulibus est, ut de permutandis provinciis sena-
tum consulerent. Marcellus, *si jam auditi ab senatu* Mutantur
Siculi essent, aliam forsitan futuram fuisse sententiam provinciæ.
suam, dicere: nunc, ne quis timore frenari eos dicere
posset, quo minus de eo libere querantur, in cuius po-
testate mox futuri sint, si collegæ nihil intersit, mutare
se provinciam paratum esse: deprecari senatus præju-
dicium; nam, quum extra sortem collegæ optionem
dari provinciæ iniquum fuerit, quanto majorem inju-
riam, immo contumeliam esse, sortem suam ad eum

U.C. 542. *transferri?* Ita senatus, quum, quid placeret, magis
 A.C. 210. ostendisset, quam decesset, dimititur: inter ipsos
 consules permutatio provinciarum, rapiente fato
 Marcellum ad Hannibalem, facta est: ut, ex quo
 primus adversæ pugnæ gloriam ceperat, in ejus lau-
 dem postremus Romanorum imperatorum, prosperis
 tum maxime bellicis rebus, caderet.

Siculorum XXX. Permutatis provinciis, Siculi, in senatum
 oratio in introducti, multa de Hieronis regis fide perpetua
 Marcel- erga populum Romanum verba fecerunt, in gra-
 lum. tiam publicam avertentes, *Hieronymum ac postea*
Hippocratem et Epicydem tyrannos, quum ob alia, tum
propter defectionem ab Romanis ad Hannibalem, invi-
sos fuisse sibi: ob eam caussam et Hieronymum a prin-
cipibus juventutis prope publico consilio interfectum: et
in Epicydis Hippocratisque cædem septuaginta nobilis-
simorum jurenum conjurationem factam; quos, Mar-
celli mora destitutos, quia ad prædictum tempus exer-
citum ad Syracusas non admovisset, indicio facto, om-
nnes ab tyrannis interfecos. Eam quoque Hippocratis
 atque Epicydis tyrannidem Marcellum excitasse, Leon-
 tinis crudeliter direptis. Numquam deinde principes
 Syracusanorum desisse ad Marcellum transire, pollice-
 rique, se urbem, quum vellet, ei tradituros: sed eum
 primo vi capere maluisse; dein, quum id neque terra,
 neque mari, omnia expertus, potuisset, auctores tradi-
 tarum Syracusarum fabrum ærarium Sosim, et Meri-
 cum Hispanum, quam principes Syracusanorum habere,
 toties id nequidquam ultro obferentes, præoptusse: quo
 scilicet justiore de caussa vetustissimos socios populi
 Romani trucidaret, ac diriperet. Si non Hieronymus
 ad Hannibalem defecisset, sed populus Syracusanus et
 senatus, si portas Marcello Syracusani publice, et non,

*obpressis Syracusanis, tyranni eorum Hippocrates et U. C. 542.
Epicydes, clausissent, si Karthaginiensium animis bel-*^{A. C. 210.}
*lum cum populo Romano gessissent; quid ultra, quam
quod fecerit, nisi ut deleret Syracusas, facere hostiliter
Marcellum potuisse? Certe præter mænia et tecta ex-
hausta urbis, et refracta ac spoliata Deūm delubra,
Diis ipsis ornamentisque eorum ablatis, nihii relictum
Syracusis esse. Bona quoque multis ademta, ita ut ne-
nudo quidem solo, reliquiis direptæ fortunæ, alere sese
ac suos possent. Orare se Patres conscriptos, ut, si ne-
queant omnia, saltem, quæ compareant cognoscique
possint, restituī dominis jubeant. Talia conquestos
quum excedere ex templo, ut de postulatis eorum
Patres censi possent, Lævinus jussisset, Maneant
immo, inquit Marcellus, ut coram his respondeam,
quando ea conditione pro vobis, Patres conscripti, bella
gerimus, ut victos armis accusatores habeamus. Duæ
captæ hoc anno urbes Capua Fulium reum, Marcel-
lum Syracusæ habeant.*

XXXI. Reductis in curiam legatis, tum consul, *Siculis re-*
*Non adeo majestatis, inquit, populi Romani imperii-
que hujus oblitus sum, Patres conscripti, ut, si de meo*
*crimine ambigeretur, consul dicturus caussam, accusan-
tibus Græcis, fuerim: sed non, quid ego fecerim, in dis-
quisitionem venit, quam quid isti pati debuerint: qui si*
*non fuerunt hostes, nihil interest, nunc, an vivo Hiero-
ne, Syracusas violaverim. Sin autem desciverunt, le-
gatos nostros ferro atque armis petierunt, urbem ac
mænia clauerunt, exercituque Karthaginiensium ad-
versus nos tutati sunt: quis passos esse hostilia, quum
fecerint, indignatur? Tradentes urbem principes Syra-
cusanorum aversatus sum: Sosim et Mericum Hispa-
num, quibus tantum crederem, potiores habui. Nor*

*spondet
Marcellus.*

U.C. 542. *estis extremi Syracusunorum, quippe qui aliis humili-*
A.C. 210. *tatem objiciatis. Quis est restrūm, qui se mihi portas aperturum, qui armatos milites meos in urbem accep- turum promiserit? Odistis et exsecramini eos, qui fece- runt, et ne hic quidem contumeliis in eos dicendis par- citis: tantum abest, ut et ipsi tale quidquam facturi fueritis. Ipsa humilitas eorum, Patres conscripti, quam isti objiciunt, maximo arguento est, me ueminem, qui navatam operam reipublicæ nostræ velit, aversatum esse. Et, antequam obsiderem Syracusas, nunc legati- tis mittendis, nunc ad colloquium eundo, tentavi pa- cem: et, postquam neque legatos violandi verecundia erat, nec mihi ipsi congresso ad portas cum principibus responsum dabatur, multis terra marique exhaustis la- boribus, tandem vi atque armis Syracusas cepi. Quæ captis acciderint, apud Hannibalem et Karthaginienses victosque justius, quam apud victoris populi senatum, quererentur. Ego, Patres conscripti, Syracusas spolia- tus si negaturus essem, numquam spoliis earum urbem Romam exornarem. Quæ autem singulis vitor aut ademi, aut dedi; quum belli jure, tum ex ejusque me- rito, satis scio me fecisse. Ea vos rata habeatis, Patres conscripti, næ magis reipublicæ interest, quam mea. Mea quippe fides exsoluta est: ad rempublicam perti- net, ne acta mea rescindendo, alios in posterum segno- res duces faciatis. Et quoniam coram et Siculorum et mea verba audistis, Patres conscripti, simul templo ex- cedemus, ut, me absente, liberius consuli senatus possit. Ita dimissis Siculis, et ipse in Capitolium ad delec- tum discessit.*

XXXII. Consul alter de postulatis Siculorum ad Patres retulit. Ibi quum diu de sententiis certatum esset, et magna pars senatus, principe ejus senten-

tiæ T. Manlio Torquato, cum tyrannis bellum gerent U. C. 542.
 dum fuisse, censerent, hostibus et Syracusanorum et A. C. 210.
populi Romani: et urbem recipi, non capi: et recep-
tam legibus antiquis et libertate stabiliri, non fessam
miseranda servitute bello adfligi. Inter tyrannorum et
ducis Romani certamina, præmium victoris in medio
positam urbem pulcherrimam ac nobilissimam periisse,
horreum atque ærarium quondam populi Romani: cu-
jus munificentia ac donis multis tempestatibus, hoc de-
nique ipso Punico bello, adjuta ornataque respublica
esset. Si ab inferis exsistat rex Hiero, fidissimus im-
perii Romani cultor, quo ore aut Syracusas, aut Ro-
mani ei ostendi posse? quum, ubi semirutam ac spolia-
tam patriam respexisset, ingrediens Romanam in vestibulo
urbis, prope in porta, spolia patriæ suæ visurus sit?
Hæc taliaque quum ad invidiam consulis miseratio-
nemque Siculorum dicerentur, mitius tamen decre-
verunt Patres caussa Marcelli: Quæ is gerens bellum
victorque egisset, rata habenda esse: in reliquum curæ
senatui fore rem Syracusanam, mandaturosque consuli
Lævino, quod sine jactura reipublicæ fieri posset, fortu-
nis ejus civitatis consuleret. Missis duobus senatori-
bus in Capitolium ad consulem, uti rediret in curi-
am, et introductis Siculis, senatusconsultum recita-
tum est: legatique, benigne adpellati ac dimissi, ad
genua se Marcelli consulis projecerunt, obsecrantes,
ut, quæ deplorandæ ac levandæ calamitatis caussa dix- Syracusæ
issent, veniam eis daret, et in fidem clientelamque se in clientela
urbemque Syracusas acciperet: post hæc consul cle-
menter adpellatos dimisit.

XXXIII. Campanis deinde senatus datus est, Campanis
 quorum oratio miserabilior, caussa durior erat: ne- datur sena-
 que enim meritas pœnas negare poterant, nec ty- tus.

U. C. 542. ranni erant, in quos culpam conferrent: sed satis
A. C. 210. pensum pœnarum, tot veneno absumtis, tot securi

percussis senatoribus, credebant. *Paucos nobilium superstites esse, quos nec sua conscientia, ut quidquam de se gravius consulerent, impulerit, nec victoris ira capitis damnaverit; eos libertatem sibi suisque, et bonorum aliquam partem orare, cives Romanos, adfinitatibus plerosque et propinquis jam cognitionibus ex conubio vetusto junctos.* Submotis deinde e templo, paullisper dubitatum, an arcessendus a Capua Q. Fulvius esset: (mortuus enim post captam Claudius consul erat) ut coram imperatore, qui res gessisset, sicut inter Marcellum Siculosque disceptatum fuerat, disceptaretur: dein, quum M. Atilium, C. Fulvium fratrem Flacci, legatos ejus, ac Q. Minucium et L. Veturium Philonem, item Claudi legatos, qui omnibus gerendis rebus adfuerant, in senatu viderent, nec Fulvium avocari a Capua, nec differri Campanos vellent; interrogatus sententiam M. Atilius Regulus, cuius ex iis, qui ad Capuam fuerant, maxima auctoritas erat; *In consilio, inquit, arbitror me fuisse consulibus, Capua capta, quum quereretur, ecquis Campanorum de republica nostra bene meritus esset; duas mulieres compertum est, Vestiam Oppiam Atellanam Capuae habitantem, et Faeculam Cluviam, quæ quondam quæstum corpore fecisset; illam quotidie sacrificasse pro salute et victoria populi Romani; hanc captivis egentibus alimenta clum subpeditasse. Ceterorum omnium Campanorum eundem erga nos animum, quem Karthaginiensium, fuisse: securique percussos a Q. Fulvio esse magis, quorum dignitas inter alios, quam quorum culpa eminebat. Per senatum agi de Campanis, qui cives Romani sunt, injussu populi non video posse:*

M. Atilii
sententia.

idque et apud majores nostros in Satricanis factum est, U. C. 542.
quum defecissent, ut M. Antistius tribunus plebis prius A. C. 210.
rogationem ferret, sciretque plebs, uti senatui de Satri-
canis sententiæ dicendæ jus esset. Itaque censeo, cum
tribunis plebis agendum esse, ut eorum unus pluresve
rogationem ferant ad plebem, qua nobis statuendi de
Campanis jus fiat. L. Atilius tribunus plebis ex au-
toritate senatus plebem in hæc verba rogavit : Om-
nnes Campani, Atellani, Calatini, Sabatini, qui se dedi-
cerunt in arbitrium ditionemque populi Romani Fulvio
proconsuli, quæque una secum dediderunt, agrum ur-
bemque, divina, humanaque, utensiliaque, sive quid
aliud dediderunt ; de iis rebus quid fieri velitis, vos
rogo, Quirites. Plebes sic jussit. Quod senatus jura-
tus, maxima pars, censeat, qui adsidetis, id volumus
jubemusque.

XXXIV. Ex hoc plebeiscito senatus consultus, *Senatus-*
Oppiæ Cluviaeque primum bona ac libertatem restituit : consultum
de Campa-
si qua alia præmia petere ab senatu vellent, venire eas nis.
Romam. Campanis in familias singulas decreta fac-
ta, quæ non operæ pretium est omnia enumerare.
Aliorum bona publicanda : ipsos liberosque eorum et
conjuges vendendas, extra filias, quæ enupsissent prius,
quam in populi Romani potestatem venirent. Alios in
vincula condendos, ac de his posterius consulendum.
Aliorum Campanorum summam etiam census dis-
tinixerunt, publicanda necne bona essent; pecua cap-
tiva, præter equos, et mancipia, præter puberes virilis
sexus, et omnia, quæ solo non continerentur, restituenda,
censuerunt, dominis. Campanos omnes, Atellanos,
Calatinos, Sabatinos, extra quam, qui eorum, aut ipsi
aut parentes eorum, apud hostes essent, liberos esse,
jusserunt, ita ut nemo eorum civis Romanus, aut La-

U. C. 542. tini nominis esset: neve quis eorum, qui Capuae fuis-
 A. C. 210. sent, dum portæ clausæ essent, in urbe agrove Campano
 intra certam diem maneret. Locus, ubi habitarent,
 trans Tiberim, qui non contingaret Tiberim, daretur:
 qui nec Capuae, nec in urbe Campana, quæ a populo
 Romano defecisset, per bellum fuisse, eos cis Lirim
 annem Romanum versus; qui ad Romanos transsissent
 prius, quam Hannibal Capuam veniret, cis Vulturnum
 emovendos, censuerunt: ne quis eorum proprius mare
 quindecim millibus passuum agrum ædificiumve habe-
 ret. Qui eorum trans Tiberim emoti essent, ne ipsi pos-
 terive eorum uspiam pararent haberentur, nisi in Ve-
 ente, aut Sutriño, Nepesinore agro: dum ne cui major,
 quam quinquaginta jugerum, agri modus esset. Sena-
 torum omnium, quique magistratus Capuae, Atellæ, Ca-
 latiae gessissent, bona venire Capuae, jussérunt: libera
 corpora, quæ venumdari placuerat, Romanam mitti, ac
 Romæ venire. Signa, statuas æneas, quæ capta de
 hostibus dicerentur, quæ eorum sacra ac profana essent,
 ad pontificum collegium rejecerunt. Ob hæc decreta
 mœstiores aliquanto, quam Romanum venerant, Cam-
 panos dimiserunt: nec jam Q. Fulvii sævitiam in
 sese, sed iniquitatem Deum atque exsecrabilem for-
 tunam suam incusabant.

Edictum
coss. de
remigibus
dandis.

XXXV. Dimissis Siculis Campanisque, delectus
 habitus: scripto deinde exercitu, de remigum sup-
 plemento agi cœptum: in quam rem quum neque
 hominum satis, nec, ex qua pararentur, stipendium-
 que acciperent, pecuniæ quidquam ea tempestate in
 publico esset, edixerunt consules, ut privati ex censu
 ordinibusque, sicut antea, remiges darent cum sti-
 pendio cibariisque dierum triginta. Ad id edictum
 tantus frenitus hominum, tanta indignatio fuit, ut

magis dux, quam materia, seditioni decesset. Secun- U.C. 542.
 dum *Siculos Campanosque plebem Romanam perden-* A.C. 210.
dam lacerandamque sibi consules sumsisse : per tot an- Querelas
nos tributo exhaustos nil reliqui, præter terram nudam
ac vastam, habere Tecta hostes incendisse, servos agri
cultores rempublicam abduxisse, nunc ad militiam par-
vo ære emendo, nunc remiges imperando. Si quid cui
argenti ærisve fuerit, stipendio remigum et tributis an-
nnis ablatum. Se, ut dent, quod non habeant, nulla
ri, nullo imperio cogi posse. Bonu sua renderent : in
corpora, quæ reliqua essent, sævirent. Ne unde redi-
mantur quidem, quidquam superesse. Hæc non in oc-
culto, sed propalam in foro atque oculis ipsorum
consulum ingens turba circumfusi fremebant : nec
eos sedare consules, nunc castigando, nunc conso-
lando, poterant. Spatium deinde his tridui se dare
ad cogitandum dixerunt : quo ipsi ad rem inspicien-
dam expediendamque usi sunt. Senatum postero die Consilia
habuerunt de remigum supplemento : ubi quum ea de re.
multa disseruissent, cur æqua plebis recusatio esset,
*verterunt orationem eo, ut dicerent, *Privatis id, seu**
æquum, seu iniquum, onus injungendum esse. Nam
unde, quum pecunia in ærario non esset, paraturos na-
vales socios ? Quomodo autem sine classibus aut Sicili-
am obtineri, aut Italia Philippum arceri posse, aut
tuta Italie litora esse ?

XXXVI. Quum in hac difficultate rerum consili-
 um hæreret, ac prope torpor quidam occupasset homi-
 num mentes, tum Lævinus consul, *Magistratus sena-* Lævini
tui, et senatum populo, sicut honore præstent, ita ad sententia.
omnia, quæ dura atque aspera essent, subeunda duces
debere esse. Si quid injungere inferiori velis, id prius
in te ac tuos si ipse juris statueris, facilius omnes obe-

U. C. 542. dientes habeas : nec impensa gravis est, quum ex ea plus
A. C. 210. quam pro virili parte sibi quemque capere principum

vident. Itaque classes habere atque ornare volumus populum Romanum ? privatos sine recusatione remiges dare ? nobismet ipsis primum imperemus. Aurum, argentum, æs signatum omne senatores crastino die in publicum conferamus : ita ut annulos sibi quisque, et conjugi, et liberis, et filio bullam, et, quibus uxor filiae sunt, singulas uncias pondo auri relinquant ; argenti, qui curuli sella sederunt, equi ornamenta et libras pondo, ut salinum patellamque Deorum caussa habere possint : ceteri senatores libram argenti tantum, æris signati quina millia in singulos patres familiæ relinquamus. Ceterum omne aurum, argentum, æs signatum, ad triumviro mensarios extemplo deferamus, nullo ante senatusconsulto facto : ut voluntaria conlatio et certamen adjurandæ reipublicæ excitet ad æmulandum animos primum equestris ordinis, dein reliquæ plebis. Hanc unam riam, multa inter nos conlocuti, consules invenimus. Ingredimini, Diis bene juvantibus. Respublica incolmis et privatas res facile salvas præstat : publica prodendo, tua nequidquam serves. In hæc tanto animo consensum est, ut gratiæ ultro consulibus agerentur : senatu inde misso, pro se quisque aurum, argentum et æs in publicum conferunt, tanto certamine injecto, ut prima inter primos nomina sua vellent in publicis tabulis esse ; ut nec triumviri accipiundo, nec scribæ referundo subficerent. Hunc consensum senatus equester ordo est secutus : equestris ordinis, plebes. Ita sine edicto, sine coercitione magistratus, nec remige in supplementum, nec stipendio respublica eguit : paratisque omnibus ad bellum, consules in provincias profecti sunt.

XXXVII. Neque aliud magis tempus belli fuit, U. C. 542.
quo Karthaginienses Romanique pariter variis ca- A. C. 210.
sibus inmixtis magis in ancipiū spe ac metu fuerint.
Nam Romanis et in provinciis, hinc in Hispania ad-
versæ res, hinc prosperæ in Sicilia, luctum et læti-
tiam miscuerant: et in Italia, quum Tarentum amis-
sum damno et dolori, tum arx cum præsidio retenta
præter spem gaudio fuit: et terrorem subitum pavo-
remque urbis Romæ obsessæ et obpugnatae Capua
post dies paucos capta in lætitiam vertit. Trans-
marinæ quoque res quadam vice pensatæ. Philip-
pus hostis tempore haud satis opportuno factus;
Ætoli novi adsciti socii, Attalusque Asiæ rex, jami
velut despondente fortuna Romanis imperium ori-
entis. Karthaginienses quoque Capuam amissam et
Tarentum captum æquabant: et, ut ad mœnia urbis
Romanæ nullo prohibente se pervenisse in gloria
ponebant, ita pigebat irriti incepti; pudebatque adeo
se spretos, ut, sedentibus ipsis ad Romana mœnia,
alia porta exercitus Romanus in Hispaniam ducere-
tur. Ipsæ quoque Hispaniæ, quo propius spem ve-
nerant, tantis duobus ducibus exercitibusque cæsis,
debellatum ibi, ac pulsos inde Romanos esse; eo
plus, ab L. Marcio tumultuario duce ad vanum et ir-
ritum victoriam redactam esse, indignationis præbe-
bant. Ita æquante fortuna, suspensa omnia utrin-
que erant, integra spe, integro metu, velut illo tem-
pore primum bellum inciperent.

XXXVIII. Hannibalem ante omnia angebat,
quod Capua, pertinacius obpugnata ab Romanis,
quam defensa ab se, multorum Italïæ populorum
animos averterat: quos neque omnes tenere præ-
sidiis, nisi vellet in multas parvasque partes carpere

U.C. 542. exercitum, quod minime tum expediebat, poterat :
 A.C. 210. nec, deductis præsidiis, spei liberam vel obnoxiam
 Hannibal timori sociorum relinquere fidem. Præceps in ava-
 vastat quæ tueri ne-
 quit. ritiam et crudelitatem animus ad spolianda, quæ tueri
 nequibat, ut vastata hosti relinquenteruntur, inclinavit.

Id fœdum consilium, quum incepto, tum etiam exitu
 fuit : neque enim indigna patientium modo abalie-
 nabantur animi, sed ceterorum etiam : quippe ad
 plures exemplum, quam calamitas, pertinebat. Nec
 consul Romanus tentandis urbibus, sicunde spes ali-
 qua se ostendisset, deerat. Salapiæ principes erant
 Dasius et Blattius : Dasius Hannibali amicus ; Blat-
 tius, quantum ex tuto poterat, rem Romanam fove-
 bat, et per occultos nuncios spem prodictionis fecerat
 Marcello ; sed sine adjutore Dasio res transigi non
 poterat. Multum ac diu cunctatus, et tum quoque
 magis inopia consilii potioris, quam spe effectus,
 Dasium adpellabat : at ille, quum ab re aversus, tum
 æmulo potentatus inimicus, rem Hannibali aperit.
 Arcessito utroque, Hannibal quum pro tribunali
 quædam ageret, mox de Blattio cognitus, starent-
 que submoto populo accusator et reus : Blattius de
 prodictione Dasium adpellabat. *Enimvero, ille, vel-*
ut in manifesta re, exclamat, sub oculis Hannibalis
secum de prodictione agi. Hannibali atque eis, qui
 aderant, quo audacior res erat, minus similis veri vi-
 sa est : *æmulationem profecto atque odium esse : et id*
crimen adferri, quod, quia testem habere non posset, li-
berius fingenti sit. Ita inde dimissi sunt : nec Blat-
 tius ante abstitit tamen tam audaci incepto, quam
 idem obtundendo, docendoque, quam ea res ipsis
 patriæque salutaris esset, pervicit, ut præsidium Pu-
 nicum (quingenti autem Numidæ erant) Salapiaque

traderetur Marcello. Nec sine cæde multa tradi potest. U.C. 542.
 tuit: longe fortissimi equitum toto Punico exercitu A.C. 210.
 erant. Itaque, quamquam improvisa res fuit, nec usus
 equorum in urbe erat, tamen, armis inter tumultum
 captis, et eruptionem tentaverunt, et, quum evadere
 nequirent, pugnantes ad ultimum obcubuerunt: nec
 plus quinquaginta ex his in potestatem hostium vivi
 venerunt: plusque aliquanto damni haec ala equitum
 amissa Hannibali, quam Salapia, fuit: nec deinde
 umquam Poenus (quo longe plurimum valuerat) equi-
 tatu superior fuit.

XXXIX. Per idem tempus, quum in arce Tarentina vix inopia tolerabilis esset, spem omnem præsidium, quod ibi erat, Romanum, præfectusque præsidii atque arcis M. Livius in commeatibus ab Sicilia missis habebant: qui ut tuto præterveherentur oram Italiæ, classis viginti ferme navium Rhegii stabat. Præerat classi commeatibusque D. Quinctius, obscurum genere ortus, ceterum multis fortibus factis gloria militari inlustris. Primo quinque naves, quarum maximæ duæ triremes a Marcello ei traditæ erant, habuit: postea rem impigre sæpe gerenti tres additæ quinqueremes: postremo ipse a sociis, Reginisque, et a Velia, et a Paestu, debitas ex födere exigendo, classem viginti navium, sicut ante dictum est, effecit. Huic ab Rhegio profectæ classi Democrates, cum pari classe navium Tarentinarum numerro, quindecim millia ferme ab urbe ad Sacriportum obvius fuit. Velis tum forte, improvidus futuri ceterum, Romanus veniebat: sed circa Crotonem Sybarimque suppleverat remigio naves, instructamque et armatam egregie pro magnitudine navium classem habebat: et tum forte sub idem fere tempus

U.C. 542. et venti vis omnis cecidit, et hostes in conspectu
A. C. 210. fuere, ut ad componenda armamenta, expediendumque
reinigem ac militem ad inminens certamen satis
temporis esset. Raro alias tantis animis justæ concurserunt classes : quippe quum in majoris discriminem
rei, quam ipsæ erant, pugnarent. Tarentini, ut, recuperata urbe ab Romanis post centesimum prope
annum, arcem etiam liberarent; spe commeatus quoque hostibus, si navali prælio possessionem maris
ademissent, interclusuros : Romani, ut, retenta possessione arcis, ostenderent, non vi aut virtute, sed
proditione ac furto, Tarentum amissum. Itaque ex utraque parte signo dato quum rostris concurrisserint,
neque retro navem inhiberent, nec dirimi ab se hostem paterentur, quam quis indeptus navem erat, ferrea injecta manu ; ita conserebant ex propinquo
pugnam, ut non missilibus tantum, sed gladiis etiam
prope coulato pede gereretur res. Proræ inter se
junctæ hærebant, puppes alieno remigio circumagebantur : ita in arto stipatae erant naves, ut vix ullum telum in mari vanum intercideret : frontibus
velut pedestris acies urgebant, perviæque naves pugnantibus erant. Insignis tamen inter ceteras pugna
fuit duarum, quæ primæ agminis concurrerant inter
se. In Romana nave ipse Quintius erat, in Tarentina Nico, cui Perconi fuit cognomen, non publico
modo, sed privato etiam odio inquisitus atque infestus
Romanis : quod ejus factionis erat, quæ Tarentum
Hannibali prodiderat. Hic Quintium, simul pugnantem hortantemque suos, incautum hasta transfigit : ille atque præceps cum armis procidit ante program : victor Tarentinus, in turbatam duce amissō
navem in pigre transgressus, quum subinovisset hos-

tes, et prora jam Tarentinorum esset, puppim male U. C. 542.
 congregati tuerentur Romani; repente et alia a puppi A. C. 210.
 triremis hostium adparuit. Ita in medio circum-
 venta Romana navis capitetur: hinc ceteris terror in-
 jectus, ut prætoriam navem captam videre; fugien-
 tesque passim, aliæ in alto mersæ, aliæ in terram
 remis abreptæ, mox prædæ fuere Thurinis Metapon-
 tinisque. Ex onerariis, quæ cum commeatu seque-
 bantur, perpaucæ in potestatem hostium venere:
 aliæ, ad incertos ventos hinc atque illinc obliqua
 transferentes vela, in altum evectæ sunt. Nequa-
 quam pari fortuna per eos dies Tarenti res gesta:
 nam ad quatuor millia hominum frumentatum egres-
 sa, quum in agris passim vagarentur; Livius, qui
 arci præsilioque Romano præcerat, intentus in om-
 nes occasiones gerendæ rei, C. Persium, in pigrum
 virum, cum duobus millibus armatorum ex arce
 emisit: qui, vage effusos per agros palatosque ador-
 tus, quum diu passim cecidisset, paucos ex multis,
 trepida fuga incidentes semiapertis portarum foribus,
 in urbem compulit, ne urbs eodem in petu caperetur.
 Ita æquatae res ad Tarentum; Romanis victoribus
 terra, Tarentinis mari: frumenti spes, quæ in oculis
 fuerat, utrosque frustrata pariter.

XL. Per idem tempus Lævinus consul, jam mag-
 na parte anni circumacta, in Siciliam, veteribus no- Res in Sici-
 visque sociis exspectatus, quum venisset, primum ac lia gestæ.
 potissimum omnium ratus, Syracusis nova pace in-
 conditas componere res. Agrigentum inde (quod
 belli reliquum erat, tenebaturque a Karthaginien-
 sium valido præsilio) duxit legiones: et adfuit for-
 tuna incepto. Hanno erat imperator Karthaginien-
 sium, sed omnem in Mutine Numidisque spem repo-

U. C. 542. sitam habebant. Per totam Siciliam vagus prædas
 A. C. 210. agebat ex sociis Romanorum · neque intercludi ab

Agrigento vi aut arte ulla, nec, quin erumperet, ubi vellet, prohiberi poterat. Hæc ejus gloria, quia jam imperatoris quoque famæ obfiebat, postremo in invidiam vertit; ut ne bene gestæ quidem res jam Hannoni propter auctorem satis lætæ essent: propter quæ postremo præfecturam ejus filio suo dedit, ratus, cum imperio auctoritatem quoque ei inter Numidas eruptum: quod longe aliter evenit. Nam veterem favorem ejus sua insuper invidia auxit: neque ille indignitatem injuriæ tulit, confestimque ad Lævinum occultos nuncios misit de tradendo Agrigen-

tum Romanis traditum. gentes ut est facta fides, compositusque rei gerendæ modus, portam ad mare ferentem Numidæ quum occupassent, pulsis inde custodibus, aut cæsis, Romanos ad id ipsum missos in urbem acceperunt.

Et quum agmine jam in media urbis ac forum magno tumultu iretur, ratus Hanno non aliud, quam tumultum ac secessionem (id quod et ante acciderat) Numidarum esse, ad comprimentam seditionem processit. Atque ille, quum ei multitudo major, quam Numidarum, procul visa, et clamor Romanus haudquaquam ignotus ad aures accidisset, prius, quam ad ictum teli veniret, capessit fugam: per aversani portam emissus, adsumto comite Epicyde, cum paucis ad mare pervenit: nactique opportune parvum na-

Sicilia de- viginum, relicta hostibus Sicilia, de qua per tot annos certatum erat, in Africam trajecerunt. Alia multi-

serta a Pœnisi. tudo Pœnorum Siculorumque, ne tentato quidem certamine, quum cæci in fugam ruerent, clausique exitus essent, circa portas cæsa. Oppido recepto Lævinus, qui capita rerum Agrigenti erant, virgis

cæsos securi percussit : ceteros prædamque vendidit : U. C. 542.
 omnem pecuniam Romam misit. Fama Agrigenti- A. C. 210.
 norum cladis Siciliam quum pervasisisset, omnia repen-
 te ad Romanos inclinaverunt. Prodita brevi sunt vi-
 ginti oppida : sex vi capta : voluntaria ditione in
 fidem venerunt ad quadraginta : quarum civitatum
 principibus quum pro cuiusque merito consul pretia
 pœnasque exsolvisset, coëgissetque Siculos, positis
 tandem armis, ad agrum colendum animos conver-
 tere, ut esset non incolarum modo alimentis frugifera
 insula, sed urbis Romæ atque Italiae (id quod multis
 sæpe tempestatibus fecerat) annonam levaret ; ab
 Agathyrna inconditam multitudinem secum in Ita-
 liam transvexit. Quatuor millia hominum erant,
 mixti ex omni conluvione exsules, obærati, capitalia
 ausi plerique ; et quum in civitatibus suis ac sub le-
 gibus vixerant, et postquam eos ex variis caussis for-
 tunam similis conglobaverat Agathyrnam, per latro-
 cinia ac rapinam tolerantes vitam : hos neque relin-
 quere Lævinus in insula, tum primum nova pace
 coalescente, velut materiam novandis rebus, satis
 tutum ratus est : et Reginis usui futuri erant ad
 populandum Bruttium agrum, adsuetam latrociniis
 quærentibus manum. Et, quod ad Siciliam adtinet,
 eo anno debellatum est.

XLI. In Hispania principio veris P. Scipio, navi- Hispaniae
 bus deductis, evocatisque edicto Tarracouem socio- res.
 rum auxiliis, classem onerariasque ostium inde Iberi
 fluminis petere jubet. Eodem legiones ex hibernis
 convenire quum jussisset : ipse cum quinque millibus
 sociorum ab Tarracone profectus ad exercitum est.
 Quo quum venisset, adloquendos maxime veteres mi-
 lites, qui tantis superfuerant cladibus, ratus, con-

U. C. 542. cione advocata, ita disseruit: *Nemo ante me novus*
 A. C. 210. *imperator militibus suis prius, quam opera eorum usus*
 Scipionis oratio ad milites. *esset, gratias agere jure ac merito potuit. Me vobis*
prius, quam provinciam aut castra viderem, obligavit
fortuna: primum, quod ea pietate erga patrem patru-
umque meum vivos mortuosque fuistis: deinde, quod
amissam tanta clade provinciae possessionem, integrum,
et populo Romano et successori mihi, virtute vestra ob-
tinuistis. Sed quum jam benignitate Deum id paremus
atque agamus, non ut ipsi maneamus in Hispania, sed
ne Pæni maneant, nec ut pro ripa Iberi stantes arcea-
mus transitu hostes, sed ut ultro transeamus, transfera-
musque bellum; vereor, ne cui vestrum majus id auda-
ciusque consilium, quam aut pro memoria cladi num-
per acceptarum, aut pro ætate mea, videatur. Ad-
versæ pugnæ in Hispania nullius in animo, quam meo,
minus obliterari possunt. Quippe cui pater et patruus:
intra triginta dierum spatium, ut aliud super aliud cu-
mularetur familiæ nostræ funus, imperfecti sunt. Sed
ut familiaris pene orbitas ac solitudo frangit animum;
ita publica quum fortuna tum virtus desperare de sum-
ma rerum prohibet. Ea fato quodam data nobis sors
est, ut magnis omnibus bellis victi vicerimus. Vetera
omitto, Porsenam, Gallos, Samnites: a Punicis bellis
incipiam. Quot classes, quot duces, quot exercitus
priore bello amissi sunt? Jam quid hoc bello memo-
rem? Omnibus aut ipse adfui cladibus: aut, quibus
adfui, maxime unus omnium eas sensi. Trebia, Trasi-
menustrum, Cannæ, quid aliud sunt, quam monumenta oc-
cisorum exercituum consulumque Romanorum? Adde
defectionem Italæ, Siciliæ majoris partis, Sardiniæ.
Adde ultimum terorem ac pavorem, castra Punica in-
ter Anienem et mania Romana posita, et visum prope

*in portis victorem Hannibalem. In hac ruina rerum U. C. 542.
stetit una integra atque inmobilis virtus populi Romani. A. C. 210.*

*Hæc omnia strata humi erexit ac sustulit. Vos omnium
primi, milites, post Cannensem cladem vadenti Has-
drubali ad Alpes Italianaque, qui si se cum fratre con-
junxisset, nullum jum nomen esset populi Romani, ductu
auspicioque patris mei obstitistis: et haec secundæ res
illas adversas sustinuerunt. Nunc, benignitate Deum,
omnia secunda, prospera, in dies lætiora ac meliora in
Italia Siciliaque geruntur. In Sicilia Syracusæ, Agri-
gentum captum, pulsi tota insula hostes, receptaque
provincia in ditione populi Romani est. In Italia Arpi
recepti, Capua capta. Iter omne ab urbe Roma trepida
fuga emensus Hannibal, in extremum angulum agri
Bruttii compulsus, nihiljam majus precatur Deos, quam
ut incolumi cedere atque abire ex hostium terra liceat.
Quid igitur minus conveniat, milites, quam, quum aliae
super alias clades cumularentur, ac Dii prope ipsi cum
Hannibale starent, vos hic cum parentibus meis (æquen-
tur enim etiam honore nominis) sustinuisse labantem for-
tunam populi Romani; nunc eosdem, quia illic omnia
secunda lætaque sunt, animis deficere? Nuper quoque
quæ acciderunt, utinam tam sine meo luctu, quam ves-
tro, transissent! Nunc Dii immortales imperii Romani
præsides, qui centuriis omnibus, ut mihi imperium ju-
berent dari, fuere auctores, iidem auguriis auspiciisque,
et per nocturnos etiam visus omnia læta ac prospera
portendunt. Animus quoque meus, maximus mihi ad
hoc tempus vates, præagit, nostram Hispaniam esse:
brevi extorre hinc omne Punicum nomen, maria terras-
que fœda fuga inpleturum. Quod mens sua sponte di-
vinat, idem subjicit ratio haud fallax. Vexati ab iis
socii nostram fidem per legatos inplorant: tres duces*

U. C. 542. *discrepantes, prope ut defecerint alii ub aliis, trifariam*
 A. C. 210. *exercitum in diversissimas regiones distraxere.* Eadem
in illos ingruit fortuna, quæ nuper nos adfixit: nam
et deseruntur ab sociis, ut prius ab Celtiberis nos: et
diduxerunt exercitus; quæ patri patruoque meo caussa
exitii fuit. Nec discordia intestina coire eos in unum
sinet, neque singuli nobis resistere poterunt. Vos mo-
do, milites, favete nomini Scipionum, soboli imperato-
rum vestrorum, velut ad cisis recrescenti stirpibus. Agite,
milites veteres, novum exercitum novumque ducem tra-
ducite Iberum, traducite in terras cum multis fortibus
factis saepe a vobis peragratas. Brevi faciam, ut, quem-
admodum nunc noscitatis in me patris patruique si-
militudinem oris vultusque, et lineamenta corporis; ita
ingenii, fidei, virtutisque exemplum expressam ad effi-
giem vobis reddam, ut revixisse, aut renatum sibi quis-
que Scipionem imperatorem dicat.

XLII. Hac oratione accensis militum animis, re-
 licto ad præsidium regionis ejus M. Silano, cum tri-
 bus millibus peditum et trecentis equitibus, ceteras
 omnes copias (erant autem viginti quinque millia
 peditum, duo millia et quingenti equites) Iberum
 trajecit. Ibi quibusdam suadentibus, ut, quoniam
 in tres tam diversas regiones discessissent Punici ex-
 exercitus, proximum adgredieretur, periculum esse ra-
 tus, ne eo facto in unum omnes contraheret, nec par-
 esset unus tot exercitibus, Karthaginem Novam in-
 terim obpugnare statuit; urbem quum ipsam opu-
 lentiam suis opibus, tum hostium omni bellico adpa-
 ratu plenam; (ibi arma, ibi pecunia, ibi totius His-
 paniæ obsides erant) sitam præterea quum oppor-
 tune ad trajiciendum in Africam, tum super portum
 satis amplum quantævis classi, et nescio an unum in

Karthago
Nova ob-
pugnata.

Hispaniae ora, qua nostro adjacet mari. Nemo om- U. C. 542.
 nium, quo iretur, sciebat, præter C. Lælium. Is, A. C. 210.
 classe circummissus, ita moderari cursum navium
 jussus erat, ut eodem tempore exercitus ostendere-
 tur, et classis portum intraret. Septimo die ab Ibero
 Karthaginem ventum est simul terra marique: cas-
 tra ab regione urbis, qua in septentrionem versa est,
 posita: his ab tergo (nam frons natura tuta erat)
 vallum objectum. Ceterum sita Karthago sic est.
 Sinus est maris media fere Hispaniae ora, maxime
 Africo vento obpositus, et quingentos passus intror-
 sus retractus, paullulo plus passuum in latitudinem
 patens: hujus in ostio sinus parva insula objecta ab
 alto portum ab omnibus ventis, præterquam Africo,
 tutum facit: ab intimo sinu peninsula excurrit, tu-
 mulus is ipse, in quo condita urbs est, ab ortu solis
 et a meridie cincta mari: ab occasu stagnum clau-
 dit, paullum et ad septentrionem fusum; incertæ al-
 titudinis, utcumque exæstuat aut deficit mare. Con-
 tinenti urbem jugum ducentos fere et quinquaginta
 passus patens conjungit: unde quum tam parvi ope-
 ris munitio esset, non objecit vallum imperator Ro-
 manus: seu fiduciam hosti superbe ostentans, sive
 ut subeundi sæpe ad mœnia urbis recursus pateret.

XLIII. Cetera, quæ munienda erant, quum per-
 fecisset, naves etiam in portu, velut maritimam quo-
 que ostentans obsidionem, instruxit: circumvectus-
 que classem, quum monuisset præfectos navium, ut
 vigilias nocturnas intenti servarent, omnia ubique
 primo obsessum hostem conari: regressus in castra,
 ut consilii sui rationem, quod ab urbe potissimum
 obpugnanda bellum orsus esset, militibus ostenderet,
 et spem potiundæ cohortando faceret, concione ad-

U. C. 542. vocata ita dissennit : *Ad urbem unam obpugnandum si
A. C. 210.*

*quis vos adductos credit, is magis operis vestri, quam
emolumenti rationem exactam, milites, habet. Obpug-
nabitis enim vere mænia unius urbis, sed in una urbe
universam ceperitis Hispaniam. Hic sunt obsides om-
nium nobilium regum populorumque : qui, simul in po-
testate vestra erunt, extemplo omnia, quæ nunc sub
Cohorta-
tur milites
Scipio. Karthaginiensibus sunt, in ditionem tradent. Hic pe-
cunia omnis hostium, sine qua neque illi gerere bellum
possunt, quippe qui mercenarios exercitus alant ; et quæ
nobis maximo usui ad conciliandos animos barbarorum
erit. Hic tormenta, arma, armamenta, et omnis ad-
paratus belli est, qui simul et vos instruet, et hostes nu-
dabit. Potiemur præterea quum pulcherrima opulen-
tissimaque urbe, tum opportunissima portu egregio, un-
de terra marique, quæ belli usus poscunt, subpedimentur :
quæ quum magna ipsi habebimus, tum demiserimus hos-
tibus multo majora. Hæc illis arx, hoc horreum, æra-
rium, armamentarium, hoc omnium rerum receptacu-
lum est. Hinc rectus in Africam cursus est : hæc una
inter Pyrenæum et Gades statio : hinc omni Hispaniæ
inminet Africa. Sed, quoniam vos instructos et ordi-
natos cognosco, ad Karthaginem novam obpugnandam
totis viribus et bono animo transeamus. Quinque om-
nes una voce, hoc faciendum, subclamarent, eos Kar-
thaginem duxit : tum terra marique eam obpugnari
jubet.*

Karthago
Nova ex-
pugnata.

XLIV. Contra Mago Pœnorum dux, quum terra
marique instrui obpugnationem videret, et ipse co-
pias ita disponit. Oppidanorum duo millia ab ea
parte, qua castra Romana erant, obponit : quingen-
tis militibus arcem insedit : quingentos tumulo urbis
in orientem verso inponit : multitudinem aliam, quo

clamor, quo subita vocasset res, intentam ad omnia U. C. 542.
obcurrere jubet. Patefacta deinde porta, eos, quos A. C. 210.
in via ferente ad castra hostium instruxerat, mittit.
Romani, duce ipso præcipiente, parum per cessere,
ut propiores subsidiis in certamine ipso submitten-
dis essent. Et primo haud in pari stetere acie : sub-
sidia deinde, idem tidem submissa e castris, non aver-
terunt solum in fugam hostes, sed adeo effusis insti-
terunt, ut, nisi receptui cecinisset, permixti fugienti-
bus in rupturi fuisse in urbem viderentur. Trepida-
tio vero non in prælio major, quam tota urbe fuit :
multæ stationes pavore atque fuga desertæ sunt, re-
lictique muri ; quum, qua cuique erat proximum,
desiluissent. Quod ubi egressus Scipio in tumulum,
quem Mercurii vocant, animadvertisit, multis partibus
nudata defensoribus mœnia esse ; omnes e castris
excitos ire ad obpugnandam urbem, et ferre scalas
jubet : ipse, trium præ se juvenum validorum scutis
obpositis, (ingens enim jam vis omnis generis telo-
rum e muris volabat) ad urbem succedit, hortatur,
imperat, quæ in rem sunt : quodque plurimum ad
accendendos militum animos intererat, testis spec-
tatorque virtutis atque ignaviæ cujusque adest. Ita-
que in vulnera ac tela ruunt ; neque illos muri, ne-
que superstantes armati arcere queunt, quin certa-
tim adscendant. Et ab navibus eodem tempore ea,
quæ mari adluitur, pars urbis obpugnari cœpta est.
Ceterum tumultus inde major, quam vis, adhiberi
poterat : dum adplicant, dum partim exponunt sca-
las militesque, dum, qua cuique proximum est, in
terram evadere properant, ipsa festinatione et cer-
tamidine alii alios impediunt.

U. C. 542. XLV. Inter hæc repleverat jam Pœnus armatis
A. C. 210. muros, et vis magna, ex ingenti copia congesta, te-
lorum subpeditabat. Sed neque viri, nec tela, nec
quidquam aliud æque, quam mœnia ipsa sese, defen-
debant: raræ enim scalæ altitudini æquari poterant:
et, quo quæque altiores, eo infirmiores erant. Ita-
que, quum summus quisque evadere non posset, sub-
irent tamen alii, onere ipso frangebantur: quidam,
stantibus scalis, quum altitudo caliginem oculis ob-
fudisset, ad terram delati sunt. Et quum passim ho-
mines scalæque ruerent, et ipso successu audacia at-
que alacritas hostium cresceret, signum receptui da-
tum est; q[uod] od spem non præsentis modo ab tanto
certamine ac labore quietis obsessis, sed etiam in
posterum dedit, scalis et corona capi urbem non
posse: opera et difficilia esse, et tempus datura, ad
ferendam opem, imperatoribus suis. Vix prior tu-
multus conticuerat, quum Scipio ab defessis jam vul-
neratisque recentes integrosque alios accipere sealas
jubet, et vi majore adgredi urbem. Ipse, ut ei nun-
ciatum est, æstum decadere, quod per piscaores Tar-
raconenses, nunc levibus cymbis, nunc, ubi eæ si-
derent, vadis pervagatos stagnum, compertum ha-
bebatur, facilem pedibus ad murum transitum dari, eo
secum armatos duxit. Medium ferme diei erat: et
ad id, quod sua sponte cedente in mare æstu trahe-
batur aqua, acer etiam Septentrio ortus inclinatum
stagnum eodem, quo æstus, ferebat, et adeo nuda-
verat vada, ut alibi umbilico tenus aqua esset, alibi
genua vix superaret. Hoc, cura ac ratione comper-
tum, in prodigium ac Deos vertens Scipio, qui ad
transitum Romanis mare verterent, et stagno aufer-

rent, viasque ante numquam initas humano vestigio U. C. 542.
aperirent, Neptunum jubebat ducem itineris sequi, A. C. 210.
ac medio stagno evadere ad mœnia.

XLVI. Ab terra ingens labor succendentibus erat :
nec altitudine tantum mœnium impediebantur, sed
quod euntes ad ancipes utrumque ictus subjectos
habebant Romanos ; ut latera infestiora subeunti-
bus, quam adversa corpora, essent. At parte in alia
quingentis et per stagnum facilis transitus, et in
murum adscensus inde fuit : nam neque opere emu-
nitus erat, ut ubi ipsius loci ac stagni præsidio satis
creditum foret ; nec ulla armatorum statio aut cus-
todia obposita, intentis omnibus ad opem eo ferendam,
unde periculum ostendebatur. Ubi urbem sine
certamine intravere, pergunt inde, quanto maximo
cursu poterant, ad eam portam, circa quam omne
contractum certamen erat, in quod adeo intenti om-
nium non animi solum fuere, sed etiam oculi aures-
que pugnantium spectantiumque et adhortantium
pugnantes, ut nemo ante ab tergo senserit captam
urbem, quam tela in aversos inciderunt, et utrumque
ancipitem hostem habebant : tunc, turbatis defen-
soribus metu, et mœnia capta, et porta intus foris-
que pariter refringi cœpta : et mox cædendo con-
tractis, ne iter impeditetur, foribus, armati inpetum
fecerunt. Magna multitudo et muros transcendebat,
sed hi passim ad cædem oppidanorum versi : il-
la, quæ portam ingressa erat, justa acies, cum du-
cibus, cum ordinibus, media urbe in forum processit.
Inde quum duobus itineribus fugientes videret hos-
tes, alios ad tumulum in orientem versum, qui tene-
batur quingentorum militum præsidio, alios in ar-
cem, in quam et ipse Mago cum omnibus fere arma-

U. C. 542. tis, qui muris pulsi fuerant, refugerat; partim co-
 A. C. 210. piarum ad tumulū expugnandum mittit, partim ipse
 ad arem dicit: et tumulus primo in petu est captus,
 et Mago, arem conatus defendere, quum omnia hos-
 tium plena videret, neque spem ullam esse, se ar-
 cemque et præsidium dedidit. Quoad dedita arx
 est, cædes tota urbe passim factæ; nec ulli pube-
 rum, qui obvius fuit, parcebatur: tum, signo dato,
 cædibus finis factus: ad prædam victores versi, quæ
 ingens omnis generis fuit.

*Præda in-
gens.* XLVII. Liberorum capitum virile secus ad de-
 cem millia capta: inde, qui cives Novæ Karthaginis
 erant, dimisit: urbemque et sua omnia, quæ reliqua
 eis bellum fecerat, restituit. Opifices ad duo millia
 hominum erant; eos publicos fore populi Romani
 edixit, cum spe propinqua libertatis, si ad ministeria
 belli enise operam navassent. Ceteram multitudi-
 nem incolarum juvenum, ac validorum servorum, in
 classem ad supplementum remigum dedit: et aux-
 erat navibus octo captivis classem. Extra hanc mul-
 titudinem Hispanorum obsides erant: quorum per-
 inde, ac si sociorum liberi essent, cura habita. Cap-
 tus et adparatus ingens belli; catapultæ maximæ
 formæ centum viginti, minores ducentæ octoginta
 et una: ballistæ majores viginti tres, minores quin-
 quaginta duæ: scorpionum majorum minorumque,
 et armorum telorumque, ingens numerus: signa mi-
 litaria septuaginta quatuor. Et auri argentiqne re-
 lata ad imperatorem magna vis: pateræ aureæ fue-
 runt duecentæ septuaginta sex, libras ferme omnes
 pondo: argenti facti signatique decem et octo millia
 et trecenta pondo: vasorum argenteorum magnus
 numerus. Hæc omnia C. Flaminio quæstori ad-

pensa adnumerataque sunt : tritici quadraginta millia U. C. 542.. modiūm, hordei ducenta septuaginta. Naves one- A. C. 210.. rariæ sexaginta tres in portu expugnatæ captæque : quædam cum suis oneribus, frumento, armis, ære præterea, ferroque, et linteis, et sparto, et navalii alia materia ad classem ædificandam : ut minimum omnium, inter tantas opes belli captas, Karthago ipsa fuerit.

XLVIII. Eo die Scipio, C. Lælio cum sociis navalibus urbem custodire jusso, ipse in castra legiones reduxit : fessosque milites omnibus uno die belli operibus (quippe qui et acie dimicassent, et capienda urbe tantum laboris periculique adissent, et capta, cum iis, qui in arcem confugerant, iniquo etiam loco pugnassent) curare corpora jussit. Postero die, militibus navalibusque sociis convocatis, primum Diis immortalibus laudesque et grates egit, qui se non urbis solum opulentissimæ omnium in Hispania uno die compotem fecissent, sed ante eo congesissent omnis pene Africæ atque Hispaniæ opes : ut neque hostibus quidquam relinqueretur, et sibi ac suis omnia superessent. Militum deinde virtutem conlandavit, quod eos non eruptio hostium, non altitudo mœniuum, non inexplorata stagui vada, non castellum in alto tumulo situm, non munitissima arx deterruisset, quo minus transcenderent omnia perrumperentque. Itaque, quamquam omnibus omnia deberet, præcipuum muralis coronæ decus ejus esse, qui primus murum adscendisset : profiteretur, qui se dignum eo duceret dono. Duo professi sunt : Q. Certamen Trebellius centurio legionis quartæ, et Sex. Digi- ^{de murali corona.} tius socius navalis : nec ipsi tam inter se acriter contendebant, quam studia excitaverant uterque sui

U. C. 542. corporis hominum. Sociis C. Lælius præfectus clas-
A. C. 210. sis; legionariis M. Sempronius Tuditanus aderat.

Ea contentio quum prope seditionem veniret, Scipio tres recuperatores quumi se daturum pronunciasset, qui, cognita caussa testibusque auditis, judicarent, inter prior in oppidum transcendisset; C. Lælio et M. Sempronio advoeatis partis utriusque P. Cornelium Caudinum de medio adjecit; eosque tres recuperatores considere, et caussam cognoscere jussit. Quum res eo majore ageretur certamine, quod amotiantæ dignitatis non tam advocati, quam moderatores studiorum fuerant; C. Lælius, relicto consilio, ad tribunal ad Scipionem accedit, cumque docet, *rem sine modo ac modestia agi: ac prope esse, ut manus inter se conserant.* Ceterum, etiamsi vis absit, nihilominus detestabili exemplo *rem agi;* quippe ubi *fraude ac perjurio decus petatur virtutis.* Stare hinc legionarios milites, hinc *classicos,* per omnes Deos paratos jurare, magis quæ velint, quam quæ sciant, vera esse, et obstringere perjurio non se solum suumque caput, sed signa militaria, et aquilas, sacramentique religionem. Hæc se ad eum de sententia P. Cornelii et M. Sempronii deferre. Scipio, conlantato Lælio, ad concionem advocavit, pronunciavitque, *Se satis compertum habere, Q. Trebellium et Sex. Digitum pariter in murum escendisse: seque eos ambos, virtutis caussa, coronis muralibus donare.* Tum reliquos, prout cuique meritum virtusque erat, donavit: ante omnes C. Lælium præfectum classis et omni genere laudis sibimet ipse æquavit, et corona aurea ac triginta bubus donavit.

XLIX. Tum obsides civitatum Hispaniæ vocari jussit: quorum quantus numerus fuerit, piget scri-

bere, quippe quum alibi trecentos ferme, alibi sep- U. C. 542.
 tingentos viginti quinque fuisse inveniam. *Æque et A. C. 210.*
 alia inter auctores discrepant. Præsidium Punicum
 alius decem, alius septem, alius haud plus quam
 duūm millium fuisse scribit. Capta alibi decem
 millia capitum, alibi supra quinque et viginti inve-
 nias. Scorpiones majores minoresque ad sexaginta
 captos scripserim, si auctorem Græcum sequar Sile-
 num: si Valerium Antiatem, majorum scorpionum
 sex millia, minorum tredecim: adeo nullus menti-
 endi modus est. Ne de ducibus quidem convenit:
 plerique Lælium præfuisse classi; sunt, qui M. Ju-
 nium Silanum dicant. Arinem præfuisse Punico
 præsilio, deditumque Romanis, Antias Valerius;
 Magonem alii scriptores tradunt. Non de numero
 navium captarum, non de pondere auri atque argenti,
 et redactæ pecuniæ, convenit. Si aliquibus adsen-
 tiri necesse est, media simillima veris sunt. Cete-
 rum Scipio, vocatis obsidibus, primum universos bo-
 num animum habere jussit. *Venissem eos in populi Ro-* Scipionis
mani potestatem, qui beneficio, quam metu, obligare in obsides
homines malit; exterisque gentes fide ac societate junc- humani-
tas habere, quam tristi subjectas servitio. Deinde, ac-
 ceptis nominibus civitatum, recensuit captivos, quot
 cujusque populi essent: et nuncios domum misit, ut
 ad suos quisque recipiendos veniret. Si quarum
 forte civitatum legati aderant, eis præsentibus suos
 restituit: ceterorum curam benigne tuendorum C.
 Flaminio quæstori adtribuit. Inter hæc e media
 turba obsidum mulier magno natu, Mandonii uxor,
 qui frater Indibilis Ilergetum reguli erat, flens ad
 pedes imperatoris procubuit, obtestarique cœpit, ut
 curam cultumque feminarum impensis custodibus

U. C. 542. commendaret: quum Scipio, *nihil profecto defuturum*, diceret; tum rursus mulier, *Haud magni ist facimus*, inquit: *quid enim huic fortunæ non satis est*. **A. C. 210.** *Alia me cura, ætatem harum intuentem, (nam ipsa iam extra periculum injuriæ muliebris sum) stimulat.* Æstat et forma florentes circa erant Indibilis filiae, aliæque nobilitate pari, quæ omnes eam pro parente colebant. Tum Scipio, *Meæ populique Romani disciplin caussa facerem*, inquit, *ne quid, quod sanctum usquam esset, apud nos violaretur: nunc, ut id curem imperius, vestra quoque virtus dignitasque facit: quæ ne imalis quidem oblitæ decoris matronalis estis.* Spectatæ deinde integratatis viro tradidit eas, tuerique hau secus verecunde ac modeste, quam hospitum conjuges ac matres, jussit.

Sponsa
Allucii
pudice
servata.

Oratio ad
eum Scipionis.

L. Captiva deinde a militibus adducitur ad eum adulta virgo, adeo eximia forma, ut quacumque incedebat, converteret omnium oculos. Scipio, per cunctatus patriam parentesque, inter cetera accepit desponsam eam principi Celtiberorum adolescenti Allucio nomen erat. Extemplo igitur parentibus sponsoque ab domo adiutis, quum interim audiret deperire eum sponsæ amore, ubi primum venit, ad curatiore eum sermone, quam parentes, adloquitu*Juvenis*, inquit, *juvenem adpello, quo minor sit internos hujus sermonis verecundia.* Ego, quum sponsa tu*capta a militibus nostris ad me ducta esset, audiremque eam tibi cordi esse, et forma faceret fidem, quia ipse si frui liceret ludo ætatis, (præsertim recto et legitim amore) et non respublica animum nostrum occupasset veniam mihi dari sponsam impensius amanti vellem tuo, cuius possum, amori faveo.* Fuit sponsa tua apud me eadem, qua apud sacerdos tuos parentesque suos, ve

*recundia; servata tibi est, ut inviolatum et dignum me U. C. 542.
teque dari tibi donum posset. Hanc mercedem unam A. C. 210.
pro eo munere paciscor: amicus populo Romano sis:
et, si me virum bonum credis esse, quales patrem pa-
truumque meū jam ante hæ gentes norant, scias mul-
tos nostri similes in civitate Romana esse; nec ullum
in terris populum hodie dici posse, quem minus tibi hos-
tem tuisque esse velis, aut amicum malis. Adolescens,
simul pudore et gaudio perfusus, dextram Scipionis
tenens, Deos omnes invocare ad gratiam illi pro se
referendam, quoniam sibi nequaquam satis faculta-
tis, pro suo animo atque illius erga se merito, esset.
Parentes inde cognatiq[ue] virginis adpellati: qui,
quoniam gratis sibi redderetur virgo, ad quam redi-
mendam satis magnum adtulissent auri pondus, ora-
re Scipionem, ut id ab se donum acciperet, cœpe-
runt: haud minorem ejus rei apud se gratiam futu-
ram esse, adfirmantes, quam redditæ inviolatæ foret
virginis. Scipio, quando tanto opere peterent, ac-
cepturum se pollicitus, poni ante pedes jussit: vo-
catoque ad se Allucio, *Super dotem*, inquit, *quam ac-
cepturus a socero es, hæc tibi a me dotalia dona acce-
dent*: aurumque tollere, ac sibi habere jussit. His
lætus donis honoribusque dimissus domum, inplevit
populares laudibus meritis Scipionis: *Venisce Diis
simillimum juvenem, vincentem omnia, quum armis,
tum benignitate ac beneficiis*. Itaque, delectu clien-
tium habito, cum delectis mille et quadringentis equi-
tibus intra paucos dies ad Scipionem revertit.*

LI. Scipio retentum secum Lælium, dum capti-
vos obsidesque et prædam ex consilio ejus dispo-
neret, satis omnibus compositis, data quinquereme,
captivisque Magone et quindecim fere senatoribus,

U.C. 542. qui simul cum eo capti erant, in navem inpositis,
 A.C. 210. nuncium victoriae Romam mittit: ipse paucos dies, quibus morari Karthagine statuerat, exercendis navalibus pedestribusque copiis absumsit. Primo die legiones in armis quatuor millium spatio decurrent: secundo die arma curare et tergere ante tentoria jussit: tertio die rudibus inter se in modum justæ pugnæ concurrerunt, præpilatisque missilibus jaculati sunt: quarto die quies data: quinto iterum in armis decursum est. Hunc ordinem laboris quietisque, quoad Karthagine morati sunt, servarunt. Remigium classicique milites, tranquillo in altum evecti, agilitatem navium simulacris navalis pugnæ experiebantur. Hæc extra urbem terra marique corpora simul animosque ad bellum acuebant: urbs ipsa strepebat adparatu belli, fabris omnium generum in publica officina inclusis: dux cuncta pari cura obibat: nunc in classe ac navalii erat; nunc cum legionibus decurrebat; nunc operibus adspiciendis tempus dabat, quæque in officinis, quæque in armamentario ac navalibus fabrorum multitudo plurima in singulos dies certamine ingenti faciebat. His ita inchoatis, refectisque, qua quassi erant, muris, dispositisque præsidiis ad custodiam urbis, Tarragonem est profectus, a multis legationibus protinus in via aditus: quas partim dato responso ex itinere dimisit, partim distulit Tarragonem, quo omnibus novis veteribusque sociis edixerat conventum. Et cuncti fere, qui cis Iberum incolunt, populi, multi etiam ulterioris provinciæ convenerunt. Karthaginiensium duces primo ex industria famam captæ Karthaginis compresserunt: deinde, ut clarior res erat, quam ut tegi ac dissimulari posset, elevabant verbis. Neco-

It Tarra-
conem.


pinato adventu ac prope furto unius dici urbem unam U. C. 542.


A. C. 210.


Hispaniæ interceptam: cuius rei tam parvæ præmio elatum insolentem juvenem, inmodico gaudio speciem magnæ victoræ inposuisse. At, ubi adpropinquare tres duces, tres victores hostium exercitus audisset, obcursum ei extemplo domesticorum funerum memoriam. Hæc in vulgus jactabant, haudquaquam ipsi ignari, quantum sibi ad omnia virium, Karthagine amissa, decessisset.

FINIS TOM. II.









PA
6452
A2
1800
t.2

Livius, Titus
Historiarum quae
supersunt

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

